

SAUNOAGA FAA-TAUPOU
SUI USUFONO O LE PALEMENE XV
2011-2016

20 IUNI 2011

Susuga PAPALII LIO FAAVAIVAIOMANU TAEU MASEPAU (Faasaleleaga Nu.2): Lau Afioga i le Fofoga Fetalai faapea le paia o le Maota, e muamua ona ou faatulou atu i le paia o le Palemene, i le afio o lau Afioga i le Fofoga Fetalai. Afio lau Afioga i le Palemia faapea lau Afioga i le Sui Palemia ma le Kapeneta. Afio le Taitai o le Itu Agai faapea le Sui Taitai. Afifio sui usufono mamalu uma o le Maota, o outou paia ma o outou mamalu, a lea ua titi tonoa i le Maota o Samoa i Tiafau nei. O lo tatou valaauina, a lea na faia mai i le fuifui lo outou paia ma lo outou mamalu, aisea? Ia manuia Samoa mo a taeao.

E faatalofa atu foi i lau Afioga i le Failautusi faapea le Ofisa o le Fono Aoaofa Faitulafono aemaise foi o Ofisa Sili o Pulega ma Faalapotopotoga Tumaoti a le Malo.

Ou te faatulou atu aua le tapuaiga a Lana Afioga Mamalu O Le Ao o le Malo faapea le Masiofo. Le Sui o le Fono a Sui Tofia faapea le Masiofo. Lau Afioga i le Faamasino Sili faapea Alii ma Tamaitai Faamasino ma le mamalu o le vasega o Faamasinoga. O paia ia ma mamalua aua le tafatolu o le tatou faigamalo.

Ou te faatulou atu aua paia faale-Atunuu, le paia aua Tama ma o latou Aiga, o Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te faatulou atu foi aua le tapuaiga a nai o tatou uso i le Motu i Sasae aua le paia o Sua ma Vaifanua, Saole ma le Launiunasa lua, Ituau ma Faatuiotemotu, Fofu ma Aitulagi, Faatui ma Tootoo o le Faleula ma upu i le Manuatele.

Ou te faatulou atu foi aua Faauluuluga o Ekalesia Kerisiano uma i totonu o le Atunuu aemaise le nofo a faa-Feagaiga i soo se fata faitaulauga i lea afioaga ma lea afioaga, o e o loo ee faafale-lemalu aua le Atua ma lona finagalo. O le Atua o Malo o loo ua tatou aeae ai nei e Faleseu ma tatou saa i Maa o Malie, o lea ua maua ai lo tatou saolotoga ma maua ai le Faavae o lo tatou Malo Tutoatasi o Samoa.

Ae avea lenei taimi ou te faatulou atu ai i le tapuaiga a lou Itumalo pele o Faasaleleaga Nu. 2, le paia aua Leilua ma le Toalima, le Afio o Sa Alaalatoa faapea le Matua ia Alaalatoa, Susu Alo o Malietoa, Maliu mai Tuilagi ma Namulauulu faapea le na ai Malae i lau Fetalaiaga Fauolo, le mamalu o le Maopu Tufuga ma le Lauti-na-laulelei ia te oe Safotulafai. O oe lava Safotulafai o le Pule, o loo tausii vaatele i Fuifatu o le Malae o le Faautugatagi aua Tootoo au o le Faasaleleaga. O le Malae e toa i ai le usuga ia Pule, o le Malae e toa i ai Umaga ma le sue Malo o Tumua, ete tau i lau Tagaloatea o loo afiafi ai upu o Samoa.

Ou te faatulou atu foi aua le Susu o Malietoa i lou tala na atoa ma lou fala na folaloe faafofoga ia te Oe Samoa. Susu Tooa o le Sao-na-lua, Susu Aiga o Sa Malietoa faapea le Alaalafaga o Usoalii, Seiuli ma Tuilaepa o ou Ituvai taitasi o le Malietoa, alaalatai le Matua ia Mago faapea oulua na Ailaoa ma le mamalu ia te oe le Itu o le Nofolii faapea le mamalu ia te oe le Faiga.

Ou te faatulou atu foi aua le faafofoga tapuai a le nofo a Faafegaiga i totonu o lo tatou Itumalo, aua o a outou talosaga ma faamanuiaga e manuia ai lo outou sui usufono.

Ou te faatulou atu foi aua le paia i Mafutaga a Tina faapea saoa ma sao tamaitai aemaise o le malosi o le tatou Itumalo. Ou te talitonu e le lanu pe nanea i sa matou faamatalaga la outou faaaloalo mauuluga, talofa, ailoga a tua ma ni a lenei faaaloalo. O lau tatalo ia alofa le Atua ma tau i soo se auala lo outou agalelei faaalua e ala i la outou faiga filifiliga saoloto ma le amiotonu, lea ua outou filifilia ai la outou sui usufono e avea ma sui usufono o le Palemene o le Malo o Samoa. Tapuai maia ma le manuia.

Lau Afioga i le Fofoga Fetalai, o le Matua o le Lauga; lau Afioga i le Palemia faapea le mamalu o le Kapeneta ma lena Itu o le Vaega Faaupufai, tatou galulue faatasi. E malie ia te au le saunoaga a le Afioga i le Palemia i le taimi na tofia ma faatauto ai Afioga i Minisita. Na ia saunoa ai, "A i ai ni mea tou te faafofoga mai e logo lelei ma manuia ai Samoa e le tau agaia na mea, o le agaga tonu lava lena lau Afioga i le Fofoga Fetalai, afai matou te maua o mea e faatau manuia ai le Atunuu e tuu i fea la matou lagolago, matou te lagolago atu. Afai foi matou te manatu e matagitogaina la tatou folauga, matou te faufautua atu, ioe, pe pao papa sa matou faufautua pe tuuaia foi i matou ua matou faitio, lau Afioga i le Fofoga Fetalai, matou te fautua ma faitio, ae le lagomia ai le finagalo o le Malo pe a faapea ua matou faitio ma fautua, leaga

o lo matou tiute lea lau Afioga i le Fofoga Fetalai ma le paia o le Maota. Matou te tuu a lalo, o aga ia faa-Kerisiano, ou te talitonu afai e manuia Samoa i Tulafono tatou te fausia i totonu iinei o tatou uma lava lena, ae a afatia lo tatou Sa tatou te piiama faatasi lava matou te le o ese.

O le tofa poto lea a le Atua na ia faatonuina ai Mose e tofofi nisi Faamasino e fesoasoani ia te oe e faamasinoina lou nuu, aisea? Ina ia taunuu lava i le taunuuga o le nuu ua uma ona folafolaina. Lau Afioga i le Fofoga Fetalai o le agaga lena, e tatau foi ona i ai nisi e sole atu ma suga atu aisea, leaga o le Sa o Samoa e fau tele. E ui lava ina ololoo pito vaa ae tasi lava lona taunuuga ma mo tatou faamoemoe maualuga ia lalago faatasi a tatou foe ina ia sao ma uli le Sa o Samoa ma maua se manuia o le Atunuu mo a taeao.

Lau Afioga i le Fofoga Fetalai, ae ou te lei oo i le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012, ou te iloa o le avanoa lea e ao ona avatu muamua nai motuga afa a lou Itumalo. Ou te talitonu e leai lava ma se afaina o le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 lenei i nai motuga-afa a lou Itumalo, e le afaina ai foi a tatou tupe. Ua na o se talosaga e avatu leaga o le amataga lenei o le Paeaiga e ao foi ona avatu i lumamea e silasila i ai lena Itu o le Malo aua lenei Itumalo.

Lau Afioga i le Minisita mo Faiga Palota, ua maua ua tofia foi le Komisi Suesue e suesueina le tatou Faiga Palota na sei mavae atu nei. Malo faafetai i le tofa ua ae i le Kapeneta, atonu o se auala lelei lea e toe faaleleia ai ni mea sa faaletonu i le tatou Faiga Palota aemaise foi sei toe silasila ona ua fai foi sina mamafa o nai faasalaga pe a. O le mafaufau lava ona upu lava a le Atunuu; “E au i le tauola, e au foi i le fagota” O latou nei ao tatou taeao. E faapena se agaga ma le vaavaai mamao faapena.

Ona ou oo mai ai lea i le mataupu o loo tau avatu i luma o lau Afioga i le Minisita o Faiga Palota, o lenei Mataupu e popoe ma lilia ina nei naunau ta foi se taofi ae avea ma lape o se isi i totonu o le Maota ma le faafofogaaga a Samoa. Ae ui o lea e punapuna ae pea se lagona ae ao lava ona avatu i le Maota. E talosagaina lau Afioga i le Minisita o Faiga Palota, sei silasila ane i se tofi sui usufono mo Sapapalii, ua mafua lau Afioga ona sa faitiaina foi e isi Komisi Suesue ua mavae ua tatau ona i ai se sui o Sapapalii. Ae ui o lea o lenei avanoa lau Afioga i le Minisita, a tuu atu lava le aofai o tagata palota e talafeagai, a tuu mai foi i mafuaaga faale-aganuu, lau Afioga i le Fofoga Fetalai ma le mamalu o le Maota, ou te le taua aua o loo silafia e le Maota ma silafia e Samoa ae na ona ou toe faamanatu atu lava, o Mataniu Feagai ma le Ata na tatala ai le Avei mai le Lagi, a le Uluai Taeao o le Talalelei. O Mataniu Feagai ma le Ata foi na ifo ai le Tafai fa o le Atunuu ma malele ai Malietoa Vainuupo, o paia ma mamalu faale-Atunuu o le a ta faatasi ia Iesu Keriso ma le Talalelei, a lo ta Faavae papa lea tatou te aeae ai nei, Faavae i le Atua, o lana aganuu faapea ma le tu faa-Kerisiano. O le talosaga lea i lau Afioga i le Minisita o Faiga Palota.

Ona ou oo mai ai lea i le Minisita o le Faalapotopotoga o Eleele a le tatou Malo i lau Afioga i le Palemia, masalo o se taimi ona oo atu lea ma faatalosaga atu foi i lau Afioga le tulaga o eleele i gauta o Safotulafai ma Sapapalii, o se taimi ona ou oo atu lea i lau Afioga i le Palemia.

Ona ou oo mai ai lea i lau Afioga i le Minisita mo Aoga, Taaloga ma Aganuu, faafetai ua uma ona feiloai atu i lau Afioga ma ua sauni le faleaoga o Sapapali, faafetai ma faamalo le tofa, ua i ai mea uma ua toe lava ina faatino. E pei foi ona ou talosaga atu toe lava o Safotulafai, e na o le lua faleaoga o lou Itumalo. O Safotulafai e toatele alo ma fanau o le atunuu mai lava i Tuasivi seia oo mai i Vaimaga o loo faapena ona toatele ai alo ma fanau. O le tatalo i lau Afioga e pei foi ona e saunoa mai o le a fai mea, o le mea sili o loo faafofoga mai Safotulafai o le a aumai le lagolago a le Afioga i le Minisita o Aoga, Taaloga ma Aganuu faapea le Matagaluega i le tatou talosaga.

Ona ou oo mai ai lea i le Afioga i le Minisita o Galuega, Felauaiga ma Atinae Tetele, faafetai mo le polokalame o auala galue ua amanaia ai auala galue i lou Itumalo. Faafetai foi i le Paeaiga talu ai ua matagofie ma lelei auala o lou Itumalo ae toe fa nai auala o lou Itumalo; ua toe o Fuaifatu, Eveeve, Aeuli ma Vaitolo. O le taua o le lagona e manaia le agaga o le faafoeina o lenei polokalame ona ua taua o loo ua fuafua mo Tsunami. Ia te au lava ia o le ala foi lea o le toe talosaga atu i lau Afioga i le Minisita, o auala nei e pei ona ou taua o le toatele o tama ma tina matutua o loo nonofo ai, ae ou te manatu a maea ona fausia nei auala o le a faigofie ai ona faataavale ane le wheelchair a le toeaina ma le olomatua e agai i uta, e pei o le uiga lena o le talosaga.

Ona ou ou mai lea i le auala laupapa i le tuaoi o Sapapalii ma Lalomalava, e pei ona silafia masalo o lenei auala laupapa ua leva ona i ai i le polokalame o auala, o le talosaga ona o loo fai ma motu ai a tatou feoaiga leaga a pa le tafe vaeatu le faafofogaaga a le Maota ma le Atunuu, e salalau solo i luga o le auala ma oo atu i tai ma afaina ai le siosiomaga ma le togatogo faatasi ai ma eleele o Avalua, o le tasi lena o eleele ua tafia uma i le vaitafe lenei. O le ala lena o le talosaga ina ia alofagia lenei auala laupapa. E pei ona taua lenei auala laupapa ona sa faapena talu ai i le Paeaiga a le Afioga i le Minisita lea ua avea ma Minisita o Tupe, sa le toe faaaogaina lo matou fanua iina ona o le fuafuaina o lenei auala ae faafetai o lea ua avatu le talosaga i lau Afioga.

Ona ou oo mai ai lea i le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012, faafetai i lau Afioga i le Palemia mo le tolaulauina o le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 faapea ona faafetai atu i lau Afioga i le Minisita o Tupe aemaise o le Matagaluega mo le tapenaina o lenei galuega tele, malo faafetai.

O le agaga fiafia ia te au i lenei Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012, e manaia le faatinoina o le Tala o Tupe o lenei tausaga o lea ua taunuu le faiga o Sector ma ua taatia mai ma agai le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 i auala faataatitia ma taiala aua le faatinoina o galuega faapea foi ma le taunuuga lelei (outcome). E manaia lena, o lau lu'i i le Matagaluega – o lona uiga e tatau lava ona faataunuu lelei mea uma o lenei Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 ina ia taunuu i lona taunuuga lelei, o lau lena tilotilo i le aotelega o le Tala o le Tupe. Ona ou oo mai lea ia tatou tupe faa-alu, o lau fautuaga i le Matagaluega afai ua faatino tupe a le tatou Malo, o lau fautuaga ia atagia i le faatinoga ma le faaaogaina o seleni, o loo lelei tautua le Atunuu leaga o tupe a le Atunuu ma atagia ai le tautua lelei o le tatou Atunuu.

Ona ou oo mai ai lea i taavale ma penisini, ou te iloa e le fou i le Kapeneta lenei mea ua lotea soo ona o le naunau ina ia faaitiitia a tatou tupe alu. O lau fautuaga, e manaia ae hire mai taavale i tua e faaaoga ai le mau taavale a nai tagata ua ou vaai ua tele naua. O le uiga o lena tulaga ina ia faasoa atu le tamaoaiga i nai nei tagata e utu ai a latou taavale. Ou te talitonu ina ia faaitiitia a tatou taavale ae faapena se agaga e aoga e faasoa atu ai le tamaoaiga i nai o tatou tagata ma fesoasoani ai ia i latou.

Ona ou oo mai ai lea i Reforms, faafetai i Reforms lea sa faatino e le PSC, ua tele tupe ua faasaoina ona o le tele o nisi o Matagaluega ua tuufaatasi. O lau fautuaga e lelei lava ona silasila totoa pea i ai, e taua Reforms i le tuufaatasiga o Matagaluega ma nisi Matagaluega laiti ae le aofia ai Matagaluega tetele, o le taua ina ia faaitiitia ai tupe aua o le tele lava o tupe o totogi o tagata faigaluega aemaise lava le level o CEOs ma agai ai i luga, o le mea lena ina ia silasila ai faapena mo sa matou fautuaga.

Lau Afioga i le Minisita o Tupe, ua ou vaavaai e tusa o le lauga i le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012, o loo i ai le faaupuga faapea o le a siitia le 4% o tupe o le 2011/2012 ona o le faaupuga lea e i ai o le vaegatupe faaopoopo mo polokalame o le Penisione mo Tagata Matutua. Ou te talitonu poo se siitaga lea mo nai tama ma tina matutua, ou te talitonu e taua lea tulaga.

Faafetai mo le polokalame faamalositi tino, ou te iloa a alu atu loa ma le tului lea o le latou penisione ua matua ova le fiafia o nai tama ma tina matutua. E pei ona taua o le au tatalo lea e manuia ai o tatou faiva, o loo faapena ona nofo tapuai ma tatalo mai mo tatou aemaise o le tele o aiga o loo faalagolago i nai tama ma tina matutua ma faapea o tupe o lea e avatu fua i le Malo. O le uiga lava lea o lo tatou tiute o le faasoa ma fesoasoani ma nai o tatou tagata.

Ona ou oo mai lea i tupe maua, faafetai i le Afioga i le Minisita o Faatoaga, Faigafaiva ma le Faleoloa o Faatoaga. A tatou mafaufau i le upu foi lea o le faatoaga o le ivitu lea o le tatou tamaoaiga, ae a ou vaai i tupe o loo aoina mai i le Matagaluega o Faatoaga, Faigafaiva ma le Faleoloa o Faatoaga e pei e le tele se tupe. A mafatia le Matagaluega o Tupe Maua ma le Matagaluega o Tupe e tau aoina a tatou seleni, ae aoga foi lo tatou fesoasoani ai aua ou te talitonu o le \$12.4miliona lea mo le Matagaluega o Faatoaga, Faigafaiva ma le Faleoloa o Faatoaga, o le tele o lenei tupe e alu i totogi o tagata faigaluega. O le uiga o se taofi ana ave lava se \$50miliona a le Matagaluega o Faatoaga, Faigafaiva ma le Faleoloa o Faatoaga, e taua lena e

uunai ai le aufaifaatoaga ma faasoa ai foi lona tamaoiga i nai o tataou tagata. E pei ona silafia masalo poo o le 80% o o tatou tagata e faalagolago i faatoaga sub-assistance a le agriculture, ou te iloa o le 80% lona o sui o le atunuu. Ou te manatu o le mea sili o lea ua tulai mai o oe o le Tama matua i lau Afioga i le Minisita mo Faatoaga, Faigafaiva ma le Faleoloa o Faatoaga, o le agaga lona. Ou te iloa a tatou le toe mimilo lava i faatoaga e le faasaoina lava lo tatou mafatia i le tau saili o seleni e pei ona i ai. E tele galuega ma tele foi mea tatou te faamoemoe i ai, ae ou te iloa a tatou le toe mimilo i le ivitu lea e pei ona tatou alalaga ai i aso ua mavae, tatou te le toe foi lava i se mea e saogalemu lelei. E faapea foi ona uunai o tatou fale gaosi oloa aua o le tasi lea fesoasoani tele ia tatou i tupe o loo maua mai i fale gaosi oloa. O lau lava fautuaga e lelei ma taua, aua e le gata ina maua ai tupe a le tatou Malo ae maua ai foi ma galuega a nai o tatou tagata.

Ona ou oo mai lea i lau Afioga i le Minisita mo Tupe Maua, ou te talitonu e le faigofie le avega e fai sina tele o le galuega i le tau sailia o le \$419miliona aua galuega fai. O lau tatalo i lau Afioga, o oe o le tama matua ua lava foi lou silafia, o oe foi o le tama o le tamaoiga, sei silasila ane aemaise lava o le tau o mea taumafa i aso taitasi. O le suka, eleni, fasi mamoe, o nai mea faapena i aso taitasi, poo o le a lava se auala e mafai ai ona fesoasoani i nai o tatou tagata. O le uiga lona, ou te iloa e le faigofie ae ua avatu iina i lau Afioga ina ia e silasila ane i ai e fesoasoani ai i nai o tatou tagata. O le isi mea ia silasila ane i le tatou Prize Control Board e masani ona fuafuaina tau o oloa ma latou siakiina, e lelei ona atoatoa o le tatou Prize Control Board ina ia fesoasoani i le tau o oloa, aua o le tasi lona fesoasoani tele i nai o tatou tagata.

Ona ou oo mai lea i le matou Matagaluega i lau Afioga i le Minisita o Leoleo, Falepuipui ma Tinei Mu, malo faafetai. E leai lava sau tala i le tatou Tala o le Tupe ua matua manaia lava. O lea ua ou vaai atu ua tele lenei siitaga i le tatou Matagaluega ua \$24.5miliona e 13% ua faaopoopo ai i luga. O le mea lea e avatu ai le faamalo faafetai, o lea foi ua tino mai le tatou Sector lea ma ua manaia le tatou fesoasoani. Atonu leaga sa fai foi sina mafatia i lona taimi ao lea ua ou vaai atu ua manaia o lea ua tino mai ma ua tele ai le fesoasoani mo tatou.

O le isi itu taua i lau vaavaai e \$2.4miliona lea ou te vaavaai atu i ai mo le toefuataiga o pagota ma Deportees. E taua tele ia te au le mea lea o le Deportees poo tagata e aumai fafo aua ua tatou manatu mama, ae mafua ona aumai mai fafo ona ua i ai foi faaletonu ae ou te iloa o se itu lelei lea. Ia fai lelei ni a latou rehabilitation programmes e toe council lelei ai a'o le'i tuu mai i le community. Ia te au lava ia ua manaia tele lea fuafuaga.

Ona ou oo mai ai lea i unforeseen expenditures poo tupe faaalu le fuafuaina, faafetai ua maua o lea lava ua fesoasoani le kapeneta aemaise lava o galuega faafuasei a le Matagaluega. E talitonu lava e le na ma le laina le tele o le mau faafitauli tatou te fetaii pea i lea tausaga ma lea tausaga e pei foi o le Tsunami, ao lenei lava le Matagaluega tatou te tua i ai i taimi faapenei. O lau tatalo faafetai ua maua o loo maua le fesoasoani e ui lava ina e le o aumaia iinei ao lea e maua le fesoasoani pe a i ai ni operations a le Matagaluega e faatino.

Ona ou oo mai ai lea i le Tinei Mu ma Faalavelave faafuasei, faafetai ua vaaia foi le sologa lelei, manaia le Ofisa Tutotonu, manaia foi le Ofisa i Tuanaimato ao lea foi ua fuafua i Maota i Savaii, o Asau faapea ma Togitogiga, o mea ia aua e alafia gofie e le Malo vaeatu le Maota, faafetai o lea ua fai i ai le fuafuaga, faafetai i le Komesina ma lea fuafuaga aemaise o lau Afioga i le Minisita.

Ona ou oo mai ai lea i le aotelega o se manatu i le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 mo se fautuaga. Muamua, lau Afioga i le Fofoga Fetalai, a ogatasi lava a tatou sailiga o tupe maua faatasi ma le soifua fiafia o o tatou tagata o le aua lona o faiga mea.

O lona lua, matua uunai faatoaga ma fai lelei maketi e ave i ai fua o faatoaga. O le fesoasoani sili lona e maua mai ai le tele o galuega e saili ai seleni. Ou te iloa le tele o le fesoasoani e maua mai ai pe a tatou toe faatino tatou faatoaga aemaise e le gata ina faigofie ona maua tupe maua a tagata ae fesoasoani foi i tupe maua a le Malo ma fesoasoani ai i galuega fai.

Ona ou oo mai ai lea i fale gaosi oloa: O le tasi lea vaega e tatau ona matua uunai, oloa foi ia e maua i totonu o le Atunuu e pei o fua o faatoaga, manu papalagi ma mea-i-tuāolō. Ua ou maua foi o lea ua manaia le tatou falaoamata. O lea ua uma ona fai suesuega i le 'ulu, vaeatu le faafofoga a le Maota ma le Atunuu. Afai ua talafeagai, o le a le mea ua tuai ai ae le fai loa se tatou fale gaosi falaoamata ina ia fesoasoani i le Atunuu? Ou te talitonu lava, o lenei faafitauli o le siitia o le tau o le soifuaga, e sa'o; ou te talia foi le sao o le Malo

i le tulaga lea ona e le faigofie aua o le tele o mea tatou te faalagolago i fafo, ae a faaleleia a tatou faatoaga, fale gaosi oloa ma mea uma i totonu o le Atunuu, e le gata ina faaitiitia ai imports, ae o le a faateleina ai a tatou exports. O le a tele foi le fesoasoani i le fofoga taumafa o le Atunuu ma maua galuega e maua ai tupe a tatou tagatanuu. Ou te talitonu lava o le a manuia ai Samoa.

Ona faapea lea o se matou faamatalaga, o sa matou lea fesoasoani lau Afioga i le Fofoga Fetalai faapea le paia o le Maota. E faamalulu atu foi, afai o le a se faamatalaga ua pā'opapa i se faafofoga, o le agaga lava o lenei sui usufono ia tatou galulue faatasi ina ia manuia ai le Atunuu.

Ia manuia lau Afioga i le Fofoga Fetalai faapea le mamalu o le Maota. Faafetai.

20 IUNI 2011

Afioga MAUALAIVAO PAT AH HIM (Palota Taitoatasi): Faamalo, faafetai. Ua ou tulai atu i le ava ma le faaaloalo tele e faigata o Samoa o le vao filifili ma le fue lavelave. E momoli atu la'u faafetai tele i lau Afioga i le Fofoga Fetalai. Ou te fia piiama i lenei taeao e tusa ai ma talosaga molia i le Tapaau i le lagi e faaleo ai la'u lauga faataupou i lenei itula o le aso, ona ua ou lagona e fesoasoani mai le Agaga Paia ia te a'u ina ia avatu so'u sao po'o se sao foi o lenei Itumalo e tusa ai ma lenei Paeaiga.

E leai so'u manatu ou te talamaea i lenei taeao, ae peitai ane, ona ua ou fiu e oomi le faamau ae pei e le o to'a lava, e keke solo lava lima, o lea la ua ala ai ona ou.....E lelei foi le tulaga lea ua ou i ai, aua sa ou manatu o a'u ou te lavea i le paga māmā, ae faigata o lea ua ou tu atu e tusa ai ma le tulaga lea.

Ou te faatulou atu i lenei itula i le Maota i Tiafau nei, o le Maota o malo, o le Maota o le taunuuga o Tama ma Aiga, Aiga ma Tama ae tainane foi o le Maota o le Faautugatagi a Samoa.

Ou te piiama e tusa ma le tatou faafetai i le Tapaau i le lagi ona ua le mafai ona tuueseina i Ona aao alofa lo tatou Atunuu itiiti ma le faatauvaa ma ua saogalemu ai ma tatou maua le taeao sa lupe ma le taeao na atofa, lenei ua tatou faafesagai ai i le alofa ma le agalelei o le Atua.

O la'u matau atu i le Maota nei, o lea ua atoa le Faga i Lau aua ua maleifua mai le paia ma le mamalu o Tupu ma Tamalii o sui usufono mamalu o Itumalo o Samoa.

Ou te faapea atu ai tulouna ia le faafofoga tapuai a Lana Afioga Mamalu, O le Ao o le Malo, Lau Afioga Tuiatua Tupua Tamasese Efi ma Lau Maisofo, faatulou atu foi i le Sui o le Fono a Sui Tofia, Lau Afioga i le Tama Aiga, Afioga Tuimalealiifano Vaaletoa Sualauvi II ma Lau Masiofo, e faapea foi ona faatalofa atu i lenei taeao i le afio o Lau Afioga Rt Honourable le Palemia o Samoa. Ou te faatalofa atu foi i le afio o Lau Afioga i le Sui Palemia o Samoa, e faapena foi ona ou faatalofa atu i le paia o le Aiga Minisita o le Kapeneta. E faapea foi ona ou faatalofa atu i lau Afioga i le Fofoga Fetalai o le Maota faapea le Sui Fofoga Fetalai, ae tainane Minisita Lagolago o le Kapeneta. E faapena foi ona ou faatalofa atu i lena Itu o le Maota i lau Afioga i le Taitai o le Itu Agai ma le Sui Taitai, aemaise sui usufono mamalu o Itumalo esee o le Palemene o Samoa.

Ou te talitonu i lenei itula ua ou tulai atu ma le faaaloalo tele e tusa ai ma lenei aso, e fia faaleo se lagona o lenei Itumalo. Ou te faatulou atu i le Faamasino Sili ma le Vaega o Faamasinoga, e faapea foi ona ou faafeiloai atu i Faauluuluga o Malo mai Fafo o tatou Paaga ia e fesoasoani malos i le Atunuu i taimi e puapuagatia ai.

E faatalofa atu foi i Faauluuluga o Matagaluega ma Matagaluega a le Malo, Faauluuluga o Faalapotopotoga faapea Kamupani Tumaoti a le Malo o lo'o tautuaina Samoa i so'o se tulaga.

E faatalofa atu foi ia Samoa aoao, Tama ma Aiga, Aiga ma Tama, Tumua ma Pule, Aiga i le Tai ma le Vaa o Fonoti.

Ou te faatalofa atu foi i Auauna a le Atua i so'o se Ekalesia Kerisiano faapea i latou uma o lo'o nofo tatalo aua le toafilemu o Samoa. O le ala foi lea ua manuia ai faamoemoe o Samoa ua tuanai atu ma faiga filifiliga a le Atunuu ma ua toafimalie mea uma.

E faatalofa atu foi i le paia o lo'u nuu o Malie. Malo tapuai, sau se itula outou faafofoga mai i se saunoaga a le sui usufono o lo outou Itumalo o Sagaga le Usoga, ae tau ina sau i le va lo'u nuu o lo'o tapuai mai i le Afio o lau Afioga Maualaivao ma le Aiga Sa Maualaivao, afio mai le Matua ia Faamausili, susu mai Seiuli, susu mai Taito o le Foalii faapea pou e fitu o le fale o Malietoa ma lau Fetalaiga Auimatagai.

E le faagaloina foi nai o tatou Uso i le Faigamalo a Tutuila ma Manua. Lau Afioga i le Kovana Sili, lau Afioga i le Lutena Kovana ma le Tafatolu o la outou Faigamalo.

O lenei taimi lau Afioga i le Fofoga Fetalai, se'i ou pa'i i lo'u Itumalo. O lo'u Itumalo o se Itumalo e faigofie ona faalupega, e le mamafa tele pei o faalupega o isi Itumalo. Pau lava le mea lo'u Itumalo, Palota Taitoatasi, e momoli atu la'u faafetai tele, malo le tapuai, malo le fai o le faiva, malo le faaloalo, malo le agalelei. O lea ua ou tu atu nei i le Maota o Tupu ma Tamalii e filitupetua ai le tofa ma le faautautaga. Aisea? Ona o lau palota. Faamalo, faafetai. Ou te talitonu foi o lenei Paeaiga i aso ua mavae sa tāliu ae popo'e. Ioe, ae a le aso lenei? O se taeao fou, o se taeao ou te taua e a'u, o se taeao faitauina o le Atunuu. O lea ua ou tu atu o a'u o se tasi o sui usufono mo Palota Taitoatasi, o a'u o le Matai Samoa. Ua laugatasia uma ai le Atunuu i totonu o le Maota lenei. A'o outou faafogafoga mai lo'u Itumalo ma o faalupega nei o lo'u Itumalo - o Samoa Aoa, afio mai Tupu ma Tamalii, Faletua ma Tausi, Saoao ma Tamaitai faapea foi alo ma fanau ma le matou taulaga i Apia. E faigofie, a outou faafogafoga mai la, e aupito tele lava lo'u Itumalo aua e sau mai Savaii ma Apolima aua o iina e toatele tagata o lo'u Itumalo o lo'o afifio ai.

E momoli atu la'u faafetai tele i le tofa loloto, o lea toe tasi le tausaga aulia le 50 tausaga o le Tutoatasi o Samoa, a'o lea faatoa... leaga sa i ai foi Paeaiga ua mavae ae pei ona fai atu o lea faatoa...ae faafetai i le tofa loloto i le tatou Malo i Paeaiga ua mavae ua mafai ai ona tulai atu se tasi o sui usufono mo Palota Taitoatasi, ua le o se sui usufono taulealea a'o le sui usufono matai. Ua laugatasia uma Samoa aua o lea ua faitauina foi matou o le Itumalo aloaia foi. Ou te faapea atu ai i lo'u Itumalo, o le taimi lenei ua le o toe i ai afa Saina, tulou, le toe i ai se Tamauli, tulou, le toe i ai se Afakasi, tulou, ae a le tatou Itumalo?

O Samoa ua tasi, tutū faatasi ma tatou Palota Taitoatasi. Lo'u Itumalo e, faafetai ua sii le fale o Asomua i le mauga, faafetai i le Malo i le tofa ua a'e, e le o se poto o se isi po'o se atamai, a'o le musumusuga a le Atua ua faapea ona laugatasia ai. E faapea lava Malo ua faavae i le Atua i le Temokarasi, tatou te agai lava i le lē mautonu, a'o lea ua pau tonu ifo lava i le mea e tataua ona i ai. O le a ou le toe tautala i ai ona o le matupalapala a lo'u Itumalo Palota Taitoatasi lea ua laugatasia le Maota. O le mea taua lea aua sa tatou solifono, ae peitai ane, sa mafai lava ona faatagaina i tatou i lalo o le Tulafono o lo'o limataitaiina ai le Maota Fono nei. Tatou lafo la ia vaega i tuagalua ma lafo i nuu le ainā.

Lau Afioga i le Fofoga Fetalai, ou te fia tautala i le Tala o le Tupe mulimuli ane, a'o le taimi nei e fia faaogaina lenei avanoa mo manaoga o lo'u Itumalo.

Ou te talitonu e le o po se lilo i le tautua matavela a lenei Itumalo o Palota Taitoatasi. E tiga lava ona leai ni vai ma leaga auala - a ou alu atu ou te asiase i lo'u Itumalo ae faapea mai, "Faatoa maliu atu nei lava si o'u tama, na soifua mai ua toe maliu atu lava e le'i vaai i se suavai." Ona ou fai atu lea, "Onosai, o mai tatou tutū faatasi i lenei tausaga, tatou tu'itu'i pea i lo tatou Malo."

Lau Afioga i le Minisita mo Galuega, Felauaiga ma Atinae Esee, o lenei ua e faafogafoga mai, o lo matou nuu o Aleisa o lo'o fia maua le suavai. E i ai le aualatele lea e ta'u o Harrington e alu i uta. Masalo o la'u matau fai mai ua sefulu tausaga talu ona fai ma tuu, fai ma tuu, a'o i ina foi e i ai le puna. Ua ou vaai i ai i le puna ona sa ou oo i ai i le Aso Toonai, masalo toe lava ina vili puna mai ai loa le suavai ma maua ai le vaitaumafa o Aleisa. O lo'o i ai le suavai ae toe lava o le faatinoina. Lau Afioga i le Minisita mo Galuega, Felauaiga ma Atinae Esee, ia e alofagia le auala lea o lo'o nofoia e le toatele o tagata, toe lava ina faata ma faalauleleia ona foia lea o le pefu aua le saogalemu faapea foi le soifua maloloina lelei o tagata.

E faapea foi ona ou oo mai i le Taulaga o Apia, lau Afioga i le Minisita mo Galuega, Felauaiga ma Atinae Esee. Ua matou matauina aemaise le talafatai i Apia i le faatafafa lea i le Maketi i Fugalei o lo'o i ai le auala e faasao mai uta i Sinamoga e tau mai i le Maketi. O le auala e feoa'i ai taavale ma le alavai, tulou, o alavai simā i autafa, a'o se mea e faaavanoa e savavali ai tagata i luga o le auala e leai se mea. E o faatasi lava taavale ma tagata, a fetauti la tagata ma taavale ua 'alo le taavale, 'alo foi ma le tagata, ae 'alo le tagata 'alo i luga o le alavai. Ua na o se fautuaga e tuu atu i ou tafatafa faamolemole, faaleleia ia vaega ona o tatou uma lava e femalagaai i taavale e afaina ai, ae faapea foi i tagata feoi.

E faapea foi i le Ofisa o Aoga e taua atu i lau Afioga i le Fofoga Fetalai i lau Afioga i le Minisita mo Aoga, Taaloga ma Aganuu. E faapea se matou tuualalo, ia alofagia ia faamalosi auala e mafai ai ona aoga uma fanau.

O lea ua matou vaavaai ua amata ona molia tagata i le lē faaogaina o alo ma fanau e maua i luga o le auala o faatau oloa, ae matou te talitonu e le o i'ina e amata ai. E ao ona tatou agai e vaai le a'a ma vaai po'o fea tonu le mea e mafua mai ai le faaletonu i le siosiomaga o aiga i totonu o afioaga, pe faapefea le soifuga ma le tamaoiga ona faapena lea ona tatou agai i ai ma maua ai le malamalama o tataou e tusa ai

ma le faafitauli ua ala ai ona le aooga nei fanau, ma faapena foi ona le usitaia ai e matua le Tulafono. A lelei ona faavae le fanau, tatou te le faafeagai ma ni faafitauli i le lumanai.

E faapea ona ou soso atu foi i lau Afioga i le Fofoga Fetalai i le Minisita mo Faatoaga ma Faigafaiva. Ou te talitonu e matagofie le polokalame o lo'o ua i ai i le Tala o le Tupe e tusa ai ma le toe totoina o laau e tai pei o niu. Ou te talitonu e ao ona faataunuu lea vaega ina ia mafai ona ola pea laau aua le soifua ma le tamaoaiga o le Atunuu, aemaise ai ou te talitonu i le land development ina ia mafai ai ona tele ni galuega e maua i fale faigaluega. E faapea foi pe afai e taunuu mai nisi fale faigaluega e pei o faletalimalo tetele o le a faatutuina i lo tatou Atunuu. E ao ona tatou galueaiina lelei le eleele e maua ai le manuia o nai o tatou tagata. Ia faamalosi ina ia latou mafaia ona aumaia ma faatino ma fafaga mai, tulou, fale faigaluega ia i fua o faatoaga. Atonu tatou te le tigaina tele e sue ni maketi i fafo, ae a tele ni fale faigaluega e faaaoaga i ai fua o faatoaga ina ia manuia ai pea o tatou tagata, ia laugatasia ma ia paleni le tele o galuega i fale faigaluega ma faapena foi ona tele galuega ma manuia ai o tatou tagata e galulue i le laueleele.

Ou te soso atu faamolemole lau Afioga i le Fofoga Fetalai i le Minisita mo Eleele, lau Afioga Rt. Hon le Palemia o le Malo o Samoa. Ou te talitonu ua maea ona fai ni iuga i eleele, ae na o se talosaga se'i silasila ane lau Afioga i eleele o Sogi pe e le mafai ona toe maua se avanoa, tuu i ai se taimi umi ina ia mafai ai ona totogi o latou fanua. O le latou talosaga lea, ae na ona faataatia atu pea i ou tafatafa se'i silasila i ai. E pei o le vaai i ai o le toatele o i latou nei ua i uta i Falelauniu, ou te talitonu ua toetiiti lava maea le malumalu o le Atua i lo latou falesa la e fau, ua latou fai mai latou te lolotu uma lava i'ina i le falesa, o i latou uma latou te o e lagolago. O le a tele ai taulaga tuofe ma faapena ona malosai ai le Matagaluega. O le tatalo lena ia alofagia ia maua se avanoa e toe fetuunai ai le vaitaimi pe tuu i ai se 40 tausaga ina ia fetau lava ma le matutua o alo ma fanau, ma faamaea ai ona totogi ma fua foi faatoaga ma faafaigofie ai ona faamama-avega ia te i latou.

O le Vaega i Tagata Tafafao Maimoa mai lau Afioga i le Palemia, ou te talitonu e ao ona faamalosi le faalauiloaina o Samoa. O Samoa o ona laufanua i le sami ma ona matafaga e le tele naua ma matagofie, aemaise o le tatou aganuu lea tatou te sapi ai nei, o le toafimalie ia o Samoa. O le ala lea o le fia omai o tagata tafafao maimoa mai i Samoa ona e leai ni faalavelave, o lo'o toafimalie Samoa.

O le agaga lea, ou te talitonu ia lava le faalauiloa o Samoa i atunuu uma o le lalolagi ina ia mafai ona faaleleia le tamaoaiga o lo tatou Atunuu e tusa ai ma le atinae.

Ou te talitonu o se tasi o vaega ou te fia oo i ai lau Afioga i le Fofoga Fetalai, o le Matagaluega o le Soifua Maloloina. Ou te masalo o se taimi saunoa le Minisita mo le Soifua Maloloina ona o a'u lea ou te lagolago i le Minisita mo le Soifua Maloloina. Ua matua tuu atoa atu i ai la'u lagolago i la'u Minisita e tusa ai o le Matagaluega. O la'u fautuaga i le Matagaluega - le Matagaluega e, o lea ua ou faalogologo o le a fau se tatou falemai fou. E amulī na mea, ae ou te talitonu o le tagata ma'i ua ou faaigoaina e a'u o lo'o sulufa'i atu i outou aao ma o outou o faola. Ou te talitonu e ao ona tatou talisapaia. Sa ou asiasi foi i le falemai ma ua ou fiafia ona na fesili atu i tagata mama'i, "O a mai tausimai?" Na fai mai, "E lelei." Ou te talitonu ua tele le suiga i le falemai. O la'u fautuaga i le Matagaluega, ia talisapaia gasegase e afifio atu o ni a tatou malo faaaloaloga, a o atu e sulu atu e tataua ona faaali i ai foliga laumata fiafia ina ia talia i le lotu. E amulī oo atu le fualaau ae ua manuia le ma'i i le matagofie o le tali lelei ma le laufofoga fiafia o le Matagaluega. Soia tatou te fetuia'i faa-faga o Apoa aua ou te talitonu e le maua ai se lelei, aua po'o a fale fou, ae a le lelei le aufaigaluega, e a'e fua lava o tatou faiva. Ou te talitonu e pei e faapena se lagona, a'o le Matagaluega faafetai ua tele lo outou sao. O lo'o i ai foi fuafuaga i le faaleleia ma le faamamaina. A outou afifio atu i le falemai, ua tele lava le suiga ua i ai.

Masalo o vaega ia na ou fia tautala i ai ae o la'u fautuaga i Matagaluega uma a le Malo, ia alofagia e pei ona matou vaavaai i ai i le agai i luma i tupe faaalu faasili o lea e agai i lalo le Tala o le Tupe. O lea ua matou talitonu ai i la outou auaunaga ma a outou galuega e ao ona faapena ona tusaafia faauluuluga o Matagaluega aemaise foi o Matagaluega, ia uluulu matafolau le faiga o galuega, ia faigofie ma ia i ai le faamaoni ina ia fiafia e faatino le galuega, aua po'o le a le tele o tupe e la'u atu i Matagaluega, ae a le faamaoni ma leai se tusaafia ma lē felagolagomai le Faauluuluga o le Matagaluega faapea foi le Matagaluega, e le lagona se fiafia e galulue faatasi.

Se'i ou oo atu i le Tala o le Tupe: O le Tala o le Tupe ua faamalo faafetai. O la'u vaai i ai e pei ona ou tautala atu i le Tala o le Tupe, o lo'o faasolo lava ina faaitiitia tupe faasili i tupe faaalu e tusa ai ma fuafuaga

a le Malo. O le isi mea, ona pau le siitaga lea e i ai o pia ma sikaleti, ae taua. E taua le taofiofi o le faaaogaina o nei oloa aua e tupu ai le lē soifua maloloina, e sefe ai foi seleni a aiga. O i latou o lo’o tagofia nei oloa, a taugata ia taumafai e taofiofi le faaaoga, a’o le mea taua e le o aafia ai le tau o le soifuaga. E le faapea o aafia ai le tau o le suka ma isi mea faapena e aofia ai taumafa aua e afaina ai ma taugata le soifuaga.

O le ala foi lea i la matou vaai matou te talia gofie le Tala o le Tupe aua sa taumate faapea o le a siitia tupe faaopoopo po’o le VAGST i luga o oloa, a’o le matou vaai o lea lava e tumau e le o i ai se suiga.

Ua toe tasi lava le Ofisa lea e le’i oo atu i ai se faamatalaga, o le Ofisa o Leoleo; ua faamalo faafetai. Ou te talitonu i le polokalame o lo’o outou faatinoina nei o le Neighbour Watch, o lona uiga o le tuaoi e vaavaaia le isi tuaoi, ae e le lava lea. E tatau ona i ai le follow up, e tatau ona o e silasila i ai aemaise le afioaga faigata lea i le Itumalo o Faleata Sisifo, ioe. E tatau ona faamalosia ia pule a alii ma faipule aemaise o pulenuu, ia ave i ai ni a latou terms of reference foi lele, ia o tonu lava e faatino a latou galuega, ioe, ma lipoti mai i lo outou ofisa ina ia mafai, ioe. Aua e le mafaia e se sui usufono se toatasi ona vaavaai atoa le anoano o nei, ioe, atonu foi e le faamaoni foi le sui usufono latou ona e le faigofie ona taunuu i se taunuga lelei ia ia vaega, ae ou te talitonu, o le agaga lena. Masalo e i ai nisi mea o le a toe faailoa i se isi taimi, ae mo le taimi nei i le Tala o le Tupe, ua talia ma le fiafia e lenei sui usufono mo le Itumalo o le Palota Taitoatasi.

E faauma atu ai sa matou faamatalaga i lenei itula o le aso, faamalo i lou Itumalo le tapuai, faamalo o lea ua outou faafofoga mai ua ou... e leai se isi o faapea mai, aua ana ou sau nei foi o ou sau ia Pat Ah Him, faapea, hey nofo i lalo, ae leai, faafetai o lea o Maualaivao lea ua tulai atu, ia e faapena, talu ai ua laugatasia le Maota. O lou pale lea, o lou taeao lea le Palota Taitoatasi, no morning can beat this morning, it is the best morning. Ia manuia lau Afioga i le Fofoga Fetalai, faapea le Palemene o Samoa.

20 IUNI 2011

Tofa TUSA MISI TUPUOLA (Falealili): Lau Afioga i le Fofoga Fetalai ma le mamalu o le Maota, ou te muamua ona ou faafetai atu ona o le avanoa ua e tuuina mai i le isi sui usufono mo Falealili e fai atu ai foi ni manatu poo ni motugaafa foi e tusa ai ma le Tala Faatatau o le Tupe a le tatou Malo ua taoto i luma o le Laulau a Fono a le Palemene.

O le viiga lava ma le faafetai i le Atua e le faaitiitia, e pei ona avea lau Afioga i le Fofoga Fetalai e fai ma o tatou sui i lenei taeao e momoli le agaga faafetai i le Alii, aua o Lona mana ma Lona malosi ua mafua ai ona tatou toe fesilafai i lenei taeao i le lagimama ma le soifua lelei o sui usufono mamalu uma o lenei Palemene. Ia, le paia e o le tatou Itumalo Falealili, masalo e i ai se taimi ona saunoa lea o le isi o tatou sui usufono poo le Afioga foi i le Minisita, le Afioga Hon Tuiloma Lameko mo la outou faafofoga mai. A o lenei itula, ia tapuai maia ae sei taumafai atu le isi sui usufono o le tatou Itumalo aua foi lenei faamoemoe o le tatou Malo ua i ai nei.

O lea ua paia ma mamalu Tiafau o le Malae Fono o le Faautugatagi a Samoa, aua o lele ua afifio ma papaaao sui usufono mamalu o le Palemene, afio lau Afioga i le Palemia, afio lau Afioga i le Sui Palemia, Minisita o lau Kapeneta, lea o loo alaala ma papaaao nei.

Masalo ae ou te le’i oo atu i tulaga uma o lenei aso i le afio o le Taitai ma le Sui Taitai o le Itu Agai, ou te muamua ona ou momoli atu le faamalo ma le faafetai i lau Afioga i le Palemia ma Minisita uma o le Kapeneta sa i ai i le Paeaiga ua tuanai atu, ona o galuega lelei ma galuega e tele sa outou faafeagai ai. E ui foi ina le paau mai nisi o Minisita sa i ai i lenei Paeaiga, a’o le agaga lava lea e tatau ona momoli atu le agaga faafetai i lau Afioga ona o ia galuega i fatia ua mavae. O upu lava e masani ai le Atunuu, e masani ai foi lenei Palemene e fai i le seuga i le Tuavao, o lea ua e faia lava mea silisili ma le matagofie ma e manumalo ai pea lava.

Lau Afioga i le Fofoga Fetalai, o lea ua taoto faagalua e le fati ae fata i mauga o ao paia sautuafafafa o Samoa aua e faigata o oe o le ao mamala, o le vaofilifili, o le ia e iviivia, e leai lava se potu ma se atamai e mafai ona toe auauina aua o ou paia ua taoto a o se alaoo, e afua mai i le Taisamasama o le Tuimanua, seia paia Fili ma Puletuu na tauilo ai Malo. O le paia lava lea i le afio o Aiga ma a latou Tama, o Tama ma o latou Aiga, Tumua ma Pule, Ituaa ma Alataua, Aiga i le Tai ma le Vaa o Fonoti.

E le faagaloina le paia maualuga ia Tutuila ma Manua ma le latou Faigamalo, aua foi le latou tapuaiga leleoa o loo tapuaia pea faiva o le Palemene o Samoa, aua le paia ia Sua ma le Vaifanua, Fofu ma Aitulagi,

Saole ma Saleaamua. O le mamalu lava lea i le afifio o Faatui o le Motu, alaala foi Tootoo o le Faleula, faapea Oe le Manuatele.

Tau ia ina ou sau i le va lau Afioga i le Fofoga Fetalai, ina nei ou malaga loa ae sei ou afea lape o upu, nei sala le gagana aua e faigata Samoa o le ao mamala i le faasouga o ao ma le atufolasa. Avea ia lenei avanoa ou te faatalofa atu ai e fai ma sui o lenei Itumalo i le tapuaiga mamalu a Lana Afioga Mamalu O Le Ao o le Malo o Samoa, lau Afioga Tuiatua Tupua Tamasese Efi ma lau Masiofo. E faatalofa atu foi i le Sui Usufono o le Fono a Sui Tofia, lau Afioga Tuimalealiifano Vaaletoa o le Tuiaana ma lau Masiofo, faamalo faafetai. Faafetai i la oulua tapuaiga leleoa mo Samoa, ua manuia ai ma ae manumalo faiva e ala i lana faiga filifiliga na sei mavae atu nei.

E faatalofa atu foi i lau Afioga i le Faamasino Sili ma le Vaega mamalu o le Faamasinoga, ua malo le galue malo le tauatai. Faafetai i la outou tapuaiga, o lea ua manuia ai fuafuaga uma o le faiga filifiliga na sei mavae atu nei, e ala i faiga faatemokarasi e pei ona tatou i ai i lenei vaitau.

Ia, lau Afioga i le Palemia, o le Taitai o le Malo, ou te fia fai ma sui o lenei Itumalo o Falealili e momoli atu le agaga o le faafetai ma le faamalo ona o le filifilia o le isi o matou sui usufono e avea ma se tasi o Minisita o lau Kapeneta, pei ona tulai mai ai le Afioga Hon Tuiloma Lameko. Ia lau Susuga i le Minisita, o le ta Itumalo, ia alo ane laia i ou faiva a manaia, ia sagai ane ai o le tai ma ia oso pea moegaluaga, aua le faatautaiga o ia Matagaluga ma Faalapotopotoga a le Malo ua tofia oe e te galue ai. O le tatalo lava a le tatou Itumalo i lau Afioga i le Minisita, ia maua pea lou soifua malosi, aua feau ma galuega ma e lagolagosua pea i fuafuaga uma a le ta Itumalo e pei ona maea ona ta soalaupuleina.

Lau Afioga i le Fofoga Fetalai, avea ia lenei avanoa e fia pai atu ai i lou Itumalo pele o Falealili, e afua mai i Tapulolou i sasae seia paia Iliili i Sisifo, aua le afifio o Alaalagafa ma la oulua nofo a Tulafale ma le Tauagaeseese ia te Oe Falealili. Ua faamalo i lau faaeaea ma lau puleto ua tuuina mai, e le gata i lou nei tagata faatauva, ae faapea foi le Afioga i le Minisita le Tofa Hon Tuiloma Lameko. Falealili, o oe lava o le afa a le tulatoa e fili i le ao ae talatala i le po, o oe o le upega a le tautai matapalapala e masaesae i le ao ae toe talatala i le po. Le Itumalo e, aemaise o le tatou Falefitu, aua nei outou manatu ua maua ula futifuti pe ua ai ulu tuanai taisi, e leai, ona o la outou puleto ma la outou faatuatuaga ua tuuina mai, lea ua ma tulai atu ai ma le Afioga i le Minisita aua upufai o Samoa. O le ala lea ua le fia gugu ai ma taialalo le melomelo a le Tuimanua, ae ao ona alaga leotele aua o lele ua atu e tautai o le vasa, ua maua le ai o le tausinioga, o lea ua outou faaeaea i le Afioga i le Minisita ma lou nei sui usufono fou, e fai ma sui usufono o le ta Itumalo i lenei foi Paeaiga fou ua i ai nei. Malo faafetai le Itumalo, faafetai i tupu ma ee o le tatou Itumalo ona o la outou faaeaea ma la outou faatuatuaga ua tuuina mai.

Lau Afioga i le Fofoga Fetalai, e fia momoli le faafetai tele i sui usufono sa i ai o lenei Itumalo i le Paeaiga ua mavae i le Afioga i le Gafatasi, lau Afioga Fuimaono Naoia Tei, o le sa e galue mo le isi nofoa o le ta Itumalo i nisi o Paeaiga ua tuanai, faamalo faafetai i le tele o au galuega lelei na faia mo le ta Itumalo, o lea foi ua fai sina malologa i lenei vaitau, ia e fai aso pea le Atua mo le agai i luma. Ou te faamalo atu foi ma momoli atu le faafetai i sui tauva uma o le Itumalo o Falealili e pei ona sa tatou galulue faatasi ai i le tatou faiga palota ua tuanai atu nei, aua ni tofi se toalua mo le tatou Itumalo. Malo le galulue malo le tau, malo foi le tausala. O le upu lava e masani ai i taaloga i le tai, ia e le mua uma ni vaa, ae faatili foe mo le ae, e le o toe mamao foi le faiga palota i le 2016.

Ia Falealili e, lou Itumalo e pele i le agaga, e le fai mea talai pe folafola ni galuega fai mo le ta Itumalo faapea ma le Afioga i le Minisita. Ae i ai le manatu, o le a taoto mai pea lo outou finagalo ma a tatou talosaga, o lea ua maea ona tuuina atu i le Malo nisi o a tatou talosaga aua foi le amataina o lenei Paeaiga pei ona i ai nei. Ia aua le popole le tatou Itumalo, o lea lava ua amata le tatou Paeaiga fou lenei a le Palemene, ia o loo maua lava le avanoa, aua o loo silafia lelei e le Palemia ma le Malo, o le tatou Itumalo lava e lagolagoina le Vaega Faaupufai e pei ona tu malo nei. Ia tatou talitali ia, o loo maua pea avanoa mo le agai i luma.

Lau Afioga i le Fofoga Fetalai, ona ou oo mai loa lea i le Tala Faatatau o le Tupe e pei ona i luma nei o le Laulau a Fono. E le o i ai se manatu o lenei Itumalo lau Afioga i le Fofoga Fetalai matou te toe tautala umi i le Tulafono Tau Faaofi o le Faatatauina o Tupe Faaopopo (Nu.2) 2010/2011, ma le Tulafono Tau Faaofi o le Faatatauina o Tupe 2011/2012 e pei ona taoto nei.

E mautinoa ua matua lagolagoina e lenei Itumalo Tulafono Tau Faaofi e pei ona faataoto mai e le Malo ma lau Afioga i le Minisita o Tupe, malo faafetai mo le saunoaga matagofie ua taoto nei. E ioe lava lenei Itumalo ona e tele fuafuaga faataatitia e ao ona silasila i ai i le faagasologa o le tamaoiga o le Atunuu e ala i ana tupe maua i lea tausaga ma lea tausaga. Ona pau lava le vaaiga faanoanoa e pei ona maua pea i totonu o le Tala Autu o Tupe lau Afioga, ona o le tele pea o tupe alu ae itiiti a tatou tupe maua aemaise lava o le le 'au'au o tupe maua, revenues a Matagaluega ma Faalapotopotoga o loo tuuina atu pea i le Matagaluega o Tupe i lea tausaga ma lea tausaga.

O le talosaga a lenei Itumalo i lau Afioga i le Minisita ma le Matagaluega o Tupe, sei toe silasila ane lava i ai aua o i e faamoemoe i ai tupe maua a le Malo i ana fuafuaga i lea tausaga ma lea tausaga. Afai ua le 'au'au o lona uiga e i ai nisi o Matagaluega ma Faalapotopotoga ua latou le o faia lelei lo latou tiute ma le galuega, aemaise lava lau Afioga i le Minisita mo Tupe Maua o loo aafia ai foi i lea vaega, sei toe silasila ane poo a nisi aiaiga ma tuutuuga e fuafua i ai i latou nei o loo nafa pea ma le aoina o tupe a le Malo e ala ia latou Tulafono o loo galulue ai.

Lau Afioga i le Minisita mo Galuega, Felauaiga ma Atinae Eeseese, e ui lava ona o au o loo lagolagosua i lau Afioga ma ia Matagaluega, ae moni lava nisi o sui usufono, o nisi o nei mataupu ua maea ona ou talosagaina lau Afioga aemaise o le Matagaluega, ae pei e lelei ona faafofoga mai o le Itumalo ua toe faaleo atu. E puupuu lava ina ia latou silafia o loo taumafai pea le sui usufono aemaise o le Afioga i le Minisita mo le faaauauina pea o nisi o fuafuaga aua le Itumalo mo Falealili.

Lau Afioga i le Minisita mo Galuega, Felauaiga ma Atinae Eeseese, masalo ua e silafia o Falealili e 14 afioaga ae na o le lua afioaga ua maea auala galue e pei ona mavae atu i le amataga o lenei tausaga na faauma ai. Ua i ai i luma o lau Afioga le talosaga a lenei Itumalo, toe sefululua isi nuu o loo talosaga mai pea mo ni auala galue. E silafia lelei e lau Afioga i le Fofoga Fetalai ma le mamalu o le Palemene, o le Itumalo lenei ua mafuli i ai le tele o le talo fou, e manaomia ni auala lelei aua le felauaiga o fua o faaeleeleaga a le Itumalo e pei ona finagalo i ai le Taitai o le Malo. Na o se talosaga i lau Afioga ae fuafua lava poo fea e ave i ai le faamuamua ao lea ua amata le Paeaiga o lenei lima tausaga, ao lea le tatalo ma faatauanau a lenei Itumalo, faamolemole sei alofa mai i le Itumalo o Falealili e 12 nuu e lei oo i ai ni auala galue ao loo i ai pea i le faigata o felauaiga i lenei taimi, ua tele taavale a aiga talu ai le suiga o o tatou auala i le 2009 ma ua fialia ai lava lenei Itumalo. Ua na o se talosaga i lau Afioga pe a tusa ai ma fuafuaga faagasolo i lenei lima tausaga.

O le tasi itu lau Afioga i le Fofoga Fetalai e auala atu ai se talosaga, ona o le utiuti pea o le suavai i le Itumalo o Falealili, o Falealili o loo ola ae i ai taimi e pepe ai paipa ae i ai foi taimi e ola ai.

O lo'o fia talosagaina pea lau Afioga ona e lua water plants e tasi o loo i Saleilua tasi o loo Piu, o le a se finagalo o lau Afioga ae ua tataua ona mita vai o le Itumalo. Ua malilie le Itumalo ia mita o matou vai paipa ina ia maua pea le suavai mama ma le suavai lelei i aso uma lava o lenei soifuaga. Na o se talosaga e faataatia atu i autafa o lau Afioga ao lena le talosaga e pei ona talanoa atu ai i lau Afioga i se aso ua mavae atu.

Masalo ona pau lea o nai mataupu e fia talosaga atu ai, ae maua pea nisi avanoa e talatalanoa ai pea i lau Afioga mo le agai i luma o fuafuaga a lenei Itumalo ma le faaaloalo tele.

Lau Afioga i le Fofoga Fetalai, ona oo atu ai lea o se faamatalaga i lau Afioga i le Minisita mo le Soifua Maloloina. Lau Afioga i le Minisita ma le Matagaluega, malo faafetai mo galuega lelei aemaise o le Paeaiga ua mavae atu nei ma ua lelei ona toe faaleleia lo matou falemai. Ae na o se talosaga vaivai ona o lenei taimi e na o le tasi le aso e taunuu atu ai le Fomai i Falealili ua na o le aso Tofi, a ua maua ma mautinoa e i ai gasegase e taunuu i le aso Toonai ae ua fia maua lava se vaaiga a le Fomai. Pe a pe'a finagalo malie lau Afioga ma le Matagaluega ae lua ni aso o le alii Fomai poo le Aso Gafua ma le Aso Tofi, ua na o se talosaga ao le vaai alofa foi i le tele o nisi o gasegase o le Itumalo e fia maua ai lava le fesoasoani, ao le taimi nei i le galuega a alii ma tamaitai tausua soifua o loo galulue ai i le falemai i Poutasi, malo faafetai, malo le galulue, malo le alolofa i le Itumalo e ala foi i gasegase e autovaa atu i le Maota gasegase.

O le tasi talosaga lau Afioga ona o le taimi lenei o loo fia talosagaina pea se taavale mo gasegase poo se ambulance, ou te iloa ua tele nisi o falemai i nuu i tua ua i ai a latou taavale e ave ai gasegase. O le taimi nei lau Afioga ma le mamalu o le Palemene, o loo faaogaina lava le faiga o le valaau mai i Apia ona faatoa alu atu ai lea o le ambulance i tua i Falealili, ae i ai lava isi aso e tuai ai ona omai ai lava lea o nai aiga ma

aumai a latou gasegase i isi taavale pe a tuai atu le ambulance o loo i Motootua nei. Na o se talosaga e tuuina atu i lau Afioga, pe tefa le tauala i lau Afioga ma le Matagaluega, ae ave ia se taavale fou i tua i Falealili aua gasegase mai lo ma Itumalo ma le Afioga i le Minisita. O le talosaga lena.

O le tasi itu e fia maua ai se faafesili o loo fesili pea i ai le Itumalo lau Afioga i le Minisita, ona o lea sa matou iloa sa i ai le fuafuaga e sii ese le Falemai mai lona nofoaga o loo i ai ona o le tulata i le sami ona o aafia mai le faalavelave faalenatura e pei ona silafia. O loo fia mautinoa pe siitia le Falemai i se isi nofoaga i uta pe leai, afai e leai, o le tatalo ma le talosaga i lau Afioga sei alofa ane i le mea o loo nonofo ai alii ma tamaitai tausi soifua, e le o lelei le siosiomaga, e le o lelei foi mo le soifua maloloina ae ua manaomia se isi faaleleia atili aua le aufaigaluega o loo galulue ai i le falemai i Poutasi i Falealili. O nai fautuaga na lau Afioga sei silasila ane i ai le Matagaluega aua lava le faaleleia o le falemai o lenei Itumalo i Falealili.

Ona ou oo mai ai lea i le Minisita mo Faatoaga, Faigafaiva ma le Faleoloa o Faatoaga. Faafetai tele i lau Afioga i le Minisita ma le Matagaluega ona o le tele o nisi o atinae lelei ua maea ona faasolo atu i le Itumalo o Falealili masalo o loo faapena i nisi o Itumalo e pei ona i ai le toe totoina o le niu ma le koko ma nisi o faaeleeleaga e pei o fualaau aina ua mafai ona faatinoina i lalo o nisi o polokalame. O la matou tatalo lau Afioga sei alofa ane ua fai lava sina taugata o vailaau aemaise o le tele o le aufai lafumanu i nuu i tua ua oo atu ma fai mai ua le gafatia le tau o le uaea ona ua taugata tele mai kamupani aemaise o le Faleoloa o Faatoaga. Ua na o se talosaga a le Itumalo ina ia silasila ane i ai faamolemole aua se faamamaavega mo le aufaifaatoaga i nuu i tua o loo tua i ai le tele o le afioaga o Falealili.

E momoli atu foi le faafetai a le Itumalo i le tele o fuafuaga uma aua se manuia au i luma aua e mautinoa o a tatou faatoaga o le ivitu lea o le tamaoiga o le Atunuu o lea o loo galulue ma taumafai pea i ai lenei Itumalo ina ia fesoasoani ai i lau Afioga ma le Matagaluega. E talosagaina foi lau Afioga i le Minisita ma le Matagaluega ona sa i ai le Ofisa o Faatoaga i Poutasi ao le taimi nei ua le toe i ai. E talosaga atu ai poo le a le mafuaaga ua aveese ai ae ua tatau ona toe amata ma maua ai ni avanoa e talatalanoa ai ma le aufaifaatoaga aua se lelei au i luma o a latou faatoaga aemaise o le itu tau faigafaiva ma le faia o a latou lipoti mo ni nonogatupe i le Faletupe o Atina'e e pei ona talosaga mai.

O le talosaga mulimuli lau Afioga i le Minisita mo Faatoaga, Faigafaiva ma le Faleoloa o Faatoaga ona o le tulai mai o aafia i le tele o nisi o afioaga aemaise o Falealili ona o le fish poison poo le i'a oona. O loo fia malamalama lenei Itumalo ma lenei sui usufono poo le a le tulaga o loo faatino ai e le Matagaluega le aafia pea o le Atunuu mai i'a oona o le sami? Poo ua i ai se fuafuaga a le Matagaluega e faalauiloa ai i'a oona i lea ogasami ma lea ogasami ma i'a e le tatau ona oona. O le manatu autu o le talosaga lau Afioga i le Minisita, ona o le toatele o alo ma fanau aemaise foi o le au matutua e vave ona aafia lo latou soifua i le i'a oona. Ua na o se talosaga e tuuina atu i lau Afioga aua le faagasologa ma le au i luma o lenei itu, ao motuga afa na aua se lelei au i luma o lenei Itumalo i le itu tau faatoaga.

Ona ou oo mai ai lea i le Minisita mo Leoleo, Falepuipui ma Tinei Mu. E momoli atu le agaga faafetai tele o lenei Itumalo i lau Afioga i le Minisita aemaise o le Matagaluega ona o tiute fai aua le saogalemu o le Atunuu. Matou te ioe i le tele o feau ma galuega o feagai ai ma ua tau le maua se malologa a le aufaigaluega a le Matagaluega o Leoleo aemaise o le Tinei Mu ona o faalavelave e tutupu mai i lea aso ma lea aso i totonu o le Atunuu, malo faafetai i lau Afioga ma le Matagaluega mo ia galuega lelei mo Samoa.

Ona pau lava le talosaga a lenei Itumalo lau Afioga, ua maea ona ta talanoa ma talosaga atu ai i lau Afioga sei alofa ane i se taavale lelei mo le Pou a le Matagaluega o loo i ai i Poutasi, ua faatuputupulaia ma manaia le aufaigaluega i Poutasi i Falealili, o loo i ai alii ma tamaitai Leoleo aemaise o lo latou Taitai, na ou afe i ai ma talatalanoa i ai, o lau vaai o loo lelei le faatinoina o feau ma galuega mo le saogalemu o le Itumalo ao le faalavelave o le pe soo o le taavale. E alu le van ma pe, lau Afioga e le natia ao le tatalo a lenei Itumalo sei alofa ane poo i ai sina isi taavale feoloolo aua la latou galuega i tua mo le saogalemu o lenei Itumalo. Ona pau lena o le talosaga lau Afioga, tau ina ia alofagia e le Atua feau ma galuega ao le tatalo ina ia alofa ia vave maua sa matou taavale aua feau ma galuega a le Ofisa o Leoleo.

Ona ou oo mai ai lea i le Minisita mo Tina ma Tamaitai, Atinae o Nuu ma Afioaga ma Agafesootai ma le Matagaluega, malo faafetai, faafetai tele mo galuega lelei sa faafeagai ai i le la tausaga ua tuana'i ma le Paeaiiga na sei mavae atu nei, ia aemaise le tele o polokalame faaauau a le Matagaluega i tua i Falealili, malo faafetai le galulue.

Pau lava le matou talosaga lau Afioga i le Minisita ma le Matagaluega, ona na uma loa le Tsunami i le 2009, ua matua aafia ai vaipuna ma vaitaele o le Itumalo. O le matou tatalo ma le talosaga i lau Afioga ma le Matagaluega, poo i ai se polokalame o avanoa nei a la outou Matagaluega seia vave faaleleia ai le tele o nisi vaitaumafa, vaipuna i totonu o le Itumalo ona o i e tua i ai pe a oo i le taimi e pepe ai paipa. Ia na o se talosaga lau Afioga i le Minisita ma le Matagaluega, sei silasila ane i ai, aua le tulaga lea mo le faaleleia atili o le vaitaumafa, aemaise o vaitaele o afioaga taitasi, e amata mai lava i Sapoe seia paia Saleilua ma Iiili lau Afioga.

Lau Afioga i le Fofoga Fetalai, e le o toe umi, ae na ona ou fia oo atu i le Minisita mo Aoga, Taaloga ma Aganuu, aemaise le Matagaluega o Aoga, Taaloga ma Aganuu. Lau Afioga i le Minisita, faafetai tele, malo faafetai mo galuega lelei sa faia e le Matagaluega mo lenei Itumalo talu ona maea mai le Tsunami, ua maea ona faatino le matou faleaoga fou o le Itumalo, o lea foi ua i ai le saunoaga a le tatou Taitai, ia o se taimi poo lenei tausaga pe a, o le a avea ai lenei faleaoga ma Kolisi a le Itumalo o Falealili. Ia talosia ia ia vave mai lea fuafuaga, a o le talosaga i lau Afioga e pei ona tuuina atu le talosaga, ua maea lava le faleaoga lea ua fuafua mo le Kolisi ae lei i ai sona pa e puipui ai le saogalemu o le faleaoga, aemaise foi o le saogalemu o alo ma fanau a le Itumalo. A o le talosaga, ia alofa ane mo se pa lelei e siomia ai le tatou Kolisi lea pei o nisi o faleaoga.

E talosagaina foi lau Afioga ma le mamalu o le Matagaluega sei silasila ane i se malae taalo, e pei lava ona silafia e lau Afioga, soo se faleaoga lava e tatau ona i ai se malae taalo, ae pei sa toe faataatia mai sei i ai se taimi, o lea la ua ala ai le talosaga vaivai a lenei Itumalo pe a i ai se taimi e fuafuaina e taua mo lenei talosaga.

Lau Afioga i le Fofoga Fetalai, masalo o le toe talosaga lenei a lenei Itumalo, e talosagaina le Afioga i le Minisita o loo nafa ma lenei vaega o le Ofisa o le Komesina o Faiga Palota, ona o lenei Itumalo e 14 afioaga ma ua faigata ai i sui usufono e toalua ona tausisia ma tausisi pea i faiga e masani ai le Atunuu, aemaise foi le tulaga o le faiga palota, e tele lava ina le faamaoni i le tele o le tausisia o a tatou Tulafono. Ae na o se talosaga, o lea ua amata ona galulue le Komisi Suesue mo le toe Iloiloina o le Tulafono o Faiga Palota, ae o le talosaga lea a lenei Itumalo, sei toe silasila ane pe le ua tatau ona i ai se isi fuafuaga ina ia tau faaitiitia ai le tulaga o aafiaga ua tulai mai ona e 14 afioaga mavae o loo i ai i totonu o le Faiga Palota ae 6,000 tagata palota. Ia na o se talosaga a lenei sui usufono, ae lelei lava ona toe silasila i ai le Komisi poo lenei Palemene i le tulaga o loo i ai le Tulafono o Faiga Palota.

Ia, lau Afioga i le Fofoga Fetalai, aemaise le mamalu o lenei Palemene, afai foi ua i ai se gagana ua paopapa foi poo se pati foi ua sala, ia alofa le Atua ma lafoai i nuu le aina, a ia alofa le Atua ia maua pea le galulue feoeoeai ma le galulue felagolagomai o lenei Paeiga, ina ia maua se ai o Samoa aua a taeao.

Ia o toe upu a lenei Itumalo i lau Afioga i le Palemia ma le mamalu o lau Kapeneta, ia alo ane laia mo lenei tausaga aemaise le lima tausaga ua tatou amataina nei, i ou faiva manaia aua Samoa ma sona manuia mo a taeao. E lagolagoina e lenei Itumalo le Tala Faatatau Autu o Tupe 2011/2012 i ona tulaga uma e pei ona aumai i le Tala Faatatau Autu o Tupe. Ia Samoa e le Atunuu e pele i le agaga, e faapea foi ona manaomia lo tatou galulue faatasi ma galulue punouai, aemaise foi o Matagaluega ma Faalapotopotoga uma a le tatou Malo. O le tatalo a lenei Itumalo, ia maua pea e i tatou le galulue faatasi, tatou galulue punouai ma faatalitali i le faatonu mai a le Atua ia i tatou ona manuia lea o a tatou galuega uma aua se manuia o Samoa mo a taeao. Ia manuia lau Afioga i le Fofoga Fetalai, ia manuia lenei Palemene, ia soifua ma ia manuia.

20 IUNI 2011

Tofa AVEAU NIKOTEMO PALAMO (Faleata Sasae): Faafetai i lau Afioga i le Fofoga Fetalai mo le avanoa.

O le mea muamua lava, faafetai ua i ai se nofoa o lenei sui usufono i totonu o le Maota o le Palemene, ma o le sui usufono foi, poo fea lava e tu ai le nofoa, e le taulia le nofoa.

Ae ou te le i 'apa'apa i le ofeloa, e muamua ona ou t̄p̄ā le siliga ma ou taia ulugalua e pei o le fetalaiga i le gataifale. O le a muamua foi ona ou totō le taamu teevao ma ou totō le niu tuaoi ma ou faatulou i le vatapuia aua e faigata le paia ma le mamalu o le Maota Fono nei.

Lau Afioga i le Fofoga Fetalai, lau Afioga i le Palemia ma le mamalu o le Kapeneta, lau Afioga i le Taitai o le Itu Agai, le paia ma le mamalu o sui usufono o le Palemene o Samoa. Tulouna le paia ma le mamalu o

Samoa, le paia i Aiga ma latou Tama, o Tama foi ma Aiga, tainane le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faapea foi se tapuaiga ia Sua ma le Vaifanua, Fofō ma Aitulagi, Saole ma Saleaamua, Tama a le Manuatele ma le Tootoo o le Faleula. Tulouna foi le mamalu o le Palemene i paia faaleaganuu, paia faale Itumalo ua taoto a'o se alao'o. O Samoa o le fatu e le gāe'e, ua maea ona maioio faai'a o le moana. Ma o paia la ma mamalu o lenei aso, o le a ou nuunuu lea i le Usoga a Tumua ma Pule ma Faleupolu o Tofiga aua o le latou fatuaiga tausii lea.

Ae avea ia lenei taimi lau Afioga i le Fofoga Fetalai ua maua ai so'u taimi ma so'u avanoa aua le tapuaiga mamalu ma le faafofogaaga a si o'u Itumalo o Faleata Sasae. Susu lau Susuga i le Tama a le Fale, Usoalii ma le Matua o Patauave, malii mai oulua Igoa-Matua o Tomaagauaune ma Aogamalie, Manuleleua ma le Faleagafulu. Oulua Matua ia Toala ma Tiufea aemaise upu ia te oe Vaimoso.

Afifio foi Tapaau, le Tupufia ma Tamapaa, oulua Nofoasa, le Tauaitu ma le Saofaiga ma upu ia te oe Lepea. Ae tainane foi oe le Faiga, Nuu ma Leatinuu aemaise le paia tele i alaalfaga taitasi o lo'o aafia i le Itumalo o Faleata Sasae.

Ou te faatalofa atu foi i Faafegaiga Taulagi ma outou Faletua o lo'o tauasuina le Tala Lelei i totonu o lenei Itumalo. Faafetai mo le tofa ma le faautaga i la outou filifiliga o lea ua avea ai a'u e fai ma sui o le Itumalo i le Palemene nei.

Faafetai mo talosaga ma faamanuiaga, o lea ua taunuu manuia le faamoemoe, ua malie le faaaloalo, o lea ua tofu malemo le Tagaloa nai Aopo.

E faapitoa la'u faafetai i si o'u nuu o Vaimoso ma Sinamoga, lau Tofa Tomaagauaune ma le aiga, Manuleleua Samaseia ma lo outou aiga, Manuleleua Tauiliili ma lo outou aiga. O ai foi le tagata nei faatauvaa ua outou filifilia e fai ma sui o le tatou nuu? E faapea foi si a'u komiti mamalu ma nai o'u aiga, nai o'u uso ma tuafafine ma o'u aiga uma i Sinamoga, aemaise o nai a'u uo i totonu o le Itumalo o Faleata Sasae. Sa tatou le mautinoa pe tau lau o le faamoemoe, a'o lenei ua e silasila i taumeasina ae tepa i matagofie ona o le agalelei ma le alofa o le Atua. O lau pule ua tōtōtetele ma o le a ou talisapaia faatuaeleele. O a'u foi o le sui usufono mo Faleata Sasae. Pe na e lagolago pe e te le'i lagolago ia te a'u i le palota, o a'u lenei o lou sui i totonu o le Maota Fono. Ae tapuai maia ae se'i tau saili se manatu leaga e faigata le paia ma le mamalu o Samoa aemaise o se manuia mo Samoa mo a taeao.

Lau Afioga i le Fofoga Fetalai, ae ou te lei tautala i le Tala Faatatau o Tupe, e muamua ona momoli lau faamalo i le Afioga i le Palemia ma le mamalu o le Kapeneta i le Paeaiga ua tuanai, aemaise foi le Paeaiga nei. Ou te talitonu e leai lava se taitai poo se Minisita poo se sui usufono e sau i le Maota lenei e sue se mea e le manuia ai Samoa. O le Itu foi lenei, e le o se Itu tetee, o le Itu faufautua, o le Itu e lagolago i mea lelei. Lau Afioga i le Palemia, ou te momoli le faafetai tele i le Minisita sa tuanai i fanua sa tuuina mai i lenei Itumalo, e ui lava ina le lava, ae a outou silasila i ai, o lea ua amata ona lau mai fua o faatoaga i le maketi. Ae paga lea lau Afioga i le Palemia ma le mamalu o le Kapeneta aemaise le Minisita, sei e toe tagai ane lava, pe i ai nai isi fanua o loo i ai i Faleata, o loo i ai fanua o loo aveatu i tagata taitoatasi, o le a sou finagalo, o loo i ai le mamalu o le Atunuu i Sinamoga, o Lotopa, o Alafua, e matua leai lava se mea e galue i ai. O le Itumalo lenei, e lumafale i le gataifale, ae tuamaota i aoga ma Iunivesite. O lea ou te ole atu ai lau Afioga i le Palemia, sei e tagai ane i nai fanua.

O lona lua, faafetai o lea ua ou faalogologo atu o lea ua i ai auala galue o isi alaalfaga. Ae pei ona ou fai atu, o le Itumalo lenei o Faleata Sasae, e tau o le taulaga, ae leai ma se auala ua ta, vagana lava auala ia e faaoga e le mamalu o le Atunuu. Ou te talosaga atu, sei tagai ane i le auala i Laloanea, ua matua le sao lava i ai se taavale.

E faapea foi ona ou talosaga atu i le auala laupapa lea e i Vaimosouta, e pei ona silafia e lau Afioga i le Palemia, o le auala laupapa lenei, a oo ina pa le vai, ona sau uma lea o le vai agai ii e lavea ai le Peace Chapel, e lavea ai si ou tama faaleagaga EFKS lena e i Vaimoso, alu atu i Fugalei, e matua lolovaia ai lava lea itu o le taulaga. O lea ou te tatalo atu ai, sei tagai ane. Ou te tau matau o loo i ai se fuafuaga a le Malo e faaleleia lea auala laupapa, sei tagai ane i ai faamolemole.

Ou te masalo foi o le a faauitu atu pea ii lau talosaga i le fale o le Mau. Ia silafia o le fale lenei na maua ai le saolotoga o Samoa, ae a outou tagai i ai ua leai se fale o le Mau. O lea ou te talosaga ai, pe i ai sina vaegatupe, ou te iloa sei oo i le vaega o Tagata Asiasi Maimoa Mai poo le vaega o fale mataaga, aua e mafai

ona fai i se vaegatupe sei faaleleia ai le fale o le Mau e fai ma mataaga o tagata tafafao maimoa mai pe a omai iinei i Samoa.

Ia, ona ou oo ane lea i le Tala Faatatau Autu o le Tupe e pei ona faataatia mai i le Maota Fono nei. E muamua ona ou faafetaia lau Afioga i le Minisita o Tupe, aemaise le Matagaluega o Tupe mo le tala maeaea e pei ona faataatia mai i lumafono nei. Ae ou te lei tautala i vaega taitasi, e muamua ona oo atu sau faamatalaga i le Matagaluega o Aoga, Taaloga ma Aganuu. I se lipoti ua tuuina mai e le Ofisa o Faamaumauga, o loo faapea mai ai, o aoga o le tasi lenei o mafuaaga ua ala ai ona ola mativa ma ala ai foi ona ola manuia le tagata. O lona uiga, e taua tele le Matagaluega o Aoga. Ma ou te talitonu foi, e leai lava se isi o tatou o loo alaala nei i le nofoa poo e faigaluega i le mea o loo e i ai, e te lei alu i le aoga. O le lipoti foi lea o lo o tuuina mai o lo o faapea mai, o le mafuaaga o le le o tamaiti i le aoga, muamua o le pili aoga, e i ai ma isi vaega o lo o i ai i i. Ia ona ou fesili lea, pe aisea le mea ua ala ai ona le o tamaiti i le aoga lau Afioga i le Fofoga Fetalai?

I le polokalame lea ua fai nei a le Malo, e momoli lau faafetai, atonu o se faamanuiaga lenei mai le Atua i alo ma fanau a Samoa. Aua o lenei polokalame, lea ua amata ona totogiina ai e le Ofisa o Aoga po o le Malo foi, fesoasoani mai Ausetalia ma Niu Sila i pili o tamaiti aoga. Ae sau pea le fesili e tumau pea le fesili, Aisea le mea e ala ai ona le o tamaiti i le aoga? Ou te faafetaia le Ofisa o Leoleo, o lea na ou faalogo nei i le taeao, lea ua amata ona molia matua ia e le o avea o latou alo i le aoga. Faafetai i lea galuega atonu ua leva ona tatau ona faataunuu. Aua o lo o i totonu o nisi o tatou tulafono, o le aiatatau a le tamaitiiti e tatau ai ona alu i le aoga. O le isi vaega e le gata i le pili, o le scheme lea po o le fuafuaga lea a le Malo e i ai vaega e le mafai ona faatupeina ai. O le faaitaiga la, e na o le \$800 e ave i le Ofisa o Aoga e totogi ai le pili o le vai, e le mafai ona totogi ai ia le faiga o pa po o se faleaoga. Ae ou te talitonu o pa, o isi ia mea taua o Ofisa o Aoga e puipuia mai ai tamaiti mai faalavelave, 'aue ne'i o ni tamaiti i fafo.

O isi foi mea taua tai pei o le moaina o le vao, vaeatu tulou le Maota Fono nei, o le tasi lea vaega ou te iloa e tatau ona fesoasoani ai lea polokalame. Lau Afioga i le Minisita, sei e tagai ane lava i ai. O le mafuaaga lena o lo o totogiina ai lava pili, lea o lo o faaigoaina lava e le tele o Itumalo o lesitala po o le school fund, a o le pili lava. E le telē tele la se pili o totogi, ma o lou talitonuga, o le mafuaaga foi lena e ala ai ona le alu le tamaitiiti i le aoga. O la'u tamai suesuega sa fai, o Samoa o le isi Atunuu lea e ese le toaaga o matua e ave tamaiti i le aoga tulagalua.

E ese le maua o pasene o tamaiti aoga, e alu atu i le year 1 e tau i le year 8. A vaai foi i ai i fuainumera o lo o faamaumau e le Ofisa o Aoga ma le Ofisa o Faamaumauga, i le tamaitiiti na aoga i le year 1, a oo mai i le tausaga 8, ou te masalo pe na o se afe ni tamaiti ua o ese, pe i lalo ifo foi o le afe. Ou te iloa o le mafuaaga poo le natura o le soifuaga po o nisi foi ua malaga i fafo. A o le va lea o le year 9 e alu i le tausaga 13, toeititi lava afa o tamaiti e le o i le aoga. Atonu o se isi lea mafuaaga e tatau ona tagai i ai. E i ai la lou manatu, o le vaega muamua o le taugata o le pili i le vaega lea o le year 9 e tau i le year 13. Lona lua, e aafia ai foi ma tulaga lua i lalo foi o le lipoti lea, o le isi vaega e ala ai ona le o tamaiti i le aoga, o le mamao o le mea e savali ai e leai se pasene. O lau fautuaga i lau Afioga i le Palemia ma lau Afioga i le Minisita, e a pe a fai ni pasi school buses, pasi aoga, e faaoga e tamaiti aoga, na o le lua lava pasi a le Itumalo, o faamanuiaga foi ia mo nisi o le aufaipisinisi. E tele mea lelei e maua mai ai i le polokalame lea, aua e le toe tauaifusu tamaiti i le maketi, o le a leai se tamaiti e toe sau i le maketi, e leai ni faalavelave e tutupu talu ai faaososoga e tutupu iina i lena vaega.

O lea e talosaga atu ai, sei tagai ane, e moni lava e tele le seleni e alu ai, ae ou te iloa o le lumanai lena o Samoa o o tatou alo ma fanau, aua o lea e fai mai le lipoti lenei, e mafua mai lava i le lelei o aoga le lelei manuia o lou aiga. Aua o lea na fesili le Atua ia Solomona po o le a le mea e manao ai, pe manao i le pote, pe manao i le tamaoiga? Ae tali Solomona e manao i le pote. Aisea? E silafia lelei e Solomona, o le taui o le pote o le tamaoiga.

O le mataupu lona lua, o le leai o se meaai, leai se tupe e ave e le matua i le tamaitiiti e faatau ai lana lunch. O le tasi lea faafitauli e tupu tele mai pea i aoga. Ia ona ou toe talosaga foi lea i le Palemia ma le Afioga i le Minisita, e a pe a fai se tatou polokalame e fai ai meaai a tamaiti, the lunch program. A tagai i ai, e tele atu faamanuiaga a Samoa e maua ai nai lo le tupe e alu ai. Muamua, e tusa e 40,000 tamaiti aoga i tausaga i lalo o le tulaga lua. Afai ae tatou faia se polokalame faapea e \$3:00 i le lunch foi lea e ave e le tamaitiiti i le aso, e 40,000 foi na o niu e alu ai, e le gata i lena o fai, o mago, o fala, o a laau aina o lo o i ai

o le esi. O nei uma fua o faatoaga, e le toe tau suea se maketi e ave i ai ia fua o faatoaga a le Atunuu ma e le toe faapea mai foi, ua leai se tupe, aua e mafai ona ave lava e le Itumalo le latou polokalame latou te faatinoaina. Na o se fautuaga, ou te iloa e telē tele le seleni e alu ai, ou te iloa foi, o lo o tele ni faamanuiaga mai fao aemaise lava i mea nei tau aoga e fesoasoani ai se seleni e aumai e fai ai le polokalame lenei.

Ona ou oo atu lea i nai faiaoga, na o se talosaga i lau Afioga i le Minisita, sei e tagai ane i totogi o nai faiaoga, aemaise o le Matagaluega o Tupe. O le tasi lenei galuega e ese le leaga o totogi, ou te le iloa po o le a le umi e fai ai le siitaga o totogi. Ae tasi foi lenei Matagaluega e ese le toatele o ona tagata e omai e lagolago ia tatou fanau.

O le tele o taimi o le olaga o a tatou fanau, o faiaoga. Afai foi la ua i ai nisi aoga ia e tulai mai nei, aua a silasila, ua sili atu i le matua le ave lana tama i le aoga lea e \$800 le pili i le kuata, i lo le ave i le aoga lea na o le \$20. O le mafuaaga, e manao le matua ia maua le manuia lea tatou te talanoa ai, ia 'aua ne'i oo lana fanau i le olaga lea o le maua o se mea lelei. Na ona ou faataatia atu.

A o lenei itula lau Afioga i le Fofoga Fetalai, le paia o le Maota Fono, ou te fia talanoa i le Matagaluega o Faatoaga. E pei lava ona saunoa se tasi o sui usufono, o le Matagaluega lenei o Faatoaga sa taua o le tuasivi o le Atunuu lenei. A tagatagai foi i faamaumauga, e ave lava lau faafetai i le Ofisa o Fuainumera iinei i Samoa, le Statistics, ona o le suesuega ma faamaumauga o lo o faia e le Ofisa lea, e ese le manaia, e te maua uma ai so o se mea e te sailia i totonu o Samoa. O lea foi la o lo o i ai foi faamaumauga i tupe ia e alu imports ma exports, o lo o faamau ai foi le aofai lava o mea tau faatoaga o lo o ave i fafo. A tagai i ai, i le 2002 i le 2003, e tele atu tupe na maua mai a le Ofisa o Faatoaga i le export i lo le taimi lenei. O lea foi sa i ai i le Tala o le Tupe le Fale Fasi Manu. O lou talitonuga ma lou iloa, o le Ofisa lenei o Faatoaga, o le tasi lenei o vaega e tatau ona fesoasoani i le polokalame lea e pei ona ou taua, o le polokalame lea o meaai a tamaiti aoga. Afai o i ai se faamoemoe a le Ofisa lenei e fai se Fale Fasi Manu, e tatau ona tilotilo muamua pe tagatagai foi, po o lava ia lafumanu e fai i ai le Fale Fasi Manu, aua i lalo lava o suesuega, e le taitai ona lava ia lafumanu o lo o i totonu o le Atunuu lenei e ono fai ai le poloketi lea. O lona uiga la i lou iloa, e tatau i le Ofisa o Faatoaga ona atinae muamua, aua i lalo o faamaumauga nei, o le tele o le tupe lea e alu a tatou i le aumaia o fualaau aina i totonu, o mea nei o meataumafa e maua mai manu. Ou te iloa ana o se mea e mafai ona fai e tatou a tatou lava oloa i le povi, vaeatu tulou le Maota Fono nei, le meaituaolo, o le moa, o a uma manu o lo o iinei e mafai ona fai e tatou e faatino ai tatou polokalame, ou te talitonu, o le a mafai ona tatou faia lea vaega.

Ona ou oo mai lea i le Ofisa o Galuega. Ou te fia tautala i le Matagaluega lea o le EPC po o le vaega lea o lo o faia le tatou eletise. I le tau o le eletise o lo o i ai nei, e lua tau o lo o tuuina mai i totonu i le mamalu o le Atunuu. Muamua, a faapea e 50iunite e te faaaogaina, alu lea i le tau pe 82sene, ae a ova atu i le 50iunite ona e totogia lea o le \$1.04sene, o lona uiga, na o le \$43.50sene e te maua i le taugofie lea. Ae ova atu loa i luga, o lona uiga ua matua pologa le totogiina o le eletise lenei. O le tau foi lea e \$1.04sene e aumai e le EPC, o lea e ave i Matagaluega a le aufaipisinisi, e tutusa lelei lava le tau lea ua ave i le tagata lenei, consumer, le tagata lea e i ai tatou ma le lautele o le Atunuu, ma le tau o lo o tuuina atu i le aufaipisinisi.

Se faamolemole lau Afioga i le Minisita ma le mamalu o le Kapeneta aemaise lau Afioga i le Palemia, e ui atu i lau Afioga i le Fofoga Fetalai, sei tagai ane, pe le tatau ona faamamaavega lea vaega.

O le vaega lona lua, ou te fia fesiligia le EPC, pe fia se aofai o le eletise o lo o latou tuuina atu fua i nisi o le mamalu o le Atunuu? Ae po o ai foi o lo o faatupea, ae po o fea le vaegatupe e sau ai lea alaga-manuia. Ne'i te'i ua uma ifo le aso, ia ua toe totogi atu e tatou le vaega lea. O lea la, na ona ou talosaga atu, faamolemole pe mafai ona aumai se faamalalamalama i lou nei sui usufono, po o ai uma lava ni tagata le mamalu o le Atunuu o lo o ave fua i ai le eletise e le Ofisa o le EPC?

Ona ou oo lea i le Ofisa o Galuega. I totonu o le Tala o le Tupe, e \$29miliona o lo o faataatia mai i le faiga o tatou auala, atonu lau Afioga i le Minisita e lavea atu ai le auala galue o lenei nuu i lenei \$29miliona. O lau fesili lava i le Afioga i le Minisita ma le mamalu o le Matagaluega, po o a ni auala na tatou faia, aisea le mea e ala ai ona leaga soo a tatou auala? Ou te iloa o isi auala pe faatolu, faafa ona fai. O lau fesili la, afai e le lava le seleni o lo o ave i le kamupani po o le konekarate lea ina ia faia lelei auala pe timu, pe afa, pe tsunami e lelei lava auala, o le a le mea e le fai ai? Aua o lou talitonuga, e sili atu le fai ia lelei i lo le fai na o sina vaega ina ia vaai atu le Itumalo o la ua ta mai, ia faamimita ai le vaega lea ua uma ona ta o latou

auala, ae atonu o lea o le a amata i lenei Itumalo i le faiga o auala ia, ia fai ia lelei, o le polokalame o se polokalame lelei.

O le isi vaega ou te fia fesiligia i i faamolemole, ua ou vaai soo lava i konekarate nei, e faaaoga mea o lau laau mea o lala laau e faatino ai le galuega. Ae e talitonu tatou, e le mafai ona mau ai ia maa ma le ta lea i le faaaogaina o le lala laau e faaoga e le vaega e fufui i totonu o le ta, ia ona taumafai lea e tuu i luga o le vaega. Afai o le tupe lea o loo faaalu i le faiga o auala, sei tagai ane lau Afioga faamolemole i konekarate nei, poo le a le mea e le faatauina mai ai ni pulumu lelei poo ni meatotino lelei e faatino ai le galuega, aua o lea ou te vaai atu i le Tala Faatatau Autu o le Tupe, e fai lava sina tele o le tupe lea e alu i le vaega lea, ma e ala foi ona tele ona o le mamalu o le Atunuu, e tatau ona lelei mea e feoai ai.

Ona ou oo ifo lea i le Matagaluega, ou te iloa o lau fesili lenei e ui atu i le Matagaluega o Tupe lau Afioga i le Minisita, i le faaaogaina o aseta a le Malo. Ou te le tetee i le faaaogaina o aseta a le Malo e le mamalu foi o le Atunuu o loo faatinoina le vaega lea, e manaia foi le auala lea na faatu atu e le tasi o sui usufono. Ae i ai lou manatu, pe le tatau ona faamalosi ni nai fuafuaga poo ni nai Tulafono ina ia tau sefe mai ai le penisini e faaoga, aua a ou fesili atu nei faamolemole pe mafai ona faataatia mai se tau o le penisini e alu i aseta uma lava o taavale a le Malo i le masina, e le gata i lenei, ae o se tau e alu i le faatauga o taavale uma lava a Matagaluega a le Malo i le tausaga; pe ou te fesili atu foi i le lima tausaga ua tuanai ae tagatagai ane i ai i penisini o loo faaaogaina ai.

Ou te iloa lava o se mea taua le faaoga ina ia mafai ona fai galuega a le Matagaluega ae taua foi ona tatou tilotilo ona o lea e fai sina tele o le tatou aitalafu, o fea se mea e ono maua ai se tatou tupe e sefe mai ai, ona aumai lea e faatino ai le polokalame lea o meaai a tamaiti o le aoga.

Ona ou oo mai lea i le Matagaluega o Leoleo, Falepuipui ma le Tinei Mu, e momoli lau faafetai i lea foi auaunaga i le Matagaluega o Leoleo i le Minisita ma – tasi foi lenei Matagaluega ou te iloa e tatau ona tagai i ai le paia ma le mamalu o le Malo i le faaleleia o latou taavale, o latou meatotino e faaoga i le susesueina o soo se Tulafono aua e tele ina tatou faitioina i nisi taimi, ae a tagai i ai i taavale ia e faaoga e leoleo, ia o isi aso e sau le taavale a leoleo e tasi le moli. Ia, e tatau ona tagatagai ane i ai faamolemole i le faaleleia o meatotino nei, aua o i, o le puipuia lea o le saogalemu ma le soifuaga o tagata Samoa.

Ona ou oo mai lea i le Matagaluega o Fesootaiga ma Faamatalaga Tekonolosi, ia, leaga e fou le sui usufono lenei, ae ou te fia fesiligia lava le faiga o Tulafono e faaaogaina poo le totogiina o lenei auaunaga. O le mafuaaga o lau fesili, tasi lenei auaunaga e ese le taugata pe a e alu i fafo. E aupito taugata lava lou vili mai i Samoa. Poo fea lava e te alu i ai, e le mafai, ona faapea lea o le aiga poo fea la e te tafao ai, vaeatu le paia ma le mamalu, ae le iloa, e le mafai ona e vili mai i le taugata.

O le mea lona lua, pe mafai ona toe tuutuu ifo i lalo le tau o a tatou telefoni ia feaveai, e pei o auaunaga ia a le Digicel ma le SamoaTel. Aua e pei ona silafia, faafetai foi i lea auaunaga ua soo ai Samoa. Ae a outou tagatagai i ai, o le auaunaga lenei, o le polofiti uma e maua i le auaunaga lenei, e sau lava i le taga a le tagata Samoa, aua foi e leai se export poo se mea e maua mai ai se isi tupe a le vaega lenei. Afai la o lea na faasoaso le miliona i e fai saofaga i ia foi auaunaga, ia o le miliona lenei e sau i lau taga, e sau i le taga a tagata uma o le mamalu o le Atunuu. Ia afai ua oo faapea ni polofiti, e a pe a toe tagatagai ane ae toe tuutuu i lalo le tau o le credit lea e taua o le credit, poo le tuutuu ifo laitiiti i lalo pe faaafa, pe aveese se isi sefulu sene, ae tuutuu i lalo, ua oi le Atunuu. E moni lava i le auaunaga faigofie, ae tatau ona tilotilo ma tagatagai i ai.

Ou te faafetai i le Pulega o Tagata Asiasi Maimoa Mai Fafo, aua ou te tau manatua o aso ia, sa le manao Samoa e aumai ni tagata tafafao mai i Samoa, ona o le taumafai e puipuia le aganuu, puipuia alo ma fanau, ae peitai, o le tasi lenei alamanuia o le Atunuu. Ou te faafetai la i le Pulega o Tagata Asiasi Maimoa Mai Fafo. Na pau lava lau talosaga i le Pulega, sei tagai ane i se vaegatupe e fesoasoani ai i le fale o le Mau lea a Samoa, aua tasi lea mataaga e mafai ona o atu tagata tafafao maimoa mai e matamata ai. Aua e le gata i lea, e mafai foi ona fai ai ma falelalaga a le komiti o lenei Itumalo faamolemole lau Afioga i le Minisita, sei toe tagai ane.

Ou te toe talosaga atu i lau Afioga i le Palemia poo le Minisita o Eleele, sei e tagai ane poo a ni fanua latalata mai i le taulaga atonu e le ono faia ai se auala galue i Falelauniu poo Vaitele poo fea se mea o i ai nai selau eka lenei sei faamatuu ane i si o matou Itumalo, ua leva ona fia galulue le Itumalo nei tei ua outou faapea e le galulue, a o se Itumalo e galulue tele.

Ia ma le faaiuga o lou manatu, i le vaega lea o le Siosiomaga. E pei ona tagai i ai i le Itumalo lenei o Faleata Sasae, e pei o i lea e tua i ai o le gataifale, e le gata i le paa, o le u'a, a o le tugane, a o lea toeitiiti lava uma le togatogo ona faatau, lea e i tua atu o Vaimoso. Ona ou fesiligia ai lea o le Siosiomaga, aua o le latou lava lea mataupu e alu atu i le Televisi, ia faasao togatogo, faasao laau e latalata i le sami, a o lenei ua toeitiiti uma ona ta i lalo le togatogo lea.

O le isi vaega ou te talosaga atu ai, sei toe tagai ane lava i le treatment plan lea, poo le vai foi lea o le tane lea e faamama ai le otaota poo le vai lea e faasau i totonu o le taulaga, ona o le vai lenei o loo faaalu i totonu o lenei Itumalo, tusa e faaalu agai i o i tua mai o Vaimoso. Ia, atonu o lea ua i ai le tatou Matagaluega foi lea o le SROS, sei tagai ane pe mafai ona aumai se sample, se vaega o le vai lea e faaalu i le sami, sei suesue ane pe le ono afaina ai le togatogo, ae le gata i lenei, a o figota uma foi o loo i ai iina aua e le o le taimi nei, a o le lumanai. O lea ou te talosaga atu ai ma lou agaga faaaloalo.

Faafetai tele lau Afioga i le Fofoga Fetalai. E momoli le faafetai i le Maota Fono nei i lau Afioga i le Palemia, le Sui Palemia ma le mamalu o le Maota, ae o le manumanu i le taimi, o lea o le a faaauau ai le lauga a lenei auuuna.

Lau Afioga i le Fofoga Fetalai, ou te fia tautala i le Tala o le Tupe a le Pulega o le Suavai. E muamua ona momoli la'u faafetai tele i le Pulega o le Suavai ona e faalē tele se faafitauli o i ai i le suavai o lenei Itumalo, ae silasila foi le mamalu o le Maota Fono nei, o le punaoa lenei o le suavai o lo'o tele ina alu atu i Faleata Sasae lo'u Itumalo. Masalo e silafia lelei e le Afioga i le Minisita o Tupe, ona o tua tonu o lona maota lea e tele ina i ai ia vaega. O la'u matau atu i le tele o saunoaga i le aso ananafi a nisi o sui usufono, e pei o le suavai lava le isi faafitauli. O le saunoaga la a le sui o le Pulega o le Suavai sa faapea ai lana faamatalaga atoa foi ma faamaumau o lo'o i ai, "E tusa ma le 60 pasene pe sili atu foi le suavai o lo'o alu maumau po'o le leakage." O le suavai lea e le o faaogaina a'o lo'o maumau. O lona uiga pe na o le 40 pasene o lenei suavai lea e inu ai Samoa. A tuu i se isi faaupuga, ana le alu maumau lea suavai, e mafai lava ona inu fua Samoa aua o lea e 60 pasene o le suavai lea e alu maumau.

O la'u fautuaga i le Afioga i le Minisita o lo'o i ai lea Faalapotopotoga, faamolemole se'i taga'i ane i lenei faafitauli aua afai o lea e 60 pasene le suavai o lo'o alu maumau – e sa'o e le o se faafitauli o aafia ai na o Samoa ae e tele atunuu o lo'o i ai lea faafitauli, ae e tatau ona i ai se fuafuaga e faaitiitia ai. A faapea e 30 pasene o lo'o alu maumau, e mafai ona inu Aleisa lea na talosaga i se suavai, e mafai foi ona inu ai Faleasiu lea na talosaga i se suavai. O le mea lea se'i faamolemole le Pulega o le Suavai, tagai ane i lea auuunaga aua o lea e alu atu i tua o Faleata ae le o tagisā lava Faleata i le suavai, ona o lea lava e faasoa atu i le mamalu o le Atunuu.

Lau Afioga i le Fofoga Fetalai, ona ou te iloa o lo'o tele nisi o le Maota o lo'o fia saunoa ma o le a ou usitai foi i lau faasilasilaga, o lea ua maea ai la'u lauga, ae e momoli la'u faafetai i lau Afioga i le Minisita o Tupe aemaise o le Matagaluega o Tupe, faapea foi Matagaluega uma a le Malo mo le galuega maeaea sa faatinoina ma o le a faatinoina foi.

E momoli foi la'u faafetai i lau Afioga i le Palemia, lau Afioga i le Sui Palemia aemaise le mamalu i le Kapeneta. E pei lava ona ou fai atu, e le o se galuega faigofie a'o se galuega faigata ona o lo'o outou amoina lo tatou Atunuu, ae na ona fautu atu. O a foi ni mea ua talosaga atu ai le Itumalo, ou te iloa ona o le utiuti o le seleni o lo'o i ai, aua a faatino uma talosaga a sui usufono sa talosaga atoa ai ma nisi o le a talosaga atu, e le iloa po'o fea o le a aumai ai seleni e faatino uma ai ia manaoga, ae ou te iloa o lo'o i'ina le tofa ma le faautaga e faasoasoa ai le tamaoiga o lo tatou Atunuu.

Ou te momoli atu foi le faafetai i Faaululuga o Matagaluega. Afai foi ua i ai se upu ua pā'o-papa i la outou faafofogaaga; o motugaafa lava a le sui usufono mo Faleata Sasae, ua na o nai fautuaga ma timaiga e faataatia ane i ou autafa, afai e aoga, ia viia le Atua.

Lau Afioga i le Fofoga Fetalai, faafetai mo le avanoa. Tau ina ia alofa le Atua ia foai atu pea i lau Afioga le malosi aemaise o le manuia aua le taitaiga o le Fonotaga.

Ia manuia le Maota Fono nei ma ia manuia le Itumalo o Faleata Sasae o lo'o faafofoga mai. Faafetai.

21 IUNI 2011

Afioga SOOALO MENE (Gagaifomauga Nu.2): E momoli atu la'u faafetai i lau Afioga i le Fofoga Fetalai e tusa ai ma le avanoa ua tuuina mai e tuuina atu ai se sao o lenei Itumalo o Gagaifomauga Nu.2,

aua le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012.

E manatu lau Afioga i le Fofoga Fetalai o lea ua maea ona e faa'ula ma faatiti le Ta'ui Paia a le Atua aua lo tatou va tapuia ma Lona Silisili Ese. I le ua ulu foi la le Ū i le vateatea ma ua ofi atu i le Lagi paia e Afio ai le Tapaau e Tasi o Samoa. O Ia o le To'ala Faaautama o mea lelei uma. Fai mai e 'ofu i le Viiga, e pale la'ei i le Faaneetaga ma Lona mamalu e o'oo'o i tuluiga o le lalolagi uma. Fai mai e aliita'i i ai tagata soifua uma ma meaola na Ia faia. Faamalo faafetai mo le Taulaga-osi i lenei taeao. Ia tatou fusifusi ia i maea ma faaee atu i Nifo o le Fata Faitaulaga ina ia mālie ma nanamu i le faafogafoga mai a lo tatou Matai i le Lagi. Ia taalolo la le pule a le Atua ae nu'u faa-Tini o Tausala i Ana Auauna o lo'o tala'ia le feau ma le galuega a le Atua aua o le Tao lea a Samoa na velo i le Lagi e nonō ai so tatou gafa i le Atua, lea ua mamalu ma paia ai Tiafau nei.

Lau Afioga i le Fofoga Fetalai, o Samoa o le Atunuu ua uma ona tofi, ua taoto foi a'o 'Ai o Fei'a ona tulaga masani.

O le Malae foi i Tiafau nei e le toe olo ai se manu pe toe fati ai se galu, aua o le Malae o le Faa-Utugatagi ua atoa i ai mamalu ma paia o Samoa i ona tulaga faalupe, ae se'i se'e lili'a ia Saveasi'uleo e asaasa le o'oo'o tutū o le Tai aua e faigata paia ma mamalu sauo'o o le Fua lea ua olo, o sui usufono mamalu, o sui-a-Faipule na fā'ia mai le Fui'fui lea ua tatou i ai i lenei taeao. Ona ou faapea lea, ou te mua'i faatulou atu i lau Afioga i le Palemia ma lau Kapeneta, e faatulou atu i lau Afioga i le Fofoga Fetalai, Afio le Taitai o le Itu o lo'o agaia le Faigamalo, afifio foi le mamalu faalupe i sui usufono uma o le Palemene Lona XV o le Malo Tutoatasi o Samoa.

E faatalofa atu foi i le Failautusi o le Fono Aoa aemaise o Faauluuluga o Faalapotopotoga ma Matagaluega a le Malo ua tatou faatasi i lenei taeao.

Ou te faatulou atu i lau tapuaiga tatalo Samoa aua le alofaiva o lau Palemene i ona faiva alofi-aao se'i sufi Upufai o Malo. Tulouna la le afio o Lana Afioga Mamalu, O Le Ao o le Malo, Afioga Tuiatua Tupua Tamasese Efi ma lau Masiofo, Afio lau Afioga i le Sui o le Fono a Sui Tofia ma lau Masiofo, Afio lau Afioga i le Faamasino Sili ma le Ofisa o Faamasinoga. E faatulou atu foi i le faafogafoga tapuai mai a Taitai o Ekalesia ma le Au Ositaulaga o Suli ma Feoi o le Tala Lelei o lo'o faafale lē malu ma faapuna pa'ulia i tūlāmala e fia o le Atunuu. O lo outou faiva o le fautua tatalo ua manuia ma tofilemu ai Samoa.

E faatulou ia Samoa ma lona vāvāloa aua le paia i Tama ma o latou Aiga, Aiga ma latou Tama, Aiga o Tupu, Aiga o Nofo, Aiga o Papa, Aiga o E'e ma Aiga Tafa'ifa, ae tainane le alalata'i o le Usoga a Tumua ma Pule, Itua ma Alataua, Aiga i le Tai ma le Vaa o Fonoti.

E faatulou atu foi i le faafogafoga tapuai mai a o tatou uso i le Motu i Sasae aua le Susu o Sua ma le Vaifanua, Fofō ma Aitulagi, Saole ma Saleaamua ma le Launiu Saelua, Tama a le Manuatele faapea Tootoo o le Faleula ma le mamalu i le Faleagafulu.

O ou Paia na Samoa e afua mai i le Tai Samasama o le Tuimanua seia pa'ia Fili ma Puletuu na tauilo ai Malo. Tulou, tulou, tulouna lava. E talitonu le taofi lau Afioga i le Fofoga Fetalai, o taeao o Samoa ua faafagogo tagia, ae fia afea i le lauga a Gagai'fomauga Nu.2 ona e le omiomia faa-niu 'ale'ale le taeao nai Sāuā ma le taeao nai Samanā ma le aso nai Tumua. O taeao ia na tofifi ai Samoa, peitai o le taeao nai Mataniu feagai ma le Ata, Faleū ma Utuagiagi, Malaeola ma Nafoga na 'emo ai le uila lalelei, lea ua pine ai Tiafau. O taeao na o le lauga a Samauga ma Safune. A'o lenei aso lau Afioga i le Fofoga Fetalai ma lenei taeao, ou te fia pa'i atu loa i lo matou Itumalo ma lana tapuaiga.

O lea ua maea atu le Amouta ma le Amotai, ua ifo muao foi faigamea o le toe aso nai Moamoamo, ae taalo i le vai le Ataata o le Tama lea na galo i le vaa o Toga. O ata lafoia o se faamoemoe ua manuia ina ua tapatini le 'ai o so outou atalii.

O lea ua pale la'ei foi la outou auauna faatauvaa i le faaeaea ma lau puletō. O lenei ua ou tiu faa-matalā'oa i le faatofalaiga a Tupu o lo tatou Itumalo. Ua ou sapi foi i se faautautaga alualu mamao i Tootoouli o le tatou Falelua Safune ma Samauga aua le afio o Le Tagaloa susū faapea le Alii o le Nuū, alaatai Tulafale ma lo la Toalua, lau Fetalai i le Tuua Tugaga ma le mamalu ia Safune ma Taulauniu. Ae a le faafogafoga mai a Sa'o e Fa ma le Aiga Sa-Peseta? Lau Fetalai le Tuua Sooalo, lo outou Falefa ma le mamalu ia te oe Samauga. Ioe, fai mai a faapupula lo outou soifua ma so tatou ola, ua le ese ma le Inafo sa ave e manu. Fai mai a tuli, e sue i le Foe ae apo i le Tata, ae a oo i le taali'i, fai mai toeaia, o le Taotoga a I'a Sa. O lea

la ua sua ai nei i Faletagaloa ma Lalokava sāsā o uila, aua o lau Lupe sa tu Tula lea ua tu i le Lima. Ua tatou mau lupe maua foi, ina ua asaasa ia i Vai o Malo. Ua gagase ai Faiva o lālō, ae ua tatou fesilafai i Ligoligo a Malo. Ae a le tuu mumusu ma le memumemu a le Aufaigaluega Paia a le Atua, e faasifo i le Ao ma le Po, e faanoinoi ni manū ma faautiuti tagi i le Atua, ina ia taoama Mala ma Puapuaga, ae faapu'e Manū o Malo, ina ia toafilemu la ta faiga filifiliga. A lea ua tini tauao i le Laau o le Faaolataga. Faafetai i lau tapuauiga tatalo.

Le paia e o lo'u Itumalo, malo le lavapapale, malo fai o le faiva. O lea ua inu malie le 'Aila i le vaitafe. Ua matua taumafa foi i le suamalie o le Vai o le Tuiatua. Ua malie le loto ma le agaga i lau faaaloalo ua toto tetele, ma au faamanuiaga sautuafafa o lenei ua ou sapaia faatua eleele.

E le faagaloina foi Afiā isi ona Vao i sui uma sa fia auauna aua le Tofi o lo ta Itumalo. Malo le tau. Malo toa. Malo le taalo faa-Tausala ma faa-Tamalii. O le Tala e fai i lo ta Falelua Safune ma Samauga; 'E feagai Lolua ma Vana', o Samauga, o Safune foi lena. O le ta Falelua e pele i le agaga ma ua soona lalelei lava Oe i le Vasa, aua e te faa-autama i Tupu o Samoa.

E le faagaloina foi Taē o i Atuā, i le Aupuputoa ma le Aufueloloa ma le Aufuefuesisina o si o tatou Itumalo. O tofi uma sa faapea ona asaina le gasū o le Taea, se'i fatufatu lo ta Pale ma fonofono lo ta Titi, ae aoao manogi aua se manuia o lo ta Itumalo. Sa e tu foi i Fao ae laa i Malata, e saposapo mai ni Ua e faasopolia ai le soifua lelei o si o tatou Atunuu pele o Samoa ma lana Faigamalo. Faafetai i lo outou tautua Malo, ua outou faia mea sili e mitamita ai lo ta Itumalo.

E le itiiti foi le agaga faafetai i le Afioga a Safuneituuga Paaga Neri sa tu mai le Foe aua le Sa o lo ta Itumalo, malo lava mo galuega lelei sa faaauaina pea ma matimati mo le manuia o lo tatou Itumalo aemaise Samoa ma lona vavaloloa. Ia viia pea le Atua i lou soifua tautua.

Ia le paia e o lou Itumalo, ioe, ta musu e ne'i pei o le Suagāipu nai Avalua, fai mai e Ao ma Po, ae a'e fua e noa ma se mea na maua. E manuia faiva pe a tapuaia. Ia po maia le Fala, tu'i maia le mulipapaga ma tatalo e talosia ai so outou finagalo o le a ou momoli atu i le Palemia ma le Malo e tauala atu i le Nofoa. Afai e taulu taulu ae to ni Manū o Malo, ona faafetaia lea o le Atua ma patipatia mea silisili ua Ia faia mo i tatou o tagata augavale.

Lau Afioga i le Fofoga Fetalai, o le a taumafai atu loa se vaivaiga o lenei Itumalo i le Tala Faatatau o le Tupe 2011/2012 ma le Tala Faaopoopo Lona Lua 2010/2011. Lau Afioga i le Fofoga Fetalai, o le Tala o le Tupe, o se Tala malamalama ma le manino, pe a faitau auiliili lelei i ai. O le faamoemoe foi o lenei Tala o le Tupe e tusa ai ma le Anava tausi a le Malo, ia faatino pea atinae mo le tamaoaiga o le Atunuu o lo o faataoto mai i le Taiala o le Atinae o Samoa 2008/2012.

Lau Afioga i le Fofoga Fetalai, e fia momoli atu le faafetai i lau Afioga i le Minisita o Tupe, le Ofisa Sili ma le Matagaluega o Tupe mo lenei Tala o le Tupe. A tau matau atu i le lua tausaga faale-tupe talu ai i le faaletonu ma le aafiaga na i ai le Tamaoaiga o le Lalolagi, aemaise foi o le pagatia na i ai le Atunuu i le Tsunami i le 2009, e maeu lava lo outou mataala. Sa faapea ailoga e vave mai se aso e toe sologa lelei ai lo tatou tamaoaiga, aua e le faigofie la outou pitolaau tau le lufilufiina o seleni ina ia faamalieleina vaega moomia e fia faaleleia o le tamaoaiga i ona vaega eseese. Ae ui lava i nei faigata ma fita, sa outou tauivi pea, aua o aso leaga e iloa lelei ai le Tautai matapalapala. E pei la o lenei aso, ua tatou molimauina i le Tala o le Tupe le alualu pea i luma o le tamaoaiga o le Atunuu. I lona aotelega o lenei Tala o le Tupe, ua faamauina ai o le a faatupulaia le tamaoaiga i le 3.1% 2010/2011, ae 2.3% 2011/2012. A faatusa i le lua tausaga talu ai, na faamauina le faaitiitia o le tatou tamaoaiga i le 5.1% 2008/2009 ma le 0.2% i le 2009/2010.

Ua faamauina foi le faaitiitia o Tupe Pau i le 6.5% o le tamaoaiga i le tausaga faaletupe 2011/2012, pe a faatusatusa i le Tupe Pau lea na faamauina i le 9.4% i le 2009/2010 ma le 9.3% i le 2010/2011. O lo o atagia mai foi i faiga faavae a lenei Tala o le Tupe, o le isi lua i le tolu tausaga e toe ausia ai paleni faatulagaina o le Tala o le Tupe. Ma le isi lau Afioga o lo'o faamauina foi le faasiliga o le Tala o le Tupe 2011/2012, e tusa lea ma le \$3.8milion. E ui la ina maualuga foi a tatou nonogatupe ma tului, ae o lo o taoto mai i le faiga faavae a lenei Tala o le Tupe, le tulaga e gafatia lava e le tatou Malo ona toe togitogi.

Lau Afioga i le Fofoga Fetalai, pei o mea nei ua ou taua, o ni faailoilo lelei ia i le aotelega o le Tala o le Tupe, e faailoa mai ai le lelei tapena ma le faafoeina o lenei Tala o le Tupe. O lea ou te faapea atu ai

ma lou faaaloalo, ua matua lagolagoina lava e lenei Itumalo o Gagaifomauga Nu.2 le Tala o le Tupe ua faataoto mai nei i luma o le Laulau a Fono.

Lau Afioga i le Fofoga Fetalai ma le mamalu o le Maota, o le a oo atu loa se faafetai i le Faigamalo i le Paeaiga talu ai e tusa ai foi ma atinae sa faapea ona faatinoina i lou Itumalo. Ua maea ma matagofie taligalu i Lefagaoalii, ua faapena foi taligalu i Fatuvalu ua maea faatino, faamalo faafetai.

E toe talosagaina le fia faasopolia o ia taligalu e agai atu i Faletagaloa ma Matavai, pau lea o le vaega maualalo o lou Itumalo e manaomia tele ai taligalu, aua le taofiofia o le sami mai le agai mai i le aualatele.

Ia ma le isi lau Afioga i le Fofoga Fetalai, o le tulaga maaleale o mala faalenatura e ono oia ai vaega maualalalo ma lamatia ai le soifua o le mamalu o lenei Itumalo o lo o nonofo ma pāpā-ao i lea vaega o lo matou Itumalo. Ua maea foi ona faata auala agai i uta i vaega o loo nofoia e aiga, auala o Lefagaoalii, Matavai, Faletagaloa ma Fatuvalu. Faafetai i lau Afioga i le Minisita mo Galuega, Felauaiga ma Atinae Eseeese mo ia auala ua faafaigofie ai femalagaiga i nofoaga i uta, tau latalata mai ai foi ma auala galue i tai. O le talosaga e manaomia pea le toe faaopoopo atu i uta o nei auala galue aua ua leai lava se vaega o lenei Itumalo e le o malosilaga o le galueaiina o le laueleele. Ma le isi talosaga lau Afioga i le Minisita, ua oo atu auala i uta i le vaega lea e nonofo ai nisi o aiga o lenei Itumalo, ae peitai, e le'i oo atu le vai ma le eletise i Faletagaloa ma Fatuvalu. E matua manaomia lava foi ma ni moli i nei auala ona o le pogisa tele.

Lau Afioga i le Fofoga Fetalai, toe lava o auala o Paia ma Samauga e le'i oo i ai le faasoia a le Malo. O le auala lenei o Paia ua matua faaleagaina, masalo e silafia lelei e le konekarate fai auala ma so o se galuega i lea foi itu o Savaii, o Paia lea e la'u mai ai le maa e taua tele ia latou galuega. O nei la felauaiga, ua matua faaleagaina ai lenei auala. O le talosaga ma le faaaloalo i lau Afioga i le Minisita mo Galuega, Felauaiga ma Atinae Eseeese, sei silasila ane i le auala lea, ona e le o se auala galue, o le auala e agai atu i le totonugalemu o Paia.

Lau Afioga i le Fofoga Fetalai ma le mamalu o lenei Maota, o lo'o i le totonugalemu o lou Itumalo le laufanua lafulemu e taua o Ologogo, lea sa fai ai le atinae a le Esetete Tausi i ia aso. O lenei fanua pe a ma le 1,600 eka lona tele, o lo'o i lalo o le Faalapotopotoga o Eleele a le Malo. Sa talosagaina e lenei Itumalo le faamatuuina atu o lenei fanua mo ana atinae, ma sa talia e le Malo i lalo o tuutuuga, e lisi atu i le Itumalo i le \$100 i le eka i le tausaga ma le aiaiga, o le a faatinoina e le Faalapotopotoga ni nai auala kolosi se lua pe tolu e fesootai i totonu o lenei fanua. O le vaevaega o lenei fanua e 100 eka Safotu, 900 eka Samauga, ae 600 Safune. E lua ni vaega e fia auala atu ai le talosaga lau Afioga i le Fofoga Fetalai mo lenei fanua. Muamua, o ni auala i le fanua. E i ai le auala na fai e le Malo i le taimi na faatino ai lea atinae ma sa matauina ai o se atinae sa manuia. O le mau foi a nai toeaiaina o lou Itumalo, fai mai o le laufanua lenei a pae povi, sei tulou i so o se vaega o Samoa, ona avatu lea i Ologogo e faapepeti mai ai. E oo foi i le talo fai mai e sosolo e pei o le ufi.

O lona uiga lau Afioga, ua le ese le fanua lenei ma Kanana i le Tusi Paia lea e fai mai, e tafe ai le suasusu ma le meli. Ae ua outou silafia lelei, e le mafai ona tafe ai le suasusu ma le meli, seiloga ua galueaiina le fanua.

O le uiga o le faamatalaga lau Afioga, e fia soosoo atu le auala o Samauga, seia tau tonu i le ogatotonu o Ologogo ona fai atu ai lea ma isi auala i vaevaega i totonu o lenei fanua, e pei ona faataoto mai e le Faalapotopotoga o Eleele a le Malo i aiaiga o le Lisi. O le auala foi lenei o Samauga ua silia ma le 30 tausaga talu ona asaina lenei auala, e le faataina, ae sa taumafai lava i le malosilaga o nai tuua sa i ai i lea taimi. O le mafuaaga foi lea o le mutu o le auala e le oo i Ologogo. O le talosaga la ma le faaaloalo i lau Afioga i le Minisita mo Galuega, Felauaiga ma Atinae Eseeese, e le tagisā foi i ni aualata, na o sina masini lava se'i toe asa lenei auala ua fia oo si o matou nuu i Kanana.

Lona lua, o le talosaga lau Afioga i le Fofoga Fetalai, o le faaitiitia lea o le totonu o le Lisi. I le lua tausaga talu ai na tali atu le Malo e agai mai loa e totonu o le Lisi ma faaaoaga le fanua. E le'i tali 'a'aina le finagalo o le Malo na faaoo atu, e lagona le agaga faafetai ma le agaga fiafia ona ua faamatuu atu fanua mo le lisina, ae peitai, e faigata tele ona asa i le ogatotonu o lenei fanua, ae o le totonu o le Lisi ua outou silafia e pei ona ou taua, e \$90,000 Samauga, \$60,000 Safune ae \$10,000 Safotu i le tausaga pe a fua i le vaevaega a le Faalapotopotoga na tuuina atu.

O le talosaga vaivai a lenei Itumalo i lau Afioga i le Minisita mo Eleele, lau Afioga i le Taitai o le Atunuu ma le Minisita mo Galuega, Felauaiga ma Atinae Eseeese ia alofagia nei auala. Ae le gata foi i lea, pe e le

toe maua sina isi faamama-avega i le tologiina o le lisi. Ua matou fia oo i le tuasivi, ae paga lea ua noatia matou e le gata i le auala a’o le tologi foi o le lisi.

Faafetai atu i lau Afioga i le Fofoga Fetalai, ao lenei taimi ou te faamalulu atu i lou Itumalo pe afai ua outou le maua nisi vaega o le tatou talosaga ua tuuina atu i le Malo. Ae aua tou te popole sei oo i le faaiuga o lenei vaiaso ona ou alu atu lea e avatu o tatou manaoga ua maea ona folasia i luma o le Malo.

Lau Afioga i le Fofoga Fetalai, ou te talitonu ua faafagogo tagiao i le faafogafoga mai a le Maota i lenei talosaga. Ua tala lo matou nuu ma lo matou Itumalo, ua uma atu tupu ma e’e o lenei Itumalo sa latou tauaveina le Nofoa, e lei mafai lava ona ola lenei nuu i le 24 itula o le suavai. E toe talosagaina lau Afioga i le Minisita mo Galuega, Felauaiga ma Atinae Eeseese sei e toe silasila ane i le vai o lenei Itumalo, e ola i le 6 i le taeao ma pe i le 10 i le taeao, ona toe ola lea i le 5 i le afiafi ae pe i le 9 i le po. O lona uiga e na o le 8 itula e ola ai le suavai i lona tuufaatasiga i le aso e tasi. O le talosaga afai ua le maua ni punavai e toe maua ai se suavai faaopoopo e ola ai mo le 24 itula, pe mafai ona toe faaopoopo se isi valu itula e faa-fuluono ai itula e ola ai lo matou Itumalo. E talosagaina ina ia amata mai i le 6 i le taeao seia oo atu i le 10 i le po.

O le falemai faa-Itumalo i Safotu e na o le faatasi lava i le vaiaso ona oo atu le Fomai, o le isi ono aso e tuli mamao lava Tuasivi. O le talosaga i lau Afioga i le Minisita mo le Soifua Maloloina, mo se fomai tumau pe a tusa ai ma fuafuaga talafeagai a lau Matagaluega, a lei foi pe maua ni aso se lua e faaopoopo ona manaia lea o le faamamaavega mo lo matou Itumalo.

Lau Afioga i le Fofoga Fetalai, e le itiiti le agaga faafetai i le Malo mo vaega tau Aoaoga. O loo faagasolo ona fausiaina le faleaoga faa-Itumalo o lo matou Itumalo o Alofi-o-Taao i Safune, i lalo o le polokalame faaauau a le Malo o loo fai paaga faatasi ma le Faletupe o Atina’e o Asia. Ou te talitonu o le a matua siitia ai le tulaga o aoaoga e ala i le maua o se siosiomaga lelei ma tapena mo alo ma fanau a lenei Itumalo. O le talosaga i lau Afioga i le Minisita, ina ia faatotoga uma lenei Aoga i vaega e moomia faaonaponei ina ia matua siitia ai le tulaga o aoaoga aua nai fanau. A fou foi ma lelei meatotino e faaogaina e mautinoa ua matua faaatoatoaina foi le auaunaga a faiaoga ma tinoū ai foi fanau e faatino o latou tiute faatasi ai ma le lagolago a le Komiti, o matua ma aiga. O le tausaga na tea nei sa umusaina ai le faleaoga o lo matou nuu i Samauga ma Lefagaoalii i lalo o le polokalame a le Malo ma Iapani, ua maea le faleaoga ao loo taatia pea le vaega lona lua o lenei atinae e fia faaleleia ma fia faamaeaina. Sa auai atu sui usufono o le Malo, ou te manatua foi sa auai atu ai foi ma lau Afioga i le Fofoga Fetalai, ma sa outou molimauina uma e lei taitai ona oo i se tulaga e ono faaogaina ai lenei malae. O lea foi aso sa outou saunoa mai ai o le a sauni mai le Malo i le tausaga fou e faaleleia lenei malae mo nai alo ma fanau, o lona uiga o le tausaga faaletupe lenei o loo tatou talanoaina.

Lau Afioga i le Fofoga Fetalai ma le mamalu o le Palemene, e le faaitiitia le agaga faafetai i lau Afioga i le Palemia ma le Malo i le faamamaavega i nai aiga ma matua aua le polokalame i le tologiina o pili o tamaiti aoga. Faafetai ua e aapa lava ina ia aua nei misi se isi i lau faaso. Ua maua uma foi e tamaiti avanoa tutusa ina ia aua nei vale tuulima lo latou lumanai. E le gata i le ausia o le manulauti o le meleniuma ina ia aoga uma tamaiti i aoga Tulaga Lua, a’o le tamaoiga foi lenei o le atamai e le mafai ona satia i ni mala faalenatura. O lona uiga o se polokalame lelei tele lea e tali atu ai i le limavaivai ma le le tagolima o loo tatou Atunuu. O le talosaga lau Afioga ina ia aua nei muta le suauu i le kate.

Lau Afioga i le Fofoga Fetalai, o nai moomooga na faalupe naumati o lenei Itumalo o Gagaifomauga Nu.2. Ou te faamalulu atu i le Maota faapea le tapuaiga a Samoa, e potu le tautai ae le atoa atu i liu o lona vaa. O faiva o lima tautala o lou lima foi e paia ai ou mata. Afai ua sala se gagana ma se lafoga, sala ia ia Vala, faamagalo se leo o le Falelua. Ona faapea lea o se leo vaivai o lenei Itumalo, o le a seu le vaa o Safune i Taao i Faletagaloa, seu foi le vaa o Samauga i Lalokava o tua o Finao ou te tafao ma mata toaga. Ae aumaia le filemu ma le alofa o le Atua Silisili Ese e faalava tapui ai lo tatou taeao paia ma le mamalu.

Ia manuia tele lau tapuaiga Samoa, manuia tele lau Afioga i le Fofoga Fetalai ma maua sou finagalo aua le faatautaia o le Maota. Ia manuia lau Nofoaiga.

Lau Afioga i le Palemia ia mau pea le toovae ma ia lototele e tautai taofi taumuli pea le Sa o Samoa ina nei satia i ni matagi vale. O oe o le lafogaseuga o lenei Maota. O mea lelei, o mea feololo lona lelei ma mea e matua le lelei, e faaee uma atu i lau Afioga. Ia manuia lau Afioga i le Palemia.

Ia manuia le Kapeneta ma la outou galuega fita aua le lufilufiina o galuega mo vaega eseese o lo tatou tamaoai ma ia outou alofagia le talosaga a lenei Itumalo ua faataoto atu i luma o le Laulau a Fono.

Le mamalu o sui usufono uma o le Palemene, o outou mama na, ia sagai ane ai o le tai e faafulu la outou tofa saili ma le tofa fetalai ina ia mamau tuitui ma lago le Sa o Samoa. O au faiga filifiliga ma au faiga faaiuga i le tuufaatasia o Tulafono, ia fe-molimaua'i Samoa ma ia ola i lou alofa, a ia silisili ona mitamita ma viia ai Lē o loo Faavae ai lo ta Malo, o Ia foi na faia i tatou i Lona faatusa Paia, o le Tama, le Alo ma le Agaga Paia.

Soifua.

21 IUNI 2011

Tofa LEFAU HARRY SCHUSTER (Vaimauga Sisifo): Faafetai i lau Afioga i le Fofoga Fetalai mo le avanoa. O le a ee ia i ulugalua liaiga o le tai i le paia o le tapuaiga a Lana Afioga Mamalu O Le Ao o le Malo ma le Masiifo, le Sui o le Fono a Sui Tofia ma le Masiifo. Le Faamasino Sili ma le vasega o Alii ma Tamaitai Faamasino faapea le Ofisa o Faamasinoga.

Afio lau Afioga i le Palemia ma le mamalu o le Kapeneta.

O Ofisa Sili o Pulega ma Faalapotopotoga a le Malo. Afio lau Afioga i le Fofoga Fetalai ma sui usufono o le Palemene o Samoa.

E moni ua mautu le tai avea ae ou te faatulou atu foi i le paia ma le mamalu o Samoa, le paia o Tama ma o latou Aiga, Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te faatulou foi i le tapuaiga a lou Itumalo o Vaimauga Sisifo i le paia o Alosina le Afioga Seumanutafa ma Toomalatai, le Fuaifale o Salevalasi, le Faletulou ma le Vainalepa aemaise upu ia te oe Tuisamau. O le paia foi lea ia i laua o Matua i le Afifio o Usoalii, Susu le Alo o Malietoa, alaatai lau Fetalai ia Atoa, tulouna foi Tofaeono ma Tama ma le mamalu ia te ouluna na tai ma le nofo a ituaiga Fuata, afifio foi Usoalii, Aiga, Susu Alo o le Malietoa ma le mamalu o le Aiga Sa Taga, afifio foi Soosialo, Aiga ma Faleupolu.

Ou te faatulou atu foi i le paia o fata faitaulaga e fia o Ekalesia ma talitonuga uma o lo tatou Atunuu o Samoa. Ou te faatulou foi i le tapuaiga a o tatou uso i Tutuila ma Manua, o le paia lava lea ia Sua ma Vaifanua, Fofu ma Aitulagi, Ituau ma Alataua, Saole ma le Launiunasaelua aemaise upu ia te oe le Manuatele ma Tootoo o le Fitiuta.

O le aso o le oooga o le Talalelei, o le oooga foi o tu ma aganuu a Samoa, o oooga o le Talalelei ona ua tatou feiloai i le alofa ma le agalelei o le Silisili Ese. Ua tatou fetaii foi i tu ma aganuu a Samoa ona ua tatou feiloai i le lagi e mama ae le o le lagi o le taape o papa, ua tatou vaelupe maua ae le o le vaelupe saa.

Ou te tulai atu ae lagona le lilia, e lagona foi le faatauvaa, lagona le vaavaa, e lagona lea tulaga ona e faigata sa ma faiga o sui usufono mamalu o Samoa ua aofia i lenei Maota. E lagona foi le faatauvaa pe a fua atu i e sa muai taunuu i lenei Maota i le Paeaiga ua tuanai atu faapea nisi o Paeaiga ua mavae atu, ae aupito sili le lagona o le faatauvaa pe a mafaufau atu i Tupu ma Ee o le Atunuu, o tatou Tuua sa tauaveina finaiga ina ia saoloto Samoa ma pulea e Samoa ia lava. O lea ua tatou maua ai nei le saolotoga ma maua ai se Malo pulea ai lava e tatou lava.

E fia avea lenei avanoa e faafetai atu ai i lou Itumalo o Vaimauga Sisifo. E faatauvaa lou tagata ae faafetai atu i lou Itumalo mo le faatuatuaiga ua avea ai au ma se tasi o sui usufono o le Vaimauga Sisifo. O le a ou taumafai i le mea e gata ai le taumafai mo se manuia o le Itumalo faapea Samoa.

Ou te momoli atu foi le faamalo i lou uso a sui usufono, le Tofa Lenatai Victor Fafoi Tamapua o loo ma seelua i le Nofoa o Vaimauga Sisifo. E eseese Vaega Faaupufai o loo ta i ai ae tasi lava lo ta tiute o le taumafai ni atinae mo le Itumalo aemaise foi o mea silisili mo le Atunuu.

E momoli atu foi le faafetai tele i le Afioga Patu Ativalu Togi II faapea foi Anauli Pofitu Fesili, o i laua sa faia le tiute o le finau mo le matou Itumalo i le Paeaiga ua tuanai atu.

E le o se mea faigofie pe itiiti le galuega sa faia e o tatou tuua, o Tupu ma Ee ma Taitai o Samoa ua tuanai atu. E amata mai lava i le taimi o Siamani seia oo mai lava i le taimi o Niu Sila. Na faigata le auala sa latou uia, e lei faigofie. I le vaitaimi o Siamani na iu lava ina ave tagata o le tatou Atunuu sa Taitai faa-falepuipui i isi atu motu e pei o Guam.

E oo mai lava i le taimi o Niu Sila e oo lava i le soifua o Tupu ma Ee o Samoa na foai ina ia maua le saolotoga ma maua le Pulega lea e pulea ai lava e Samoa ia Samoa. Ua i ai le Palemene lenei ua filifilia ai tatou, tatou te faia ai tonu mo Samoa. O le tulaga lea e tutusa ai Samoa ma talafaasolopito o isi atunuu o le lalolagi i le finau ina ia pulea saoloto. O isi finauga na oo lava ina tau ma e eseese uma lava mafuaga na fai ai nei taua. O isi taua na mafua ona e manao le isi atunuu e faoa eleele ma tagatanuu o le isi atunuu ma latou pulea tamaoiaiga o loo i ai. O se tasi taua matautia o le lalolagi na mafua ona o le lalelei tele o se tamaitai lea e faapea o le lalelei tele o lea tamaitai na folau ai vaatau e afe. E tele lava mafuaaga o taua ae o taua aupito iloga ma taua i le talafaasolopito o le lalolagi, o taua na finau ai tagata mo lo latou saolotoga. Na amata mai lava i le Tusi Paia na taitai e Mose Isaraelu mai Aikupito ona ua matua lelava fai pirimita mo Aikupito. E oo foi nei ona po i le Atunuu lea o Libya, Syria ma Aikupito, o loo tetee foi tagata i le fia saoloto lea ua latou teena ai o latou Taitai.

O le tala foi lea ia Samoa, o le finau o tuua mai le vaitaimi o Tonga, Siamani ma Niu Sila i le finau lava o Samoa ina ia tutoatasi ma pulea e tatou tatou. O le taua la o lenei Maota i le tulaga lea ona o le tau lea sa totogi e tatou tuua sa pulea Samoa ma o totonu o le Maota lenei tatou te fausia ai Tulafono Tau Faaofi. O lau la vaai i le suiga ma le faatuina o Tulafono Tau Faaofi i totonu o le Maota Fono e le o se galuega faigofie, aua e tele itu e tataua ona tilotilo i ai. E tilotilo ma faapaleni tulaga eseese, tilotilo i le tulaga lelei mo tagata lautele. O le faiga foi o Tulafono Tau Faaofi mo tagata lautele e ao ona amanaia le taua o le aiatatau a le tagata e toatasi. E i ai foi le taimi a tilotilo i le taua o le aia a le tagata e toatasi ae tataua foi ona faapaleni le aia lea, i le aia a tagata e tóatele ma o le tiute lea o loo ia i tatou.

O Tulafono Tau Faaofi o le a tatou iloiloaina i totonu o le Maota lenei, e faamuamua ma faatauaina le fausia ma le suiga o Tulafono Tau Faaofi ina ia puipuia ai ma faagasolo atili ai i luma le saolotoga ma aia tataua a tagata. Ia tatou fausia Tulafono Tau Faaofi e maua ai e le tóatele le avanoa e atinae ai o latou aiga ma alaafaga. Ia fausia foi Tulafono Tau Faaofi e maua ai le avanoa e ave i soo se tagata lautele ae le o le avanoa na o se toatasi, se vaega poo se Itumalo e tasi. O se Tulafono Tau Faaofi lea e le talafeagai. O le faatinoina o le galuega, e eseese Vaega Faaupufai ae tasi lava le au, o le au a Samoa. O Tulafono Tau Faaofi tatou te iloiloaina e vaavaai lava i mea silisili mo Samoa. E le o se mea silisili mo tatou poo a tatou Vaega Faaupufai.

I faamaumauga a le Matagaluega o Fuainumera Faamauina i le 2006 e 180,741 le aofai o tagata i Samoa, mai lenei aofaiga e 43,000 tagata poo le 21% o loo alaala i totonu o le taulaga o Apia ma lona talafatai. O loo gasolo pea le Atunuu i totonu o le taulaga o Apia ona o avanoa o aoga, avanoa faigaluega faapea foi avanoa e faatuina ai pisinisi.

O se tulaga lelei le tulaga lea i le sue avanoa o tagata o le Atunuu ae i ai foi tulaga ogaoga e tataua ona tatou tapena i ai. O le tulaga e tapena i ai o le a siitia manaoga mo le faalateleina o aoga tau aoga, soifua maloloina ma avanoa faigaluega. E ao la ona faataatia fuafuaga ina ia mafai e nei auaunaga ona ausia manaoga o le Atunuu o loo gasolo mai i totonu o le talafatai o Apia ae ia lava foi mo e o loo alaala ai. E taua le fuafua mamao ina ia maua pea avanoa aoga ma faigaluega e tausi ai aiga aua a leai ni avanoa o le a uia loa ala sese ma solitulafono e maua ai le tupe.

O le Itumalo lenei o Vaimauga Sisifo e le o se Itumalo faigofie. O le tele ia o ona eseese ma e le o se Itumalo laitiiti foi. E te maua i Vaimauga Sisifo le milionea e matua milionea lava ae e te maua foi i Vaimauga Sisifo le tagata e leai se lima sene e milimili faapea. O Vaimauga Sisifo foi e maua ai alaafaga o loo malosi ai pulega a Alii ma Faipule, ae e te maua foi le tele o le vaega o eleele o loo umia saoloto. E te maua ai foi le tagata foi lea e i ai le kuaka eka, a loka loa le pa ua sa ona e toe ui mai totonu o lou fanua. O le eseese lea e fai ai sina faigata i totonu o le Vaimauga Sisifo, e le mafai ai ona tasi se tali mo mea eseese mo tagata o Vaimauga Sisifo ona e eseese uma lava tagata o loo nonofo i totonu o Vaimauga Sisifo. Ae ui i ia eseese e i ai lava mea e tutusa ai foi ma manaoga o isi Itumalo. O se tasi o faafitauli o loo vaaia i totonu o le matou Itumalo, o le tulaga lea i fanau laiti ua le ave e matua i le aoga ae o e faatau oloa i le ao. O isi fanau e aoga i le ao ae oo i le po ona o lea e faatau oloa ma ua oo i se tulaga e le saogalemu mo latou. E avatu ai le faafetai ma le faamalo i le Afioaga i le Minisita o Leoleo, Falepuipui ma Tinei Mu faapea le Komesina ma le Matagaluega o lea ua amata ona molia i le Tulafono matua nei e faatamala i le tausiga o a latou fanau ma le faia le tiute o le faaoga ma tausia lelei tamaiti.

Lau Afioga i le Minisita o Galuega, Felauaiga ma Atinae Eseeese, o lea e vaavaai atu i le Tala o le Tupe o loo i ai le \$29milionia mo auala ma auala laupapa. O le talosaga ia aofia ai si o matou Itumalo i ia fuafuaga. E tele lava auala o le Vaimauga Sisifo lea ua uma ona faalelei e i ai le auala manaia lea pei se motorway lea e alu atu ia matou i Faleata tau atu i le magatolu lea e i Malifa, ae i ai foi nai auala galue e lei oo i ai le faaleleiga. E sao le faamatalaga foi lea e masani ona fai e le HRPP. “o le mea lelei mo Apia, e lelei foi mo nuu i tua” ae vaai nei tei ua le tilotilo mai i le Vaimauga Sisifo ae faamamafa le ave i nuu i tua ae o loo manaomia foi e Apia se fesoasoani a le Malo i tulaga ia.

Lau Afioga i le Fofoga Fetalai, o se tasi foi o faafitauli o loo aafia ai lenei Itumalo o le aafia lea o nisi vaega o le taulaga i lologa. E le o taimi uma e tupu ai ae tupu i taimi o timuga. Peitai la, e i ai le popolega ona o le tulaga i le soifua maloloina. O lea e talosagaina ai le fesoasoani a le Minisita mo Galuega, Felauaiga ma Atinae Eseeese ma le Matagaluega.

Lau Afioga i le Minisita mo Leoleo, Falepuipui ma Tinei Mu, o se tasi o faafitauli o le tupulaga lea e vevesi i totonu o fale ava i le taulaga i Apia. E le gata i lea tulaga ao le tele foi o taavale ma meatotino a i latou o loo tafafao mai faleaiga ma fale ava i le taulaga ua faaleagaina e nisi o tupulaga ma e pei ona taua e le sui usufono mamalu ananafi e leai se turisi e fia sau i totonu o Samoa pe afai o le tulaga lea e oo i ai le tatou Atunuu.

Lau Afioga i le Minisita o Punaoa Faalenatura ma Siosiomaga, e tutusa lava le Vaimauga Sisifo ma isi Itumalo i le tulaga lea o le vai. E utiuti foi le vai i Vaimauga Sisifo, aemaise lava taimi o mugala. E tape paipa i uta ia matou i le mauga ae tau faasoosoa le vai i le taulaga, atonu o se tulaga lea e maua uma ai lava Itumalo. O le popolega e ogaoga atu i le taufaasoa o le suavai, a outou tagai atu i tua mauga o Vaimauga Sisifo o iina lea e tapue mai ai le suavai ae ua amata ona nofoia. O lona uiga o le a amata o faaitiitia le vaega e pue mai ai le suavai ma o le a le mama foi le suavai. E le o se faafitauli e mo na o le taimi nei ae o se faafitauli mo le lumanai pe a le tagai i ai i le taimi lenei.

O le Tala Faatatau o Tupe 2011/2012 e momoli atu le faafetai tele i le Afioga i le Minisita o Tupe, Afioga i le Palemia, Sui Palemia, Kapeneta ma lena itu o le Malo. Faafetai mo le Tala o le Tupe ua taatia i luma o le Maota. E momoli atu foi e faafetai i se tasi o sui usufono mo Palota Taitoatasi, Susuga Hon Papalii Niko Lee Hang faapea foi le Komiti o Tupe Maua ma Tupe Totogi mo le lipoti maea o le Tala Faatatau o Tupe 2011/2012. E momoli atu foi le faafetai i le Ofisa Sili o Pulega o le Matagaluega o Tupe ma le Aufaigaluega ma Matagaluega ma Faalapotopotoga a le Malo na saunia le Tala o le Tupe. E \$780milionia le tupe o loo i ai i totonu o le Tala o le Tupe, a vaevae i le 180,000 tagata e tai \$4,000 a le tagata e toatasi. Ou te lagona e leai se Minisita o i totonu o le Maota poo se Ofisa Sili o Pulega a fai atu i ai pe ua lava le tupe lea ae fai mai ioe. Aua e tele mea tatou te mananao i ai ae le maua uma le tupe e te talosaga ai. Ao tatou o tagata ua masani i le uu o tupe, masani foi i le mativa ma o le a i ai foi tulaga e faasoosoa i ai nei tupe. Tapuaia faiva o Afioga i Minisita ma Ofisa Sili o Pulega o le Matagaluega o Tupe, a’o outou taumafai e faatino taunuuga manaomia i le faatinoina o le Tala o le Tupe i le aofaiga o tupe ia ua atofa atu e le Malo mo le faiga o ia tiute.

O le maitau atu i le Tala o le Tupe, o tupe o loo faatino ai galuega a le Malo e maua le \$481milionia, o tupe foai mai le Malo ma isi Faalapotopotoga mai Fafu e \$127milionia ma o le vaega atoa lea e faaatoa ai e \$108milionia ma o se tulaga lelei i le vaai e laitiiti le tupe nono lea e faatino ai galuega a le Malo ao lea e tele tupe ao mai a le Malo ma tupe ia e fesoasoani mai fafo. O le maitau atu i Matagaluega ma Pulega Tumaoti i tupe maua, e na o le Matagaluega o Tupe Maua le Matagaluega a le Malo lea e tele atu tupe ia latou te maua mai nai lo tupe ia latou te faaaluina.

O isi Matagaluega a le Malo o loo tele atu tupe faaalu nai lo tupe la e maua mai. O le vaai la i lea tulaga e pei ona taua e nisi o sui usufono ina ia atinaeina le Vaega o turisi, o faatoaga, eleele ma le sami, o a foi oloa ma auaunaga e mafai ona faatau atu i fafo aua na o le pau ia o vaega e mafai ona tatou tilotilo i ai e faasili ai tupe maua a le Malo. E le tele se eleele o le tatou Atunuu, e le tele foi se ogasami ae le maua foi se auro poo se suauu ia tatou.

I le tulaga tau Faamasinoga, e momoli atu le faamalo i le Minisita mo Faamasinoga ma Pulega tau Faamasinoga faapea le Malo, i le faatinoina o le tulaga lea i le vavae ese mai le vaai o le falepuipui mai le vaavaaiga a leoleo, ae o le a faatuina se puleaga latou te faia le tulaga lea. O se vaega talafeagai ua leva ona tatau ona fai, ona o le tulaga lea, e matua feteenai lava lou fai i le leoleo e alu e loka mai le tagata e

molía i le tulafono, ae e toe fai e alu e toe vaavaai le tagata lea na taumafai e toe rehabilitate, o le talitonuga lava o leoleo ia, e loka mai loa e leoleo se tagata tiai le ki, o le tagata lava lena na ona solia le tulafono. E faigata la i le ituaiga mafaufau lea ma faapea, o le tagata lea e i ai le avanoa e mafai ona toe atinae lona olaga, ma o se tulaga talafeagai lea ua i ai, e faafetai atu i lau Afioga i le Minisita mo lea tulaga.

Lau Afioga i le Minisita, o lo o faataatia i le Tala o le Tupe lea ia taunuuga moomia a le Matagaluega, le tulaga lea faapea ia vave fai faamasinoga ma ia i ai foi le tulaga i faamasinoga ia e le'i faia mai i taimi ua tea, ia faavavevave le faiga o faamasinoga nei. O lou lava manatu vaivai i lau Afioga i le Minisita, le Fofoga Fetalai ma le Malo. E le mafai ona faatino le tulaga lea o le taunuuga moomia lea, pe a le faatoateleina alii ma tamaitai faamasino. O le tatou Atunuu, ua alu i luma ia le tulaga ua faaogaina e tagata ia le Faamasinoga o Fanua ma Suafa, le Faamasinoga Faa-Itumalo faapea foi le Faamasinoga Maualuga. E le gata i le tulaga lea, a o le tele o Tulafono ua pasia e le Palemene, o Tulafono uma nei, a oo ina feteenai pe manaomia se faaliliuga o le Tulafono, o matafaioi lea a le Ofisa o Faamasinoga. O sau faataitaiga, ina ua faatu le Ofisa lea o le Regulator i lona Tulafono, o le tele ia o faamasinoga ua i ai nei i le va o le Digicel ma le SamoaTel, o le taimi ma le tau o le faamasinoga e alu i faamasinoga a le toalu lea, o le matua tele lava o le taimi ma le tau e alu ai. E le mafai la ona siitia le aofai o faamasinoga e fai ma kilia faamasinoga ia mai le taimi ua tea, pe a le siitia i luga ia le aofai o alii ma tamaitai faamasino.

I le Faamasinoga o Fanua ma Suafa, i le sefulu o faamasinoga e fai ai Faaiuga a le Faamasinoga, fa o faamasinoga ia e apili, a tagai la i ai o la e tumau lava le aofai o Alii ma Tamaitai Faamasino ma le Peresetene i le aofaiga sa i ai. E le mafai ona e faaauauina le tele o faamasinoga o la e i luga o le faamasinoga, toe faliu mai foi toe fai ia apili la e taatitia.

Pau lava le auala e mafai ona fai ai i lou lava manatu vaivai, tagai i le tofia o ni alii ma tamaitai loia talafeagai e fai ma Sui Peresetene o le Faamasinoga o Fanua ma Suafa, o latou e taitaia ia panels uma e fesoasoani i tupu ma ee o le Atunuu o lo o malamalama i tu ma aga a le Atunuu. Ae o le tele o apili ua ou vaai i ai, o apili o mea tau le Tulafono. A aveese le tulaga lea o le apili o le tagata i le tulaga tau le tulafono, ona vave foi lea ona fai ia faamasinoga.

O le tulaga o lo o i ai nei, o lo o taumafai le Matagaluega e faavavevave le lisi lea i le avatu o Faamasino ia mai i le Faamasinoga Faa-Itumalo ma le Faamasinoga Maualuga e o e fesoasoani i le Faamasinoga o Fanua ma Suafa. Lau Afioga i le Minisita, atonu o le a vave ai Fanua ma Suafa, ae o le a le faia ai foi la ia le faamasinoga lea sa tofia ai le faamasino lea e alu atu e fai, o le a maua la sina mama mai i le isi itu ae mamafa ia le isi itu, na ona pau le mea e maua ai o le mai ai o le Faamasino.

O le isi talosaga i lau Afioga i le Minisita, e i ai le tulaga lea i le Tulafono e faasa Loia ona o i Fanua ma Suafa. Lau Afioga i le Minisita, e foliga mai i le Tulafono lea pei o matou o Loia o ni faamai pe a o i Fanua ma Suafa, ae le o matou o ni faamai, o matou le fomai o le Tulafono e matou te fōfōa le Tulafono ia vave ai Faamasinoga. O le mea e le tafeagai, e faasa ona e alu e fai se faamasinoga a se tagata o le Atunuu lautele, ae taga ona e alu atu e fai le faamasinoga a lou aiga, ona e alu atu lea e loia, ae o le isi itu e leai se loia, e le o paleni lea tulaga. Ma le isi mea, o aiga ia e faiaina i le faamasinoga mai lalo apili, a o atu la i le apili ae le fiafia, ona omai lea i le Faamasinoga Maualuga. le Supreme Court fai le judiciary review ona alu atu lea o le loia fai le judiciary review i le Supreme Court toe alu i luga i le Court of Appeal, a o lea e faasa ona alu i le Faamasinoga lea i lalo, e feteenai le tulaga lea, seiloga a faataga Loia ona o i le Faamasinoga o Fanua ma Suafa, o le a vave ai foi le galuega. Se toe taimi lau Afioga i le Fofoga Fetalai, toe tasi lava le mea lea e fia taua.

Lau Afioga i le Minisita o Tupe, e momoli atu le faafetai tele i lau Afioga, faapea le Palemia, le Sui Palemia, Kapeneta ma le Malo. Faafetai mo le \$850,000 lea e faataatia i le Tala i le Tupe e fesoasoani i le Manu Samoa mo le Tapenaga o le Ipu o le Lalolagi. E leai ni au upu, e leai foi ni tala e mafai ona faia e le Iuni Lakapi e faafetai atu ai i lau Afioga ma le Malo mo le vaegatupe lenei. Ae o lau tala sao lava, o lau tupe aupito i sili lea ona alu aoga lea e i ai i totonu o le Tala o le Tupe lea. Silasila foi, e \$850,000 le tupe ua foai mai, ae i le aso muamua o le aso 10 o Setema e taaalo ai le All Blacks ma Tonga e oo i le aso 22 Oketopa lea e fai ai le final o le suega siamupini, e 2.5pilion tagata e matamata i le Taaloga o le World Cup. E 800,000 ē o le a matamata i taaloga uma e 48.

Lau Afioga i le Fofoga Fetalai, o le tulaga lea tau tagata tafafao maimoa mai fafo, o le a maua mai tagata tafafao maimoa mai fafo i le lakapi i le taimi lea o le World Cup, aua e 2.5pilion tagata ia o le a matamata

ai. O le vaega la lea o le a maua mai ai le tupe e ave i le Minisita mo Pulega o Tagata Asiasi Maimoa Mai Fafo mai le \$850,000 lea e te aumaia, ona ave lea e le Minisita mo Pulega o Tagata Asiasi Maimoa Mai Fafo le isi vaegatupe isi ou uso le sui usufono mo Faleata Sasae e fai ai le fale o le Mau lea e i Vaimoso, pei ona talosaga ai ananafi.

Lau Afioga i le Minisita, faafetai tele lava mo le tupe, toetiiti lava maua ai le quarter final o le Iuni i le \$850,000 lea. O se talosaga a i ai lava se auala lanu efuefu o e silafia e mafai ai ona toe faatele i luga le tupe lea, o lena e afio le Afioga i le Minisita mo Tupe Maua o lena lua te sosoo, e monomono ifo i ai se faasili lea mo le lakapi, a leai foi, tuu sao i le Afioga i le Palemia o ia lea e Taitaifono i le Lakapi, a misi lena, e mafai lava ona ou suea se auala efuefu e ta te o ai i le Iuni i o i le World Cup, ae monomono mai le ta siaki, ou te le taua i isi taaloga o lea na maua mai se ta tupe.

Lau Afioga i le Fofoga Fetalai, faafetai tele lava mo le avanoa. Ia faamanuia tele le Alii i lau Afioga ma le tiute faigata o e tauaveina. Ia faamanuia le Atua i le Afioga i le Palemia, Sui Palemia, Kapeneta ma le mamalu o lena Itu o le Maota, faamanuia foi i le Afioga i le Taitai, Sui Taitai ma sui usufono o lenei Itu. Faamanuia foi le Atua i Lana Afioga Mamalu O Le Ao o le Malo ma le tapuaiga a Samoa, ae faapea Faauluuluga o Matagaluega ma Faalapotopotoga a le Malo ua tatou feiloai i lenei taeao.

Faafetai mo le avanoa. Soifua.

21 IUNI 2011

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): Lau Afioga i le Fofoga Fetalai, a'o le'i toлива se sao o lenei Itumalo aua le tautiaga a le Fono Aoaio Faitulafono, e momoli atu le faafetai ma le faamalo i le tofiaina o lau Afioga e fai ma Fofoga Fetalai o le Maota e taitaia lenei Paeaiga. E leai foi se mea e lagomia ai le agaga faafetai i lau Afioga i le Palemia ma lau Vaega Faaupufai aua le faatautaia o le Sa o Samoa i lenei vaitau, malo faatoatoa, malo faapalepale ma le onosai. Ua lata i le 30 tausaga o la outou Taitaiga ma o se taimi umi ua se tau foi ma lau Afioga aua e le o se taimi puupuu.

E le galo foi i lenei usugafono tupu ma tamalii, o tulatoa ma le aufue loloa sa foai lo latou soifua aua le sailia o so tatou Malo saoloto. E afua mai i le Mau a Pule faapea le Mau sa Taitai ai Tama-a-Aiga, aua lo latou soifua ofoina atu mo se Malo Tutoatasi o Samoa lenei ua tatou aeae ai ma ua agiagia ai le Tagavai o le Saolotoga ma tatou o ese mai ai i pulega faa-Kolone.

Lau Afioga i le Fofoga Fetalai, ua ou tulata i le atu tia o alii seu ae ou te ee i faletese, aua ua tapu ususi ma ua paia sau tuaafe Tiafau nei. O le Malae o le tofa liaina ma le faautaga faailo aua le tapuaiga a Samoa, o loo tuitui malofie ma tau talia malama ina ia faaae i le Atua faiva o le Maota aua se manuia o Samoa ma ona tagata.

Ae ou te le'i paia le afaga o Tautai aua paia faaofogata o lenei aso. Ou te muai faatulou i le afifio o le vaa folafola o le Talalelei, o loo outou paopaoina Agaga o Samoa mo le Atua. O le Atua o loo Faavae ai lo tatou Malo Tutoatasi.

Tulouna foi le ee faafogafoga i Lana Afioga Mamalu O Le Ao o le Malo o loo e mapu, e see ma tapuaia le faalegafulu a le Maota Fono a Samoa. Tulouna foi le fala na fofola i lau Afioga i le Sui o le Fono a Sui Tofia ma le tapuaiga mamala i Tama ma o latou Aiga, Aiga ma Tama. Le faafuasasau o le utu taulafo i le Usoga a Pule ma Tumua, Ituaui ma Alataua, Aiga i le Tai ma le Vaa o Fonoti.

E faatulou atu foi i le fala na fola i luma i lau Afioga i le Palemia, o loo e taumataalii aua le Sa o Samoa.

Tulouna foi le afifio o Minisita o le Kapeneta tainane le atuao o le saofaiga o pou faifaia o le Palemene o Samoa.

E faatulou atu foi i le Taitai o lenei Vaega Faaupufai a le Tautua.

Tulouna lau Afioga i le Faamasino Sili ma le mamalu o le Vaega o Faamasinoga.

E le faagaloina foi i le taofi le Faigamalo a Tutuila ma Manua, i le Afio o lau Afioga i le Kovana Sili ma le Lutena Kovana, le Tafatolu o lau Faigamalo i le Peresetene o le Maota Mauuluga, le Fofoga Fetalai o le Maota o Sui, le paia o le Faleagafulu ma le Manuatele.

Lau Afioga i le Fofoga Fetalai o Samoa mamala na, taoto ia ma faataalolo aua o paia ua popo ma mamalu ua oo.

O le a ou see ane i lou Itumalo. Le paia o lou Itumalo e faasifo le tauvaa ma lelepa ma le gatete aua e le sili Mo'a i matagi i sou leo faatauva. Ao le laolao ua maua e faatulou atu ai i le vaa talatala o le feau folafola i le Susu o lau Susuga i le Toeaina, ao le Taitaifono foi o le Ekalesia Faapotopotoga Kerisiano Samoa, le nofo a Faafeagaiga ma o outou faletua i lo tatou Itumalo, malo tatalo. Ua logo i tino, logo i loto e pei o le tala i le Malofie a outou faalaeiau faale-Agaga e ala ia outou talosaga.

E faatulou atu foi i malae e fia o loo tatanu ai faavaesala ma measina a lo tatou Itumalo. Tulouna le afifio o le Aiga Taulagi ma le Maopu o le Tuiaana, tulouna le alaalatai o Tootoo o le Falefitu ma le mamalu i le Fale Fasitoo. Tulouna foi le Afio o Aiga, Alo o Tamaalelagi ma le Tamaitaitasi o Aana. Alaalatai lau Fetalai Talimatasi ma le mamalu i lea itu o le Faleaana, tulouna foi le Afio o le Aloalii, le Afio o le Matua Taulagi ma le Afio o le Tamaitaitasi.

Tulouna le alaalatai o lau Fetalai Peipeigamalie ma le Tofa, alaalatai lau Fetalai Tuagalua ma le mamalu ia te Oe Satuimalufilufi aemaise lou nuu pele i Satapuala. E faatulou atu i le Afio o le Saoalii ma le Aiga Sa Tuala, tulouna le alaalatai o lau Fetalai i le Laaunafausia Vailitusimealelei ma le Faleaana, Leifo Satapuala le Lautinalaulelei ma le Vainalepa.

Lou Itumalo e, e momoli atu le agaga faafetai i le paia tele o le nofo a faafeagaiga i a outou tatalo sa le mapu i le ao ma le po ua mafua ai ona manuia le tatou faamoemoe. Faafetai foi i le paia o aiga e fia ma le faautaga i Aana na Saeseese o lo tatou Itumalo, malo le tofa, malo le uta. Faafetai atu foi i faletua ma tausi, saoa ma tamaitai, le malosi o le nuu e tua i ai le tofa ma le faautaga. Malo faafetai, e afua mai lava i tula o mauga maualuluga seia oo lava i se toe tagata, latou uma na alolofa ma agalelei mai i le filifilia o lou tagata faatauva e avea ma Tofi o le Itumalo mo lenei Paeai. Ee maia laia i le tumutumu o le faleselau ou paia le vaea ma mamalu le aveesea lo tatou Itumalo ae se'i fai so tatou sao aua le Fono a Samoa o lo'o fai nei.

Lau Afioga i le Fofoga Fetalai, e momoli atu le faafetai ma le faamalo i le Afioga i le Palemia, Kapeneta ma sui usufono mamalu o Paeai e XIV o le Palemene o Samoa ua tuanai, e tusa o le faafoeina o le Sa o Samoa mai lona faatoa Tutoatasi seia paia mai lenei Paeai Lona XV. E lagona le agaga faagaetia ona o le toafimalie o Samoa faatusa i nisi o uso a atunuu tuaoi, e ui ina aupito i matua le tatou Faigamalo i le Pasefika. E le gata i lea e mitamita le agaga ona o le faatautaiga o atinae mo le soifua manuia o Samoa. O loo vaaia ai le faatuputupulaia pea o faamanuiga ia Samoa ma ona tagata.

Ao lei faaalua se manatu i le Tala Faatatau o Tupe 2011/2010 lau Afioga i le Fofoga Fetalai, avea ia lenei laolao e momoli atu ai nisi o atugaluga poo ni talosaga a lenei Itumalo i le Laulau a Fono a Samoa. Aua se silasila a le Afioga i le Palemia ma le Kapeneta mo le faaleleia i totonu o lenei Paeai.

Lau Afioga i le Fofoga Fetalai, ou te fia tautala muamua i le vaega o auala. E faafetai atu i le Paeai ua tuanai e tusa ai ma le faaleleia o le tele o auala galue o lenei Itumalo, ao le tuualalo i lau Afioga i le Minisita mo Galuega, Felauaiga ma Atinae Eeseese, i afioaga o Satupala ma Satuimalufilufi e lei faamanuiaina lava i le faataina o auala galue. Pe a tusa ai ma le faasoaso a le Malo, matou te tatalo atu ma le agaga maualalo e fia maua foi e nei afioaga faamanuiga o loo maua e nisi afioaga o le Atunuu.

O le Pulega o le Suavai, e faafetai atu i le Malo ona o le galuega fesoasoani ua mafai ai ona faatupeina e le Iuni a Europa le faaleleia o vai tumaoti i afioaga ma alaalafaga, atonu o lea foi ua agai i ai nisi o afioaga o lenei Itumalo ona o se talitonuga e le mafai ona oo atu le suavai a le Malo i vaega o afioaga o loo tumamao ese ma le aualatele a le Malo. E talosagaina foi le Pulega o le Suavai e auala atu i lau Afioga i le Minisita mo Galuega, Felauaiga ma Atinae Eeseese le faaleleia o pamu vai o loo i le faatoaga a le Esetete Tausi ina ia faaleleia auaunaga taua mo tagatanuu o lenei Itumalo aemaise le lavalao o Aana. E le gata i lea ua tusa nei ma le fa tausaga o faatalosagaina pea le Pulega o le Suavai mo se fesoasoani ona ua tele ina tapunia ai le Aoga Tulagalua a Satapuala i vaiaso taitasi ona o le lē ola o le suavai mai le suavai a le Malo.

Ona ou see mai lea i le Vaega o Aoaoga. Faafetai le Malo ona o le tofa ua ae e tusa ma nonogatupe mai Faletupe o Atinae o Asia e toe faaleleia ai le tele o faleaoga o Itumalo o le Atunuu. O lea foi ua faamanuiaina ai ma le Aoga Faaitumalo a Aana Nu.1 o loo tu i totonu o lenei Itumalo, malo faafetai. E tuu atu foi le lagolagosua a lenei sui usufono i le talosaga molí a le sui usufono mo Faleata Sasae e ala lea i le faatupeina e le Malo o se polokalame mo mea taumafa a alo ma fanau aoga, ona e taua meaai paleni mo alo ma fanau latiti ina ia faaitiitia ai le anemia lea e aafia ai le olaga suesue o fanau laiti.

E talosagaina foi le Matagaluega ina ia mafai ona faaofi i totonu o fesoasoani le totogiina o pili aoga e faaleleia ai nisi o vaega o loo faatupeina e Komiti o Aoga, pei o le vai, eletise ma le teuina o faleaoga. Lau

Afioga i le Minisita mo Aoga, Taaloga ma Aganuu, e momoli atu foi se tasi o toatuuga ogaoga o loo feagai pea ma aoga a lenei Itumalo, o le lē lava lea o faiaoga. O le Aoga Tulagalua a Satapuala ua savalia nei i le tolu tausaga e le o atoa lava faiaoga ae 350+ tamaiti aoga. O le faasoasoina o ia vasega i faiaoga e ono, e le talafeagai ona aoaoina ai tamaiti. E faatusa lea i nisi o aoga e le atoa le 200 o tamaiti ao loo atoa le aofai o faiaoga. O le fautuaga ina ia toe sasaa le fafao i se auala talafeagai e mafai ai ona faasopolia aoga uma i faiaoga.

O se tasi o fautuaga pe a talafeauga ma le Minisita mo Aoga, Taaloga ma Aganuu o le tagai lea pe mafai ona tuufaatasia nisi o aoga laiti poo le faia lea o Junior ma Middle Schools ae tuufaatasi ai afioaga ona e i ai se manatu o le tele o nisi afioaga o loo naunau pea e pulea e latou a latou aoga. Peitai a mafai ona faatinoina pasi mo aoga o le a mafai ona felauai tamaiti aoga i afioaga taitasi. Lau Afioga i le Minisita mo Aoga, Taaloga ma Aganuu sei tagai ane pe talafeagai lenei avanoa e faaleleia ai le Aoga Faaitumalo Aana ma toe faamaea ai ma le malae faava o Malo lea ua lua tausaga talu ona sua ae lei mafai lava ona faamaeaina. Ou te talitonu toe pau lava se vaega o totoe o le faamaeaina o lenei malae o se top soil mo le malae ma se pa e puipui ai. O le augani a lenei sui usufono atonu o le a fesoasoani i ai ma nisi o sui usufono o lenei Itu vai o Aana Alofi sa latou uunaia lenei faamoemoe i tausaga ua sola. E talitonu le taofi o le tasi lenei alamanuia o alo ma fanau a lenei Itumalo aemaise le Atunuu pe a faaleleia lenei malae taaalo.

Ona ou see mai lea i le Matagaluega o le Soifua Maloloina. Faafetai atu o lea ua maitau atu ua seei mai se tasi o Tama o lenei Itumalo. Lau Afioga i le Fofoga Fetalai e faafetai atu i le faaleleia o le falemai faaitumalo o loo i totonu o le Itumalo o le Minisita mo Tina ma Tamaitai, Atinae o Nuu ma Afioaga ma Agafesootai. Pau le tuualalo a lenei sui usufono ina ia mafai ona maua ni fomai tausi itumalo e pei ona faaalua e nisi o sui susufono e tasi le aso o le vaiaso e oo atu ai le fomai i lenei Itumalo. Ae sei tagai foi le mamalu o lenei Palemene, o le tasi lenei Itumalo aupito tóatele ma e tele foi ona vaega e manaomia ai le fesoasoani a alii ma tamaitai fomai.

E avatu foi le agaga faafetai i le Matagaluega o Leoleo ma Falepuipui ona ua lelei le pulega a le Station a leoleo o loo vaai lenei Itumalo.

Lau Afioga i le Fofoga Fetalai, o se tasi o talosaga a lenei Itumalo aemaise lava afioaga o Satapuala ma Satuimalufilufi pe a talafeuga ma lenei vaitau pe mafai ona tuuina atu se sui o nei afioaga i totonu o Komiti Faafaoe a le malae vaalele e tusa o le tautua o eleele o nei afioaga o loo fausia ai nei le malae vaalele.

E le gata i lea, e talosagaina foi ni avanoa e mafai ai ona faamatuu mai nisi o galuega mo le teuina ma le faaleleia o le malae vaalele i afioaga o lenei Itumalo.

E avea foi lenei avanoa e toe fagufagu atu ai i le Komiti Suesue mo Faiga Palota ona e talitonu lagona sa faapea ona faataatia i Paeaiiga ua tuanai le faia lea o se isi sui usufono faaopoopo o lenei Itumalo. O lea e talosaga atu ai mo se avanoa e fai ai se isi sui usufono mo lenei Itumalo ona ua tóatele le aofaiga.

O nisi ia o manaoga o lenei Itumalo e amata ai lenei Paeaiiga. E i ai le talitonuga o le a faapea ona faamaopoopo ma logoina mai le Palemene nei i nisi vaega pe a maua se feiloaiga ma nisi o lenei Itumalo.

Ona ou see mai lea i le vaega o le Tala o le Tupe lau Afioga i le Fofoga Fetalai e pei ona folasia i le Maota. E avatu le faafetai tele i lau Afioga i le Minisita o Tupe mo le Tala o le Tupe ua maea ona tapena. E avatu foi le faafetai i le Taitaifono o le Komiti o Tupe Maua ma Tupe Totogi a le Maota mo latou suesuega ma le lipoti maeaea ua faataatia i le Maota. Sau se itula ona faifai atu foi lea o nisi o mataupu e fia laga ao le aotelega i le vaavaai i le Tala o le Tupe ua faataatia, faafetai mo le faaitiitia mai o aitalafu mai le \$150milionia i le tausaga ua tuanai i le \$105milionia i lenei tausaga. Ua tau tuapega se fautuaga ina ia toe timata le upega ma tagai i auala e mafai ai ona oo atu i le faaiuga o lenei Paeaiiga ua le toe i ai se aitalafu.

O le Tala o le Tupe ma ona fuafuaga o loo i ai nei mo le auai atu o Samoa i le WTO aemaise le faasee ese atu o Samoa mai le least developed countries. Ou te talitonu o le a tele vaega o le a faaitiitia ai tupe maua, e le gata i lea o le a faateleina tupe totogi atu i aitalafu a le Atunuu. O se vaai foi i ai ua siitia tupe faaalu ae itiiti tupe maua mai. Afai foi ae ulufale atu Samoa i le WTO ma siitia ai le avanoa i developed countries status ma e maua se talitonuga o le a tele se aafiaga i tupe maua mai tax ma le toe totogiina atu o tatou aitalafu.

O nisi vaega o le Tala o le Tupe lau Afioga i le Minisita mo Faatoaga, Faigafaiva & Faleoloa o le Ofisa o Faatoaga tau ala atu i lau Afioga i le Fofoga Fetalai, e talosagaina le faaoga lelei o seleni o loo faamatuu atu i Matagaluega o Faatoaga ona o loo i ai se naunautai ina ia faaleleia ponesi, maua ni maketi e lau atu

i ai oloa gaosia ma galueaina e le Atunuu. Faaopopo atu foi i lea talosaga lau Afioga i le Minisita mo Galuega, Felauaiga ma Atinae Eeseese aemaise le Minisita o Tupe i le tagai lea ini auala e mafai ona fai ai ni incentives_e faataugofieina ai tau o oloa o loo faaaoga e le aufai-faatoaga e pei o equipments, masini ma nisi o vaega e mafai ona faafaigofieina ai le galueaina o eleele tetele.

Lau Afioga i le Fofoga Fetalai, o le Matagaluega o Galuega, Felauaiga ma Atinae Eeseese e avatu le talosaga i le Afioga i le Minisita o loo feagai ma le LTA e pei ona faaalua e nisi o sui usufono ua loa tausaga o loan mai pea faaunegatupe e totogi ai le faiga o auala.

O le talosaga ina ia mafai ona faaleleia le vaaiga o konekarate o loo faatinoina le faaleleia o auala ina ia tuumamaina ai le fai o loans e fai ai auala. E talosagaina foi le tele o auala galue ina faamalosi le faia o drainages ona o le tele o nisi o auala galue e le umi lava ae leaga ona e leai ni alavai i autafa ma a timuga foi ua tele ina faaleagaina ai. Ao le tele lava o nei auala e leai ni drainages e faatafe ai le suavai i le taimi o timuga.

I le vaega o le suavai lau Afioga, e avatu le tuualalo i le Pulega o le Suavai, e pei ona faaalua, o le suavai o lo o faapea ona faaaogaina i Malololelei ma Fuluasou e faasopolia ai le Taulaga i Apia aemaise nisi o vaega o le itu i Sisifo i Matu o Upolu, e na o le 40% pe a o lo o faapea ona mafai ona faaaogaina, e silia i le 60% o lea suavai o lo o faapea ona tafe ese ma le mafai ona faaaogaina. E fautuaina la ma avatu foi se tuualalo ina ia mafai ona siitia lea vaega ina ia mafai ona faaitiitia tupe alu ae le gata foi i lea, o le faaleleia o le auunaga a lea Matagaluega.

Ona see mai lea i le Matagaluega o Faamasinoga ma Pulega tau Faamasinoga. Lau Afioga i le Fofoga Fetalai, e i ai se tuualalo a lenei sui usufono, ina ia mafai ona toe tagatagai le Matagaluega i se vaega e mafai ona faavave ai le tulaga o Faamasinoga o Fanua ma Suafa, ona ua tele tausaga o taatia pea faaiuga. Po o le a se auala e mafai ona faaleleia ai ma siitia ai le auunaga a lea Matagaluega?

Lau Afioga i le Fofoga Fetalai, o se tasi o vaega ou te fia talanoa i ai o le Matagaluega lea o Punaoa Faalenatura ma Siosiomaga. E faamalo ma faafetai atu i le Faigamalo ua tuanai e tusa o le faatofalaiga ua saunia ai e le Malo o Samoa le tele o faamaliega Faava o Malo mo le puipuia ma le vaaia lelei o le siosiomaga. E i ai le talitonuga, o Samoa lava le Atunuu o le Pasefika aupito i tele feagaiga Faava o Malo o le siosiomaga o lo o ia sainia. O lenei faamamafa a le Malo, lea ua amata ona fua mai lea i le fesoasoani tau tupe o lo o ua maua mai e faatino ai nisi o galuega, aemaise foi o le vaaiga lea o le toe faaleleia mai o le siosiomaga o le Atunuu. E le gata foi i lea, ua maitauina ma le agaga fiafia le tele o afioaga o lo o ua faamamafa le puipuia o latou eleele ma gataifale, faapea foi ma vaega eleele o lo o pueina ai le suavai mo le fofoga taumafa o le Atunuu. Faafetai atu foi i le tele o nisi tulafono ma faiga faavae ua limataitaiina ai nei le Matagaluega ma le Atunuu ina ia faatauina le silasila totoa i le afaina o le siosiomaga mai atinae eeseese o lo o faatinoina o lo tatou Atunuu.

E momoli atu foi se faamalo i le faamuamua o lo o tuuina atu e le Malo mo le faaitiitia o aafiaga o le Atunuu mai le fesuiaiga o le Tau. O le tuualalo a lenei sui usufono ma le fautuaga faatauavaa, e lagolagosua i galuega faatino a lenei Matagaluega. E fautuaina le laugatasia uma o tagata i faiga faavae mo le puipuia o le siosiomaga mai le aafiaga o atinae e le talafeagai.

Toe liliu le fafao ma silasila i ni auala e mafai ai ona faataugofie ma faaaogaina auala e faaitiitia ai le eletise ma le paoa faaalu, e ala lea i le energy efficient products faapei o le CFL Lights nisi o moli tu auala e faaaoga ai LED Lights, nisi o pusaaisa ma nisi o oloa e faaaoga ai eletise o lo o mauaina nei au tau i se tau taugofie, ma e faaitiitia ai foi ia le tupe faaalu, e le gata i le Atunuu ae faapea aiga taitasi.

E faamalo atu foi i le filifilia o Samoa e avea ma se tasi o Atunuu tau atiae ua uluai faatino ai lenei polokalame mo le faaitiitia o aafiaga mai le Fesuiaiga o le Tau. E pau lava se tuualalo i lenei polokalame, ona o lea foi ua faamuamua auala, ae tuua le tele o nisi o aafiaga ogaoga faapea ona faamauiina i nisi o peleni faapei o le NAPA ma le Same Plans sa tapenaina mai le nonogatupe i tausaga ua tuanai.

Ona ou faaii mai lea lau Afioga i le Fofoga Fetalai ma le mamalu o le Maota, i se tasi o toatuga o atugaluga o lenei Itumalo. Lau Afioga i le Palemia ma lau Kapeneta faapea foi le mamalu o le Fono Aoaofaitulafono a Samoa, o lenei mataupu o eleele, o lenei lava gasegase ua autausaga o lo o nofo pea ma lenei Itumalo, e faasinotonu ia Satapuala ma Satuimalufilufi. O lea ua toe nei o se aga ona atoa lea o le 70 tausaga talu ona aveesea faatagataotauaina nei afioaga i lalo o pulega o Niu Sila, ona o le faamoemoe o Amerika e faia se malae vaalele i le vaitau o le Taua Lona Lua o le Lalolagi.

O se vaega ogaoga na tagi ai le fatu ma le eleele i nei afioaga, ona o toe eleele nei o nei afioaga o lo latou tofi, ae ua avea faamalosi ma le talitonuga, e faaaogaina uma nei eleele mo malae vaalele. Peitai, ua na o se vaega itiiti o lo o faaaogaina, ae ua tuuina atu nei le tele o nei eleele mo faatoaga a le Esetete Tausi. Peitai ane lau Afioga i le Fofoga Fetalai, o se tasi o vaega tetele o eleele o nei afioaga e aofia ai ma nisi o eleele o le Aiga i le Tai, Falelatai ma Samatau, sa faatauina foi i pisinisi a Siamani i auala le talafeagai, ia po o le faatauina atu foi i nisi o tuua ona o le fia maua o auupega e saili ai se Malo Tutoatasi o Samoa. O lenei ua i o outou aao ma o matou lima le Malo o Samoa. O lea e toe faatalosagaina ai pea se finagalo o le Malo ona o le a tatou sauni atu e Faailogaina le 50 tausaga o le Tutoatasi, ae faailogaina foi le 70 tausaga o faatafeaga a Satapuala ma Satuimalufilufi mai lo la tofi. Pe le ono mafai ea ona toe faafoisia nisi vaega o nei eleele o nei afioaga, e talitonu le lagona, o se faatalosaga lenei o lenei Itumalo i lau Afioga i le Palemia ma le mamalu o le Kapeneta ma le tatou Palemene.

Ona faai'u lea o se faamatalaga lau Afioga i le Fofoga Fetalai, e avatu le faafetai tele i lau Afioga mo le avanoa.

Faafetai foi i le Afioga i le Palemia ma le Kapeneta ma lea Itu o le Vaega Faaupufai a le HRPP mo le avanoa e mafai ona faaali ai se sao o lenei Itumalo. Faafetai atu foi i le Afioga i le Taitai ma le Vaega Faaupufai o le Tautua.

Ona faamaea atu ai lea o so matou manatu, ia faamanuia mai lo tatou Tapaau mai le lagi i lenei Paeaiga ina ia mafai ona tatou faia ni auala e faaleleia ai lo tatou Atunuu. Soifua.

21 IUNI 2011

Afioga TUISA TASI PATEA (Sagaga le Falefa): Faafetai atu i lau Afioga i le Fofoga Fetalai, atonu o lea ua uma ona e toto le niu o le tuaoi i le taimi ua mavae, ua uma foi ona e siitia le atu o le taeao ma momoli lapalapa o malo i le faapolo ma le faasagi i le Tapaau i le lagi, aemaise foi ua uma ona e paelago paia o le Maota. Ae faafetai atu mo le avanoa, e fia tulai foi le sui usufono mo Sagaga le Falefa e fia faaalua foi se lagona ma se manatu aua le Tala o le Tupe lea ua folasia.

Ae ou te le'i saila'uina le uluta o le pana o le muai fetalaiga i le Tuasivi, pe ou te lalaga foi ma fatu le tapui o le tagifatea e pei o le muai fetalaiga i le gataifale o Aiga e tolu ma Luatua. Ou te muai tapui le tapu a Tupolesava, e pei o le tala i le Taotolima a Galumalemana. Ou te faapoipoi lilia foi i faa-alofisa o tupu nai le malae o le vavau, aua Samoa o le aomamala o le faasauga o ao ma le atu folasa. O Samoa o le fale ua tulutulu i tao ua soo ona taiao.

Ona faapea lea o se faamatalaga, tulouna Lana Afioga Mamalu O Le Ao o le Malo, lau Afioga Tui Atua Tupua Tamasese Efi ma lau Masiifo, lau Afioga i le Sui o le Fono a Sui Tofia ma lau Masiifo. Lau Afioga i le Palemia ma le mamalu o le Kapeneta, lau Afioga i le Fofoga Fetalai ma sui usufono mamalu o le Maota Fono o le Palemene o Samoa. Lau Afioga i le Faamasino Sili ma sui mamalu o le Ofisa o Faamasinoga ma tagatanuu uma o Samoa. O Faaululuga uma o Matagaluega a le Malo ma Faalapotopotoga aemaise Pisinisi Tumaoti.

O le a le faagaloina foi le paia i Aiga Sa Levi, susu Susuga i Faafeagaiga Taulagi i so o se fata faitaulaga, o lo o faa-falelemalu ma faa-faletuluia i so o se vaipanoa o Samoa ma le lalolagi atoa, aua lava lo latou faiva alofilima o le nonomanu aua se manuia o Samoa atoa. O paia lava ia aua Aiga ma Tama, o Tama foi ma Aiga, le mamalu le Usoga Pule ma Tumua, Itua ma Alataua, Aiga i le Tai ma le Vaa o Fonoti.

O le a le galo foi le tapuaiga a nai o tatou uso o lo o i le Motu i Sasae o Tutuila ma Manua. Tulouna lau Afioga i le Kovana Sili, lau Afioga i le Lutena Kovana, lau Afioga i le Fofoga Fetalai ma sui usufono mamalu o Maota e lua. Lau Afioga i le Faamasino Sili o tagatanuu uma o Amerika Samoa. O paia lava ia aua Sua ma Vaifanua, Fofu ma Aitulagi Saole ma Saleaamua ma le Launiu na Saelua. Afio le Laau na Amotasi, Tama a le Manuatele ma Tootoo o le Faleula. O paia na Samoa mai le tai samasama o le Tuimanua i le oneone le ufitia, seia paia le tai ulaula o Nafanua i Fili ma Puletuu le mea na tauilo ai Malo. A o paia foi e le mafai ona toe suia, ua uma ona tuulaupua ma tuu matamaga nei seia oo i le faavavau.

A o lenei taeao, o lea ua tatou laulua fesilafai i malo ae fesagai i au o manu, ua fano mala o le atuvasa ma ua le afe foi se atua o le ala, pe to foi ni matagi vale. Ua lalafu foi le savili ma ua tafe toelaua mauga o le Atuolo, o lea ua tatou laulua fesilafai magafetau soifua ua talanoa foi ae ua i alo pei o le tala i le tei o Tupua.

Faafetai le Atua i Lou alofa ma Lou agalelei, o Lou alofa mutimutivale ia Samoa ma ona tagata, e ia te Oe pea le viiga nei ma aso uma lava.

Lau Afioga i le Fofoga Fetalai o se taimi ona ou oo lea i le Tala o le Tupe lea ua folasia i le Maota Fono. E avea ia lenei laolao sei ou liliu ane, aua e faigata le tapuaiga a lou Itumalo pele o Sagaga le Falefa. Le paia i lo tatou nuu i Faleula, tulouna Fogaa ma Maota e fia e afifio ai Toetaufanua ma Alo o le Malietoa, e afifio ai Maopu o le Tuiaana ae polapuipei e lau Fetalaiga Laupa o le Tagatafou o le Malietoa, le mamalu i le Faletolu ma Tapunuu.

Le paia foi i si ou nuu pele i Saleimoa e afua mai i le Fuafua ma Fagavā i Falesoa ma Aveavai seia paia Niuvai ma Mataale e titi tonoa i Lotosoa o le tupua ma le laoi o le toaiga o Tumua, e afifio ai Alosina, Alo o Malietoa, Toetaufanua a le Malietoa, le nofo a Maopu, Aigaetolu, Sa-Tilialō ma Usoalii, ae polapuipei e lau Fetalaiga Luatua o le Aitu Tagata na faialaga i le Tuamasaga, le Gautaala ma le Faletolu ma Siufanua.

O paia na o si o ta nuu, ae le mafai foi ona faagaloina le paia i Ekalesia sa faia le faiva o le tatalo leleoa aua le alofaiva. So'o se Ekalesia i so'o se fatafaitaulaga i totonu o le tatou nuu ma le Itumalo, Susuga i Faafeagaiga ma Faletua i Ekalesia taitasi, ua faamalo faafetai fai o le faiva.

Lou Itumalo, ou te faafetai atu i la outou tapuaiga mai le taimi o le palota seia oo mai i le aso. O a foi ni gasegase o le tatou nuu ma le Itumalo i le taimi sa mavae ai le palota, ou te tatalo atu ma avatu malu i puega i o outou finagalo, tatou faatafea i le auau, ia taunuu i nuu malolo. A lea ua aumai e le Atua le tali faaialiali, ia sagai maia e alo lo tatou sa aua se manuia o le tatou Itumalo mo a taeao. O le upu e fai i le itulagi lea, 'Ua tulima tu i le tula ua faapulou le tualima, ua e seu lagatila.' Ua malie le papa i galagala ua malie le papa o le faatolotologatama ae a le lauu na gagana? Ua atu e le faga i Foa ua malie atoatoa le tamaloa.

A lele ua mapu i Aganoa le faiva o le tamaitai Tuamasaga. Ua a'e foi ma le inato, lele ua fai ma latu i vai o le Malietoa. Faamalo faafetai. A o ai foi Tuisa ua outou manatu mai ai, ua outou faatietie au i le maasalafa, ua sii foi le fale o Asomua i luga o le mauga. Ua faafetai i lau faaaloalo, lele ua toto tetele ua ou sapaia faatuaelele.

Ou te avatu foi le faamalo ma le faafetai i ou uso a sui tauva sa asa le gasū o le tai taeao. Faafetai i lau Afioga Loau i le tele o galuega lelei sa e faatinoina aua lo tatou Itumalo i le taimi foi sa e tulai mai ai. Faafetai atu i lau Afioga Muaiava ma lau Afioga Maaolegalu, ua faamalo tausinio. O upu o le Atunuu, 'A taia loa ulufanua i le mu faailoai ma le malama foagia, ona logo i logo a lea o le ligoligoa o vanu ma le pau o mauga, ae malaga manuisina o le tuasivi e faatamasoalii.' A taia foi le faafofogaaga a mauili o Tapunuu ma Tapuafanua o taotoo i malae ma atu tiasā i le tofa ma le moe faalelefulu a aitu o Samoa, ona lalaga lea o tofaga ae saili tapuvae folau ae moe lava ina ua suluia i malama mamana. Ona faapea lea o sau tala, atonu o au nei, a o oe taeao. Ae alo maia tatou tausoa faatasi le avega e mama ai, aua se manuia o lo tatou Itumalo mo a taeao.

Ia lou Itumalo pele, to maia lau pule ma lau faamanuiaga ou te se'e ai i fala gatete aua ou te tu i Tiafau ma seu faaaloalo aua lau tapuaiga. E se'e a le saualii vaoto, ae na lili'a aua na itea le sau o le ola. E ui foi ina ou lagona fisaga o matagi le moe, ae ou te lilia lava i matautulesolo aua lou tui mai o le mulipapaga. O le a le galo lau tapuaiga ma lau tatalo leleoa aua lou alofaiva i le faatugatootoo i le malae o le faautugatagi aua se manuia o lo ta Itumalo ma Samoa, ae faasili ai le viiga i le Tapaau i le Lagi, o le a le galo lau faaaloalo. O le upu a le Isaraelu moni, 'Ierusalem e, afai e galo oe ia te au, ia pipii ae lou laulaufaiva.' Faafetai, faafetai, ia manuia lau tapuaiga.

Lau Afioga i le Fofoga Fetalai, ia avea ia lenei taimi e avatu ai foi se faafetai tele i galuega lelei ua uma ona faatinoina e le Malo, e amata mai i Faigamalo ua mavae seia oo mai lava i lenei foi Paeaiga. O le upu moni, e fesili taeao i le asō, a'o ananafi na nonō mai ai. O le manuia o le lumanai o Samoa e fesiligia ai a tatou galuega na faia i le taimi nei, ae faalagolago tele i mea na tutupu i tausaga ua mavae.

O le Tala Faatatau Autu o le Tupe lea ua folasia i lumamea i le Maota Fono nei, ia, e avatu le faamalo ma le faafetai tele i lau Afioga i le Minisita o Tupe ma le Matagaluega o Tupe. E tiga lava le fesouaiga o lo tatou Atunuu i tausaga ua mavae i le faafitauli o tala tau tupe a le lalolagi ma le tamaoiga, faatasi ai foi ma le aafiaga o i tatou i faalavelave faalenatura pei ona i ai le Tsunami, a o lea e maitau atu o loo mau lava le toovae. Ua sao mai lou sa i uta i le taimi o le Tsunami. Faafetai atu i lau Afioga i le Minisita o Tupe. Aeva ia lenei avanoa e molimoli atu ai se faamatalaga i le Tala Faatatau o le Tupe, ae fafao atu ai i totonu ma nai galuega fai a si ou Itumalo.

Lau Afioga i le Minisita mo Galuega, Felauaiga ma Atinae Eseeese, ou te talitonu o faafitauli masani lava ia i Itumalo, ae tau ia ina ou tuualalo atu ma tuu atu i ou autafa faamolemole. O auala galue o nuu ia o matou o loo fia maua fesoasoani, faamolemole, o le pitonuu lea o Levi ma Alamutu, o Nonoa ma Utalii, e lei faia lava se galuega talu mai le foafoaga ma Atamu. Faamolemole, faamolemole, o loo moomia le fesoasoani.

O le auala galue foi i si o'u pitonuu o Lotosoa, ia, ou te talitonu o lena ua taatia iina le talosaga, pe a ma le fa tausaga ua mavae nei o loo faatalia lava se fuafuaga. I le ava ma le faaloalo faamolemole, sei toe tagatagai ane i ai. Ua uma foi ona ofoina e lou pitonuu ma nisi o nuu o lou Itumalo le fesoasoani e ala atu i le faatinoina o maamaa ma nisi o palapala e manaomia. O lona uiga, na o ni masini e moomia ona faatinoina lea o ia galuega aua lava le manaomia e tagata o loo nofoia le nuu a uta.

O le toatele ia o le matou nuu ua nonofo i nuu a uta, ou te tatalo atu ai ina ia alofagia auala galue. E pei lava foi ona tilotilo atu i le Tala Faatatau o le Tupe i lenei foi tausaga fou o loo savalia, e leai ma se iota o auala galue o tau mai ai, ua ave le faamuamua a le tatou Malo i a tatou aualatetele ma auala laupapa. Faafetai. A oo i le taimi e manaomia ai, faamolemole, sei manatu ane.

E faapena foi le auala i Utumoa i Faleula, ua manaomia foi le faaauauina i uta, e na o le afa lava o le auala lea ua uma ona faia. Ae a lelei le auala lea, o le a faigofie foi ona fesootea ma AeLe.

O le mataupu i le suavai, i lou ava ma le faaloalo i le Afioga i le Minisita, ia o loo i ai le vai i uta i le pitonuu i uta o le matou Itumalo, ae peitai ane e faigata tele ona faafesootea. E oo mai la i le taimi nei, o nisi nei o pitonuu o le matou Itumalo e lei oo lava i ai se vai i le nuu a uta, o Levi, o Nonoa ma Utalii, e lei oo lava i ai se vai i nuu a uta. O loo taatia le talosaga a le matou pitonuu o Levi i lau Afioga ma le Matagaluega, sei e alofa, sei e silasila ane i ai.

O si o matou nuu i Utalii, ua faaletonu le eletise, e lei oo i ai le eletise, faamolemole sei silasila ane i ai. O le taua o le faatinoina o galuega a le nuu a uta, o le eletise, o le vai ma auala galue. E pei lava ona faataatia mai i polokalame faaalualu a le Malo aua le manuia o Samoa ma ona tagata i le galueaiina o le vao, faaleleia o le tamaoiga aua le fofoga taumafa o le Atunuu e ala i mea toto, ae le gata foi i lea, ua manaomia foi le malaga atu i luga o mea mauululuga aua lava le taufaafefe a le Tsunami. O lona uiga, ou te talosaga atu i lau Afioga i le Minisita, sei silasila totoa faamolemole i la matou talosaga ua taatia ina ia faia o matou auala galue, aemaise ai le suavai faatasi ai ma le eletise i vaega e lei oo i ai.

Ona ou oo atu lea i le Matagaluega o Faatoaga ma Faigafaiva, ou te talitonu e manaia ma matagofie i le Tala Faatatau o le Tupe, ae ou te talitonu faamolemole, o nisi o fua o faatoaga e fia faalelei, ou te talitonu o lea foi ua tafafao taliga o tufuga uli, ua lelei le tatou talo i Falealili. E i ai foi le talitonuga a lelei le talo i Sagaga le Falefa, ia, o le a manaia foi lea atinae, faaopoopo i ai ma le koko ma le popo, o le ava ma le nonu ma le tipolo o Tuamasaga, o le a manaia ia atinae mo lou Itumalo. Aua a lelei atinae, o le a siitia foi le soifuaga o si o matou nuu i tupe maua, ae o le a siitia ai foi oloa e auina atu i fafo mo maketi i fafo. O lona uiga, o le a galulue faatasi ina ia uunaia a tatou maketi i fafo aua se manuia o tatou oloa e avatu i fafo.

O le Matagaluega o Aoga, Taaloga ma Aganuu, e fiafia foi ua tilotilo atu ua lua pasene ua faaopoopo i tupe maua foi o lenei Tala Faatatau o le Tupe. Ou te talitonu foi ua nofo fale ia Satuiamaa, ma e le o toe po foi se lilo, o se Itumalo poo se Atunuu e aoaoina ona tagata, e maua foi le manuia, e le gata i le siitia o lona tamaoiga, ae o le tulaga i le soifuaga, o le a faaitiitia foi solitulafono. O le a manuia ai aiga, nuu ma Ekalesia ma le Atunuu.

Ou te tatalo atu i lo'u nuu i Lotosoa ona ua matua manaomia lava sa latou Primary School. Ou te talitonu e na o le tolu Primary Schools o loo i ai i lo matou Itumalo, o Levi, Utalii ma Salepouae. O le ova ma le 30 tausaga talu ai na faavaeina ai nei aoga ma e i ai le talitonuga ua toatele ma ua uluola le fanau a Atamu ma Eva, ua toatele tamaiti o lenei pitonuu ma ua tataua ona fai se latou faleaoga, i le ava ma le faaloalo ae o le a taatia atu pea i ou autafa.

O nisi foi faleaoga e pei ona ou taua i Levi, Utalii ma Salepouae e manaomia le fia faaleleia o totoga o ia faleaoga aua le faatinoina o le auaunaga a nai faiaoga. O le talitonuga a lelei le faleaoga ma le anofale e auau faatasi ma le lelei o faiaoga aua le faateleina o le latou auaunaga o le a faapena foi ona siitia ma faafaigofie ona maua e tamaiti le poto ma le atamai faatasi ai foi ma nisi o lo matou pitonuu o loo manaomia Pre-schools poo Aoga Amata. Ua i ai le Aoga Amata i Salepouae ao isi pitonuu o lo matou nuu o Saleimoa ma Faleula e lei oo lava i ai ni Aoga Amata. O le a taatia atu i autafa o lau Afioga i le Minisita ma le Matagaluega ina ia fesoasoani mai.

Ona ou oo mai lea i le Matagaluega mo Punaoa Faalenatura ma Siosiomaga, faafetai atu mo galuega lelei uma i lau Afioga i le Minisita aemaise o le Matagaluega. E i ai le faafitauli o loo i ai i lou Itumalo i le taimi nei ona o eleele ma palapala o lou Itumalo ua eli e Kamupani tetele ma faatau atu. O le popolega o loo i ai le pulega a alii ma faipule o lou Itumalo ina nei eli, eli ona tasi lea o le oso o se mafuie ma folo patate atu ai ma luma maota o lo matou nuu.

Ae paga foi, o a eleele o le a tua i ai fanau lalovaoa aemaise o tupulaga e le'i fananau mai a lenei Itumalo pe a faapea o le a eli le palapala ma maa ma faatau atu, a'o le aafiaga foi o le suavai ma le siosiomaga o le a tulai mai? O le augani atu i lau Afioga i le Minisita ma le Matagaluega, sei faia se tapu; ina ia faapitoa ni eleele e le o nofoia e tagata ola e faaauau ai a latou eligā tupe. A le o lena e i ai lo'u talitonuga ua tatau ona totogi ni a latou land rates i a latou eligā tupe i totonu o le nuu o lo'o aafia ma ona nei eleele. Aua o le tala lena a le tuua o lo matou nuu pe faatau motu le fanua i totonu o lo matou nuu, e ese lava fanua ese eleele. O le tala lena o le tuua o lo matou nuu ae o le a taatia atu i lau Afioga i le Minisita ma le Matagaluega, o iina o loo i ai le fofo o lenei faafitauli.

Ona ou oo mai lea i le Faiga Palota, lau Afioga i le Minisita o loo nafa ma lea tulaga faamolemole e manaomia foi ni Nofoa se lua mo Sagaga le Falefa, ua fai sina toatele o Faleula ma ua toatele foi Saleimoa, ae ua tatau ona ese le Nofoa o Faleula ese le Nofoa o Saleimoa, ae taatia atu pea i ou autafa.

Ona faapea lea o sau faamatalaga i lau Afioga i le Minisita o Tina ma Tamaitai, Atinae o Nuu ma Afioga ma Agafesootai, o tu foi ma aga a le atunuu e tatalo atu e tatau ona faataua le tatou aganuu i tulaga uma e pei ona i ai fuafuaga i le fausia o Tulafono ma aua nei galo a tatou Ekalesia aua o iina le tupuga o manuia e puna mai ai le vai o loo manuia uma ai Samoa. O le fausiaina foi o Tulafono i totonu o lenei Maota, e tatalo atu foi ina ia fausia ma le faamaoni ae aveese le faaituau ma le faaalatua aemaise o le manatu faapito ae ia fai ni galuega lelei mo Samoa.

Ua toe tasi lava le mea lea. O le Matagaluega o Faamasinoga i lau Afioga i le Minisita ou te talitonu o le Matagaluega o Fanua ma Suafa o loo lotolotoi ai measina a le Atunuu, ae i ai le talitonuga e manaomia foi le toe silasila totoa i ai i le faatinoga o fuafuaga uma a lenei Matagaluega, o faitioga a le Atunuu o loo taatia. E i ai le talitonuga ua au foi lou manatu ma ua tatau ona auai nisi ua malamalama lelei i le Tulafono aua le faatinoina ina ia faafaigofie le galuega ma ia faavavevave ma aveese ai faitoga a le Atunuu o loo i ai.

O se vaivaiga lea ona e maitau atu ua uma lou taimi ae avea lenei avanoa e avatu ai le faafetai tele i lau Afioga i le Fofoga Fetalai, le mamalu o le Kapeneta ma le Palemene i lenei aso, ia faamanuia le Atua i faiva ma tiute ua totoe. Ia manuita tele Samoa.

Soifua.

21 IUNI 2011

Afioga TAEFU LEMI (Falelatai ma Samatau): Faafetai i lau Afioga i le Fofoga Fetalai, ou te talitonu o le a tapena ia lava le lauga. Ou te talitonu o lea o le a 30 minute nei, toe 30 minute foi nanei, e momoli atu ai le agaga faafetai tele i lau Afioga i le Fofoga Fetalai.

Ou te talitonu ua uma ona tuu laupua ma ua taoto foi i lagatonu upu o lenei aso, o le aso sa lupe aua le faafesagai o segaula. O lupe sa vao eseese ao lea ua fuifui faatasi. Ua laulau sasaa foi le faiva o manusina i sausaunoaga ma tuleiga i sui usufono mamalu o le Maota. Ona ou faapea lea, lau Afioga i le Fofoga Fetalai, o le a faagafua ia lou tulaga ma magalo le leo ae sei taumafai atu se upu a lenei Itumalo e lagolago ai i le Tulafono Tau Faaofi o le Faatatauina o Tupe Faaopopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 ua taatia i luma Maota.

E muamua ona ou faatulou le paia o le Maota o le Fono Aoaofaitulafono o le Malo Tutoatasi o Samoa. Ou te faatulou atu i lau Afioga i le Fofoga Fetalai. Ou te faatulou atu i lau Afioga i le Palemia, le Sui Palemia, Alii ma le Tamaitai Minisita, lau Afioga i le Taitai o le Itu Agai, lau Afioga i le Sui Taitai ma sui usufono mamalu o lenei Fono Aoaofaitulafono.

Ae a Ofisa Sili o Pulega ma Faalapotopotoga a le Malo, ou te talitonu ua atoa le Faga i Laua aua o lele ua tini au ao paia o Samoa i le Maota i Tiafau. Ua ou manatua le Maota o Po ma Ao ma lo la Fale tulutulu i tao a lele ua soo ona taiao. Ae a le fale nai Amoa fai mai e lau i ula ae pou i toa. Ae a lea ua faataalolo i ai

paia ma mamalu o Samoa. Ona ou faapea lea, lau Afioga i le Fofoga Fetalai, nuunuu atu o outou paia, o sa ma faiga, ae sei ou afea le tapuaiga a lo tatou Atunuu.

Tulou le Afio o Lana Afioga Mamalu O Le Ao o le Malo o Samoa, lau Afioga i le Tama a Aiga, lau Afioga Tui Atua Tupua Tamasese Efi ma lau Masiofo. Tulou foi le faafofoga taputapu a lau Afioga i le Sui o le Fono a Sui Tofia, lau Afioga i le Tama a Aiga ma o le Tama a lenei Itumalo, lau Afioga Tuimalealiifano Vaaletoa Sualauvi II. Tulou le faafofoga i lau Afioga i le Faamasino Sili aemaise o le vasega o Faamasinoga. O tupu ma ee, o le mamalu o le upega lauga ma la outou faafaleupoluga.

Ou te talitonu o le paia lava lea aua Aiga ma o latou Tama, Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E fia faapai atu foi i Auauna Paia a le Atua o loo tala faauto ma nono manu, o loo faafaletuluia ma faafalele-malu i soo se tulimanu o Samoa ae a atunuu mamao, o loo nono manu aua se manuia a Samoa.

E manatua le tapuaiga a nai o tatou uso i le Motu o Sasae, Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu-na-saelua, Faatui o le Motu ma le Malu o le Fale o Alataua, Autasi ma le Maoputasi, Auvaa o Tootoo ma oe le Manuatele.

Lau Afioga i le Fofoga Fetalai, ua ta fia oo i lou Itumalo. Pe uma lou taimi i lou Itumalo ua lava lena lauga. Aua e faigata le paia o le Aiga Tau Aana ma le latou Tama, o le paia lea aua le Falefitu o le Ati Tagaloa, Afio le Matua Moepo ia Faasavalu ma lona aiga ia Salū, Auvaaipeau, Tama a Tausala, Afio Taii na Falefia i ai Aiga, Tonumaivao, lo outou Matua Aiga, alaatai le mamalu i Galuefa ma le Tula o Salogo, Falelatai ma Tagata o le Vavau ma Vaeolenofaia. Afio foi ma alaatai le Falefa o le Usoalii ma le Gafa, Fiamae ma le Tamaitai, le Nofu a ituaiga ia te oe Leulumoega o oe o le Tumua.

Ou te faatulou foi i le paia o le aufaigaluega a le Atua o loo nono manu ma faafaletuluia i totonu o lo tatou Itumalo. Ou te faatulou atu i lau Afioga Moseniolo Pesa, lau Afioga Patele Iose. E faafeiloai atu foi i lau Afioga i le faipule i lau Susuga i le faafeagaiga Leusu ma Imeleta ma le paia o le Ekalesia Katoliko i Siufaga. E faafeiloai atu i lau Afioga i le Tiakono, lau Susuga i le Faafeagaiga Sanele ma Amanda ma le paia o le Ekalesia Katoliko i Samatau. E faatalofa atu foi ma faafeiloai atu i le tama matua o le galuega i lau Susuga i le Faafeagaiga Mikaele ma Analosa ma le paia o le Ekalesia Katoliko i Falevai.

E faatulou atu i le Susu o le Toeaina Faatonu, o le Sui Taitaifono o le Ekalesia Faapotopotoga Kerisiano i Samoa, lau Susuga Senara Tautiaga. Susu lau Susuga Opapo ma le faletua ma le paia o le Ekalesia EFKS i Siufaga, susu lau Susuga Misiperetiso ma le paia o le Ekalesia EFKS i Samatau. Susu foi lau Susuga Cesar Samuelu ma le faletua ma le paia o le Ekalesia EFKS i Pata. Susu lau Susuga Livigisitone Toelupe ma le faletua ma le paia o le Ekalesia Kerisiano i Samatau. Susu foi lau Susuga i le Epikopo Taefu Masi ma lou faletua ma le paia o le Ekalesia o le Au Paia o Aso e Gata Ai i Siufaga. E faapea foi ona faatulou atu ma faatalofa atu i lau Susuga i le Epikopo lau Fetalai Fanaea Fagalima ma lou tausi ma le paia o le Ekalesia o le Au Paia o Aso e Gata Ai i Samatau. E faatalofa ma faafeiloai atu i lau Susuga Talavou ma le faletua ma le paia o le Ekalesia Metotisi i Pata. E faatalofa atu foi i lau Susuga Kereta ma le faletua ma le paia o le Ekalesia Asofitu o le Toe Afio mai i Samatau. Lau Afioga i le Fofoga Fetalai, o paia ia o le Itumalo, o paia faaleaganuu ma paia faale-Ekalesia.

Lau Afioga i le Fofoga Fetalai, o le Itumalo lenei o le Aiga Tauaana, o le aiga e tasi lava i Samoa, e tasi leaga o le Aiga Tauaana, e le faaluaina. E faigata ou te le toe autalaina paia o si o matou Itumalo. O paia o le Aiga Tauaana faapea foi le tapuaiga ia Leulumoega, e tumau pea i faavae na sau ai i tuua ua mavae, o faavae o le Aiga Tauaana, a saunoa tama matutua o le nuu, e faafofoga le nofo a suafa, logosaia e le paia o le nuu. A saunoa le matai o le aiga, e logosaia e le tina o le aiga ma le aiga atoa. O le mea lea lau Afioga i le Fofoga Fetalai, e sau lava i luma le talutalufou o lenei vaitau, le 21 tausaga, o le aia tataua ae tumau lava lenei Itumalo i ona faavae, aua foi o le mau a le autalavou, e a tatou nei, ae a latou le autalavou a taeao, latou te solisoli muliaao i faavae o lenei nuu na tuumatamaga ma paepaeina ma lalaga e tuua ua lagomau mai tiasa.

Lau Afioga i le Fofoga Fetalai, o le Itumalo lenei, i le 12 masina a o lumanai le faiga palota, ua tofi le latou tofi i le Maota lenei pe ua faamausali le latou tofi i le Maota lenei, ioe, leaga e filimafua e le Itumalo, e fua i luma, fua i tua. Ioe. O fua ia ma galuega ia faafafine toaga e tapena e aiga, ae a foi le tapuaiga a Leulumoega. Na muamua ona falē lou ulufale mai i le Maota nei i le maota i Tupatupa e afio ai le Faaaloaloga ia Taefu ma le paia o lona aiga, ona fonoa lea o le maota i Tausunu e afio ai le Faaaloaloga ia

Lealaitagomoa ma le paia o lona aiga, ona fonoa foi lea o le maota i Matagiagimalie e afio ai le Faaaloaloga ia Faalavaau ma le paia o lona aiga. Ua atoa le toatolu, ona ave lea o le savali o le tuisanifoalii i le nuu tele i uta e afifio ai le Toafa. Fai mai na fonoa Sagogo e afio ai le Afioga i le faaaloaloga i le Faamasino lau Afioga Anae ma le paia o lou aiga Sa Anae, fonoa Samailauano e afio ai lau Afioga i le faaaloaloga le Matua ia Lupematasila ma le paia o lou Aiga, fonoa Matautu e afio ai lau Afioga i le faaaloaloga, le Matua ia Nanai ma le paia o lou aiga, fonoa foi Nefunefu e afio ai lau Afioga i le faaaloaloga le Matua i le Laau na Fausia, lau Afioga i le Faaaloaloga Misa. A tasi le faafitiga o aleaga, ua faamau le afioga, ua tasi le Falefitu o le Ati Tagaloa ua faamau le afioga, ua tulagavae e tasi Sa Tagaloaalagi, ua tatou tiu ai i latasi ina ua tasi le Falefitu o le Ati Tagaloa, tusiaao i so latou tofi, aua o lou vaa e le natia, na sii i le tai e fou atu i le la Itu o le Maota, ae a? Na finagalo le Itumalo e manuia le Itumalo i le Itu lea. Ia o se auauna lava e alu i le ia a le faalolo. O le afioga lea lau Afioga i le Fofoga Fetalai...

Faafetai i lau Afioga i le Fofoga Fetalai, faafetai foi i lou uso a sui usufono e tusa ai ma le faamanatu ma le tuualalo. Ae i ai le manatu, o le Falefitu o le Ati Tagaloa, tasi loa so latou taofi, o le afioga lena, ae olo lava le fua i le maota i Falevai aua e afio ai Fasavalu, le maota i Falematai e afio ai Taii, ae taunuu foi ii le suafa ua faaigoa ai le maota o le Tamaaiga o lenei Itumalo, o Matamatanononofo, aua e tapuai lana Tamaaiga ma aumai lana faamanuiaga i le mea ua tasi i ai le Falefitu o le Ati Tagaloa. Ia pe ua faamalieina le sui usufono?

Faafetai i lau Afioga i le Fofoga Fetalai i le tau faatoatoa. Ia, ou te talitonu ua tau sola foi manatu i le tulai mai o le tama matua o le Maota. Ia e le afaina.

Lau Afioga i le Fofoga Fetalai, o le afioga lena a le Aiga Tauaana, e leai lava se isi e afio ma papaaao i totonu o lenei Itumalo e utuvai tofo i ai, sei vagana o tama fanau a lenei Itumalo o loo afifio i o latou itu taulagi ma aita malele, latou te masalosalo pea ma tuitui pea le faitotoa poo afea e maluelue ai le afioga lea.

Lau Afioga i le Fofoga Fetalai, o lau faapai atu lea e tusa ai o le oo mai o lau taumafai i le Maota nei. Ua tali faaaliali le Atua i le faiga filifiliga a lou Itumalo. Ua ou talitonu o pine ia o loo tumau pea le mamalu o faavae o le Aiga Tauaana, o loo tumau pea le mamalu o le latou afioga i Faaaloaloga o le Falefitu o le Ati Tagaloa.

Le Itumalo e, ua toia lava au i le uila i la outou faaaloalo maualuga ma la outou faaeaea, ua malie le faga i Paau, ua malie foi le faga i Lalau, aua o se togi le seu na lagatila ae faapulou i le tualima, ua faamalo fai o le faiva. Ua outou faatietie lenei itu o le tatou faiganuu, ua outou faatietie le Toatolu ma le Laau na Fausia, ua outou faatietie lenei auauna i le maa salafa, ua outou sii foi le fale o Asomua ma tuu i le mauga. O le tala a le auauna, o ai ea le tagata ua outou manatu ane ai? Le Itumalo, ua ou talitonu ua outou filifili faatasi ma le Atua, aua ua outou filifili i se tasi o outou lava e fai ma o tatou sui, ua outou filifili i se aupito itiiti ma faatauvaa, vaivai ma le taualoa, e fai ma o tatou sui, ua outou tusiaao i le o loo outou militino ma soosootauau faatasi, o lo'o outou tofafa ma maleifua mai faatasi, e tasi lo ta aluga, e tasi lo ta fala. Tou te tapuai faatasi i le Atua i Aso Sa taitasi uma, tou te talisua faatasi. A pe le paoa, e pogisa foi lona fale, a pe le suavai, ua outou le taumamafa ae le taele ai ma le sui usufono o le tatou Itumalo. A faaletonu foi auala e pei ona malie i saunoaga a sui usufono, e taumalua mai foi ma le sa o le tatou tofi e agai mai i Apia. Ae i ai le lelei o ia faiga lou Itumalo, aua e moemanatunatu le tamaloa Aana, e taunuu loa i Apia, faasasao loa i le ofisa o le Minisita, tauanau, tuualalo, tuitui ma saga tuitui, aua e faapena, e le moemoenoa, ta'ita'i ua filifilia e se Itumalo.

O le mea lea e momoli atu ai le faafetai tele i le paia o lou Itumalo, aua ua outou le tagai i le lauamanu, ae ua outou silasila i le faamuli o atu. Ua outou le saili foi i le oa ma le tamaoaiga, aua e le o le mea malosi, o le mea moni lea, a o le mea moni, o le mea sili lea ona malosi i luma o le silafaga a le Alii. Ua outou filifili foi ua sili lava le manu e tasi ua uu i o outou lima nai lo manu e tele o loo i le vaomaoa, na o le aai ma felelei solo. Lou Itumalo e, ia o la outou pule lea, o le a ou tiu ai faamatalaoa, e tiu ma afifi ma taofi mau ia aua lava nei aveesea.

E momoli lau faafetai i ou uso a sui tauva, lau Fetalaiiga Toomaga Olomautu poo lau Afioga foi Taefu Salapu, faapea lau Fetalaiiga Manoo Kato. Se ua faamalo finau, ou te talitonu e lei lelei sa oulua malolo i le ao ma le po i le taumafaiiga o le tatou finauga. Ua malo le taalo faatamalii, sa oulua seu i falemua ae ou seu

i falevaai, ua tali le tatou Itumalo, ua oulúa faaaloalo ma o tatou faamamalu faatasi i ai. O le mea lea e momoli atu ai le faafetai tele.

Lau Afioga i le Fofoga Fetalai, e fia faamau le faafetai a lenei Itumalo i le sa seei i le Nofoa o le Itumalo i tausaga e 20 ma ona tupu talu ai, le Afioga i le Laau na Fausia, le Afioga i le sa fai ma Sui Palemia o le Malo Tutoatasi o Samoa, lau Afioga Misa Telefoni, i tausaga e fia ma Paeaiga e fia sa e tautua tuavae ai i le Itumalo, sa e asa le gasu o le taeao ma e faalaulelei le ala. Masalo lava na e taumamate e vaivai se sui usufono o le a tulai mai, ua e tapenaina ai faafafine toaga le Maota lenei aua le ulufale mai o lou sui e faaauauina au galuega lelei.

O la'u tala lau Afioga i le Laau na Fausia, o le a tulitulimatagau le ufi a Sina, o tofiga a le Malo aua na Sui Palemia lo tatou Itumalo, toe lava o se aga ona tatou taunuu lea i le tofiga e gata ai tofiga o le Maota lenei. Lau Susuga i le Laau na Fausia le tofi sa i ai o le tatou Itumalo, o le a taumafai i ai lenei sui usufono. O le tatalo foi a le Toatolu ma le Laau na Fausia, o le tatalo foi a au nei le auauna i le paia o le tatou Itumalo, tuu mai laia o se avanoa sei ou faliu ane e tulituli le ai lea aua le tatou Itumalo.

Ia ou te faamalulu atu foi i le faafofoga a Samoa i la outou fita faafogafoga a o alo atu le paia o le Aiga Tauaana e taumafai e fofu alamea ma teuteu le lotoifale i le tau faaiuiuga o lena Paeaiga ua mavae atu. Matou te talitonu o lo outou finagalo malamalama aua e le aia moo i liu o vaa, e le po pea se nuu, e sau pea malama, aua e toese nuu potopoto.

O le mea lea lau Afioga i le Fofoga Fetalai e momoli atu ai le agaga faafetai tele ma tatalo atu foi i le tatou Malo, o se tasi lenei o tamalii e tele le silafia ma agavaa o i ai. A o i ai ni galuega a le tatou Malo e aoga i ai o ia e vae ma lima i ai, faaoga. O le tatalo lea a lenei Itumalo.

Ou te see atu i le Tala Faatatau Autu o Tupe.

Ou te talitonu ua gagaifo le la, ua goto foi le fetu a le tamaloa. E talitonu foi ua falē i maota ma laoa o le Atunuu i le mamalu o le Atunuu o ē sa fitā-i-tuga i galuega faatino o lenei aso ma o lenei foi afiafi ou te talitonu ua usua le Fono lau Afioga i le Fofoga Fetalai, ae ua amata ona nōnōmanū aiga ma nuu aua se manuia o lenei Maota Fono aemaise foi o le Atunuu, ma e faafetai tele atu ai i lau Afioga i le Fofoga Fetalai.

E toe faatalofa atu foi i le faafofogaaga a lo'u Itumalo i lo outou fitā faafogafoga. E i ai le manatu o le taeao ua sola sa paepae ai Paia ma Mamalu o lo tatou Itumalo, le Paia i Aiga Tauaana ma le latou Tama. O lenei itula ona o le manumanuga i lo tatou taimi, o lea e i ai le agaga o le a aga'i sa'o le lauga a le Aiga Tauaana aemaise foi o le mamalu ia Leulumoega i nai mataupu o le lauga o totoe.

E maea se faamatalaga i le taeao ua sola ua oo le tautalaga a lenei Itumalo i le Tala o le Tupe ma e momoli le faafetai a lo'u sui usufono i lo tatou Itumalo, aua e faigata ona sa i ai le manatu e le oo se lagona ma se manatu i le Tala o le Tupe. O lo outou sui usufono po'o le auauna foi, o le sui o le Komiti o Tupe Maua ma Tupe Totogi sa gafa ma le suesueina ma le auiliiliina o le Tala o le Tupe. O le mea lea, o la outou tuualalo i a tatou feiloaiga i afiafi fai so'o, na faapena ona tuusao atu i taimi sa iloiloaina ai le Tala o le Tupe, ae faafetai atu mo fautuaga, faafetai mo tuualalo. O lea lava e manino lelei la outou tuualalo, sa agai sa'o lava i le Tala o le Tupe e pei ona outou fautua mai i vaega e pei o le inflation, na outou fautua mai foi i le unemployment ma outou tuualalo mai foi pe aisea ua naunau ai lo tatou Malo e fia aveva ma sui o le WTO ae le faaleleia muamua nai Faalapotopotoga o lenei itulagi e pei o le PICTA ma le PACER Plus.

O le mea lea lo'u Itumalo, faafetai i la outou tuualalo, o lea ua i ai se manatu ua maua se motugaafa e lo outou sui usufono ona o la outou tuualalo i taimi tatou te mafuta ma fefaasoai ai. O le a agai sa'o se faamatalaga lau Afioga i le Fofoga Fetalai i nai atinae o lenei Itumalo.

I le itula ua fano sa agai atu se faamatalaga aua e le o po se lilo, sa tautua le sui usufono o lenei Itumalo i le Malo i le tofiga o le Sui Palemia, o ia sa faia le faiva o le faasoaso, sa tapena foi ala ma faapena ona faia le faaso i atinae uma a le Itumalo. E i ai foi le talitonuga lau Afioga i le Fofoga Fetalai aemaise o lau Afioga i le Palemia ma le Kapeneta, e pei lava o tala ua masani ai le Maota, "Ua faaso matamuli le tamaloa Tauaana ona o ia o lo'o limalima lelei i le faasoasoina o le tamaoiga o le Atunuu." Masalo tasi lenei Itumalo lau Afioga i le Fofoga Fetalai na muamua lava HRPP a'o le'i faavaeina le HRPP, ioe; o le agaga lena o lenei Itumalo. E i ai le faaeteetega aua e matamuli e oo i galuega sa faatino e le HRPP i na fatia ua sola. Aua a ou oo i lea tulaga, e faaeteete lava e pei ona ou taua, o le sui usufono o lenei Itumalo sa gafa ma le faasoasoina o a tatou seleni ma tuu lava ia e faamulimuli i la tatou faaso. O le tele lava la o Paeaiga, e tapuai lava lenei Itumalo.

Lau Afioga i le Palemia ma le Kapeneta, o le a se tautua a le Laau na Fausia, o le a se tautua a lē na seei i le tofi o lenei Itumalo, le Sui Palemia o le Atunuu sa i ai, o le taimi lenei ua i ai le faitau a le Aiga Tauaana ma Leulumoega ua tataua ona i ai se seleselega. E muamua ona lūlū ona selesele lea. Ua ou manatu la sa lūlū lenei Itumalo i tausaga e fia ma Paeaiga e fia, ae a pe a fai sina galuega mo lenei Itumalo? O le tausaga fou e atoa ai le 50 tausaga o le Tutoatasi o le Atunuu, o le 50 foi lena o tausaga o lagolago lenei Itumalo i le Faigamalo a le HRPP. O le a le faatauana lau Afioga i le Palemia ma le Kapeneta, ae o mea nei o lo'o moomia ai le fesoasoani a lau Afioga i le Palemia ma le Malo foi aua le faaleleia o lenei Itumalo: o alatele, o ala-galue, o taligalu, o le falemai, o faleaoga, o le suavai ma nai isi atinae afai e lava lo'u taimi ona ou oo lea i ai.

I ala-tetele lau Afioga i le Fofoga Fetalai, e matamuli lava e tau atu le tulaga afaina sa i ai le alatele. Na lofia se vaega tele o lenei Itumalo pe a siisii le tai, ona lofia lea o le alatele ma faaleagaina ai. Peitai, e momoli la'u faafetai tele ona e pei ona ou taua i le taimi ua sola, a uma loa ona taumalua mai i le leaga o le auala, tuusao loa le savali i le Afioga i le Minisita. O le mea lea e momoli atu ai la'u faafetai tele i lau Afioga i le Minisita mo Galuega, Felauaiga ma Atinae Eseele ona o lea ua fai o matou auala. E momoli atu foi le faafetai tele aua o lea lava e uia le auala i aso uma i le afiafi ma le taeao i aso fai so'o, ae e momoli atu le faafetai.

E fiafia e lipoti atu i lau Afioga i le Minisita ona o le faatinoga o le auala lea, e ese le manaia. Ou te le iloa po'o ai le konekarate o lo'o faatinoina ia galuega, ae ua matua lelei faatino le galuega.

E manaia le lautele ma ua faatino foi i se faiga e le to'a ai le suavai i luga o le auala lea e fai ma afaina pe a uia alatele a'o to'a ai le suavai i luga. O le mea lea e momoli atu ai le faafetai tele lau Afioga i le Minisita.

Pau lava se matou matau ae ina ne'i matou vavevave lau Afioga i le Minisita, o le tuai laitiiti lava i la matou matau ma ua tuai tele le faatinoga o le galuega. Sa amata mai i le masina o Me, ae tasi lava se section po'o se vaega ua uma ona faata, ae faalamolemole lava i le tele o taimi, e alofa foi i le konekarate. Po'o le mea e le'i taunuu mai ta ma tulaga faapena ua ala ai ona tuai? O lea e talosaga atu ai i lau Afioga i le Minisita, e leai ua lelei mea uma i le tapenaga o auala tetele i le vaai atu a lenei Itumalo, ae ua tuai laitiiti lava, o le ala lea e tuualalo atu ai i lau Afioga i le Minisita. O le a taatia atu iina e fefulisai i ai le tofa a lau Afioga i le Minisita.

Ou te fia taua le auala i le pitonuu lea o Siufaga faamolemole lau Afioga i le Minisita, e i ai le talosaga sa faatoai mai i le Malo i le la Paeaiga ua sola e fia faaatoatoa le Malae Taalo o lenei Itumalo. Sa i ai le agaga i le Ofisa o Aoga, Taaloga ma Aganuu e fesoasoani atu i lea Malae Taalo, peitai, o le talosaga lava ia na tuuina mai i le Malo pe mafai ona tuutuu laitiiti i tai le alatele ae se'i faaavanoa le vaega-eleele lea e faalautele i ai le Malae Taalo lea. O le mea lea e toe tatalo atu ai i lau Afioga i le Minisita, se'i alofa ua taatia i lau Afioga la'u talosaga i ta talanoaga faapea foi se talosaga tusitusia ua taatia atu i lumamea, se'i silasila ane i ai lau Afioga i le Minisita.

E i ai le faamoemoe ina ua fausia le falesa o le EFKS i Siufaga e le'i mamao atu nei, sa i ai le vaega o le falesa na oo mai lava i luga i le auala. O le Ekalesia EFKS, na savalia le Matagaluega o Galuega ma na avatu ai le faatagaga ona o le manatu lea a oo loa ina tuutuu i tai le auala, ona kilia lelei lea o le falesa mai le auala lea. O le ala lea na ona faamanatu atu ai i lau Afioga i le Minisita, ae ou te talitonu ua faasolo le faaleleiga o le auala, ae i ai foi le manatu a oo loa i le taimi e faatino ai le taligalu, o a ni tulaga sa manatu e faatino i lea vaega ona me'i loa lea i le tulaga e pei ona talosaga mai ai lenei afioaga i Siufaga i Falelatai lau Afioga i le Minisita.

O alagalue lau Afioga i le Minisita, e pei lava ona masani ai o le tele lava o afioaga e manaomia alagalue e galulue ai. O le nuu lenei o Falelatai o se tasi o nuu tele o le Atunuu, e tasi le alagalue ua uma ona faavalitaina ma faia lelei i ona tulaga matagofie. O le mea lea e momoli atu ai le faafetai tele i lau Afioga i le Minisita mo Galuega, Felauaiga ma Atinae Eseele ona o lea galuega ua faatinoina i Matautu Falelatai ua maea lea auala-galue. Peitai, e pei ona ou taua o se tasi o nuu tele le nuu lenei o Falelatai, a'o lea ua ou taua e tasi lava le auala-galue ua faatinoina ai.

E tasi foi le auala-galue i le nuu o Samatau ua uma ona fai lau Afioga i le Minisita. E momoli atu ai le agaga faafetai tele ma ua silafia foi e lau Afioga, e leai e le laitiiti foi lea nuu.

O le nuu o Samatau e feooloo lava sina tele. E i ai foi taimi e talatalanoa ai ma nai toeaia ma tuualalo mai i le tulaga o lo'o taatia ai lenei Itumalo i le Itu i Saute o Upolu, le Itu i Saute o le Atunuu e faasaga tonu

i le vaega o lo'o lamatia ai lo tatou Atunuu i galu, mafui'e ma tulaga faapena. O lea e i ai le lagona lau Afioga i le Minisita, e tataua ona silasila totoa i nai vaega ia o le Atunuu e faasaga tonu i Saute, po'o vaega foi o lo'o taatitia ai fesoootaiga o papa tetele i le oga-manava o le eleele ina ia tapena i ai lenei Itumalo. O lona uiga o le tele lava o alagalue, o le vave foi lena ona alofaga i ai lenei nuu pe a oo ina lofia le aai i le galu faapena ma mafui'e e sulufai ai i tuamaota ma tualaoa pe a oo ina tupu mai ia pefea.

Lau Afioga i le Minisita, ou te talitonu o lo'o i ai lava nisi alagalue i le taimi nei e le'i faataina ma e tatalo atu ai i lau Afioga i le Minisita ina ia alofagia, o Siufaga o se tasi o pitonuu o lenei Itumalo, o Pata se tasi o pitonuu, e leai lava ni alagalue o ia nuu e lua ua faatinoina, ae tatalo atu ina ia alofa lau Afioga i le Minisita se'i oo ane i ai le asiasiga mo lau faasoa.

O taligalu: lo'u Itumalo e, ua uma ona asia ma faatalatalanoa lenei mataupu ma e faapena foi ona faafetai i le Palemia ma le Minisita ona ou te talitonu o lea ua oo i ai le latou faasoasoa i lenei taimi i taligalu mo lo tatou Itumalo. O le tele o nisi o taimi e lofia le auala o lo tatou Itumalo i vaega tu maualalo, ae le lava vaega o i ai e foia ai ma taofi le suasami. O le mea lea e fiafia ai e faailoa atu o lea ua oo atu le faasoa a lo tatou Malo, o se taimi o le a faapena ona oo atu masini e faatino lea galuega, a'o le agaga faafetai o le Itumalo e le faaititia lau Afioga i le Palemia ma le Kapeneta ona o le faamatuuina o ia tulaga aua lenei Itumalo i taligalu ina ia oo lelei atu i itu uma ma ia faasopolia lenei Itumalo.

O le Tsunami na feagai ai ma le Atunuu ia Setema i le 2009, sa afaina lenei Itumalo, e le natia i luma o lau Afioga i le Fofoga Fetalai ma lenei Palemene, ae talitonu lava, ua laki ona o le tolototo i Fagaiofu, faapea ma nai togatogo i Pata ma se vaega o Siufaga. O nai vaega ia na malu ai le Atunuu o lo'o afifio ma papaaao i lea vaega o le Itumalo ona ua taofiofi e ia vaega le matautia o le galu.

O le faleaoga i Siufaga i Falelatai, o le faleaoga lava lea e aupito i sili ona lata i le sami o lenei Itumalo lau Afioga i le Minisita mo Aoga, Taaloga ma Aganuu. Sei alofa ane aua na afaina lenei faleaoga, peitai e leai se fesoasoani na maua atu i le tatou Tsunami. Ua utiuti foi le faasoa a le tatou Malo, ua gafa lava le afioaga latou ma le faaleleia o lona faleaoga, ae faafetai atu i lau Afioga i le Minisita mo Aoga, Taaloga ma Aganuu, ona e talitonu sa i ai lava foi sina popolega o lenei nuu ona o le tulaga o le tatou aoga ne'i tapunia ona o le faaletonu o faleaoga, peitai, ua talia nai galuega sa faatinoina e le nuu ma le komiti, ua mafua ai ona solosolo lelei i lenei vaitau lo matou faleaoga.

Ua ou taua ia vaega ona o vaega lava ia na faatamaia e le Tsunami ae moomia le faasopolia o lo matou taligalu ona malu ai lea o sia aoga, aemaise foi o le lautele o lo matou Itumalo. O le mea lea e momoli atu ai le agaga faafetai.

O le falemai o lenei Itumalo e pei lava ona silafia, sa i ai le falemai o lenei Itumalo, ae ua leai se falemai i lenei taimi. O le taimi nei o lo'o totoe na o nai tanevai sima o lo o taatitia ai, sei vaeane le faafofogaaga a le Atunuu, o nai pine ia e iloa ai sa afaina lenei falemai po o fale na totoe ai i le Tsunami. O le mea lea e tatalo atu ai i lau Afioga i le Minisita mo le Soifua Maloloina, ia masalo na uma loa ona faatauto a outou Afioga i Minisita, ta feiloai loa ma ou tuualalo atu e uiga i le faafitauli o lo'u Itumalo, e fia fai sina falemai, e le faapea o le a matua fai se falemai tele a o sina mea e tau ina tua i ai lou Itumalo. O le mea lea e tatalo atu ai i lau Afioga i le Minisita mo le Soifua Maloloina mo lea vaega.

O le suavai e pei ona ou taua, o le Itumalo lenei e lua vai e oo atu i ai, o le vai o le Malo ma le vai foi e tutoatasi o lenei Itumalo, o le isi e alu atu mai Sasae, o le isi e sau mai Sisifo, ae o lo o amo lava le paelo vai e oo mai i lenei taimi i se vaega o lenei Itumalo. O lona uiga e le oo le malosi o le vai lea e alu atu i Sasae i le ogatotonu o le nuu, e faapena foi le sau mai Sisifo, e le o oo atu le malosi i le ogatotonu o lenei Itumalo i Pata ma se vaega o Siufaga, o lo o utiuti le faasoa o le suavai, o le mea lea e tatalo atu ai i lau Afioga i le Minisita e ana ia lea matafaioi, ina ia alofa ma silasila ane i ia vaega.

O le Afioga i le Minisita mo Taaloga ma Aganuu. Ua ou taua ma faafetaia foi lau Afioga e tusa o nai atinae ma asiasiga sa faatoai atu i si o matou Itumalo. Ia e faapena ona tatalo atu e i ai isi faamanuiaga e pei o Tele Centres ma isi mea faapena, e lei oo atu lava se vaega i lenei faa-itu o Upolu. E manaia foi pe ana i ai se vaega faapea sei fesoasoani i le vaivai o nai alo ma fanau o lenei Itumalo. Ua ou taua foi i lau talosaga i le Minisita mo Galuega lau Afioga i le Minisita mo Aoga, Taaloga ma Aganuu, le tulaga lea i malae taalo, sa i ai lava le agaga fesoasoani o le Matagaluega o Aoga sa tuu mai, ae peitai, ia tuu ese muamua ma tuutuu i tai le auala, ona avanoa lea o le fanua mo le malae taalo.

E fia fai se tala i le tatou Faiga Palota, peitai e manumanu i le taimi, ae o lea foi e i ai le Komisi Suesue e gafa ma lea vaega, o le a tuu sao i ai se manatu o lenei Itumalo.

Lou Itumalo e, o lena ua outou silasila i le ata foi lea o le Survivor ua amata foi ona toe pue, ou te talitonu o lena ua toe faamanuiaina ai lo tatou Itumalo i galuega ma tulaga faapena.

Ia tatou viia ma faafetaia le Atua ae momoli ai foi le faafetai i le Afioga i le Minisita o lo o gafa ma lea vaega, ona o lea polokalame ua toe oo atu isi o matou Itumalo ma maua ai galuega a lo matou Itumalo. E i ai lava le talitonuga maualuga lau Afioga i le Fofoga Fetalai, o lea lava ua tuusao le faatonutonuina o ia fuafuaga i le feiloaiga a le Pulega o Tagata Tafafao Maimoa Mai Fafu ma le afioaga, ina ia manino tulaga uma, o le mea lea e momoli atu ai le agaga faafetai tele.

E fia oo foi lau faafetai i le Afioga i le Minisita mo Faamasinoga ma Pulega tau Faamasinoga...

I le Minisita mo Faamasinoga ma Pulega tau Faamasinoga, o le Minisita foi e fitoitonu i ai lou nei tagata o le Minisita Lagolago e tusa ai o le faatuatuaga ua tuuina mai i lou nei sui usufono, e tautua tuavae ai foi i le tatou Ofisa o Faamasinoga. E momoli atu ai le faafetai tele i lau Afioga i le Minisita.

Lou Itumalo, o lena ua motu atu se vaivaiga a lo tatou sui usufono. Ia paga lea, e fai foi o le fia 'ai malie, a o le tuu malie. Ina ne'i avea le naunau e fai ma lape o le tatou lauga. O le mea lea ou te faamalulu atu ai i lo tatou Itumalo, o le a sa outou faafogafoga ma matau i le taumafaiga a le sui usufono vaivai o le tatou Itumalo, ia tatou ave ia lea i uta, e pei o lea upu. O le tatalo, ia tuu maia lo outou faatuatuaga, ae sei faliu le Toatolu ma le Laau na Fausia, aemaise foi o lou nei tagata, e tautua le tatou Malo e ala i le Nofoa i lo tatou Itumalo. Sa tu'i lava foi le mulipapaga e lo tatou pitonuu nei le Toatolu ma le Laau na Fausia, a o felafuai lo tatou Tofi i lena itu o le tatou nuu ma le afioaga i Samatau. O le mea lea e momoli atu ai le faafetai tele.

Ae ou te le'i nofo i lalo lau Afioga i le Fofoga Fetalai, e avatu lau faafetai ma le faamalo i lau Afioga i le Taitai o le Itu Agai, le Afioga i le Sui Taitai, o sui usufono mamalu o le Palemene ua nofoia lena vaega o lo tatou Malu, ia e momoli atu le agaga faafetai. E i ai le talitonuga maualuga, leai ua outou sii se matalalaga i upufai o Malo e ala i lena Vaega Faaupufai e Agaia le taumafaiga o lo tatou Malo. O le mea lea e momoli atu ai le faafetai. Ia faamanuia tele le Atua i taumafaiga a lau Afioga ma le Vaega Faaupufai o le Tautua. E momoli foi le faafetai tele i lau Afioga i le Palemia ma le Kapeneta, e tusa ai o le faasoasoina aemaise o le faatoatoaina o Taulumaga uma aua se manuia o lo tatou Malo.

Lau Afioga i le Fofoga Fetalai, e faigata o lau Afioga e tofe uma ou itu, aua ua matou talitonu ua saofai le tamaloa Sasina i le Nofoa, ia ae lagolago i ai le paia o le Aiga Tau Aana.

Ou te le tau fai atu lau Afioga i le Fofoga Fetalai, e leai o lau matau, ia e pei lava e foliga o le Nofoa lena na fai mo lau Afioga, i le matou matau i le faiga o le tatou nofoa i lenei Paeai. Ua malualii lau Afioga i le Nofoa lena o lo o seei ai – ma faamanuia le Aiga Tauaana i lou nofoa o le Nofoa o le Fofoga Fetalai. O le tatalo, a maea lena lima tausaga, ia aua ne'i e tuua le Nofoa ou te talitonu lava, na fai faapitoa lava le Nofoa lena mo lau Afioga.

Ia manuia tele toe Taulumaga o le tatou Fono i lenei afiafi, ia manuia foi le faafogafoga mai a lo'u Itumalo. Soifua.

21 IUNI 2011

Tofa LENATAI VICTOR FAAFOI TAMAPUA (Vaimauga Sisifo): Faamalo faafetai i lau Afioga i le Fofoga Fetalai. Sa faapea e tosotoso laitiiti i tua, ona o le taimi nei o faigalotu o lo matou Itumalo, ae ui o lea, o le a taumafai atu.

Ou te faatalofa atu i le paia maualuga ma le mamalu tele o lenei Maota, talofa lava. Ou te talitonu o lea ua afio le faiva o Toamanupau aina le aiga o talotaloga, ua malieō foi le faiva o tapuaiga. Ou te tu foi i ao o maugaloa ma ou vaavaai i le ava pasama na itea ai fanualuga nai vasa.

O lea ua tu maualuga lenei taeo liugalua ina ua pai Tupu le Foe a Ulualofaiga, ua tau Tupu, ua tau Tumua, ua tau i le Atua aua le afio o lau Afioga i le Fofoga Fetalai, afio lau Afioga i le Palemia, Sui Palemia ma le nofo a Minisita o le Kapeneta.

Afio lau Afioga i le Taitai o le Itu Agai, afifio a outou Afioga i sui usufono mamalu o le Palemene. O lou tulai mai i le foe lau Afioga i le Fofoga Fetalai ma e seei i le Nofoa pule o lenei Maota, se ua faamalo le galue, faamalo le tautua. Ua faamalo le fai o le faiva e pei o le fetalaiga ia Lefaoese ma le Ulumu. O tala a le Tusi; "E te faia lava e oe mea sili ma e manumalo pea".

Ia faamanuia tele le Atua i lou tulai mai e fai ma Tootaumua o le Sa o le Palemene o Samoa.

Ou te faafetai atu i lau Afioga i le Fofoga Fetalai ona o lenei avanoa maualuga ua e tuuina mai. O au o se tasi o sui usufono mo le Itumalo o Vaimauga Sisifo, ou te tuuina atu se tasi o sao o lenei Itumalo aua taualumaga o le talanoaina o le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 e pei ona i luma o le Laulau a Fono a le Palemene.

Lau Afioga i le Fofoga Fetalai ma le mamalu o le Palemene, ou te talitonu ua uma ona tea Sa mo ula i Matautusa, o Le sa alo seu ai Feagaimaalii aua lo la va tapuia ma lona Matai. O lau faausuga sega ma lou siitia o le atu o le taeao ua faaagi i tia malie, aua o lele ua mapu i Tuigaolo o le toa na e lagatafa, ma ua e tapui le tapu a Tupolesava e pei o le tala i le Taofia a le Malietoa Taulapapa. Ua fai lau Afioga ma o tatou sooupu i le lagi aua lo tatou va tapuia ma lo tatou Matai Sili, o Ia o le Atua o Lanu ma Gagana, o le Atua o Nuu, Malo ma Atunuu. O le Atua foi ua Faavae ai le Malo Tutoatasi o Samoa. E talitonu le faamoemoe e autasi finagalo uma o lenei Maota ma lau Afioga i le Fofoga Fetalai i le lagona e tasi, tatou te matua moomia le musumusuga ma le taitaina mana a le Agaga Paia ona pau lea o le taiala maotino e mafai ai ona manuia lo tatou alofaiva aua Samoa ma ona tagata. Tau ina ia logo i logo a i se faafofoga a Ieova la tatou faapolo ua e siitia ma liligi ifo lona sosia o manuia i luga o lau Afioga ma lenei Palemene tainane le faafogafoga tapuai mai o Samoa atoa.

E muamua ona ou faatulou ma ou faatalofa atu i le tapuaiga paia a Lana Afioga Mamalu O Le Ao o le Malo o Samoa, lau Afioga i le Tama a Aiga Tui Atua Tupua Tamasese Efi ma lau Masiofo. Le tapuaiga mamalu a lau Afioga i le Sui o le Fono a Sui Tofia lau Afioga i le Tama a Aiga, lau Afioga i le Tui Aana Tuimalealiifano Vaaletoa Eti Sualauvi II ma lau Masiofo.

Lau Afioga i le Faamasino Sili faapea lau Afioga i le Peresetene o le Faamasinoga o Fanua ma Suafa ma le vasega o Faamasinoga.

Ou te faatulou ma ou faatalofa atu i le mamalu maualuga o le nofo a Minisita o le Sakarameta Paia i Afaigaluega Paia a le Atua o loo faatuna pa'ulia ma faafale-le-malu i nuu ma afioaga i le soo faataamilo o Samoa. Aua o outou o anava o le taua faale-Agaga aua Iesu Keriso ma lana Talalelei. Faamalo faafetai mo la outou tatalo ma lo outou faanonoga manū aua se manuia o Samoa ma lana Faigamalo.

Ou te faatulou ma ou faatalofa atu Samoa i ou paia agi nuinui tetele ma ou mamalu e agi laufola i ou feaoga ma tanugamutia. Mai le Gaga'ē na tuliloa ai le piilua o le fili o Aiga seia paia le Gagaiḡō na fata ai iā Tagaloa le auli o Samoa. Tulouna le salafa o le tu tafaitoa ma ou sa vavaloloa, aua e sili ou aupā'ā ua le tauilo ai ga-togiā. Ua uma ona tofi tofi le lauu a Tama lea na tafai fa, tafai tia, tafai toto i Aiga ma o latou Tama, Tama foi ma o latou Aiga, Aiga o Tupu, Aiga o Nofo, Aiga o Papa ma Aiga na Tafai. Tulouna le va vavae o Tumua ma Pule, o le va tootoo ma le va fetalai. Tulouna le va vavae o Ituau ma Alataua, Aiga i le Tai ma le Vaa o Fonoti, o Tulati ma Tulatoa ma le Aufueloloa ma outou Ē faia upu o Samoa.

Ou te faatulou atu ma ou faatalofa atu foi i le tapuaiga mamalu a le Malo i Sasae i le Afio o lau Afioga i le Kovana Sili ma Lutena Kovana ma le lua au taupulega. Afio le Afioga i le Faamasino Sili ma le Vaega o Faamasinoga, Afio lau Afioga i le Peresetene ma le Maota maualuga, Afio lau Afioga i le Fofoga Fetalai ma le Maota o sui. O le paia lava lea aua le Nofo a Maopu ma le Fale o Tutuila ae tainane le afifio o Faletui ma le Auva o Tootoo ma Tama a le Manuatele. O paia sauo'o na o Samoa e afua mai i Fale Gase ma Fale Taapau seia paia Faleniu Sa. Ou te faatulou atu ai, tulou, tulouna lava.

Ae o le a sunui tonu lau o le fō ma faapito augafa se leo o le auauna faatauvaa aua e faigata le tapuaiga a lou Itumalo pele o le Vaimauga Sisifo. O le paia maualuga o le Falesagauga, i le Afifio o Alo o Sina i lau Afioga Seumanutafa ma lau Afioga Toomalatai. Afifio le Aiga Paia o le Aiga Salevalasi i lau Afioga Tamaseu ma lau Afioga Faualo, Susu oulua Matua o Onofiatele ma Faaolesa, Afifio Tupuola, Faumuina ma Siligatusa, Susu le Matua o Leupolu ma Alo o Malietoa, Afio Soialo ma le Matua o Feetau, alaatalai le Faletolu i lau Tofa Tuiletufuga, lau Tofa Letaa faapea lau Tofa Pupualii. Alaatalai le Vainalepa i lau Tofa Lima ma lau Tofa Lealasola ma lau Tofa Atoa-ma-Fuaipolu, alaatalai oe le Tuisamau i lau Tofa Samau ma lau Tofa Feagaimalii. Liua le vai o Sināfatunua i le paia maualuga o le Fuaipolu i le Afio o lau Afioga i le Matua ia Tofaeono, Afifio oulua o Tama Asi ma Patu, o le Afifio lava lea o Aiga e Tolu, Afifio oulua Usoalii o oulua Luafau ma Tuiono ma Lupetaliaami, alaatalai i laua na Ta'i ia Tamapua ma Manogiamanu

ma le mamalu i le Nofa a Ituaiga ia Fuata, tainane le mamalu ia Ātaga ma Sa Tagā, faapea le launiu na saelua, Taga ma Salaitia ma la moa-na-fagatau.

O paia faataotooto na o oe Vaimauga Sisifo aua le paia maualuga i Susuga i Faafeagaiga ma le Aufaigaluega Paia a le Atua i le nofo fatalua o le Talalelei. O le paia i tupu ma ee, o failauga ma ponaoo, o saoo ma aualuma, faletua ma tausī, aumaga ma ava a aumaga e oo lava i tupulaga talavou ma le mamalu tele o le au palota.

E avatu foi le faamalo faapitoa i sui tauva sa fai ai le filifiliga a le tatou Itumalo, malo le fai o le faiva, malo le faatamalii. Ua ou iloa oe lou Itumalo pele, e te tago fenunuti i namusala aua e te sisila faa-foafoa i olataga. Ae fai mai le fetalai a le fale lalaga o tupu tafai fa na Mauga ma Nuuausala, “Suga pi’i pola uma ma fola le Maota, o la ua faatau muaava mai tai le Sa o le Tupu tafefe ai nei o le a e’ e ni Pāpā”.

Lo’u Itumalo o Vaimauga Sisifo, ua faapena se lagona maualalo ua oo ifo i lou nei tagata aua lo tatou faafeagai ai. Aua o lea ua taoto i lagatonu le Tuafe’i na saafi i ai Nonumaifele. Sa ou faatagisia lau puleto ma lau faaeaea e ala i lau faiga filifiliga talu lou fia pa’i i Vai o le Tama ma lou fia tautua ia te oe lou Itumalo e ala i se tasi o Nofa o le Palemene. Ua a nei? O le tala e fai i tiuga alofilima na fai i Samoa na Galo, “ua tofo i tino matagi lelei, ae tofo i lologa mata ai o le Tai”, a lea ua vaai i mauga ma ua ou tepa i ula. O lea ua faatietie lou tagata augavale i le maa salafa, ua e to pule, ua e faaea, ua e le tali tualimaina sou manao. O le tala a le Tusi; “O ai ea le tagata ua e manatu mai ai, ma le atalii o le tagata ua e asi asi mai ai?” Fai mai le talatuu e fai i le Tuamasaga, E na noga le moe tagi ae moenoa ma togiola Samoa ina ua fatitu Luatua i le aso o Malietoa ma igoa ai le vai taele i Malua o Tofuola. Ioe le Vaimauga Sisifo, talofa, ua fatitu lo outou mamalu ma ua outou faaeleelea ona o sa’u faaoloolo maau. O lenei ua ou tofuola i lau faatupu ma lau faaeaea, lau tofa faatamalii ma lau faautaga faa-faleupolu. O le tala e fai i le alo o le Tuimanua, “ua malie lau pule ua malie lau faaaloalo. Aumai lau faaaloalo o le a ou le folasia i le ala pe faasautia i fafo, ae o le a teu i le va o ou mata e fai ai au upu ma au tala. Aumai lau faaaloalo o le a teu i le va o lou ulu ma lou fatu e fai ai au upu ma ou manatu”. Ou te momoli atu le faafetai tele mai le taele o lou fatu ma lou agaga ona o lau faaeaea ma lau faaaloalo ua mamalu ma ua maualuga, ua tau tupu ma ua tau tamalii, ua le mafai e le mafaufau ona faavasega ma ua le mafai foi e upu ona faamatala. Faafetai, faafetai, faafetai tele lava Vaimauga Sisifo.

Ou te le faia ni folafolaga ae na o lau tautinoga ma lou agaga faamaoni, o le a ou tuuina atu atoatoa lou malamalama, lou malosī ma lou ola ou te auauna ma tautua ai ia te oe lou Itumalo e ala i lou tofi sui usufono. E faapena ona faatagisia foi lau tatalo faifaipea ina ia faamanuia mai le Atua i lou alofaiva aua oe lou Itumalo. Ia apele ma apepele outou uma i manuia faalanu maaveave o le Atua. Ae tapuai maia ma le manuia ae sei ou liliu ane e fai so tatou sao aua le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012 e pei ona i luma o le Laulau a Fono.

Lau Afioga i le Fofoga Fetalai, e momoli atu le faamalo ma le faafetai tele i le Afioga i le Minisita o Tupe ma le Matagaluega aua ua outou sa’a faaoti le utu a le faimea i le tapenaina o lenei galuega maeaea. Faamalo le galulue, faafetai i la outou tofa manatunatu ma la outou faautaga le moe e pei o le igoa o le Tamaloa Aana o Ape-na-moe-manatunatu. E asi asi i soo se tulimanu ma soo se vaipanoa aua le mataituina o tulaga uma mo le faaleleia o le atinae o Samoa e pei ona folasia. E matua lagolagoina e lou nei sui usufono le Tulafono Tau Faaofi o le Faatatauina o Tupe 2011/2012 ua tuuina mai ma o le a le tele foi sau faamatalaga e faia i ai. Ae pau a o lea, e fia tulituli matagau pea le ufi a le tamaitai e tusa ai ma manaoga o vaega e fia faaleleia o lenei Itumalo.

Ua le o toe po se lilo i le silasila ma le faafofoga a le Palemene i le mataupu o le Fale Eletise o loo i Tanugamanono. E le na ma le laina le tele o le aafiaga o le soifua o aiga ma lenei nuu o Tanugamanono o loo nonofo latalata ane i ai, ona o le uu tetele o afi aemaise o le kasa uliuli o loo alu ane i luga o ala asu. Lau Afioga i le Fofoga Fetalai ma le mamalu o le Palemene, o lenei faafitauli o loo faaauauina pea i le 24 itula i le 7 aso o le vaiaaso, o lona uiga e le o se faafitauli e faigofie ona foia aua e fai o le aafiaga o le soifua maloloina o tagata ao le manaomia foi o le auaunaga o lea fale eletise mo le atunuu. Ua na o se faatala uula a lou nei sui usufono afai ua faafaigata se fuafuaga e toe siitia ai le fale eletise mai Tanugamanono i se isi nofoaga, ae a sina faamanuiga tau tupe mo nai aiga o loo aafia o latou soifua i aso uma ona o lenei faafitauli.

O le tulaga i auala tetele i totonu o le Itumalo, lau Afioga i le Fofoga Fetalai poo le a lava le tele o mataaga ma faatosina mo turisi mai fafo i totonu o afioaga i tua e amulī ona oo i ai turisi i na mataaga ae muamua lava silasila ma vaavai i le talafatai o le taulaga i Apia nei. E fia maimoa turisi i le Maota o le Tusitala lauiloa i le lalolagi o Robert Louis Stevenson o loo i Vailima. E fia maimoa turisi i se tasi o mataaga faatalatuu i le Vaimauga Sisifo o le fale o le fee i Alaoa. O isi e fia maimoa i le Iunivesite Aoa o Samoa i Le Papaigalagala ato ai ma le tele o nofoaga ma atinae o loo i totonu o lenei Itumalo. O nei nofoaga ma atinae uma e tatau ona fausia lelei auala tetele e agai i ai. O le mea lea e faaolo'oloma'au ai se taofi o lenei sui usufono i lau Afioga i le Minisita mo Galuega, Felauaiga ma Atinae Eseeese ia alofagia le mau auala o loo felavasai i totonu o lenei Itumalo ina ia toe faaleleia ma toe faataina.

E avatu foi le lagolago faatauvaa a lou nei sui usufono e pei ona faaleo e lou uso a sui usufono o lenei Itumalo mo alavai ona o lologa i taimi o timuga i totonu o le talafatai o Apia. E fia faamamafa le talosaga i le auala agai lalo o le pitonuu lea o Magiagi ua faaigoaina o Ueligitone. E pei ona silafia ua tóatele aiga ua latou nofoia lenei vaega eleele ma ua pei lava o se isi nuu mavae. E le gata i lea o le galueaina o lenei vaega eleele e le itu tau faatoaga.

E tatalo atu ai ma le agaga faaaloalo i lau Afioga i le Minisita, sei silasila ane i le taua tele o le faatinoina o lea auala mo le mamalu o nisi o lenei Itumalo.

O le itu i taligalu, lau Afioga i le Fofoga Fetalai ma le mamalu o le Palemene e leai sau faamatalaga e faia i le taligalu o loo i ai nei. E amata mai Mulinuu seia paia le uafu i Matautu ona ua matua mautu ma lelei. A o afioaga o Vaiala ma Moataa, o nisi ia afioaga e taia pea i le savili mai Matu i aso uma ma taimi uma. E faapena foi ona fetau pea le apitagalu ma le malolosi o auma o le sami i le taimi o le sousou. O lona uiga e matua manaomia le faia faalelei oni taligalu malolosi ma mauululuga. E tatalo atu ai ma le agaga faaaloalo i lau Afioga i le Minisita mo Galuega, Felauaiga ma Atinae Eseeese pe mafai ona toe faafoi mai tua le galueaina o taligalu e toe amata atu i Vaiala ma Moataa ona toe faaauau atu lea i isi afioaga i Sasae.

Lau Afioga i le Fofoga Fetalai ma le mamalu o le Palemene, o le Aoga Tulagalua i Moataa o se tasi lea o Aoga Tulagalua aupito tele o loo i ai nei i Samoa. E silia ma le 400 tamaiti aoga o loo aoga ai i lenei Aoga. O lenei foi Aoga e le na o tamaiti Moataa o loo aoga ai ao tamaiti mai isi afioaga e tau lata ane. A silasila lau Afioga i le Fofoga Fetalai ma le mamalu o le Palemene i le faleaoga fogafale lua o loo i ai ua faasolo ina pala ma ua oo i se tulaga e lamatia ai le saogalemu o alo ma fanau. E le gata i lea ua le taitai ona lava le tele o le fanua o loo tu ai nei mo le agai atu i le lumanai. O loo i ai le faamoemoe o le faleaoga fou e fia fausia i se vaega o loo i ai nei le malae taalo i le afioaga o Moataa. O le mea lea e tatalo atu ai ma le agaga faaaloalo i lau Afioga i le Minisita sei silasila ane i se auala e faafaigofie ai ona maua se seleni e mafai ona faatinoina ai ma maeaea lelei lenei faamoemoe aua alo ma fanau aemaise fuaga lalovaoa o lenei Itumalo.

E faapena foi i le Aoga Tulagalua i Vailima. O loo manaomia le toe faaleleia mo le saogalemu o tamaiti aemaise o faiaoga.

Lau Afioga i le Fofoga Fetalai ma le mamalu o le Palemene, o manaoga ia e tuuina atu i le taimi lenei aua e lelei le faasoasoa atu malie ae leaga le avatu uma i le taimi e tasi ona leiloa lea poo fea a ave i ai le faamuamua mo lenei tausaga. E popole foi le mafaufau o lou nei sui usufono pei ona saunoa nisi sui usufono nei avatu uma tali uma mai i lenei tausaga ona oo mai lea i le tausaga lona lima o le Paeaiga ua galo uma nei galuega.

E faafetai atu i lau Afioga i le Fofoga Fetalai mo le avanoa. Ae ou te lei nofo i lalo, e momoli atu le faamalo ma le faafetai tele a lenei Itumalo i le tautua le faalogologo tiga a Ofisa ma Auaigaluega o Matagaluega uma ma Faalapotopotoga Tumaoti a le Malo. Faamalo le galulue, faamalo le finau i mea lelei aua Samoa ma lana Faigamalo. Faafetai atu i lau Afioga i le Failautusi ma le Ofisa o le Fono Aoa aemaise foi le Ofisa Faasalalau a le 2AP.

Lou uso a sui usufono se tasi o sui usufono mo Vaimauga Sisifo, Tofa Lefau Harry Schuster, faamalo fai o le faiva. O le tatalo, ia alofagia e le Atua le ta Nofoaiga. Maua le malosī, maua le malamalama ma ia tumau i le fealofani aua se ai o le Itumalo aemaise se sao mo le lumanai manuia o Samoa.

Ou te momoli atu le faamalo ma le faafetai tele i lou Itumalo o Vaimauga Sisifo. Faafetai tele mo le tapuaiga.

Lau Afioga i le Fofoga Fetalai, faafetai tele mo le avanoa. Ia manuia le Fonotaga. Soifua.

21 IUNI 2011

Afioga IFOPO MATIA FILISI (Aiga i le Tai): Faafetai i lau Afioga i le Fofoga Fetalai. Leai na ou tulai atu ou te faaluaina le lafo a le Afioga i le Palemia. E taofia lauga ae ua lagona foi le fefe ua taumafai ai e fai se lauga.

Faafetai i lau Afioga i le Fofoga Fetalai ua maua se avanoa o le sui usufono mo Aiga i le Tai. E tafai maa le tamaloa na liu fatu i le Alataua ae tafai tupu, tafai tamalii, tafai faleupolu Tiafau ma le Maota o Samoa o loo afio ai le Afioga i le Palemia ma le Kapeneta, afifio foi le Fono Aoa o Samoa i ona sui usufono mamalu uma. Le paia lasilasi ua afifio nei i le Malae o le faautugatagi a Samoa, ou te faatalofa atu.

O le agaga o le Talalelei, lou agaga e, faamanu atu i le Alii, o mea uma foi o ia te au faamanu i lona suafa paia, e viia ai le Atua o le Tama, le Alo ma le Agaga Paia.

Sa matemate lima, saga a Pausisi ae lupe le lafo a Lualemana aua e faigata paia o le Maota o Samoa i lana fonu usu. A saua foi au i le va e pei o faiva i le malae, pe fetogiai foi le tofa lalafu faasoli tuaoi, o le upu moni o le gafa lava o le Tuiaana ua oo.

E se'e lili'a foi le gagana nei pei ona sai Asomualemalama ao alofisa Malietoa i le fale o Tuamasaga ina ua sipa le lamaga. Ona ou faapoipoi lilia lea ma ou faapea ane tulouna ia Samoa aua o oe o le aomamala. Tulouna le tapuaiga i Lana Afioga Mamalu, O le Ao o le Malo Tutoatasi o Samoa, lau Afioga Tui Atua Tupua Tamasese Taisi Efi ma Lau Masiofo, Tulouna lau Afioga i le Sui o le Fono Sui Tofia, lau Afioga i le Tuiaana Tuimalealiifano ma Lau Masiofo. Afio lau Afioga i le Faamasino Sili ma le mamalu o le Faamasinoga, Ofisa Sili o Pulega o Matagaluega a le Malo, Faalapotopotoga Tumaoti, Kamupani ma Aufaipisini uma o Samoa, talofa lava.

O le paia lava lea i le afifio o Aiga o Tupu, Aiga o Nofo, Aiga o Papa ma Aiga na Tafai. Le mamalu o le lauga i le Usoga a Pule ma Tumua, Tula o Aiga ma Faleupolu tofofi o Samoa.

Ou te faatulou foi i le paia o le Aufaigaluega tofofi faauuna o le Talalelei ma le Aiga Sa Levi tulouna lava.

Tutuila ma Manua e faatalofa atu le lauga a le sui usufono mo Aiga i le Tai i lau Faigamalo, talofa lava. E maualuga le afio o lau Afioga i le Kovana ma Lau Masiofo, afio lau Afioga i le Kovana Lutena, afio lau Afioga i le Peresetene ma le Maota Maualuga. Afio lau Afioga i le Fofoga Fetalai o le Maota ma sui usufono. Lau Afioga i le Faamasino Sili ma le faamalosiua o le Tulafono. Lau Afioga i le Failautusi ma Vaega o Mataupu tau Samoa ma lau Faigamalo. O le paia lava lea i le mamalu o Falelima Sasae ma Falelima Sisifo, le afifio o Maupu ma nofo i Maupu. Le mamalu ia Sua ma le Vaifanua, Fofu Aitulagi, Saole ma le Launiunasa. Le afifio o Faatui, le mamalu o Tootoo, afio le Launaamotasi ma upu i le Manuatele. Le Aufaigaluega e, o le Talalelei talofa lava.

Lau Afioga i le Fofoga Fetalai ma le mamalu o le Palemene ua tu mai lagi le lagaali a Tamafaiga. O upu ia o lenei Itumalo o Aiga i le Tai. Ou te faamalulu atu ae sei ou liliu ane i ai. Talofa Aiga i le Tai lou Itumalo pele. O Ifopo Matia Filisi lenei, o la outou sui usufono filifilia na tusi aao i ai e tauaveina le Nofoa i lenei Paeaiga o le Faigamalo a Samoa.

Ou te faatalofa atu i le paia o Luatimu i Faleu o le malae na lua i ai taeao o le Talalelei a Samoa. Ae o le uluai pou o Malo na tofofi ai upu o le Atunuu. I le susu o Leiataualesa ma Leiataua ma le Aiga Sa Leiataua. Lau fetalaiga Futi o le moa na vini mua ma Samutimuti ma le Matua ia Vaisagote talofa. Mamalu Malaetoli i le susu o Leiataualetaua ma le Aiga Sa Leiataua, le Falelima o alo o Sapapa, lau fetalaiga Vai ma le faletolu talofa lava. Tulouna Atiga i le susu o Taupau ma Aiga Sa Taupau, tulouna Falema'i i le susu o Mulipola ma le Aiga Sa Mulipola. Alalatai lau fetalaiga Auapaau ma le falefa o Salua ma Satuilaiga. Faatalofa atu i le Ana o le Maile aua Luatutu ma lo outou Aiga Sa Luatutu. Tulouna Fogamanono le Maota e susu ai Tuilaepa o le alo o Malietoa, susu Leusoalii, afio le Matua o Finau ma le mamalu i le Pologama.

Ou te faatulou atu foi i le paia o Lalotoa aua le susu o Sau ma Aiga Sa Sau, afio Lilo ma Liuvao ma le mamalu ia te oe Sauma talofa lava.

Ou te saga faatalofa atu pea i lo tatou nuu i Mulifanua. E ui tatou te nonofo faatasi lava i po ma ao ae o lou taimi muamua lenei ua ou lauga atu ai faasui usufono o le Palemene i totonu o le Maota o Samoa talofa lava.

Faatalofa i le susu o lo outou Aiga ma Alo o le Malietoa, lau Susuga Moananu o le faaaloaloga, susu Taulapapa, Mauinatu ma Tauti. Faatalofa atu i le paia o Fuailefau, susu Pouli, afio Lilomaiava. Faatalofa

atu i lo tatou aiga Usoalii, le susu o Togialelei Ioapo o le faaaloaloga, Susuga Togialelei ma Ifopo, susu Togia Vaimoa ma lou outou aiga. Ou te faatalofa atu foi i le alalatai o Falute ma Maoso, Faati ma lo outou aiga, le paia i le Lauti na laulelei, le susu Mulipola ma Taupau ma lo outou aiga. Ou te saga faatalofa atu foi i le mamalu i lau tofa i le Tuua Vaatiuola ma Lautolo ma lo outou Faleupolu.

E manatua foi le sao taua o faletua ma tausii, Satoa ma saoa le malosi o le tatou Itumalo ma le 21 tausaga, talofa lava. E le mafai ona galo le sao ma le faapunapa'ulia o le Aufaigaluega Paia ma o outou Faletua ma aiga, e le gata o tatalo ma faamanuiaga, a o le faalototele, talofa.

Ou aiga e, paolo ma gafa ou te malu ai sa lagolagoina malosi lou tagata ma talosia le faamoemoe, tau o se iuleo o le faafetai ou te fai atu ai, a o le Atua e tau ai atu lo outou alofa ma le lagolago mai. Ou te talitonu o lo outou lagolago ma le faamalosi faatasi ma le faalototele, ua ou penei atu ai.

E ao foi ona ou pai atu i ou sui a tauva i la tatou Faiga Palota, sa tatou talatalanoa lava ma ou tautino atu le iuga e aumai e lo tatou Itumalo, ae malilie ia, omai tatou alo faatasi lo tatou vaa. O Aiga i le Tai e masani i taaloga tetele, tatou galulue faatasi mo se manuia o lo tatou Itumalo ma lo tatou Atunuu. Ia saga faamaise atu foi lou nei tagata i le faletua o le susuga ia Sau Siaso i le isi sa tatou tauva ona ua afemoe le malaga, ia saga faalototeleina pea oe ma le nofo a alo.

E momoli atu foi la'u faamalo i le susuga Mulipola Oliva, o lē sa tauaveina lo tatou Nofoa i le Paeaiga ua tuanai atu, malo le galue, malo le faatoatoa.

Lau Afioga i le Fofoga Fetalai, e sau se taimi ona faailoa lea o le finagalo o le Itumalo i le Tala o le Tupe ua taatia nei i le Laulau a Fono, ae avea ia lenei avanoa ou te molimoli atu ai nisi o manaoga o lo'u Itumalo, a'o faafofoga ma taputapu mai.

Muamua e momoli le agaga o le faafetai ona o le galuega faatino i le aualatele, faafetai i le Afioga i le Minisita. Ua ou fiafia lava ina amatamea Aiga i le Tai. Ua ou manatua ai, e le o faagaloina e le Minisita mo Galuega le feagaiga a Tumua ma Pule.

O lenei taimi, sa i ai le manatu e le faaleo atua ni manaoga o lenei Itumalo, ae o se agasala pe afai e le tau atua i luma o le Maota ma le mamalu o le Palemene mea o lo'o tutupu ma mea e tataua ona faaleleia vave mo se alualu i luma o Samoa. O le suavai o eletise o aualagalue ou te talitonu, o nei galuega e tuufaatasia uma i afioaga taitasi po o Itumalo foi i o latou manaoga. Ae ou te tatalo atu, ua i ai foi le fiafiaga ua saunia e le Matagaluega o le Suavai, lau Afioga i le Minisita, ou te tatalo atu, ia alofagia si o matou motu i Manono, ua leai se vai. Ou te le faaleagaina foi ni galuega a ni Paeaiga ua uma atu, ae i ai le talitonuga, e i ai se isi faiga po o le tatou tane e store i ai le vai i tai i Manono, ona faasoasoa ai lea e le toe motusia ai le suavai. O lau talatalanoa atu lea, e le mafai foi ona faagaloina le taumafaiga ia aumai tagata tafafao maimoa mai fafo isi o tatou Atunuu. Ia e i ai le talitonuga o lena ua i ai le fuafuaga foi ia te outou mo se auala e savavali ai tagata tafafao maimoa mai fafo i tai i Manono e faataamilomilo i Manono, ae 'aua le avea i ai ni taavale, ua lava ai lena.

O le uafu faaloloto i Manono faamolemole, pei o le mea o lo o i ai e le mafai ona natia e tataua ona faailoa atu i lau Afioga i le Palemia faapea le mamalu o le aiga Minisita. O le uafu faaloloto i Manono o lo o i ai, o mea nei o lo o tutupu, afai ae i ai se maliu sei tulou, ia e fuafua lava taimi e sau ai le vaa aua e le mafai ona oo mai i uta i le papau tele o le taele o le uafu i Manonouta faapea foi i tai. Ona ou talosaga atu ai lea ma le faaaloalo, e alofoga faamolemole se matou uafu i Manono.

O Apolima, Manono, o Mulifanua ua latou usitaia lava le tatalo atu i lenei mea o le Tsunami, ma ua faapena ona gasolosolo i uta le nuu ma ua toe fausia ai fale, o le agaga lea faamolemole e faailoa atu, o ni auala, o le moli faapea foi ma le suavai. O matou faleaoga, o le faleaoga o le kolisi i Aana Nu. 2 o lo o lua i ai lo matou Itumalo ma le Tauaana, e tau atu i lau Afioga i le Minisita, na o se asiasiga lava e fia oo atu i ai ae lei taofia ia alo ma fanau o le Year 8 e toe omai i Apia ae agai tonu i ai i le kolisi lava i nuu i tua. Ona ua i ai le talitonuga foi, o a lava foi ia se mea e lelei i Apia, e faapena foi i nuu i tua.

Lau Afioga i le Minisita mo Faamasinoga ma Pulega tau Faamasinoga, po o le Ofisa foi e i lalo o le vaaiga o lau Afioga o Faiga Palota. E talitonu o lea ua ou faalogo o lo o tatalo nisi mo ni sui o latou Itumalo, ou te talitonu ai o le fuainumera foi lea o tagata ua tóatele Itumalo, a o lenei Itumalo o Aiga i le Tai, e le gata i le tóatele ae e tatalo atu foi, alofa aumai se isi sui se tasi e faalua ai sui o Aiga i le Tai, ua tele ia Tumua ma Pule, a'o se tasi e faalua ai, ma lou agaga faaaloalo tele.

Ona oo mai lea o sau faamatalaga, ou te faafetaia lau Afioga i le Taitai o le Malo ma le Kapeneta, ina ua tofia au e fai ma Minisita Lagolago o le Afioga i le Minisita mo Tupe Maua.

E le mafai foi ona le oo se faamatalaga pe afai o la ua i ai le galuega e faigaluega ai aua se lelei o le tatou Atunuu. Ia o le tupe maua, o matou nei o lo o aoina le tupe maua, faafetai i le Malo, o lo o i ai ia talitonuga i le faamamaavega lea sa tatou pasia se tulafono aua foi ia tiute le 50%. O le mea moni o lo o tupu, ua tele le au le faamaoni o le tatou Atunuu i lea feagaiga. O lea e tatalo atu ai faamolemole, a tele a tatou tupe, ia ua faigofie foi ona pasi le Tala o le Tupe.

Lau Afioga i le Fofoga Fetalai ma le mamalu o le Maota, o le Tala o le Tupe ua folasia e talisapaia e Aiga i le Tai, e le toe i ai foi se isi faamatalaga e talia e lenei Itumalo le Tala o le Tupe.

Lau Afioga i le Tama o le Atunuu le mamalu o le au usufono mamalu o lenei Maota Fono, ia le Atua e pulepule tetele e foai le ola ma le malosia ia i tatou taitoatasi, ola le sui usufono mo Aiga i le Tai, faafetai.

21 IUNI 2011

Tofa TUILEUTU ALAVAA VOI (Faasaleleaga Nu. 3): Lau Afioga i le Fofoga Fetalai, lau Afioga i le Palemia ma le Sui Palemia, le paia o le Kapeneta mamalu i sui usufono uma o le Maota Fono o Samoa.

Ua tulituliloa le mano'o nai foa e pei o le upu i Salega, ina ua fai folauga le faiva o faalologo. O lenei aso, e le o se taeao na aave po o se taeao na amiami, leai o le aso na lupe ma le taeao na lupe ma le aso na lupe. Tulouna Tiafau, ua sa Tiafau, ua maua Tiafau, ua mamalu Tiafau, aisea? O le tupua sa, o le tupua tumau e oo i le faavavau.

Ae muamua ia ona ou faatulou Samoa i ou sa ma faigata, ma le la oso nai le tolotolo nai Saua seia paia le maa ta'oto faasasao, o le tolotolo nai Analega. O ou tia vavau ma mulivaigasi'a, o malae fonu o tuasa ma ou matua tausii, e le suia e faavavau lava. O lenei aso, e i ai le lagona ma le faamoemoe e ao lava ona ou faatulou i le paia o le Atunuu, ee ia ma susu ma afio Lana Afioga Mamalu O Le Ao o le Malo, le Afioga i le Tui Atua Tupua Tamasese Efi ma lau Masiofo, ee foi ma afio lau Afioga Tuiaana Tuimalealiifano Vaaletoa Eti Sualauvi le II ma lau Masiofo. O le paia o Samoa i le ee tapuai, aua o le afio o lo outou afioga i Aiga ma Tama, o Tama ma Aiga, le fala le gae ma le papa, laupata fetalai aua oe Tumua ma Pule, Itua ma Alataua, Aiga i le Tai ma le Vaa o Fonoti.

E faapea foi le mamalu i tulatoa i faleupolu tofi ma faleupolu o papa. O lenei taeao ma lenei aso e lei tunoa le faiva o Samoa. E le i soona lalafa foi leaga o lea ua malu peaua foga le moana ma ua feilafi ulugalua ona o le aave mai ma le malamalama o le masina susulu ona o le agalelei o le Atua. O le Atua soifua ma Lona agalelei e leai lava se tusa ma Ia i le va o atua, ua mafai ai ona aave aave aau taunuu i le nuu o Ape. E tu ae lili'a, e taliu foi ae popo'e, ou te tu foi i Fa'o ae ou manatu ma vaai i Malaka e pei o le fetalaiga i le Vai Fagaloa.

Ae pe a ou manatu i lea itulagi ma vaavaai i o tatou uso i Sasae, i le paia o le Faigamalo aua le afio o le Kovana ma le Lutena Kovana, Maota e Lua ma le mamalu o le Senate, le paia o le Faigamalo a Tutuila ma Manua, ae tainane aua le nofo a Maopu ma le Faleagafulu. O paia ia o Sua ma Vaifanua, Fofu ma Aitulagi, Saole ma Saleaamua, Faleagafulu ma Faatuiolemotu, le paia aua oe le Laau na Amotasi, Tootoo ma le mamalu o le Faleula.

Ou te manatu i lenei aso o upu masani lava o le faiva e saa le isi ae faapena le uiga o le faamoemoe e pei ona tulai le sui usufono mo Faasaleleaga Nu. 3, e manatua Pule ae galo Faalaeo, pe a manatu o lea ua papa tonu ala o le atu i lo outou valaauina ma lo outou faaeaina. O lea ua malama i ulu galu ae le ufitia e le fetu ona ua faatasi mai le Atua i se faamoemoe. Le paia o le taulagi ia Vaafusuaga ma Toleafoa, le Taulagi e faigata e taulagi mea uma, o taulagi foi o Samoa e fa, Faleaseela, Fasitoo-tai, Faga ma Saasaai. O oe Salemuliaga, e leai se Salemuliaga ia Upolu ma Tumua ma Tutuila, o la e i Savaii uma. O oe le Faleaana ma lau tapuaiga, faafetai, e ono Faleaana, Faleseela, Nofoalii, Faleatiu, Satapuala, Faga ma Patamea. O le ta nonofo ai e taulagi ou Maota, e taulagi ou Malae Fono, taulagi ou Tupua tausii, e taulagi ou tala na atoa. Tulouna ia, e taulagi Tumua nei. Ae ou te faapea ane i lo ta Itumalo ma lau tapuaiga o le faamoemoe ua taunuu o le laau o le ola, o le tofa e saili ai Malo ma le faautaga e tu i matagi olo lea ua tu ae tali le tamaitai.

Lo tatou afioaga i Saipipi i le afio o lenei itua o le taulagi, afio lau Afioga i le Tui Atua lau Afioga Tofa ma lou Aiga Sa Tofa, Susu oe o le Maopu lau Susuga Su'a, afio le Vaafusuaga i lau Afioga Utumapu ma Usoalii, Matatau Faiga faapea foi oe le Tuua ma le Nofo a ituaiga o le Falefitu. Le afio o Talaleu faapea foi

Sugalopea, Peone ma Tupoloma, tulouna Talitaliai ma Manuvasa, o taulagi na. Mataniu ma Saipipi ua le ole lea, faafetai le agalelei faafetai le alofa.

Ona oo mai lea i lea itu o le taulagi i le afio o lea Itu, afio Vaafusuaga faapea foi Suafoa, Tea o oe o le Faasisina e alaala ai oe le Pou o le Faletufuga lau Fetalaiga Segi o oe na pule i le uu, le Falelua ma e na pae laufola, Salemuliaga o le Faleupolu tofi, tulou. Faafetai, malo pule.

Ona ou oo mai lea i lo tatou nuu i lea itulagi aua oe le Fagaoneone ma le papa maseese, tulouna alii o le toaono, tama tau fai tutusa mata o le tao.

Le Afio o lau Afioga Unasa, Afio Toala, Afio Nonumalo, Afio Ufagalilo, Afio Sooaemalelagi, Afio lou suli moni o Puleono na. O la outou tofa o tama o Tumua ma tama o Pule, Puni ma Vaisau, Fiso ma Tapuala, o oe o Tama o le aava, o outou o Tama o le nuu, lau Fetalaiga Tuileutu ma lau Fetalaiga Taula, Faleaana ma le Nofo a Ituaiga o le Falelima lena, amuia oe.

O le tatou au fono i Salimu faafetai malo aua le afio o Sa Fuelolo ma Tolefoa, Afio le Usoalii i lau Afioga Tupua, lau Fetalaiga Taula ma upu ia Salimu. E faapea foi le Malae o filiga e fili ai upu o le taulagi pe a oo i Tumua – o i Pule, Afio le Aiga Sa Tuala, Afio Tofa ma Tauiliili, lau Fetalaiga Vaisau ma le mamalu i le atu Vaisau.

Oo mai i Siufaga ma vai o le alii e afio Unasa ma lou Matua, o oe Vaafusuaga, o oulua Suafa i lau Afioga Toala faapea foi lau Susuga Seiuli lau lua sa tautai lua ia oulua Fiso ma Tapuala ma le mamalu ia Samusua.

Oo mai i Sapini tulouna le Maota o tua o Fuaifatu e a? E afio ai Sooaemalelagi ma le Usoalii, e afio ai le la itupae o le itu paepae i lau Afioga Togamua, lau Afioga Unasa, lau Fetalaiga Taipinipini ma le mamalu ia Sapini, aumaia si ou alo fono i la outou Afioga i le faasaosao o Suafa, malo faafetai. Afio o le Falefia o Maopu e afio ai Faanana ma Latuivai, afio ai Nofoa, lau Fetalaiga Tuileutu ma le mamalu ia Saeluasa. O le taoto lima lea ae vae i le tafatolu o Faga, Saasaai ma Saipipi, o taulagi lena. E le tau laeia pe lauti foi o le sami pe a manatu i lau puleto ma lau faaloalo lea ua ala ai ona faapenei.

Le Aufaigaluega mamalu ma le Aufaigaluega Paia latou te tauasu ma tau ave, latou te asamo i le lagi aua ni manū o le ta Itumalo faapea Samoa. Le nofo i ituaiga i fata e fia, faafetai i la outou galuega i feau ma le Talalelei o lea ua ala ai. Faafetai i lau Susuga Kaleve Leifi ma lou faletua, Susuga i le Epikopo ia Tagaloa Tofa Aeau ma lou faletua, faapea foi le Susuga i le faafeagaiga o le Faalapotopotoga a le Atua ma lona faletua i Saipipi.

Ona ou oo mai lea i Saasaai, faafetai i lau Susuga Sakaria ma le faletua ma le Ekalesia, faapea foi le Susuga i le Epikopo ma lou faletua o lena ituvai. Mataniu i Faga, faafetai i le tatalo tapuai aua o lau Susuga Alofa ma lou faletua, Susuga ia Fiafia Toleafoa ma lou faletua, Susuga i le Epikopo Muliaga Tupo ma lou faletua e faapea foi le Susuga Olataga ma lou faletua ma le Ekalesia Faapotopotoga a le Atua aemaise la outou galuega tausi, ua outou sii le taulaga o Sa Levi e momoli nifo o le fata faitaulaga. E le mo i tatou ao le Atua ua na faia. Faamalo atu faafetai tele ua le tusa au, o ai le tagata. O lo outou Nofoa lea e tumau e faavavau ae suisui, a o la outou faaea ma ou faatusa o se i'a itiiti o le igaga, a ua ou faatusa i se lamepa e le mumu a ua latou faamumu. Ua outou faamumu ma tuu ae i luga ma tuu maualuga ma ua mumu ma ua iloa e tagata. Faafetai tele.

O lenei taeao liugalua e ao ona ou manatunatu ma tau saili e pei ona i ai le faamoemoe i le auga o aute e pei ona taoto le Tulafono Tau Faaofi o le Faatatauina o Tupe Faaopopo (Nu. 2) 2010/2011 faapea le Tulafono Tau Faaofi o le Faatatauina o Tupe 2011/2012. Ou te faatusa a ou uuina ua ou uuina i le Tusi Paia mai le Kenese e oo i le Faaaliga ua matagofie ma lelei tapena. A ou nofonono ma le Tulafono Tau Faaofi o le Faatatauina o Tupe Faaopopo (Nu. 2) 2010/2011 ma le Tulafono Tau Faaofi o le Faatatauina o Tupe 2011/2012 ae faapea mai toeaia “Voi faifai malie i tei ua le umi ona lua mafuta ma le tou aiga”. O le mea lea e le faigofie, e le faigofie ae tau lava ina ou avatu le faamalo ma le faafetai tele i le tapenaga e le faigofie aua o lē faatupu le iloa e faatupu e ia le tiga, amuia. O lē faatupu foi le atamai e faatupu le mafatia i sē o tauivi ma tauave aua la outou Afioga, lau Afioga i le Palemia faapea foi le Aiga Kapeneta i la outou faasoa ma fetuunaiga, e le faigofie. O le agaga maualuga ia maua se taeao o Samoa.

E ao ona ou faapea atu ma le agaga faaloalo tele lau Afioga i le Fofoga Fetalaia faapea le Afioga i le Palemia, na taele magavai aua la outou Afioga i Aiga, le paia i le Kapeneta, e tele mea e fia maua. Paga, o le tilotilo e taga tasi lava, e auga e tasi. O moomooga ma saafiafiga, o ai ea se e le manao i se mea lelei? A

ou siva atu iinei ua aiuli foi lea, a ou saasaa, tulou le Maota. A ou tagi atu i le mea e fai a'o lea foi e tagi mai le isi. E le fou, a'o le auga e tau ia o se mea e ala ai aua o lo'o iina Tagaloatusi.

E tolu nuu, e le o ni tamai nuu. Silasila ane i le tuasivi o Savaii, o iina e amata ai lo'u Itumalo i le mea o lo'o i ai le falemai, Malietoa Tanumafili II. Ou te faatusa i le nuu foi lea aua o se nuu matagofie. E pei o fugalaau, e tau faapena le uiga. E lalelei, aulelei, mata lelei ma lalelei. Faafetai pe a o tau ane ai aua ua oia ma 'aia. E le mafai ona sii le Sa o le Atunuu mai le Itu o Tane i le Faasaleleaga pe a leai le mea lea. Ua 'aia ma oia, e moomia le faaleleia i se taimi vave.

O lea ua maua faafetai i lenei fesoasoani e pei lava o le lafoga lenei, ae ua oia atoa ona o iina, tulou le Maota, e pei e tapuvae tasi i ai le tele o papalagi, e tele foi tupe ma mea o lo'o lagolago ma fesoasoani ai i le Atunuu. E le gata i lea o le vaega tonu lava lea e pei o se fala e fofola, e pei ou te faatusa i se saoluma pe a o atu i Savaii. E leai se isi e fia alu i Savaii e tutusa ma le loaloa, faasasao. O le tele foi o nisi o afioaga se'i tulou, e matagofie ae pupuu, ae moomia se fesoasoani i le gataifale. O la ua oia ona o nei aso ma tauviga o le lalolagi, e leai lava se mea e mafai, a'o tatou le paia i le Minisita e fitoitonu i lenei mataupu, o le tatalo a lenei Itumalo e le gata o Faga, Saipipi ma Saasaai.

E le gata i lea e masani ona o atu tagata tafafao maimoa mai fafo ma o i le laumua la e uta i le aai o Mamona i Vaiola.

O le mea o i ai, tulou le gagana, a o atu e toe foi mai aemaise lava le Ekalesia a Iesu Keriso o le Au Paia o Aso e Gata ai, a'o lo'o i ai le isi tulaga e tatalo atu ai i auala-galue.

O nuu tetele nei o Saipipi ma Saasaai o la ua faatino i se pitonuu se auala e le mamao, a'o le auala i Tapueleele o lo'o moomia tele ai sina fesoasoani.

E faapea foi i Saasaai, e faapea foi i lenei nuu o Faga.

E tele naua mea e fia fesoasoani atu ai. Lau Afioga i le Minisita mo Punaoa Faanatura ma le Siosiomaga, o le konekarate o lo'o feagai ma nisi mea.....aemaise o lea ou te vaai o le Alataua Sisifo lea ua maua le aoina o lapisi, tulou le afiafi ma se upu. Sina lagolago ane ma taumafai ane ona e fai sina tuai, ona e pei lava o le Neiafu ea le tagata lea ua ia maua le galuega. E mamao ma...

Faafetai tele i nai o'u toe minute o lo'o totoe. E faamalulu atu foi i lo'u uso a sui usufono e pei ona tulai mai. E leai, o upu lava e fai ma le manino ma le agaga mama.

Faafetai i lau Afioga i le Palemia aua ua āsoa, ua tausagā, ua Paeigā le taumafaiga o le Atunuu. E faalogologo ma le agaga faafetai tele, e le'i fausia Roma i se aso e tasi. O le asō ma le Fonotaga a le Atunuu e momoli atu le agaga faafetai. E le gata i lea ia manatua foi, e le ese Tutuila ese Aleipata. O lenei Itu ma lenei Itu, e uso Mose ma Arona ma le la tuafafine o Miriama. Ona faapea ai lea o so'u leo ma le agaga faaaloalo tele lau Afioga i le Fofoga Fetalai, ia manū faaifo mai lagī ni ao matafitafi, aua ne'i gasolo ao pe taape Pāpā aua le Afio o Lana Afioga Mamalu, O Le Ao o le Malo faapea foi le Sui o le Fono a Sui Tofia, ia aua ne'i tafia le lili o le sami. Samoa i le faafofoga, tulou, ia mama le lagi i le tapuaiga i Aiga faapea foi Tupu ma Ee i Faafeagaiga Taulagi latou te tauave le Suafa o le Alii. Ia alofagia Samoa ua potopoto mai mauga tetele seia oo i mauga iti. Ia tautai oe le Atua i mea uma.

Lau Afioga i le Fofoga Fetalai, faafetai tele mo le avanoa, faafetai foi i Faauluuluga o Matagaluega faapea foi ma Matagaluega Tumaoti i le lagolago mai ma fesoasoani mai. Ia foai le mau i a outou Afioga e tautai ai ma le faamaoni ma le alofa aua lo tatou Atunuu.

Ia manuteleina lau Afioga i le Fofoga Fetalai, o le agaga o lenei aso o le a foi Sinafutulua. Lo ta Itumalo ina ne'i taape Papa pe motu le moli ia te oe le Taulagi. O ou māmā na, tapuai maia se'i sii le vaa pe faape'i. O fea e i ai, tatou feiloai, ae faamoemoe i le Alii.

Ia to mai lagī faamanuiaga ma ia manuteleina lenei aso. Ia tumau le la i Tiafau ma le masina ia Samoa. O le upu lea ma le agaga faaaloalo tele. Soifua ma ia manuia le usugafono a Samoa.

21 IUNI 2011

Afioga TAFUA MALUELUE TAFUA: Lau Afioga i le Fofoga Fetalai ua ou tulai atu ma le faaaloalo sei fai se sao o lo matou Itumalo. E ui lava foi e le i tapenapena lelei ae ua lava ia taimi.

O le a muamua ona ou oo atu i le matou Itumalo. Ou te tu ae lilia, lilia i se a? aua ua tele le faaeaea a lou Itumalo ia te au. Lou Itumalo e o Aleipata Itupa i Lalo, malo le tapuai. Faafetai le faatoatoa, faafetai foi mo talosaga. O lea ua ou tulai atu ma le faaaloalo ma le agaga faamaulalo i le tatou Itumalo, e fai foi o le avega,

ao le afisi. Aua e a? O lea ua aumai la outou faatuatuaga ma aumai lo outou faamoemoe e pei o le lauga a Obama na fai ina ua tulai mai e avea ma Peresetene o Amerika. “Tagatanuu e o Amerika, ua ou tulai atu o au lava o se auauna faatauva, faatauva ona e mamafa le avega ua outou tuuina mai ia te au, ae paga e tóatele foi i latou sa muamua sa tele lava latou galuega sa fai”. O le ala foi lea e tu atu ai ae lilia ma popoe aua e toatele tuua ma matua ua lagomau mai Tia Sa, sa latou taumafai lo tatou Malo. A lea ua tu le Malo. O le a la le mea o le a faatopetope ai ma vavevave? Ia toa le gase o malolo ma tatou faifai malie. Afai foi ua tapenapena Minisita ia sauni mai o le a matua avatu foi ni avega mo outou.

Lou Itumalo peleina, o le paia lea i Alalamalae, afio mai oe Laupola o le Sao fetalai ma le Toalima o le Aiga Sa Laupola. Afio mai la outou Tama ma lou Saota, o le Valasi o le Afioga Tuisila, afio mai Tuisila o le vaa na fau ese, o le Tama o le Faasuaga a laua Matua, o le Solosolo e savaili. Afio mai Tuitogamatoe o Oe o le Faauluuluga o le Aiga Salevalasi. Afio maia Fagasoia o le alo o le Tuiatua, afio mai Lesa, Tauanuu ma Luamanuvae, afio mai oulua Alii o le Fono, maliu mai Siu ma le Afolau ma le mamalu ia te Oe Saleaumua. Afio mai foi lau Afioga i le Saopapa, afio mai lau Afioga Matautia, afio mai Fanene o le Fuialii, susu mai Ifopo ma Saumalu ma le Matua o Oa, malu mai lau fetalai Leteu ma Upu ia te Oe Saleaumua.

Faafetai le tapuai i lau Afioga i le Tama Aiga, afio mai lau Afioga Mataafa, susu mai le Matua o Tauiliili, susu mai le Leusoalii, afio mai Alo tutusa o le Mataafa, afio mai Tamaapaa, alala mai Oe le Aualuma o Fonoti.

O le Alii le la o le Itu o le Itumalo nei, Taneoleitu, afio mai lau Afioga Tago ma le Aiga Sa Tago, Maliu mai lau fetalai Amoa o le Matua, o Oe o le Taneoleitu, Maliu mai le Nofo a Vaega ia Samusu ma Upu ia te Oe le Faleatua. O Oe le pule na Taitai, Afio mai Tuiavii ma le Usoalii, Susu mai Valai ma le Taauso, Susu mai le Maupu, Maliu mai le Faleulu, Maliu mai la oulua Nofo, Falelua, Maliu mai Saleaumua ma Lefagaoalii. Afio mai Faliuila ma lou Saota o Teo, Afio mai le Faasisina o Lesa ma Lesa, Susu mai Aiga e Lua o Uso ma Seupule, Maliu mai Oe le Faleatua ma Upu ia te Oe Leatitoafaiga.

Malo tapuai Saleaumua o Oe o le Matua o le Itumalo. Maliu mai Leifi ma Tautoloitua, tailo pe moni ae fai mai o Tama ia na o i Manua i le Faleula ma maua ai le Tumua ma Pule lea e sapi ai nei Samoa. E tau ina ou faamanatu atu. Mamalu maia le Nofo a Luma ma le Nofo a Pule, Maliu mai E na sili ma e Latou e ou le nuu. Mamalu maia le Tauagaeseese ma le Lautinalaulelei ia te Oe Saleaumua.

Le paia o le Afaigaluega o le a le tolalau atu outou suafa, aua pe tolalau atu nei ae siitia i le la vaiaso, tou te le toe palota ia te au i le isi lima tausaga. Ae pau o le mea faafetai mo le tapuaiga, faafetai mo a outou Tatalo le leoa. Na ou faalogo i se tasi o sui usufono o faapea e memumemu o outou fofoga poo a ituaiga tatalo e momoli atu le agaga faafetai ma le faamalo. O la outou pule lea ua i lou ulu.

Sa fai mai le Fofoga Fetalai ananafi ma tala atu ananafi, e fai lauga faa-Taupou. E tetee tele lou sui usufono i le upu lea o le lauga faa-Taupou. Aisea? E le o au o se teine. E tatau ona faapea mai e sauni sau lauga faa-Tama poo se lauga faa-Tamalii. E fetai i le Afioga i le sui usufono mo Lotofaga poo le sui usufono mo Faasaleleaga Nu.1 ae le talafeagai mo matou ma le faaaloalo lau Afioga i le Fofoga Fetalai. E faasilasila atu ai i lau Afioga i le Fofoga Fetalai e manaia pe a e saunoa mai, o le taimi lenei o Pai mo le lauga faa-Tama poo le lauga faa-Tamalii.

O le a amata lau tautalaga i le Maota nei lau Afioga i le Fofoga Fetalai. E atoa le 12 aso o matou galulue i le Komiti o Tupe Maua ma Tupe Totogi. E momoli atu ai le faafetai i se tasi o sui usufono mo Palota Taitoatasi, Susuga Hon Papalii Niko Lee Hang aemaise le Taitai o le Itu Agai, Afioga Hon Palusalua Faapo II, le Afioga i se tasi o sui usufono mo Salega, faapea foi le sui usufono mo Faleata Sisifo faapea ma le matou Komiti atoa. Galulue i le aso Sa ae le lolotu, galulue i le aso Toonai ae le faia ni feau aoga o le aiga ae talosia ia aua nei auamaia ni alauni ae ave mo le au lakapi lea na lauga ai se tasi o sui usufono mo Vaimauga Sisifo, Tofa Lefau Harry Shcuster.

O le agaga moni lau Afioga i le Fofoga Fetalai ma le faaaloalo o le a amata lau lauga i le Maota nei. O lea ou te maitau i le Tala o le Tupe o loo i ai le vaegatupe ua faapitoa mo le faafouina o le Maota. E talosagaina ma le faaaloalo lau Afioga i le Fofoga Fetalai ma le mamalu o le Matagaluega silasila totoa i le tatou Maota pe afai o le a toe faafou.

Afai o le Maota o Samoa e manaia lava ona fai tulaga masani e fili le afa ma fai ai afa masani e manaia i luga iinei. Atonu lava e i ai se tagata faapitoa e mafai ona i ai le tomai e ono faaoga ai o tatou fale afolau. Ae tatau ona fai lelei ma faamanatu ai foi a tatou tu ma aga faa Samoa, e le gata i lea ae manaia aua o le

Maota Fono lenei o Samoa. Na o se tuualalo i lau Afioga i le Fofoga Fetalai ae le fai ai. O lea e tuu atu i ou luma ma e le faatonuina foi e le sui usufono mo Aleipata Itupa i Lalo lau Afioga i le Fofoga Fetalai ma le faaaloalo. O le isi mea o le pa lea na faaagaga ai le tupe lea na ou vaai i ai. Ma lou faaaloalo lava e matua tetee lava lou sui usufono i le pa lea ua ou vaai o le a fai i luma. E mafua i se a? E mafua foi ona afai e fai le pa o le a avea lea ma mea o le a toesea ai tamaiti aoga ma i latou e omai i le savali aua e tumutumu le 50 tausaga lea e lumanai. Masalo tasi lea tulaga o le a matua faaetonu ai lava le pa aua o le pa o le mea a papalagi e puipui ai latou meatotino. O tatou ia e pei lava o le ava fatafata ma le fesilafai. E maioio lava o tatou tuaoi, e maioio foi alaafafaga ma le faasinoga o le mea e i ai lea ma lea. Ae afai o le a fai le pa, o lona uiga e le gata i le laitiiti o le malae i luma e faagasolo mai ai le savali ae o le faapea foi ona puipuia ai le mamalu o le Atunuu mo le o atu ma omai. E moni lava o le a i ai le auala e kolosi ai ae matua tetee lava lou sui usufono i le pa. Ma le faaaloalo i lau Afioga i le Fofoga Fetalai.

O le tulaga foi i le Maota Fono nei, atonu o lea e i ai le vaegatupe e faafou ai le fale e le taua e matua tu maualalo lava le tatou Palemene i le tulaga lea. E tataua ona i ai se fuafuaga e faafou tatou faleui, e le gata i lea ou te talosaga foi ma le faaaloalo i le Luafatasaga o loo i tuafale e tataua foi ona fai ma ni faleui e o i ai.

E liugalua lau tautalaga lau Afioga i le Fofoga Fetalai ou te fia tautala i le Maota o Tofilau Eti Alesana lea o loo faaoga e le mamalu o le Palemene. O lea ua maea le fesoasoani a Saina ae sa ou faapea e i ai se tuualalo a nisi o le tatou Atunuu poo nisi foi sa galulue faatasi ai, o lea ua fai le gym o le mea e koleni ao fea se fale taele, masalo o mea na o loo misi ma le faaaloalo. O loo lelei faleui ae faamolemole valivali faamalama e iloa uma mai lava i le aualatele pe afai le sauniga a le tagata i totonu o ia fale.

Ona ou oo mai lea i le 2AP sa alu i ai le matou asiasiga. Tulou lau Afioga i le Fofoga Fetalai ma le mamalu o sui usufono, matua tele le faaetonu o loo i ai le 2AP. E i ai le vaegatupe lea e faaagaga mo le faia o se isi Ofisa i Nuu ae afai o faaoga e nisi tagata faigaluega le Ofisa i Mulinuu, ou te talosagaina ma le faaaloalo le vaega lea e vaaia le fale lea e tataua ona faafou i totonu o le isi 6 masina. E le talafeagai mo ni tagata faigaluega ona galulue i tulaga faapea aemaise ai le tulaga o le fale o loo i ai.

Ona ou oo mai lea i le Matagaluega o Faamasinoga ma Pulega tau Faamasinoga.

Sa alu le matou asiasiga i Tuasivi ma talanoa ma Alii Faamasino e molimoli atu lava i le mamalu o le Maota ma le Minisita mo Faamasinoga ma Mataupu tau Faamasinoga le talosaga mai Alii Faamasino o latou alauni e le lava. E le gafatia ai le mea o loo i ai i le taimi nei. O loo talosaga mai pe mafai ona \$70 i le po pe tuu foi i ai se \$100 mo i latou ua ave i ai le faatuatuga o le Faamasinoga.

Ona ou oo mai lea i le Matagaluega o Punaoa Faalenatura ma Siosiomaga, o le tulaga o i ai le uafu i Aleipata ua leva lava ona ou talosaga i se Assessment Impact Report, o se lipoti foi lea e fuafua ai poo le a le tele o le faafitauli poo le aafiaga o le siosiomaga. E oo mai lava i le aso ou te lei vaai i se lipoti ae ua leva ona ou talosaga i le 2006 ea poo le 2007. O le talosaga ma le faaaloalo lau Afioga i le Minisita e pulea lea vaega, silasila totoa i le taimi e toso ai tatou vaa, aua foi o le vali lea e vali ai vaa ia o se vali e oona tele, afai la e fana lalo o le vaa, ia ona pauu uma lea o barnacle ma pauu atu ai le vali lea e poison tele. E mafua lau faamatalaga ona o le taimi na fai ai sima o le uafu, e piapia uma atu ai lava ma Mutiatele, Malaela, Saleaamua, aafia ai ma Satitua, ioe, aua foi o le tau ma le au e faapena, e matua malosi lava e au atu lava ia matou, o lona uiga, e matua tele le aafiaga o matou, ae faamolemole silasila totoa ane i le vaega lea, e fautua atu ai.

O le isi vaega o le vaega o le tatou suavai. Ua toatele sui usufono ua lauga i le suavai, ma o le suavai o le ola lea o so o se tagata po o so o se nuu po o so o se Itumalo. Atonu ua se tai taliga i le faafofoga a lau Afioga i le Fofoga Fetalai faapea foi le Taitai o le Malo ma sui a usufono, ou te masalo o le tasi lenei Itumalo sa aafia tele i le Tsunami, ua uma ona fai o matou auala e o i uta, i le taimi nei, o auala ia i Saleaamua na ona fai lava e le o soo, e toalusefulu nai aiga la e le o la lava e savavali i le togavao ma le palapala, sei tanu foi le auala faasoo auala ia e lua o lo matou nuu, ae leai e leai se mea o fai.

Lona lua, o le suavai, e matua utiuti lava le suavai i lenei taimi, atonu foi e le aoga ona faitio tele i le Pulega o le Suavai, ae o se tuualalo i lau Afioga i le Ofisa Sili o Pulega ma le Minisita ma le faaaloalo, sei alofagia o le loli vai lea na lipoti mai nei a le matai na sau mai nei mai tua i Saleaamua, ia e lei alu atu lava le loli i lenei vaiaso atoa, po o le vaiaso ma le afa e lei alu atu se loli vai. E talosaga atu ai ma le faaaloalo, afai lava o i ai ni nai loli vai, a leai e 27 taavale fuimu la e i ai. O le a le mea e le faaoga ai taavale fuimu ia e o atu e lau atu le vai, o le a le aoga e tutu ai a o faleoo e le pe ai le faleoo pe a fui le mu? O le saunoaga

a le alii Pule o le Fuimu i le matou komiti, afai e mu lou faleoo ae atoa le 15 minute, ia e maimau le taimi, e pau le mea e o atu latou o le fui o fale foi ia i te'i ua sosolo i ai le mu, afai la e le aoga le tulaga lea, o lona uiga e talosaga atu sega ma le faaaloalo, avatu se taavale fuimu i tua e lau ai le vai i lo matou nuu e faaaga ai taavale, i lou agaga faaaloalo.

O le isi vaega, o le vaega o tatou taligalu. O matou e pei ona ou taua sa matua aafia lava i le Tsunami, faafetai na ou talosaga i le Matagaluega o faia taligalu o lea ua fai le aualalaupapa lea na tau motu i Lotopue, ae faamolemole ua alu atu le konekarate ona sua uma i lalo o fetau, o talie ma laau sa aoga e tetee ai le galu, ua oo mai i Saleaamua, ua leai ma se fetau ua tuu uma i lalo le vaega i luma ifo o le falesa Pope, o le taimi nei la, ia ua alu atu lava le galu ia ua faasoloatoa ua au lava i luma o le falesa. Ae talosaga ma le faaaloalo, faafetai o lea ou te vaai o lea e i ai le vaegatupe e fai ai a tatou taligalu, ae faamolemole lau Afioga i le Minisita sei silasila ane, e manaomia lava le sau mai Satitoa, e faapena ma le isi vaega i Lalomanu seia oo i Tiavea. Ua ou taua Tiavea o le tasi lea nuu e mafatia tele ona ua le toe i ai se Tiavea-tai e pei o ia aso sa nofoia gatai i lea aai, o Tiavea-tai la e maualuga lava le aega e alu ai i luga e tau i le nuu a uta. O le taimi nei, ua le toe i ai se aai o Tiavea-tai a o lea ua nonofo i uta i le ogatotonu o le aega lea. O le talosaga la ma le faaaloalo i lau Afioga i le Minisita, pe mafai lava ona fai se auala e amata ai nai aiga ia ua sulufai mai uta sei tau i le alatele, e le tele masalo pe o se kilomita ma le afa pe a le umi o le auala lea, ae tasi lenei nuu masalo po o le faatamala o le pulenuu, ua le logoina ai le DMO ma i latou sa faasoasoina faamanuiaga o le Tsunami, ia e leai se auala o faia o le alaafaga lea, atoa ai ma Lotopue ia faapena foi ma Utufaalalafa.

Lau Afioga i le Fofoga Fetalai ma le mamalu o le Palemene, o lea ua matu i alo le taliga o le sua ma ua palega-auau foi le mamalu i le Afioga i le Palemia, faapea le Kapeneta ma le mamalu o le au usufono, ae tainane lau Afioga. Leai, e faamalulu atu foi pe afai e i ai se lape ua sala i le taimi ua fano, o le agaga lava ia sa i ai le faamoemoe e tulai atu e fai le lauga, ae sa tapenapena malie lava.

Ua leva ona sauniuni aua o kama foi gei mai kua i le Makamakagi e le kau sasalua gi lauga. Ae ui o lea, e faamalulu atu i lau Afioga pe afai ua i ai foi se lape ua sala.

O le vaega e fia paia i lau tautalaga o le vaega lea o tagata tafafao maimoa mai fafo. O lea sa saunoa se tasi o sui usufono mo Vaimauga Sisifo, Tofa Lefau Harry Schuster e uiga i le faailoaina o le lakapi. Masalo atonu e moni lava e faailoa i le Atunuu, ae a le lelei ona faailo ma maketi lelei e tagata tafafao maimoa mai fafo le tatou Atunuu, e i ai mea o faatosina, mea e asiasi i ai pei o matafaga, vaitaele, o le mamā o le sami ma tulaga faapena, e le mafai ona omai tagata i Samoa. Aua e ese lava le vaai ia i le lakapi e lelei, ae a le lelei le mea e o mai tagata e maimoa ai ma matamata ai, o le tulaga lena. Ae faafetai mo le tuualalo lau Afioga, leai o lea ou te vaai e feooloo foi le paketi lea e tuu i le maketiina o tagata tafafao maimoa mai fafo a Samoa, ma ou te matua lagolagoina foi lea tulaga.

O le saunoaga a nisi o sui usufono na matua faamamafa lava i le tatou suavai ua pau ia te au, o le tulaga lea i le Tulafono, ou te masalo e le o lelei ona faamamalu, aemaise lava le vaega lea o le wáter catching area, po o le vaega foi lea e puipuia ai le suavai. Sa ou talosaga i le taimi na o atu ai le Matagaluega e feiloai ma le Komiti o Tupe, sa ou maua nei le tala e 10 mita le mamao o le mea e i ai le siosiomaga, ae talosaga ma le agaga faaaloalo e toe silasila totoa le Matagaluega i le tulaga lea, ou te masalo o le ala foi lea ua tele ina matutu o tatou vai, e moni lava a timu, ae a faapelepele le vaega lea e tulata i le amataga o le vai po o le wáter source, e masalo e umi foi ona matutu le wáter source lea ma feooloo ai lava le tatou suavai e maua.

Sa saunoa foi se tasi o sui usufono i le tulaga o liki foi ia po o paipa ia e mama, aemaise le tele o le pasene lea na taua, o isi fai mai e 60, fai mai isi e 70 po o le a lava, o le matua tele lava lena suavai e maimau – ma e le o se mea taugofie foi le faiga o lea vaega. O lea ou te tilotilo i le tupe lea e aumai ai e faaagaaga i ai, e le lava le tupe lea mo le faatinoina o le faamoemoe atoa.

Lau Afioga i le Fofoga Fetalai, masalo ou te faalogo foi i nisi o sui usufono, e le o maua le TV, e ui lava ona ou lagona e le o toe i lalo o le Malo, ae masalo e tatau ona i ai se fesoasoani a le vaega lea o tatou i le fesootaiga, tekonolosi, aua o lo matou Itumalo e tau atu e le lelei le leitio e leai se TV. Ae faamolemole na ona tuualalo atu e le faatonuina, sei silasila totoa i le vaega lea.

O le vaega o aoga, e lima matou aoga tulagalua ia ae tasi le aoga maualuga, e lua la aoga e talosagaina ma le faaaloalo e manaomia lo latou malae sei faaleleia, o le aoga lea a Tiavea, le aoga tulagalua, e faapena foi ma le aoga a Saleaamua ona e matua faaletonu lava le auala i le aoga a Satitoa ma le aoga a Saleaamua.

E talosagaina ai ma le faaaloalo, afai o i ai se tatou masini o i tua a le konekarate o lo'o galulue ai i tua, e manaomia lava le faaleleia o auala ia mo alo ma fanau i le aoga tulagalua a Satitoga faapea foi le aoga a Saleaamua.

O le tulaga o le tatou falemai, lau Afioga i le Minisita, sa vaai lava ma le faanoanoa i le matou asiasiga i le vaiaso ua tuanai le tulaga o lo o i ai le tatou falemai, amata mai lava ina ua matou ulufale i le vaega foi lea e tala ai fualaau, ia o paipa uma na e i ai, o paipa tai pei o le micro phone lea ou te tautala atu ai, e oomi la le ki ona ola lea. E tolu sink i totonu o le fale talavai lea, e tolu foi paipa e le ola, e le lelei mo le ki foi lele. O nai mea e faigofie lava ona fai, ua fai lava sina faatamala o le Matagaluega i le tulaga lea, maintenance work o galuega faatino. O lea foi ou te vaai o lea e lava le tupe i totonu o le paketi e faatino ai le vaega lea, o lea foi e i ai le tupe a le SWAP, aisea ua le faaoga ai mo le faiga o lea vaega? E matua faatamala lava le tatou Matagaluega i le tulaga lea. E fautua atu ai ma lou agaga faaaloalo, silasila totoa i mea nei e faigofie, ae a omai nisi mai fafo ma vaai i ai, o iina e taua ai tatou o le federal country. O le isi mea lau Afioga ma le faaaloalo, o la e i ai pusa ai po o ni faameaalofa mai fafo, masalo pe lata i le 300 pusa o la ua expire ai lava i totonu o lea fale talavai. Pe aisea na le taumafai ai e faatau ia pe fai meaalofo i nisi o tatou pharmacy lea e i totonu o le Atunuu, aua o mea faapea e tatou te soalaupule ma faasoaso, e vaai mamao ma silasila mamao i le tulaga a faapea ua le taulia pe ua le o faaogaina, e le tele se demand po o se manaomia o i ai, ia e tataua lea ona tufatufa e faasoaso i le Atunuu po o falemai i tua e faaoga ai lea vaega, toetiiti 300 atigipusa la e i ai e le'i faaogaina ma se mea e tasi. Silasila faamolemole lau Afioga i le Minisita silasila totoa i le vaega lea.

O le polokalame a le Matagaluega o Faatoaga, Faigafaiava ma le Faleoloa o Faatoaga masalo e le o lava fesootaiga a nei Matagaluega e lua, o le Matagaluega o Faatoaga, Faigafaiava ma le Faleoloa o Faatoaga ma le Matagaluega o Punaoa Faalenatura ma Siosiomaga i le tulaga lava o lea e uunai e le Matagaluega o Faatoaga, Faigafaiava ma le Faleoloa o Faatoaga i le ta ma le gagauina o le vao, ae uunai foi e le Matagaluega o Punaoa Faalenatura ma Siosiomaga le siosiomaga ina ia mautinoa le saogalemu ma lelei. E leai se aoga e o ai e gagau ma ta le vao ma matutu ai le eleele ma leai se suavai e maua, a'o lea e lauga uma sui usufono o le Palemene e leai se suavai. Aisea? E le lelei le faasoaso, le lelei le vaai, le lelei le faasoaso mamao. O tulaga nei e tataua ona tatou mataitu i ai, a lelei le puipuiga, lelei le vaai mamao aemaise o Matagaluega nei e lua pe tolu, e tataua ona outou fesootai.

O le isi vaega lau Afioga o tatou tagata nei e asiasi maimoa mai fafo e manaomia lava le vai mama ma manaomia le sami ia mama. O le fesili e tuu atu i lau Afioga i le Fofoga Fetalai ma le mamalu o le Maota, pe faamata o siaki a tatou vai a'o le a le umi e fai ma siaki ai?

Po'o faalauiloa i ai a taele i o tatou ogasami ma vaitafe ma tulaga uma faapena? Aua e taua uma nei vaega? O lea ou te faalogologo e manaia faasalalauga o loo sau i le TV o totonu o le vaitafe poo le sami e maua ai le siama lea o le echovirus. O lona uiga a le lelei ona vaai lea vaega e tele foi le faamai e maua.

O le Matagaluega o Leoleo, Falepuipui ma Tinei Mu, o le matou asiasiga i Tafaigata e le o po se lilo ua silafia uma e le Atunuu le mafatiaga o loo i ai nei tagata. E ui lava e faapea ona o nei tagata ua solitulafono ae leaga o tamalii o le Atunuu e pei foi o tatou ma ua sasi foi la latou faatatau ma ua puapugatia ai, ae le aveese ai le tulaga mamalu, ae tataua ona tuu i ai se fale lelei ma toe faatele nisi potu, aua e 30 pagota i totonu o le potu e tasi. O lona uiga ua pei lava o le potu aoga. E talosagaina ma le faaaloalo lau Afioga i le Minisita mo Leoleo, Falepuipui ma Tinei Mu sei silasila totoa ane i lea vaega.

Faafetai. E faamulimuli lau tautalaga lau Afioga i le Fofoga Fetalai, o le vaega ea o le Sainenitisi poo le Scientific Research Of Samoa, masalo e le o lava le faaogaina e le Malo ma le Matagaluega o Leoleo, Falepuipui ma Tinei Mu o DNA faapena foi ma le vai lea na ou tautala nei i ai. E tataua ona i ai le siakiina lelei o nei vai poo le fai o le water test ae ave le isi vaega e suesue mai e le vaega o le au Sainenitisi. Sa ou talatalanoa foi i ai i le matou asiasiga o le tulaga lea ae tataua ona silasila totoa i ai.

Lau Afioga i le Fofoga Fetalai, o nai motugaafa na o lenei Itumalo ma e faasilasila atu ai ma le agaga faaaloalo afai ua i ai se lape ua sala, lafo i nuu le aina. E faamalulu atu foi i Matagaluega taitasi aemaise o le mamalu o le Malo i Afioga i Minisita, leai na o luitau e avatu e faatupu manatu ae leai se agaga faitio pe tomumu, poo le tomumu foi i tua ona outou faapea lea ua le avatua i luma, ae leai o le mea moni lava e avatu mo le silasila a le mamalu o le Malo mo le lumanai.

Ona ou faapea ai lea, lau Afioga i le Fofoga Fetalai, leaga o lea e faafofoga mai Lana Afioga Mamalu O Le Ao o le Malo ma le Masiofo faapea foi le Sui o le Fono a Sui Tofia ma le Masiofo. O le paia i le tapuaiga a Samoa, Tumua ma Pule, Ituau ma Alataua, Aiga i le Tai ma le Vaa o Fonoti, afai ua i ai se lape o le lauga ia faamagalalo mai.

Ona ou faapai malu atu ai lea i lau Afioga i le Faamasino Sili ma lou faletua faapea foi le Vasega o Faamasinoga, ae le gata i lea o Ofisa Sili o Pulega o Matagaluega a le Malo, o a tatou Malo poo sui o Malo mai fafo. E faapea foi i lo tatou Motu i Sasae, e ui lava ina lagona le faanoanoa Tutuila ona o le le faatagaina o matou e leai ni pemita ae o le a tuualalo atu o maua lenei avanoa e fai atu ai lea vaega.

E tatau ona outou silasila totoa o tatou e tasi, o outou foi sa i Atua, o lona uiga e tatau ona outou silasila totoa e faataga le mamalu o Samoa e malaga fua atu e leai ni pemita. E faapena foi pe a outou afifio mai, o tulaga ia o uso aua o tatou lava e uso.

E faaiu atu ai lau tautalaga, afai o lea e i ai le isi vaegatupe pe lata i le \$400,000 o loo faaalu i le Konesula a Tutuila, afai e uma lenei tausaga e leai se tatou feutagaiga lelei ma Tutuila e maua ma e aua le faia ni pemita, ou te talosaga atu ma le agaga faaaloalo ua tatau foi ona tapunia lea Ofisa. E leai se agaga e faaauau ai pea pe afai na o le alu ai o tupe ae leai se fesoasoani a tatou o maua mai ai.

O le faafofoga a le Atunuu ia manuia le tapuaiga a le Aufaigaluega a le Atua ma ia manuia foi le Malo. Soifua.

21 IUNI 2011

Afioga AFOAFOUVALE JOHN MOORS (Palauli): Lau Afioga i le Fofoga Fetalai, ou te faafetai atu mo lenei avanoa saili gata. Ae ui ona ua maea molia viiga i lo tatou Matai Sili, ou te manatu e ao lava ona faailo se lagona ona e uiga ese ma ua faageetia foi lou agaga talu ai lana faasoia lea ua afua ai lo tatou fesilafaiga paia i lenei afiafi. Ae a le tofia o Samoa e faia ma ou faasinomaga, lea ua avea ma ou malu ma ou toomaga. Aua o se Atunuu ua maoae lona faamanuiaina, e ese lava mai atunuu uma o le Pasefika poo le lalolagi atoa.

O le mea lea ou te tulai ai ma lou ava tele ma le migao, e faatulou atu ai i le paia lasilasi o Samoa. Tulouna Lana Afioga Mamalu, O Le Ao o le Malo, Afioga i le Tui Atua Tupua Tamasese Efi ma lau Masiofo. Tulouna lau Afioga i le Sui o le Fono a Sui Tofia, Tuimalealiifano Vaaletoa Sualauvi II ma lau Masiofo.

Tulouna lau Afioga i le Faamasino Sili ma le vasega o Faamasinoga. Tulouna foi lau Afioga i le Palemia ma le mamalu o le Kapeneta faapea le Faigamalo.

Tulouna lau Afioga i le Taitaifono. Tulouna lau Afioga i le Taitai o le Itu Agai ma le maave eseese o la outou Vaega Faaupufai. E faatulou atu foi i lau Afioga i le Fofoga Fetalai faapea sui usufono mamalu o le Fono Aoa o Samoa.

E faapea foi ona ou faatulou atu i le tapuaiga mamalu o le Usoga a Pule ma Tumua, Ituau ma Alataua, Aiga i le Tai ma le Vaa o Fonoti, ae tainane Tama ma o latou Aiga, Aiga foi ma o latou Tama.

Ae a foi o tatou uso na i le Motu o Sasae i le Faigamalo a Tutuila ma Manua, tulouna Sua ma le Vaifanua, Fofu ma Aitulagi, Saole ma Saleaamua ma le Launiunasa lua, Tootoo o le Faleula, o upu lava ia te oe le Manuatele. O paia na ta te tiu ai Samoa.

O le a ou faafeiloai atu i lou Itumalo paia e pele i lou agaga, le Itumalo faa-Palota o Palauli Sasae.

Tulouna oe le Faleao, tulouna oulua Aiga Talua ma Safaleletaua, tulouna Faasisina lau Susuga Leleisiua o ma Niupulusū, tulouna le Fofoga Sa-Lilomaiava, Susu mai lau Susuga Sālū, Susu mai oe le Maopu, lau Susuga Tualau, Susu mai le Tei lau Susuga Leituala, tulouna le Fofoga o le Vai, lau Susuga Leavaiseeta, Susu mai Alo o Lilomaiava o Momoi ma l'aulualo, Susu mai le Aloalii lau Susuga Tupua, Alaalatai maia le Tulafalealii o Fiso ma Seumanufagai. Tulouna lau Fetalai le Tulafale Lagaaia, Alaala maia lo outou Aiga Sa-Lagaaia, tulouna oe le Uso Tui ma Tapusoa, Susu mai le Suafa Lauulu ma Tauvao, o le mamalu lena ia te oe le Pule.

Palauli lo'u Itumalo pele, e faafetai atu i le Pulega mamalu a Alii ma Faipule aua le maopoopoga ma le saogalemua o lo'o tatou 'ae'ae ai nei i lo tatou Itumalo. A lea sa tatou molimauina a'o faagasolo le Faiga Palota tele? E leai lava se faaletonu po'o se mea sa tulai mai. E faafetai atu foi i Faletua ma Tausi aua o outou o fautua o aiga. Saoao ma le Aualuma, o pelega ia o Aiga. Le Aumaga a Lilomaiava, o lima ma vae o lo tatou Itumalo ma aiga.

E faapea foi le mamalu i le Aufaigaluega Paia a le Atua i Fata Faitaulaga e fia o lo'o i ai nei. Lau Susuga Patele ma le Aiga Fesoasoani, Susuga i A'oa'o ma Tiakono, Susuga i Faifeau ma Epikopo faapea le Peresetene.

Ae ā se faafetai lē 'a'u'a'u e fia molimoli atu i le tatou Komiti Faapalota o e na gafa ma le fita ma le faigata i le tau sailia o a tatou tagata e le gata i Tumua nei, ae faapena Salafai. E le lava se gagana e mafai ona faamatala atoa atu ai so matou lagona. O lea sa outou faia mea silisili ua afua ai ona tatou 'ae'ae i se tau silisili foi.

Faafetai tele mai le taele o lo'u fatu i lo outou lagolagosua, e le gata i lea o talosaga molia. Ioe, e moni lava le tala, e le tu faamauga se isi. Aua e leai lava se mea e mafai ona matou faia pe ana leai lo outou saili Malo. Lo'u aiga e, o'u paolo ma gafa ou te malu ai, e faafetai atu le faaeaea.

E ao lava ona ou faafetai atu foi i nai o'u uso sa faapea ona matou taumafai faatasi i le Tofi; faafetai le taalo faatamalii. E iloa lava le Tupu i ana aga faa-Tupu ma ana tu. Ua silafia foi e malo lava le Tupu, e tusa lava pe i ai se isi tagata e tulai muamua mai. A faiaina le Tupu e malo lona loto ona e faamagalalo ma ia maua le loto maualalo. O outou o Tupu nai o'u uso na matou taumafai faatasi mai. Sagai ane 'ai o le tai, o mai tatou te lagolagosua faatasi ma tatou taufai galulue aua le lumanai o lo tatou Itumalo.

Palauli, ave lo tatou faatuatua atoa i le Atua ma talosagaina pea Lona malosi ma le taitaiga a le Agaga ina ia mafai ona tatou saili faatasi ni manuia lelei mo lo tatou Itumalo, e le gata i lea a'o le tatou Atunuu.

Aumaia lenei avanoa ou te solisoli mulivae ai ma faaaauu galuega sa faia e tuua ua lagomau mai Tiasā. E faatauvaa lo'u tagata ma e le atoatoa so'u malamalama po'o se tomai e faatino ai tofiga nei, peitai ane, o le a le aveva lenei mea ma pa pupuni i lo'u taumafai i lo'u loto, o lo'u agaga ma lo'u malosi atoa ou te auuana ai i lo tatou Itumalo. A'o le Atua lava na te foai pea le malosi.

Ou te le laaloa ae tataua ona ou sailia ni fautuaga mai ia te outou o Tamalii o le Itumalo. Tatou velo'aso faatasi i lo tatou faamoemoe, aumaī avatū e maua ai so tatou manuia.

Sa ou suesue ma ou vaavaai ma le toto'a i le tele o manaoga o lo'o faapea ona alia'i mai i lo tatou Itumalo aua ua loa aso talu ona le toe i ai so tatou sui i totonu o le Faigamalo. O le upu moni ma le mea moni, o Palauli lava ia e lagolagosua i le Malo. Po'o le a lava le Malo e tulai mai, o le Palauli moni e lagolagosua i le Malo. O le tulaga lea ou te tatalo atu ai i lo'u ava ma lo'u faaaloalo tele i le tatou Malo, o tauau nei e faalagolago i ai lo tatou Malo.

E i ai nai motugaafa o le a faapea ona ou faamalaulau atu, e avatu e taatia iina i ou autafa ina ia mafai ona silasila totoa i ai, o le a se mea e mafai, e talia ma le faafetai.

O le itu tau le Soifua Maloloina: ua silia nei ma le 25 tausaga talu ona le toe i ai se falemai po'o se maota gasegase i totonu o le Itumalo. O le popolega, a tupu mai ni faaletonu po'o se gasegase faafuasei, e tuli lava Tuasivi, ae pe a ma le 45 minute e alu ai le taavale. O le Atua lava e tatalo i ai ina ia mafai ona taunuu lea faiga-malaga ma le manuia. Lau Afioga i le Minisita mo le Soifua Maloloina, o lo'o i ai le fanua o le Malo sa tu ai le falemai. E mafai ona toe faaoga e le Malo pe a oo i le taimi e faasoa atu ai le tupe ina ia mafai ona faatinoina lea tulaga.

O Aoaoga: o le tulaga i aoaoga ma le siosiomaga o lo'o i ai nei lo matou Itumalo, e lelei pe a faatusa atu i Atunuu le tagolima ma le vaivai, ae a faatusa i le tulaga lea ua i ai Samoa, ua tataua ona fai i ai se fua. O lea ou te talosagaina ai lau Afioga i le Minisita mo Aoga, Taaloga ma Aganuu – faafetai ua maea ona tatou molimauiina i le la vaiaso se galuega i le Kolisi po'o le Aoga tele lea, a'o le tulaga o i ai le aoga laitiiti e manaomia lava ona faaleleia faleaoga. E le gata i lea o kesi, e manaomia foi ona faaleleia le ituaiga aoaoga o le a faapea ona faatinoina e alii ma tamaitai faiaoga. E talitonu e le o se galuega faigofie. O le a se mea matou te fesoasoani atu ai e faafaigofie ai ma faamama le avega, e augofie lava le Itumalo e lagolago atu.

Lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, e i ai le faamoemoe ina ia mafai ona faaogaina o matou tupulaga ua maea aoaoga i kolisi ao loo tausii nuu. E faamoemoe o le a faia ni polokalame e aoaoina ai i latou e ese ai ma le tomai sa latou ausia i kolisi. O le tomai e pei o le faa-kamuta, inisinia taavale, fai afi laiti poo le inisinia o moa vao ma le tomai faifaatoaga.

E le gata i faatoaga o fualaau aina ma isi lava tomai o loo moomia e le tupulaga i lenei vaitau.

Lau Afioga i le Minisita mo Galuega, Felauaiga ma Atinae Esee, e moomia lava ona toe valitaina auala galue o lo matou Itumalo. Masalo o le sefulu tausaga e lei oo le valita i auala ae laiti lava nai auala ua oo i ai valitaina ae peitai ane ua faaletonu foi. O le isi itu i auala ona ua i ai maota ma laoa ua tala atu i le talaloa

peitai ane e pogisa e leai ni moli e mafai ai ona iloa le auala o loo savalia e le Itumalo pe a oo i le afiafi po. O tuualalo nei e taatia atu i ou tafatafa.

Lau Afioga i le Fofoga Fetalai, masalo e le i mamao atu talu ona ou malaga e avea ai Au ma sui usufono o le Palemene e talanoaina se mataupu taua tele. O le mataupu lea ua faaigoaina o le Tulafono o le “Suiga o le Tau”. O le mea moni e tele se galuega e moomia ona fai i totonu o le tatou Atunuu.

Lau Afioga i le Minisita mo Punaoa Faalenatura ma Siosiomaga, o se avega mamafa tele lea tulaga e tusa ai ma le faamoemoe e fai o le manatu i taumafa a le Atunuu ae ao lava foi ona tatou puipui ma faapelepele i lo tatou vaomatua. E faamata e a ae silasila ane pe le mafai ona faasao tumutumu o mauga ma Tuasivi uma ina ia mafai ona faaitiitia le faaaogaina o laueleele nei o loo tapue ai le suavai ma maua ai le suavai taumafa mo le Atunuu, ae faaoga le pito i lalo mai o le laueleele o le Atunuu. E tele foi nisi ituaiga faatoaga e mafai ona fai ma aoaoina, tatou te le tau tulituli i le totoina o le talo ma isi faaeleeleaga e pei ona masani ai. Ia tatou faamasani i nisi faiga o faatoaga fou e tele metotia e mafai ona aoaoina. Faafetai i le Malo o lea ua faasoa mai le tomai e o tatou uso mai Saina e tusa ai ma le polokalame ua faatinoina i Nuu. Faafetai atu i le Matagaluega o Faatoaga, Faigafaiva ma le Faleoloa o Faatoaga ma le Minisita e tusa ai ma nei polokalame matagofie.

Ou te masalo ua maea ni motugaafa a lenei sui usufono, ae o le a oo atu sau faamatalaga i le Tulafono Tau Faaofi o le Faatatauina o Tupe Faaopoopo (Nu.2) 2010/2011 ma le Tulafono Tau Faaofi o le Faatatauina o Tupe 2011/2012. Ou te faafetai atu i lau Afioga i le Taitaifono faapea lau Afioga i le Sui Taitaifono ma le mamalu o le Komiti sa nafa ma le suesueina o Tala o le Tupe o le 2011/2012. Malo le fai o le faiva, malo le galulue punouai. Ou te manatu ua silafia uma e le faigofie la outou galuega, sa fau ao fau po aua o la outou taumafaiga ina ia mautinoa ua alaga tatau le faatulagaina ma le faaaogaina o tupe a le Atunuu.

E faamalo atu i lau Afioga i le Minisita o Tupe, ou te talitonu e ui lava sa feagai lau Afioga ma ni galu fatitu o le moana sausau sa faapea ona folau ai lou Sa ao tatou alo atu i le Faiga Palota, na e le tuulafoaia lava le matafaioi lea na e sii aao i ai, malo faafetai. A lea ua atagia mai i le maeaea lelei ma le lava tapena o le Tulafono Tau Faaofi o le Faatatauina o Tupe 2011/2012, o lea ua faataatia ma ua manino lona faaaogaina. E faamalo atu i le Matagaluega.

E faapena ona ou fia faamalo atu foi ma faafetai atu i Matagaluega uma a le Malo aua o le Tulafono Tau Faaofi o le Faatatauina o Tupe 2011/2012 e fau faatasi, malo le faasoasoa, malo le silasila totoa.

O Palauli e lagolago i le Tulafono Tau Faaofi o le Faatatauina o Tupe 2011/2012.

O le tulaga i le tamaoaiga o le tatou Atunuu, lau Afioga i le Palemia, Kapeneta ma le Faigamalo, e le folo molemoleina foi ni manuia ua faapena ona faasafua mai lea sa aeae ai foi lenei Itumalo i na tausaga ua tuanai ma la outou Faigamalo. Matou te faafetai atu mo le amanaia o lo matou Itumalo i le tele o manuia sa faasoa atu. A i ai foi ni tulaga e silafia e le Malo e ono mafai ona faaleleia atili i totonu o lo matou Itumalo, tatou galulue faatasi.

Lau Afioga i le Fofoga Fetalai, ou te manatu ao lei faaiuiu se faamatalaga e ao lava ona ou faailoa foi se manatu ina ia mafai ona faasoa atu aua le faafofogaaga a le Atunuu. O le Faigamalo e le na o tagata e galulue mo le Malo o Samoa. O le mea ou te manatua ai lava le lauga tautaua a se Peresetene iloga o Amerika o lena ua outou silafia lana saunoaga. O loo faapea; “Aua e te fesili poo le a se mea e faia e lou Atunuu mo Au, a ia e fesili poo le a sau mea e fai mo lou Atunuu”? Ona ou faapea lea, o Samoa a e silafia le mea lelei e tatau ona fai, tulai loa ma faatino. O le tuualalo lea.

Lau Afioga i le Fofoga Fetalai ma le mamalu o le Palemene, ae a le faafogafogaaga a Samoa, a i ai se faamatalaga ua le tau tamalii i sa outou faafofoga, se tu poo se aga ia lafo i nuu le aina. O le tatalo ina ia faamanuia mai lo tatou Tapaau Sili ma ia tatou mavae i le mavaega a tupu, ia tu pea Ieova i lo tatou va.

Manuia ma ia soifua.

21 IUNI 2011

Afioga PESETA VAIFOU TEVAGA (Faasaleleaga Nu. 4): Faafetai i lau Afioga i le Fofoga Fetalai. O le Itumalo lenei, o le Itumalo e sa i le leaga ae na o le lelei lava. E i ai foi le tapu a fanua o lenei Itumalo o Faasaleleaga Nu. 4, e sa ona lauga lenei Itumalo i le po ae na o le ao lava.

E mafua mai aisea? E leaga o le sui usufono o lenei Itumalo na fanau i le ao, e lei fanau i le po. Ua uma ona tuumatamaga e le Atua galuega e fai i le po ma galuega e fai i le ao. O le mea lea i lau Afioga i le Fofoga Fetalai...

O le a taatia le lauga na saunia mo le ao e lou Itumalo ao le a faapo atu le lauga.

Ua malu tafaifa le Maota i Tiafau nei, faafekai i lau Afioga i le Fofoga Fetalai o lea ua e ku i le koo kaimua o le Sa o Samoa, faafetai mo le avagoa. Lou Ikumalo e, pofala laia lau kapuaiga ma kui age lau mulila ae sei ou liliu age sei kaumafai se sao o le Ikumalo. Ua uma ona ka le faleka, ua sala ukauka foi le akuao o Malo, e pei o le Mavega gai Ulufaki. O lea foi ua uma faamagusiga le aku o le kaeao aua lo kakou va kapuia ma le Silisili Ese, kogi ia i le pa kau i le ave ae ifo i magu aua Samoa ma loga lumagai maguia. O Samoa o le akuguu e ee ma seei i papa ae kiu i oga faalagilagi. Aua o Oe o le Ao Mamala i le faasouga o ao ma le aku folasa. O le ia foi e kalakala ae ua uma ona kofi. Ua iloga le ia o ao, le iu alo ua malie o, aua foi ua iloga Kama ma Aiga, Aiga foi ma lakou Kama aua le Kui Akua ma le Kui Aaga, o papa ga aua Sa Kupua, Vaekamasoalii ma Gakoaikele o papa ga aua Sa Maliekoa, Kagaloo ma le Kogumaiepea, Alo Susuga ma Alofoe ia Kumua ma Pule, Ikuau ma Alakaua, Aiga i le Kai ma le Vaa o Fogoki.

Ou ke faapo ai alamea foi i ou mamalu faale Malo, Laga Afioga Mamalu, O le Ao o le Malo ma le Masiofo, Sui o le Fono a Sui Tofia ma Lau Masiofo, Afioga i le Faamasigo Sili ma le Ofisa o Faamasigoga, ao le o loo ku i makagiolo i le kaumua i le Sa o Samoa, lau Afioga i le Alii Palemia ma le Kapegeka. Afio lau Afioga i le Fofoga Fekalai, afio lau Afioga i le Sui Palemia, afio lau Afioga i le Kaikai o le Iku Agai faapea sui usufono mamalu uma o le Maoka i Kiafau. O ou mamalu ga faale Malo.

O loo kauka foi le Susuga ma kui mai le mulipapaga i o kakou uso i le moku i Sasae. Kulouga lau Afioga i le Kovaga Sili, lau Afioga i le Sui Kovaga, lau Afioga i le Faamasigo Sili faapea lau Afioga i le Fofoga Fekalai ma le mamalu o Maoka e lua. Aua Sua ma le Vaifagua, Fofu Aikulagi, Kama a le Maguakele ma Kookoo o le Faleula, Saole ma Saleaamua ma le Laugiu ga Saelua. Faapea foi upu a le Kui Magua i le Maoka fa, o le laau lava lea ga amokasi ia Kukuila ma Magua. Ou mamalu ga ma le falegiu sa o le Kui Magua seia paia le falepapa i Agalega ga kauilo ma kauiso ai ao ma magu o Samoa. Kulou ia, kulou lava.

O ka kaeao Samoa, kau ia iga ou sau le va ae ua faafagogo kagi ao i le au fueloloa ma le au kupu koa. Kulouga laia ia Kumua ma Pule o la lakou faku aiga kausi.

O kaeao o le Kalalelei lea ua ka oaoa ai i Faleseu ae saa i Maomalie. O le kalikoguga lafoai laia i faakui o le Akua lakou ke polopoloiga ae malie le faafofogaaga a Samoa sei ou afe age lava i lou ikumalo pele o Faasaleleaga Nu.4.

Ou ke faakalofa aku ma ou faafeiloai aku i lou guu o Lago, i le afio o le Aiga Sa Kuala o le Aiga Faalagilagi, aua le afio o le Falefa o le Aiga Sa Vui, afio le Kama Sa aua lau Afioga Falegaoki, afio alo o Vaafusuaga, susu ai le Susuga Sua, alalakai lau kofa le makua fekalai, lau fekalaiga Malaueulu. Ae kaigage le mamalu o le Gofu a Luma ma upu ia ke Oe Salemuliaga.

Ou ke faakalofa aku foi ma ou faafeiloai aku i lou guu i Asaga i le afio o Sakuala le paia o le Aiga Faalagilagi aua le afio o le kou Aiga Sa Makafeo o le paia lava lea o le Kauso, alalakai oe Lualuakauga o Oe o le Makua, alalakai lau fekalaiga Leakuavao o le mamalu lea ia Sa le Paku ma le Falekolu o le Salemuliaga.

Ou ke faafeiloai aku ma ou faakalofa aku i lo'u gu'u pele o Puapua, aua le afio o le paia o Aiga Faalagilagi le paia lava lea aua le Aiga Sa Kuala, afio lo oukou Maupu lau Afioga Falegaoki, afio foi lau Afioga Lemalu o Oe o le Makua, susu mai Ugapo ma Sauia o Oe na fuaao. Alalatai mai le mamalu i le Nofu Ituaiga ia te Oe le Pule Sealiimalietoa ma le mamalu o Salemuliaga.

Lou Itumalo e, sao faalalelei i lau faaaloalo lea ua ou pale ai, lea ua ou ula, lea ua ou titi ai i lau faatupu ma lau faatamalii. Ou te faamoemoe atu i la outou tofa ma le faautaga, la outou tatalo i ou matua faaleagaga i soo se fata faitaulaga i totonu o le Itumalo o le a mau ai sou manatu aua le faalagamaea i Tiafau. Aua o le malae o le taga malu, o le malae o le taga tia, o le malae o le faautugatagi a Samoa.

Ou te faatalofa atu foi i Susuga i Ao faalupega, faafeagaiga taulagi i lou Itumalo o loo faafaletuluia ma faatuna paulia i lou Itumalo ona o le Atua ma lona finagalo.

Ou te faafeiloai atu i ou aiga uma i Samoa ma atunuu mamao faapea foi le mamalu o lou Itumalo na lagolagoina au i lenei Faiga Palota. Ou te momoli atu foi lau faafetai tele i au Komiti eseese uma i totonu o le Itumalo i le Motu tele o Salafai ma Upolu nei, ia outou galuega fita ma lo outou tautua malo lea ua mafai

ai ona ou seei i le Tofi o le Itumalo. E momoli atu foi lau faafetai tele i ou uso a tauva o le faiga filifiliga a lou Itumalo na sei mavae atu nei, i lau Susuga Sua Rimoni, lau Afioga Vui Tupe ma lau Tofa Mulitalo Siafausa, ia outou tofa faatupu ma le faautaga oo ua mafai ai ona see malie le Sa o le Itumalo e aunoa ma se peau e laga. O le upu moni avea au ma o tatou sui usufono i lenei Paeaiga. O le mavaeaga nai le Namu o au nei ao oe taeao. Ae ou te faamoemoe atu foi aua ua lava lo outou tomai tou te fesoasoani mai ai ia te au aua le tautuaina o le Nofoa o le Itumalo.

Afai foi e i ai se leo o la outou auauna i le tautuaina o lenei Paeaiga, ia goto lava i iliili mamate e pei o le mavaeaga a Malietoa Tanumafili II. O lea lou Itumalo e, tapuai maia ae sei ou afe ane lava e taumafai se sao o le Itumalo e lagolagoina ai le Tala Faatatau o Tupe 2011/2012 e pei ona faataatia i luma o le Laulau a Fono.

E momoli atu le faafetai a lou Itumalo i lau Afioga i le Minisita o Tupe faapea foi le Matagaluega o Tupe i le tapenaina o lenei lipoti faaletupe. E ui lava sa i ai le tulaga sa tulai mai i tulaga faale Malo i lau Afioga i le Minisita o Tupe ae faafetai i le Atua ua faaii ma le manuia le gasegase faale Itumalo.

Ae sei ou agai atu i le Minisita mo Galuega, Felauaiga ma Atinae Eseeese ona e tasi lenei Matagaluega o loo manaomia ai sina fesoasoani mo le tau o le soifuaga i lo matou motu tele o Salafai. O lea lau Afioga i le Minisita mo Galuega, Felauaiga ma Atinae Eseeese, e tuuina atu se talosaga ma le agaga maualalo o lenei Itumalo ona ua silafia le eseese o le tau o le soifuaga ua i ai i Upolu nei ma le Motu tele i Salafai. E mafua i se a? E mafua ona o felauaiga, matou te talitonu e le faigofie la outou tiute, e le faigofie foi le taugata o le suauu o loo faaaogaina e vaa, ae na ona faataatia atu i lau Afioga i le Minisita mo Galuega, Felauaiga ma Atinae Eseeese ma le Matagaluega sei toe silasila ane i pasese o loli o loo lauina oloa, aemaise o le tamaoiaiga i le Motu i Salafai. Sei toe fetuutuunai le pasese, lea foi ua sau i ala, faafetai i le Malo mo fuafuaga alualu mamao mo uafu tetele o le a fausia i Salafai. E talitonu foi le sui usufono o lea ua matagofie le faataatiaina o se polokalame o le uafu tele e fausia i Palauli. Atonu o le a maua ai iinei se faamamaavega ma pau ai le tau o le soifuaga i le Motu i Salafai ona o le a maua le avanoa o le a afe ane ai vaa oloa nei e aunoa ma le toe faaauau mai i Upolu nei. O lona uiga o le a pau ai le tau o le soifuaga aua o le a le toe felauaina oloa i Upolu nei i Savaii.

Lau Afioga i le Minisita mo Galuega, Felauaiga ma Atinae Eseeese e momoli atu le faafetai ma le faamalo i nisi o galuega a lou Itumalo ua uma ona fausiaina i le Paeaiga talu ai, ae tuutuu atu pea le tatalo i lau Afioga i le Minisita mo Galuega ma le Matagaluega ona e i ai nisi o galuega taua ua uma ona faataatia i le Paeaiga talu ai, aua le polokekti lea ua uma ona fuafuaina e le Malo o le suavai, i le vai tuloto lea e taoto nei i gauta o Puapua. E silafia e lau Afioga i le Minisita mo Galuega o lea ua amatatia i le Paeaiga talu ai nisi o vaega o lenei auala, e tatalo atu ai ma le agaga maualalo ina lelei pea le faaauauina o lenei poloketi atonu o iina o le a maua ai le faamamaavega i pili o moli aua o lona uiga afai ae maea lenei auaunaga, o le a le toe i ai se penisini poo se kiso e faaaogaina o lona uiga o le a maua le faamamaavega mo le Motu i Salafai.

E tatalo atu foi mo auala-galue o lou Itumalo i le Paeaiga talu ai, e tasi le auala sa fausia ai, atonu foi o lena ua uma ona faataoto e se tasi foi o sui usufono o lenei Itumalo ni talosaga ae ona o le utiuti pea o seleni a le Malo.

O lea e faataatia atu ai le talosaga ma le agaga maualalo, e manaomia le faaauauina o le fausiaina o auala galue i Asaga ma Puapua. E silafia foi e lau Afioga ma le mamalu o le Matagaluega, tasi lenei afioaga e tele lona eleele e le o galueaina, o eleele o Puapua. O lea ua faalogologo atu i le tele o faletalimalo o le a fausiaina i le motu tele i Salafai, ia e ofoina atu e lou Itumalo ona eleele e fuafua i ai nisi o fuafuaga a le Malo. E i ai le malae vaalele faale Malo. Matou te tatalaina atu o matou eleele e lagolagosua ai le Malo i soo se poloketi e moomia ai le fesoasoani. E faapea foi lau Afioga i le Minisita mo Punaoa Faalenatura ma le Siosiomaga, ona e i ai se poloketi ua uma ona faatalanoaina e le sui o le Matagaluega o Punaoa Faalenatura ma le Siosiomaga i le tausaga talu ai ma si ou nuu i Asaga. Ma o lenei poloketi, o le fausiaina lea o se pamaa e lioina ai lona vai. O le vai lenei lau Afioga i le Minisita, o lea o loo i ai le vavau a lenei nuu. O lea o loo taoto ai i totonu o lenei vai le tamaitai e suafa ia Sina. O lona uiga, tasi lea pisinisi lelei a si ou nuu i Asaga o le a maua ai a latou tupe pe afai o le a teuteuina lelei lenei vai ma maimoa ma matamata ai le toatele o le Atunuu ma tagata mai fafo.

E i ai si mea lea e pau lau Afioga i le Minisita mo Galuega, Felauaiga ma Atinae Eeseese, o le ala sima lea i si ou nuu i Lano. E silafia foi e lau Afioga, e i ai le auala lea o loo maualalo lona sima, o le tele ia o le faaletonu pe a oo i tafega ma lologa, e faigata i alo ma fanau a le Itumalo ona oo atu i aoga, faapea foi le mamalu o le Atunuu pe a oo ina loloto nei tafega. E tatalo atu lava, e le o se galuega tele, na o ni nai paipa sima e faataatitia, ae na o sina maualuga laitiiti e mafai ona sopoia ai e alo ma fanau a lenei Itumalo aua aoga. E faapea foi i le auala laupapa tele lea e i totonu o Lano, o le auala laupapa lea e lei leva ona uma ona fausia, ma e matagofie ma lelei le fausiaina o lenei galuega, ae peitai, e lua lologa tetele na lavea ai le faletalimalo o le afioaga o Lano ma oo ai ina matua o uma i lalo fale o lea faletalimalo. Ae faafetai i le Atua ona ua o i lalo fale ae tumau tagata o le Itumalo. E tatalo atu ai i lau Afioga sei toe silasila ane, pe mafai ona toe faavatele laitiiti lenei auala laupapa ina ia mafai ai ona puipuia nei auala, e le gata i auala ae o le ola foi ma le soifua o tagata o le afioaga.

Ona ou oo mai lea i le Matagaluega mo Faatoaga ma Faigafaiva. Lau Afioga i le Minisita, e momoli atu le faamalo ma le faafetai a lenei Itumalo i polokalame foi ma talomua, o lea ua matau atu ua amata ona faagaioi o le Matagaluega. Ae manatu foi lenei Itumalo, e ao pea ona avatu sa matou tuualalo, e tatau ona lava ni faatosina e uunaia ai le au galulue ma le aufaifaatoaga. Ou te talitonu o lea o loo maitauina le tele o taavale o le tatou Malo o lea ua faasalalauina. E pei lava o le agaga maualuga o lenei Itumalo, aua o lea ua maitauina le tele o taavale ia ua aumai i totonu o le Atunuu, masalo o le 75% o taavale, o taavale foi nei e fa faitotoa, ae laitiiti lava le numera o nai pikiapu ona o le taugata laitiiti.

Ona i ai lea o le talosaga ma le tuualalo a lenei Itumalo i lau Afioga i le Palemia ma le Malo, pe le alagataata nei taavale o le a toe faatau ese atu e le Malo ae aumai tasi ia i le Matagaluega mo Faatoaga ma Faigafaiva e fai ai ana faatosina agai i Itumalo taitasi, e lelei le manumalo ai o le aufaifaatoaga e faatoluina ai le tau o tupe maua i lea taavale, ma o le a alu aoga ai foi. O le agaga lena e tatalo atu ai lenei Itumalo i lau Afioga i le Minisita.

Lau Afioga i le Minisita mo le Soifua Maloloina. Masalo e le o toe po se lilo i lau Afioga, o le tele lava o le pagatia ua tulai mai i o tatou falemai i Tuasivi, e le gata i le le lava o fomai, aemaise o vailaau. O lea e avatu ai le talosaga ma le agaga maualalo a lenei Itumalo, pe le maua nisi fomai, specialists mai fafo pe tai faatasi i le masina ona asia atu le motu tele i Salafai ona o nisi o gasegase e moomia fomai faapitua.

Ona ou oo mai ai lea i lau Afioga i le Minisita mo Aoga, Taaloga ma Aganuu. Lau Afioga i le Minisita ma le mamalu o le Matagaluega, ua uma ona fausia nisi o faleaoga o lou Itumalo, ua matagofie foi ma manaia nisi o malae taalo. E avatu ai le talosaga i ni taaloga faava o Malo e fai i Savaii, o le lotoa o le faleaoga la e i Puapua, masalo e laitiiti ai le Apia Park. Ia na ona faataoto atu. O loo avanoa foi nisi o eleele o lou Itumalo e fia fai ai se faletusi poo le library sei tua i ai alo ma fanau o lou Itumalo.

Lau Afioga i le Fofoga Fetalai, na o sina motugaafa e fautuaina ai sui usufono mamalu uma o le Maota i Tiafau nei, ae le aoaia e le matapia le manaia. Na filimafua le tofa a le Atunuu ma ua filifilia i tatou o lupe na faia mai le fuifui e ave ma auauna tautua mo le Atunuu. Omaia laia tatou fau faagogosina ae aua le fauina faamatalaoa. O lea e avatu ai malu i puega i lau Afioga i le Fofoga Fetalai, ona o tulaga lava nei o lauga e fai i le po, e alu ae ua pogisa foi le vaai.

Ia lau Afioga ma le Itu Agai, omai laia tatou galulue faatasi...

O la outou tofa fetalai ae faamalosia ai foi le Palemia ma le Faigamalo.

Lau Afioga i le Palemia, ua iloga lou tulai mai leaga o oe e te ganeganemea, ae matua lotemea. O le tatalo a lenei Itumalo i sui usufono mamalu uma o le Maota i Tiafau nei, o outou māmā nā.

Faata'i ma le leo ona ou manatu lea, sa feuu faaofia moegaluaga aua Lana Afioga Mamalu, O Le Ao o le Malo, Aiga ma Tama, fulifao figota o le sami, ae sagai ane 'ai o le tai, ia lele malie lau tia lau Afioga i le Palemia, manuteleina o outou faiva le Kapeneta ma le Fofoga Fetalai, manuteleina lau Afioga i le Sui Palemia aemaise le Taitai o le Itu Agai ma le mamalu o le Vaega Faaupufai.

Samoa e, tau ia ina faapea atu le sui usufono o lenei Itumalo i lau tapuaiga, ia mau pea lou too Tumua ma Pule, Ituau ma Alataua, Aiga i le Tai ma le Vaa o Fonoti, faamanuia le Atua i si ou Itumalo pele o Faasaleleaga Nu.4, faapea foi Ofisa Sili o Pulega o Matagaluega taitasi o le Malo, faamanuia le Atua i lau Afioga i le Failatusi o le Fono Aoaofaitulafono, faapea foi Pule Sili o Kamupani ma le aufaipisinisi i totonu o le Atunuu. Ia tu foi ma lelea le ao e i feoi o le talalelei, manuteleina lau tapuaiga Samoa. Soifua ma ia manuia.

21 IUNI 2011

Afioga AFUALO WOOD UTI SALELE (Salega): Ou te manatu le Itumalo o Salega, o le potala o Samoa o le eleele e le malie i vai, o le maa faafuagalu e iloa ai le vaeluaga o le tai, o le ogasami loloto foi e le soona asia e se tautai, aua o Samoa o le fue lavelave, o le ia iviivia e auaugata, tulou. Ia tulou ia le Maota o Samoa, o le malae i Tiafau, o le malae o Malo. Lau Afioga i le Fofoga Fetalai, o le Maota ma le mamalu o le Palemene o Samoa, tapuai maia, sei taumafai atu se upu a le Itumalo o Salega. Fai mai e tele mea suamalie o le lalolagi, ae suamalie a niu aati. Peitai, e tasi le mea e suamalie moni ai le ola, o le mamafa o lona amanaia, e tusa ma le auro e le mafai ona faatauina mai, e le mafai foi ona faatauina atu, tusa poo le a lona tau. Poo le a lea? O le matua lena o lau tautaualemau, a finagalo ai, avea ma lui mo a taeao.

E muamua ona ou faatulou i le paia o le tupua o Tiafau nei, o le Malae o le Taga Tia, o le Malae o Malo, o le Malae e Faautu i ai le Tagi a Samoa, aua le faa-afio fono i lau Afioga i le Fofoga Fetalai, e faapea foi le afio o lau Afioga i le Palemia, ae tainane le aiga Kapeneta o le nofo a Minisita, e faapea foi lau Afioga i le Taitai ma lenei Itu o le Malu ma le mamalu o le Palemene o Samoa.

E le faagaloina foi le tapuaiga mamalu a Lana Afioga Mamalu O Le Ao o le Malo ma lau Masiofo, lau Afioga i le Sui Ao ma lau Masiofo, lau Afioga i le Faamasino Sili ma le mamalu o le Ofisa o Faamasinoga, ae a le tapuaiga i le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

A o se faafofogaaga i le Motu i Sasae, aua le afio o le Faasuaga ma le mamalu i le Faleagafulu, e faapea foi i le Motu Sa i le afio o Faatui ma le Auva o Tootoo ma Tama a le Manuatele, ae tainane le tapuaiga mana i Ao o Faalupega i fata faitaulaga e fia o lo o talafaauto aua le tauasaina o le Ipuvai o le Ola mo se manuia o le Palemene ma Samoa ua potopoto.

E le faagaloina i loto ma le agaga lou Itumalo pele o Salega, ia tiu ia Tapapa ma Mataiili e afio ai Sa Tuimaugapo ma Alo o Lilomaiava, le mamalu ia Sa Soa ma Sa Saomai, tulouna Iliili e afio ai le afioga ia Toomata ma le Taofia, lau fetalai Tuipea ma le mamalu ia Saleutogi. Tulouna malae e fia o afio ai le Toatolu o Alii ma le mamalu ia Saleutogi. Tulouna Agalefau e afio ai Afualo ma le Toafa, susu ai Laulunatoa ma lau fetalai Faimanu o le fofoga o le Usoalii ma le pito fanua ma le mamalu o le Alataua. Tulouna le malae o le Ma, e afio ai Fualau ma le aiga alii ma Fepuleai, afio Tilafono ma le Faavaoga ma Tama, alaalatai lau fetalai Tui Salega. Tulouna Siomalae ma Vaipua e susu ai le Aiga Samoeleoi, o le inailau na o'o, susu ai le Alaala Maota ma le mamalu i le Alataua. Tulouna Fogasavaii o le maota o Tumua e afio Matautia ma le Toafa, le Matua ma Maopu ma le mamalu o le Taupololaii. Tulouna Fetoai ma Vaimoliai e afio ai le Aiga Samoeleoi ma Alo o Lilomaiava, le Matua o le Maopu ma le mamalu i le Alataua.

Tulouna Faafegaiga ma Faletua o lou Itumalo o Salega. E ui ina tomuli se upu i lo outou paia ae fua ala tasi o le vaeluaga faafeagai ma le Atua o toai o malo lo outou mamalu. Fisaga ia lau tapuaiga ma eva i laufola lau tatalo, aua o faiva e tapuaia e manuia. E tele mea suamalie o le lalolagi, ae suamalie a niu aati, ae tasi le mea e suamalie moni lava o le alofa, o le ola. E le mafai ona faatau atu e le mafai foi ona faatau mai. O le mamafa o lona amanaia e tutusa ma le auro. Po o le a lea? Ioe, o le faamaoni. A faaopoopo atu i ai ma le puna o le fiafia po o le faanoanoa, ona atoa lea o le tino o le teine o Alofa Faamaoni.

Lau Afioga i le Fofoga Fetalai, e toatolu le fanau teine a Fata i Safata, o Sinautu, o Sinataua ma Sinalei. Fai mai na nonofo faatasi ma ola faatasi nei teine e toatolu.

O se tasi aso na alu ai lo la faiva i le sua o le tai masa, o le eligapipi na tauaimisa ai teine ma maua ai le upu; 'e futifuti ulu Sinautu ma Sinataua, ae sola Sinalei ma pipi'. O le eseesega na mafua i le faaso, e le o le matapoto e sili, e le o le sili o le malosii, a o le mea sili o le alofa faamaoni, aua e u nifo e tau i le pau. O le faamaoni o le alofa e fanau mai ai le mea sao, o le mea sao e toamalie e le iloagofie. Ia manatu o le puniloa lo tatou faiva, e puni matatogo puniloa, e ae uma lava ia Samoa. E le faapea la ua ou taua ia mea ona e losilosivale le taofi, a o alofaaga molipo atonu e i ai se aoga, ne'i mumutu vanu ma le ala o le la i lou taimi, a o tapa ia Leui ma Vailiua ia Sina... togi se maa a Salega mo le galuega.

Faafetai i Auauna a le Atua mo le Itumalo ma a outou tapuaiga, ua ae ai ma le manuia le faatamasoaliiga a le Afioga ia Toomata ma le Afioga ia Tapuai o e sa tulai mai i Paeaiga ua alu. Malo tau, faafetai faatoatoa, o mea lelei na oulua faia, ia viia ai le Atua. O le Itumalo lenei o Salega e fili fetau ona upu, e le fili maveve, e fotuanuupule e le molia i nuu malolo. Fai mai o le tofa fai o'a, o lou oti mamanu ma le faautaga e tutumu ai le tai, ae taumua lelei e le Matautu. E le o se upu e avane ai, o oe o le tautai o aso louloua. O lou sao folau

i le laula'i o le afiafi, seia totego le fetuao o le taeao. Aisea? Aua o lau tofa sa filifili faatasi ma le Atua, o lau moeoo sa faatalitali i le musumusuga a le Agaga Paia. Lou Itumalo e, o au o le auauna vaivai ma faatauvaava, ae ou te malosi, ona o le faatasi mai o le Alii.

Lau Afioga i le Fofoga Fetalai, o le a agai sau faamatalaga e tusa ai o le sao o le Itumalo o Salega ma ni manaoga o lo o manaomia e lou Itumalo. E amata mai lau faamatalaga i le Minisita mo Galuega, Felauaiga ma Atinae Eeseese, faamolemole o le talosaga ua tuuina mai e le Itumalo, o lo o tele nisi nuu e le'i oo i ai le faasoloina o le galueaiina o auala galue, sa galueaiina i Paeaiga ua tuana'i ia auala ae le'i maea ona tapena. Mo se faataitaiga; o le auala galue lea e i Sagone, ia e le'i i ai ma se galuega ua faatinoina, e faapea foi ma auala galue i Fogatuli ma Faiaai, e le'i i ai ma se auala ua faatinoina. O lo o i ai isi auala o isi nuu ua uma ona faatino ae le'i maea ona tapena. O le mau a lou Itumalo sa logo mai ia te au, o tuamaota o Salega o lo o tafe ai le suasusu ma le meli. Ae paga lea, e le mafai ona aumai i tai le suasusu ma le meli, pe a le oo i uta ia taavale ia, se'i avane lou gutu ma le afi, e fa uili e aumai le suasusu ma le meli. O lo o ua toto nei le tele o le laufanua i le talo e tusa ai nei o le faamoemoe mo le toe lauina atu i fafo. O lo o i ai foi ma isi galuega o lo o galulue ai ia le Itumalo, a o le talosaga, faamolemole lau Afioga i le Minisita se'i silasila ane ina ia faafaigofie ma faatuputupulaia foi. Pei foi ona silafia, o le Itumalo foi lenei o lo o tele ina latou saunia ma tapena mai le ava lea e taumafa ai le tóatele o le Atunuu. E faigata foi le felauaiga aemaise mai le tuasivi se'i oo mai i tai i le mea o lo o gasese ai le faasoloina o le faamoemoe.

Lau Afioga i le Minisita mo Aoga, Taaloga ma Aganuu, faafetai mo le galuega ua saunia nei o la ua galueaiina le faleaoga o lo matou kolisi maualuga. O le talosaga vaivai a le Itumalo ma le komiti o aoga, faamolemole se'i silasila ane ina ia atoa le faatotoga ia masini faapitoa lea o computers, ina ia mafai ona faatino ai le faamoemoe, ma le talosaga foi ina ia faaaupega uma ia totino o le faleaoga e oo i potu e fai ai suesuega faasaienisi a le vasega 12 ma le vasega 13, pe a tusa ai mo le tapenaga mo le faamoemoe i le tausaga fou.

O aoga tulagalua, o lo o ua maea le tele o aoga ma faleaoga o le Itumalo, se'i vagana ai le falelua o Faiaai ma Fogatuli, e le'i faia se galuega i ai, ae o lo o i ai le faamoemoe e galueaiina ma ia sifi ese tama ma teine aoga mai i o ona e tu lata i le auala, faamolemole sei silasila ane. O le faleaoga tulagalua i Sagone, o lo o taoto le talosaga, o le taimi nei o la ua galulue i tai i tafatafa ane o le kolisi ia le tapenaina o le faleaoga, ae paga lea, e le o mautu ia le alaafaga o lou Itumalo, po o fea ua oo i ai le faasologa o le talosaga lau Afioga i le Minisita sei silasila ane, ona o la ua galulue e tapenapena mo le faamoemoe, a o lo o faia pea aoga a tama ma teine i le faleaoga tuai.

Ona oo mai lea o sau faamatalaga i le falemai. E pei ona silafia lau Afioga i le Fofoga Fetalai, o le falemai o lea e faaoga faatasi, sei tulou lou gutu ma le afi, e le Itumalo o Salega faapea foi ma Palauli Sisifo. O le mau sa tuuina mai ia te au, ia e faa-tasi i le vaiaso o le Aso Tofi ona oo atu i ai le asiasiga a le fomai po o se fomai faapitoa mai Tuasivi. E toatolu teine tausí soifua o lo o galulue ai i le vaiaso atoa, e fitu aso o le vaiaso. Faamolemole lau Afioga i le Minisita, sei silasila ane ina ia toe faaleleia atili le auaunaga. O le molimau mai, e fa'i o le le lava o vailaau, o fualaau a o le le lava o fomai e asiasi atu faapea ma teine tausí soifua o lo o faatinoina le auaunaga. E oo i lona tulaga o le faatotinoina o moega, sei tulou, ma nisi vaega mo le falemai, faamolemole sei silasila ane i ai lau Afioga.

O faatoaga, ona o lea o le fua muamua i lau faamatalaga e tusa ai o auala galue, ae tatau pea ona ou toe talosaga atu i lau Afioga i le Minisita, e ui lava o le a foi se faaopoopoga itiiti ua tuuina atu mo lau Matagaluega, a o le talitonuga lava o lenei itu, e tatau ona feoloolo se tamaoiga e tuu atu i ou aao e faasoasoa ma lufilufi ai au polokalame fuafua, mo le manuia lautele aemaise foi o le lautele o le mamalu o le Atunuu, o le pau lea o le toomaga e mafai ai ona maua se faasinomaga ma se fasitupe e ola ai le toeaina ma le loomatua. Ia faasolo atu nisi polokalame e tusa ai o le faamoemoe e galulue ai faletua ma tausí ma le malosi o le Itumalo.

O le eletise, lau Afioga i le Minisita, o lo o i ai afi... o lo o vili ai le vai, a o afi uma nei e alu i le eletise, ona o le molimau mai e faavaitaimi, pei e... pei lava o le aoga a oo lava i le taimi e tuua ai ua tuua le taimi e ola ai le afi.

Faamolemole sei silasila ane ona o le punaoa lenei e taua tele ina ia mafai ona faamalieina le auaunaga aemaise lava le soifua laulelei o le Itumalo i mea tau suavai.

O le Matagaluega o Leoleo, Falepuipui ma le Tinei Mu, ia ona o lea ua i ai le fuafuaga alualumamao a le Malo, a o le talosaga a lenei sui usufono vaivai, o le maitau i ai i le amata atu i Palauli Sisifo seia paia talaatu o Salega, e le o i ai se nofoaga foi lea i tua, poo le faa-Peretania o le outpost o le Matagaluega. O le tatalo i le Minisita faamolemole sei silasila ane, ae a pe a avatu se isi pou lea e faatu i Salega, e fesoasoani ona e tele atinae la e tapena ae i le la itu o le motu e ala i tagata tafafao maimoa mai, ma fesoasoani foi ma lagolagosua i le galuega a alii ma faipule aua le nofo filemu o alaalfaga.

O tagata tafafao maimoa mai fafo, lau Afioga i le Palemia o loo gafa tonu ma le faamoemoe lea, o Salega, e lumafale i le mato le tele o nuu ae tuafale i tua i mauga, sei tulou lou gutu ma le afi. A o lalo ifo o luma o le tele o nuu, o loo i ai faga oneone i le tele o nuu, o faga oneone e iila, pei e fepulafi pei o le susulu mai o fetu i le po. O le molimau mai a le tele o nuu, ua faapea mai, 'Afualo, sei e saunoa atu faamolemole i le Minisita mo Tagata Tafafao Maimoa Mai Fafo ma le Minisita mo Galuega, Felauaiga ma Atinae Eseeese, pe mafai ona fai ni auala faafasitepu foi nei e o ai i lalo e mafai ai ona fai ni fale, sei tulou o lou gutu ma le afi, fale ia e nonofo ai, mea o beach fales poo fale i lalo, ma maua ai nisi galuega a le Itumalo. Aua o le upu moni lava, afai foi e finagalo ai lau Afioga, tatou o tatou asiiasi i ai i lalo i le nofoaga i faga oneone ia e i lalo ifo o nuu o Salega, e ese le tele o tamaoiga o tagata tafafao maimoa mai o loo i ai.

Ona ou oo mai lea, ona o lea ua uma ona ou talanoa i le vai, ona o lenei Tala Faatatau o Tupe, ia o se taimi muamua foi ona toe oo atu lea i nisi manaoga o lou Itumalo, ae avea ia lenei taimi lau Afioga i le Fofoga Fetalai ou te talanoa atu ai i le Tala Faatatau o le Tupe. E muamua lava ona momoli atu lau faafetai i le Afioga i le Minisita o Tupe ma le Matagaluega sa gapatia foi ma le tapenaina o lenei faamoemoe. E le faigofie. E moni lava o le matou Komiti sa iloiloaina, ae sa molimauina le maea ona tapena le galuega. Ae i ai le vaega o le fautuaga sa ou vaavaai pea i ai, na ona tuutuu atu lava i tafatafa o lau Afioga i le Minisita.

O le tele o vaegatupe ia sa ou vaai i ai, e faatuputupulaia pea le tamaoiga lea e faasoa i galuega faatino e pei o auala ma fale. O lou popolega na o au lava ia le sui usufono, o le tuualalo, sei toe silasila totoa ane mo se isi taimi o muamua, ona e agai lou mafaufau i le faasoina tutusa o le tamaoiga. O lona uiga o lea faamatalaga, e le tóatele ni aufaipisinisi poo ni kamupani o lea e faasoa i ai le fia miliona o lea tamaoiga, ae silasila totoa i nisi vaega e ono mafai ona faasoa poo nisi auaunaga, ina ia ola lauusiusi le auaunaga a pisinisi tumaoti e faapea foi ma faalapopotoga.

O le isi vaega e avatu ai se tuualalo ma lou agaga maualalo i lau Afioga i le Minisita, o le tulaga lea i le faatuputupulaia pea o le tatou Tala Faatatau Autu o Tupe. I le maitau mai i le vaitau ua alu, pe toe savalia pe uia le toe tomanatuga, e afuafua mai lava mai le 1962 e tusa ma le \$1,046,000 pauni na amata ai le Tala Faatatau o le Tupe. Sa ou tilotilo ma le totoa i le tai sefulu tausaga, i le 1972, ua \$12miliona. O lona uiga o le \$1miliona pauni na i ai, masalo pei a faatele i le 4 aua e fuafua i le feliuaina o le \$1, ia pe \$4miliona Samoa na amata ai. Ona tupu mai lea i le sefulu tausaga, faasolosolo mai ai lava seia oo mai lava i le tausaga lenei. O le agaga tonu o lau faamatalaga, e agai lau faamatalaga i tua i le gafa, sei tulou lava. Fai mai na usu le mau a Samoa i Malo o le lalolagi ona fanau lea o le teine o Malotutoatasi. O le teine lena o Malo sa tupu mai i le 1962, e \$1miliona pauni lona mamafa. O le 1972, ua faaopopo le mamafa o le teine i le \$12miliona, o le 1982, ua \$36miliona, e oo mai i le 1992, ua \$153miliona ua lauusiusi ma olaola le tamaitai lenei o Malo. Ona mai lea i le 2002, ua \$251miliona le maualuga o le tupu a le tamaitai, ua lalelei tele. O le 2011, o lea ua oo i le \$430miliona. O le tausaga lenei, ua \$700miliona le tupu ma le mamafa o le tamaitai. Ia o se mea lelei, aua o i e fua i ai le tamaoiga o loo tupu. A o lau fautuaga, sei silasila totoa ane, ona e moni lava o le tele o Malo ia ua lalelei ma malosi, ae ua fai sina mamafa. O le taumafa foi lea e taumafa ai Malo o le taumafa le paleni, ona o loo feoloolo le aitalafu lea e faaoga e tausi ai le soifua o le tamaitai.

Lau Afioga i le Fofoga Fetalai, ona o tulaga na, o lea e foliga mai ua oo i le \$700miliona aitalafu e mafai lava ona togitogi aua o lea sa ou tilotilo i ai. A o le tuualalo, silasila totoa ifo i ai ona e manaomia pea le ola pea ma le lalelei o le teine, nei alu ai, alu ai, ona tei lea sei vaeano lou gutu ma le afi, ua faamama le toto o le teine. Faafetai foi, ona e le o saofai mai le Afioga ia Mulitalo sei tulou, o ia sa taulamua i le fale faamama toto, ae ou te talitonu, o le tuualalo, silasila pea i ai pe tatau ona faatuputupulaia pea mo le manuia, ae o loo lava pea le faasoa. E moni e utiuti lau faasoa i le Tala Faatatau o le Tupe, a o le maitau, o loo fuafua ma le totoa. A o le tuualalo lea ia fuafua mo le manuia le tatou sa ina ia faigofie ma silasila totoa foi i le faasoina tatau o le tamaoiga mo le manuia o le Atunuu. O isi totino taitasi o le Malo, o le a le oo lau faamatalaga i

ai, ona o lea lava ua faamalieina lou sui usufono i le utiuti o lau faasoa. Ou te talitonu lau Afioga i le Minisita, o oe ua e masani i le faasoa, ua e masani i le faa-Safune, e te tausi, ta te tausi, o lea ua tiu ai Samoa.

Lau Afioga i le Fofoga Fetalai, ou te masalo ua faauma mai ai ii se faamatalaga a le Itumalo o Salega. Lou Itumalo pele, ia o le a foi sau faafofogaaga i sau faamatalaga e molimoli atu ai e o ma sui usufono le agaga o le fia tapuai ina ia manuia le auunaga ma ofo moni le ola mo le Tautua ina ia manuia le Itumalo ma Samoa ae faasilisili ia maua se viiga o le Atua.

Ona faauma atu ai lea o sau faamatalaga, ona sa tatalo lou uso ia Tapuai Toese e faapea, i le faasoa lava a lau Afioga i le Minisita, na o le lima lava areto lea na faasoa ai ma i'a e lua, ou te talitonu o lena e ia te oe, ina ia uma lenei Paeaiga ua toe totoe ato e 12. Ia o le tauluga lea o lau lauga lau Afioga i le Fofoga Fetalai. E faamalulu atu i le Maota, e faamalulu atu foi i lena Itu i lau Afioga i le Palemia ma le nofo a Minisita ma lenei Itu. Afai foi ua se pe sisi le gagana, o aga lava faatamalii ma faafaleupolu e faapea. A o le upu moni, ia aua nei faia mo i tatou, a ia viia pea le Atua i lona faatasi mai. E faafetai atu foi i lou uso a sui usufono ia Tapuai i le tapuai mai, o loo faafogafoga mai pea lo ta Itumalo, ta te ave faatasi lava le fua ina ia maua se manuia e le gata o Salega, a o Samoa atoa. Ma lou faaloalo lava. Faafetai.

21 IUNI 2011

Afioga TIALAVEA FEA TIONISIO SEIGAFOLAVA (Vaa o Fonoti): Lau Afioga i le Fofoga Fetalai, o Samoa lava o le Atunuu ua uma ona tofi, o le ia iviivia e le mafai ona auuina e se tasi, aua e faigata paia ma mamalu Samoa ma ona tulaga faalupe. Ou te muai faatulou atu i lau Afioga i le Palemia ma lau Kapeneta, faatulou atu foi i lau Afioga i le Fofoga Fetalai o le Maota, afio le Taitai o le Itu Agai, afifio foi le paia faalupe o sui usufono o le Palemene o Samoa. E faatalofa atu foi i le Failautusi o le Fono Aoaio Faitulafono, Ofisa Sili o Pulega ma Pule Sili o Matagaluega ma Faalapotopotoga Tumaoti a le Malo. Ou te faatulou atu foi i le tapuaiga tatalo a Samoa aua le alofaiva o lau Palemene i o latou faiva alofiaao sei suffi upufai o Malo. Tulouna la le afio o Lana Afioga Mamalu O Le Ao o le Malo Samoa, Afioga Tuiatua Tupua Tamasese Efi ma lau Masiofo, afio lau Afioga i le Sui Usufono o le Fono a Sui Tofia ma lau Masiofo.

Afio lau Afioga i le Faamasino Sili, afio lau Afioga i le Peresetene o le Faamasinoga o Fanua ma Suafa ma alii ma tamaitai o le Faamasinoga ma le mamalu o le Ofisa o Faamasinoga.

E faatulou atu foi i le faafofogaaga tapuai a taitai o Ekalesia, o le au ositaulaga, o suli ma feoi o lo'o nōnōmanū aua se manuia mo le Atunuu. E faatulou i le paia o Tama ma Aiga, Aiga ma latou Tama, le Usoga a Tumua ma Pule, Itua ma Alataua, Aiga i le Tai ma le Vaa o Fonoti. E faapea foi le faafofoga mai a Tutuila ma Manua, aua le Susu o le Sua ma le Vaifanua, Fofu ma Aitulagi, Saole ma Saleaamua ma le Launiu na Saelua ma le Tama a le Manuatele. O paia na o Samoa e afua mai i le Taisamasama o le Tuimanua seia paia Fili ma Puletuu na tauilo ai Malo. E le faagaloina foi tama o le Itumalo.

O le asō lau Afioga i le Fofoga Fetalai, ou te fia faapai muamua i lou Itumalo ma lana tapuaiga. E momoli atu lau faafetai i la outou pule lea ua to mai i lou nei tagata faatauvaa, o lenei ua ou tiu faamatalaoa ai i faaloaloga i tupu o lo tatou Itumalo ma ou sapi ai foi i le faautautaga alualu mamao i Tootouli o le tatou Falelua o Fagalua ma Faleapuna.

Afio Ulualofaiga, Aiga e Lua ma le nofo a Usoalii, alaalatai lo outou Toafa i le Matua o Talamaivao, alaalatai e na Taitai ma Aumua ma Oloatua ma Atua-le-Fauono.

Liliu mai le vai o Sina, Afio Gafa ma le Alosina ma Suafa, lau Fetalai Moliio o le To'o o le Fua ma le Aiga Sa Moliio. O oe le Ailaoa ma le fofoga o Malepeai o le Aitu o le Nuu. O paia na o lou Itumalo.

E momoli atu le faafetai faapitoa i faafeagaiga tau i le lagi i fata faitaulaga eseese o loo nono manu aua se manuia o lo tatou Itumalo. Faafetai mo a outou talosaga ma faamanuiaga ia i matou uma sa tauva i le Faiga Palota ua maea ona faataunuuna ma le manuia ona o la outou talosaga.

E le faagaloina foi tama o le Itumalo o loo taoto mai i Tiasā o i latou sa asaina le gasū o le taeao e ala i le tofi o le Itumalo lenei ua tatou aeae ai nei. E momoli atu le faafetai faapitoa i lau Afioga Ulualofaiga Talamaivao i le tele o tausaga sa e tauaveina ai le tofi o le Itumalo, i le tele o tofiga sa e galue ai i le Kapeneta i ia tausaga ua mavae. Faafetai le lagolago mai i lau tapuaiga.

E le faagaloina foi le sa tauaveina le tofi o lenei Itumalo i le Paeaiga Lona XIV o le Palemene talu ai lau Afioga Leao Talalelei Tuitama. O le sa galue ma le faamaoni ma tele galuega a le Itumalo i lona foi taimi. Ou te talitonu o lenei Itumalo o le Vaa o Fonoti e tupuga mai ai tupu ma toa o le Atunuu. O le tasi lenei o

toa o lo matou Itumalo o le Afioga Leao vaeane le Afioga i le Minisita mo le Soifua Maloloina i lona suafa Tuitama. O lona ua e seei atu i Aana Alofi Nu. I ma avea ai lau Afioga ma Minisita mo le Soifua Maloloina ona o le toa o lau tofa.

E momoli atu le faafetai i ē sa lagolagoina Au i le Faiga Palota i o ma aiga ma lo matou aiga o uo ma e masani aemaise foi o le Komiti sa latou galulue i le ao ma le po aua se manuia o taumafaiga, aemaise o le mamalu ma le paia o le Itumalo sa latou lagolagoina lou nei tagata i le palota talu ai. O le paia ma le mamalu o lou Itumalo faafetai i la outou faaaloalo i lou nei sui usufono ma la outou pule lenei ua aeae ai nei lou sui usufono i le Maota. Ou te talitonu lau Afioga i le Fofoga Fetalai, o le taeao lenei sa saunoa ai se tasi o sui usufono e faapea, talu mai lava le foafoaga o Atamu ma Eva e le i faataina o latou auala galue. Ae faapea le manatu o le sui usufono mo le Vaa o Fonoti, talu mai lava le foafoaga o le lalolagi e le i filifilia e le Atua Atamu ma Eva, e le i faataina auala o Fagaloa aemaise lava le alu atu i Saletete seia paia Taelefaga, ma le alu atu i lenei taimi i Lona seia paia Uafato. Amuia Itumalo o loo i ai auala tetele o le Malo, o loo i ai foi ma auala galue. Amuia outou aua ua outou le lagona le mafatia ma le fita o loo i ai i lou Itumalo.

O le Anavatau a le HRPP, o mea e lelei i Apia nei e lelei foi lea i tua. O le tele lava o faamatalaga o loo feagai ma lou sui usufono pe a taumafai atu i le auala i le va o Uafato e faapea e tele se seleni e faaalu ai ae le o lava nisi o afioaga o loo alaala ma papa aao ai. Ou te tautino atu i lenei afiafi e sese lea mau, e toatele atu i latou o loo afifio ma papa aao i Uafato i lo nuu o loo lelei o latou auala. E moni e faigata ma fita ae o loo ou taumafai lava e lui le Minisita mo Galuega, Felauaiga ma Atinae Eeseese ina ia ma tietie i lea auala. O le auala lea a e tietie ma e agai i ai, a le pe lou fatu e te paū i le tofē aua e ae i mauga ma ifo i vanu. O nisi vaega o le auala pe 45 tikeri le va iti ao loo i ai nisi o le Atunuu o loo afifio ma papa aao ai e taunuu i ai lea auala e fitu kilomita le mamao. A faatusatusa atu faafetai i Itumalo ua fa o latou auala galue, e tutusa lava le fa lona o auala galue ma le mamao o le alu i Uafato e amata atu i Samamea. O Fagaloa e leai ni auala galue, e auala galue i le auala tele o le Malo e fai ai faatoaga, e galulue ai i tai i le sami.

Lau Afioga i le Minisita o Galuega e auala atu i lau Afioga i le Fofoga Fetalai, ou te talitonu e tuutuu atu i ou autafa le talosaga a lenei Itumalo, sei e alofa ane i auala. Poo a lava manaoga a o le manaoga sili lea o auala. E talitonu le agaga a mafai ona faatino e lau Afioga le auala o Fagaloa, e tele auala o loo faaigoa faa-papalagi e pei o Richardson road ae masalo a uma lea auala o le a faaigoa i le suafa o lau Afioga i le Minisita ona o oe sa e fauina i lou taimi o le auala o Fagaloa.

O le vai o lo matou Itumalo ou te talitonu o loo lava le suavai ma i ai lava paipa o alaalfaga latou te tauaveina ma faatino lea tulaga. O loo i totonu foi o le Anavatau a le HRPP se uafu o loo fuafua mo Fagaloa. Ou te talitonu o se tasi lea o galuega e sili ona taua i le Malo aua o le Bay o Fagaloa e toa, o le tele o taimi e le mafai ona asaina e se matagi ae seia vagana lava ua sau le matagi mai Matu ona afaina lea, ao itu uma e tolu o Sasae, Sisifo ma Saute e malupuipua vaa.

E faigofie foi ona fausia se uafu a o loo i ai lava le uafu i Salimu sa faaoga i ia aso i le lauina o pusa fa'i. O le a tuu atu pea i tafatafa o lau Afioga i le Minisita o Galuega, Felauaiga ma Atinae Eeseese poo le Pulega o Uafu.

Ona ou oo mai ai lea i lo matou nuu o Faleapuna, lau Afioga i le Minisita e leai foi se auala galue o lenei nuu. E i ai le auala sa fausia e le Matagaluega o le Suavai ona o Faleapuna o loo tu ai le pamuvai o loo taumamafa ai Lufilufi ma Falefa e talitonu foi ma Saoluafata. Sa faamoemoe e faata lea auala, ae na pau lava le mea na maua ina ua maea na o le tafe mai ai le vai ua toe omoomo ma leaga ai. E talosagaina lau Afioga sei tagai ane i le taligalu o lo matou nuu sa talosagaina i le Minisita mo Punaoa Faalenatura ma Siosiomaga e ala atu i le Afioga i le Nofoa le talosaga a lo matou nuu. Sa matou asia ma le Afioga i le Minisita talu ai ma le Pule a le UNDP le taligalu mo Faleapuna ona ua tele le faaleagaina e le galu, ou te talitonu o le matafaioi lea a le Matagaluega o Punaoa Faalenatura ma Siosiomaga i taligalu o nuu. E i ai le taligalu o loo faatino e lo matou lava nuu i lenei taimi i le sau mai le pitonuu o Matautu, ae talosagaina lau Afioga a taunuu atu lea taligalu ona sosoo atu lea ma le taligalu o loo galulue ai lava lo matou nuu ma matou faatupeina e auala i se kamupani o loo matou faaogaina e ave le oneone o le matafaga ae fai e latou le taligalu mo lo matou nuu. E tele foi le pitolaau a lo matou nuu o loo fesoasoani mai ai i le utiuti o le faasoa a le Malo.

Lau Afioga i le Minisita mo Aoga, Taaloga ma Aganuu, faafetai mo le polokalame aemaise o le Aoga o Matata Eeseese i Fagaloa. Faafetai mo galuega lelei aemaise o le Ofisa Sili o le Pulega ma le Matagaluega

o Aoga, Taaloga ma Aganuu sa latou faatinoina lea galuega. Ae maimau le faleaoga, ua muamua i le faleaoga ae i ai le mea ua misi. Poo le a le lelei ma matagofie o le faleaoga ae a le lelei le aualatele e mumusu tamaiti e usu mai i le aoga. O le a tuu atu i ou tafatafa afai lava e oo ane se tofa a lau Afioga i le Minisita ma le Matagaluega, e talosagaina lava le toe amatalia o lea aoga ona o lena ua alu atu le valita oo i Lona, e aoga lea faleaoga mo matou i tua.

Lau Afioga i le Minisita mo Tagata Asiasi Maimoa Mai Fafo, a lelei le auala lea e ui atu i luga o le afu i Falefa seia oo atu i Uafato ma alu atu ai seia toe ui mai i Tiavea, o le tasi lenei o mataaga ma auala e sili ona fiafia Turisi e ui ai. E le gata i le maualuga, e alu i lalo o laau lauusi, lanumeamata o Samoa ae maimoa foi i le gataifale i le lanumoana matagofie ma le manino o le sami. E tele foi vaega o le sami e mafai ona faaogaina e i latou e fiafia e mauu poo le diving. E tele foi tupe e maua mai ai a le Atunuu. E lelei foi lo matou Itumalo i le taina o galuega taulima. O le tele o meataulima o loo faatauina nei e aumai Fagaloa ma e molimauina foi pe afai e asiasi atu i le tamai Faletalimalo o le olomatua sa mamau e ni alo mai Fagaloa ona pou.

Lau Afioga i le Minisita mo Faatoaga ma Faigafaiva & Faleoloa o Faatoaga, ou te talitonu o lau Afioga o se tasi o Tama matua i totonu o le Maota. Atonu foi e te talia se fesoasoani atu i le tele o faamanuiaga ma galuega faatino o loo faaoga e le Matagaluega o Faatoaga e manaomia mo le matou Itumalo. E fai sina mamau ese o le matou Itumalo mai le tele o nuu aemaise ai lava Fagaloa. E talosagaina lau Afioga pe mafai ona avatu nisi galuega faatino e pei o le totoina o laau aina ma isi lava fuafuaga a le Matagaluega o Faatoaga e faataunuu i le matou Itumalo. O le Itumalo lenei o loo numera tasi i le 'Ava, ae o atu tagata o isi Itumalo e galueaina le ava e le mafai, leaga e maugā le matou Itumalo, e faigata. Ae ui i lea faigata ma fita, a outou malaga atu e lauusi i luga o mauga le lanumeamata o lau o ava i le ola lauusi. Poo a lava ava e faatau i faleoloa, poo le ava foi mai Salega, e muamua lava taulia le ava a Fagaloa, leaga a palu e iila ma paepae pei o se suasusu ma e lelei foi i le taumafa.

Lau Afioga i le Minisita mo Faatoaga ma Faigafaiva & Faleoloa o Faatoaga lena ua tuu atu le talosaga i luma o lau Afioga pe mafai ona e tagai ane mo le fesoasoani i le matou Itumalo. E talitonu foi le mafaufulou, o le a lava le mamau ma le fita o auala, ae a nofoia e tagata o le tatou Atunuu, o le matafaioi a le Malo o le fai atu auala. E uma lava le Paeai lenei e lima tausaga, ao le anavatau lea a lou sui usufono o le auala ae tuu atu pea i le Malo e faasoasoina. E faigata foi o le Afioga i le Minisita o Tupe o loo matou lagolago i ai ae faamoemoe ina ia mafai ona faataunuuina lenei faamoemoe.

O le Pulega o le Suavai, faafetai mo le faamama-aveaga laitiiti i le matou nuu o Faleapuna. E le tuuina foi lau Afioga i le Pule Sili i le suavai o loo faaoga e lo matou nuu ma le faigata sa i ai, i le lē fiafia e totogi pili. E talitonu le agaga ua amata nei ona foia lea faafitauli, ona o le amataga o le pamu vai, sa faapea lava matou na o le matou nuu ae uma ane ua faasoatu i nuu tuaoi toe avatu ma tane vai tuu i le pamu i Faleapuna ae tuu le isi tane vai i Lufilufi ma ua fuā ai loto o toeiina matutua o le matou nuu. Sa tatau lava ona faatutu uma tane i le matou nuu ae talitonu e le afaina o Lufilufi lava o Faleapuna lea. O le mea taua o le maua o le suavai, e fai le eletise e mafai ona e moe e leai se eletise ao le suavai e tatau ona maua i aso uma.

Ona ou oo mai lea i le Malosiaga Faa Eletise. O le nuu o matou o Taelefaga ua tele le faaletonu o le gataifale ua i ai ona o le vai o loo tafe mai luga i Afulilo e fai ai le eletise o loo mumu ai le tatou Atunuu. O galuega lelei ma le tamaoiga o le Atunuu, ae pau le talosaga i lau Afioga i le Minisita mo Galuega, Felauaiga ma Atinae Eese e auala atu i le Malosiaga Faa Eletise sei tagai ane ua uliuli atoa le gataifale o le alaalfaga lea i le suavai le mama o loo tafe mai i ai.

Sa fesiligia le Ofisa o le Malosiaga Faa Eletise mo se faamatalaga ae tali mai, sa i ai se kamupani faapitoa mai fafo na o mai e sailiili le mafuaga ua faapea ai le gataifale. O le latou lipoti e faapea, ona o le galueaina o le ava i auvae mauga aemaise lo'ilo'i o lo'o i ai meaituaolo, tulou, o le mafuaga lea o le faaleagaina o le gataifale.

Na tutupu mai lo matou Itumalo i le fia o tausaga ua mavae o le galuega lea e fai o le toto o le ava, fai le loiloi i tuafale o aiga, e lei aafia faapea le gataifale. O lou la sui usufono, ou te le talitonu i lea mau, ou te fiu foi e fesili i toeiina e leai ma se isi e talitonu i le mau lea ona sa tutupu, soifua ma ola mai i le Itumalo ma le nuu lea e lei faapea ona faaleagaina lo matou gataifale. E talitonu foi le agaga sa faamoemoe le polokalame lea e tai sao se paipa i le moana i Utulua e latalata i le moana sausu e vave ona oo i ai le suavai

lea ma avatu ai i le moana sausau ae le aafia ai le gataifale, ao le utiuti o le seleni lea ua ala ai ona le faataunuina lea faamoemoe.

Lau Afioga i le Fofoga Fetalai ou te talitonu ua uma atu manaoga o le matou Itumalo. E lei faamoemoe foi e fai se lauga i lenei po, ae talitonu le agaga o le a lava le motugaafa i lenei afiafi ua mafai ona faaleo atu, o le manaoga lena o le matou Itumalo.

Ia manuia tele lau Afioga i le Fofoga Fetalai, maua sou finagalo aua le faatautaiga o le Maota. Manuia lau Nofoaiga ma ia toa lou loto. Lau Afioga i le Palemia, ia mau le toovae ma ia lototele e tautai, taofi pea le Sa o Samoa nei satia i matagi vale. Ia manuia le Kapeneta ma le latou galuega fita, e le faigofie le tau faavasegaina o le tamaoiga ma ia outou alofagia talosaga a lenei Itumalo. Le mamalu o sui usufono uma o le Palemene, o outou māmā na, ia sagai ane ai o le Tai, ia faafulu la outou tofa saili ma le tofa fetalai ma ia maumau ligo o le Sa o Samoa. O au faiga filifiliga ma au faiga faaiuga e ala i le faauigaina ma le tuufaatasiga o Tulafono, o le tatalo ia femolimaua'i Samoa ma ola i lou alofa. Ia manuia le tatou Paeaiga, manuia le Palemene. Soifua.

21 IUNI 2011

Tofa AGAFILI PATISELA ETEUATI TOLOVAA (Palauli Sisifo): Faafetai mo le avanoa ua tuuina mai e lau Afioga i le Fofoga Fetalai.

O Paia o Tiafau ua taoto ao se I'a mai moana. Fai mai le tala a Toeaiina e leai lava se isi e ta Ti'a i Tiafau e pisapisao lana taalo. Fai mai o le malae o le faautugatagi e i ai ona tapu a fanua ae le o ona ilamutu. Ona faapea lea, o le a taoto Paia o Tiafau.

Ou te muai faatalofa atu ma faatulou atu i le faafogafoga tapuai mai a Lana Afioga Mamalu, O le Ao o le Malo o Samoa ma Lau Masiofo. Ou te faatulou foi ma faatalofa atu i le faafogafoga tapuai mai a le Sui o le Fono a Sui Tofia. Ou te faatulou ma faatalofa atu i le faafogafoga a lau Afioga i le Faamasino Sili, le Vasega o Faamasinoga ma le Matagaluega o Faamasinoga. Faatulou atu foi i lau Afioga i le Palemia ma le Kapeneta. Ou te faatulou atu foi i lau Afioga i le Fofoga Fetalai. Fai mai a fonu a le Malae Fono i Tiafau, o oe lava le Taitaifono Sili. Faatulou atu foi i lau Afioga i le Taitai o le Itu Agai faapea le Sui Taitai o le Itu Agai aemaise le mamalu ma le paia o sasao nei. O sui usufono ua filifilia e Itumalo taitoatasi aua le Palemene o Samoa. Ou te faatalofa atu foi i Ofisa Sili o Pulega o Matagaluega a le Malo ma Faalapotopotoga Tumaoti o loo faa-aogagase i lea fonotaga ma lea fonotaga aua le tautuaina ma le fautauina o le Malo.

Le faafogafoga tapuai mai a Samoa, le paia i Aiga ma latou Tama, o Tama ma Aiga, le Usoga a Pule ma Tumua, Ituau ma Alataua, Aiga i le Tai ma le Vaa o Fonoti. O le tuualalo a le faifeau ia te au na fai mai; "A e lauga, o le galuega ma le feau o le Talelelei e le tau faafetaia, a o paia o le Atua e le faalupeina leaga o paia e ao i ai paia. O paia nai le lagi na afio ifo i le lalolagi e ala ia Iesu Keriso ua toe iu ai i le lagi. Ai o le mafuaaga lea ua fai mai ai le Tusi; "Ua tala mai le lagi le mamalu o Ieova a ua faaalua e le vanimonimo galuega a ona aao". A o upu tuu taliga ua tatou masani ai ua lolo lava i le tatou faa-Samoa, o le matau i le Atua ma Lona finagalo. O paia o le Talelelei lea ua ou tautala atu ai, nuunuu atu la paia o le Talelelei i Auauna a le Atua.

E le mafai ona ou le faafetai i le paia o le Peresetene o le Ekalesia Metotisi ma le tapuaiga a le Peresetene Sili o le Au Uso, le nonofo a Sea, le saofaiga ma le paia o le Au faigaluega. E ui lava ina ua ufitia le Ekalesia i le ao pogisa ona o le valaau paia i se tasi o Alii Sea ae leai se mea tatou te faanoanoa ai. O le finagalo o le Atua o le ti'a e le seua ma le mua e le fuatia, e fai lava le finagalo o le Atua aua o Ia na te foai mai, o Ia foi na te aveese.

Ou te faatulou atu foi i le Faigamalo i le Motu o Sasae i nai o tatou uso o Tutuila ma Manua, afio lau Afioga i le Kovana ma Lutena Kovana, lau Afioga i le Fofoga Fetalai ma le Peresetene o Maota e lua. O le paia lava lea ia Sua ma Vaifanua, Fofu ma Aitulagi ma Faleagafulu, Tama a le Manuatele ma Tootoo o le Faleula ma le Launiu na Saelua.

Lou Itumalo o Palauli Sisifo ua e masani i itu aso faapenei, ou te le tau faamasuaina le paia o le Itumalo aua e le o se Itumalo tali ola. Ae tau lava ina sau i le vao, ina nei i ai sou finagalo ua ou manatu faatauvaa atu i le paia o le Itumalo. A ou amata mai i le Faga i Sasae i le afio o Aiga Salevalasi, Afio le Maopu, lau Tautalaga Faiumu ma paia ia te oe Salemuliaga.

A ou liliu ane i le Faga i Sisifo, i le afifio o Tapaau ma le Nofo a Ituaiga o Gagaemalae. O lou nuu o Salailua mai Samalela seia paia siusiu, o paia o le Aiga, alaalatai oulua Tuato ma Tuitolovaa o Aitu Tagata ma le paia ia Salemuliga.

O le paia o le Afaigaluega a le Atua o loo tala faauto i lo tatou Itumalo aua le tauasuian o le ipuvai o le ola aua se manuia o lo tatou Itumalo i le tino, mafaufau ae sili i o latou agaga.

E faatalofa atu i lau Susuga i le Toeaina Faatonu, lau Susuga Tavita Roma ma lou faletua ma le mamalu o le Afaigaluega o loo galulue ma nopiai i le Itumalo o Palauli Sisifo. O paia ma mamalu na o Samoa aoao mai le mea e oso ane ai le la e oo i le mea e goto ai. O paia na o le Talelei lea ua tatou sapi ai. O paia na lou Itumalo e, o tupu o le Itu ma Tootoo o Vailoa. O le faafetai faatauvaa a le sui usufono ua outou tusi aao i ai. E le mafai i se upu a le sui usufono ona faafetaia pe faaleo atu i lou agaga faafetai i lau pule lea ua ou nofoia ai le Nofoa mo Palauli Sisifo, ae a lau Tiumasalasalala lea ua ou ula ai i faaalagamaea a le Atunuu. Faafetai i lau pule lea, e leai lava se poto i lo outou sui usufono ua outou filifilia. E leai foi se atamai, e leai se malosi, e leai se agavaa e tauave ai le mamalu ma le paia o le Itumalo. A la outou faaea lea ia te au e faalagolago ai i le galuega a le Atua ma le faamalosiua a le Agaga Paia e maua ai sou malosi ma sou poto aua Upufai o Samoa.

Ou te manatu e le faigofie le Palota ua tuana'i atu, ae faafetai i la outou pule ona ua loa tausaga e lei nofoia e se sui usufono mo Palauli Sisifo le Nofoa o le Itumalo i le Faigamalo a le HRPP. Ua tausaga ma ua tele foi Paeaiga, e lei faigofie, ae faafetai i sui sa matou tauva i le taaalo faatamalii. Ou te talitonu o le tasi lenei o Nofoa na sese ai le mate a le Tautua, o le Nofoa lenei na 99.9% na mautinoa e le Tautua e malo ai, ae ou te talitonu lou Itumalo e, o le suega o Malo e fai i le loto maualalo. E amata mai i lalo le suega o Malo. Sa ou taumafai i le faamoemoe ae sa tuu le faatuatua i le Atua.

O le saunoaga masani a le Afioga i le Palemia, o le tofiga e tofofi mai e le Atua ma sa lagona ai lava e ou tino o lou taimi lenei. Faafetai i le pule a le Atua ua maua se avanoa ou te nofoia ai le Nofoa o le Itumalo mo Palauli Sisifo i totonu o le Palemene o Samoa.

Lau Afioga i le Fofoga Fetalai, ae ou te le i talanoa atu i le Tulafono Tau Faaofi o le Faatatauina o Tupe Faaopopo (Nu. 2) 2010/2011 ma le Tulafono Tau Faaofi o le Faatatauina o Tupe 2011/2012, ou te fia momoli atu ni manaoga o lenei Itumalo. E pei o tala masani e i ai lava le matua o le lauga. O le matua o lau lauga mo nei ma a taeao; "Tepa i tua ma le loto faafetai, vaai i luma ma le loto faatuatua". Ao le i avatua ni manaoga o lenei Itumalo, ou te tatalo atu i lou Itumalo ua ou iloa ua outou tuuaia au ma ua outou soifua faatusatusa, afai o lea e sao outou. A lea ua ou fai atu o ananafi lena, ao lea ua aumai lo outou faamoemoe nei, aua le faatusatusaina Palauli Sisifo ia Palauli le Falefa. E moni a outou ua soo moli o Palauli le Falefa ua oo lava i mea e le tataua ona oo i ai ni moli ua oo i ai. Ua maea ona valita auala galue o Palauli le Falefa ma ua oo foi taligalu i mea e le o nonofo ai ni tagata soifua o Palauli le Falefa. O lea ua ou fai atu o ananafi lena, tepa i tua ma le loto faafetai, tagai i luma ma le loto faatuatua o lea ua ou tulai mai.

Faafetai lau Afioga i le Fofoga Fetalai. O lea ua e mua'i sii le Viiga ma le Faafetai i le Atua, ua e molimoli foi Laau i Fogaa aua le sulaina o le agalelei ma le alofa o lo tatou Tama i le lagi. Ou te talitonu o le agaga foi lea o le Palemene i lenei taeao, aua e le mafai ona faaitiitia le Viiga ma le Faafetai i le Atua ma o lea ua fai ai lau Afioga i le Fofoga Fetalai ma o tatou sui. Tatou noanoa i i'umaea ma ia o'oo'o lava i nifo o le Fata Faitaulaga le Taulaga siitia i lenei taeao.

Ou te toe faatalofa atu i le Fonotaga mamalu a le Palemene i lenei taeao. E faatalofa atu foi i le faafogafoga tapuai mai a Lana Afioga Mamalu, O Le Ao o le Malo ma le Masiofo, Sui o le Fono a Sui Tofia ma le Masiofo, tainane le lasilasi ma le loaloa o le faafogaga a Samoa. E faatalofa atu foi i lou Itumalo. Ia tapuai mai sei faaauu le lauga a Palauli Sisifo.

Lau Afioga i le Fofoga Fetalai, o Oe e te tautusi Tulafono Tumau e faapea foi ona e lagolago atu i ai. E maea lau tautalaga anapo, ua toe 25 ou minute, ma o lea foi o le a ou sausu lava i lea taimi e le sili atu.

Lou Itumalo, e maea se vaivaiga anapo o ou talanoa atu i le soifuaga faatusatusa, lea na ou tatalo atu ai e taoto lea itu, aua o le tagata lava ma ana galuega. Sa ou tatalo atu foi, o le faatoa nofoia lava lea e Palauli Sisifo le Itu a le Malo, pe a faatusatusa galuega a le tasi Itumalo i le isi Itumalo. A'o le a tuli ia i luma so ta 'Ai. Ou te tatalo atu foi lou Itumalo e, ia 'aua 'aua lava ona tatou fesiligia le faaso'a a le Malo, aua e le vale tuulima le faaso'a a le Malo i lea Itumalo ma lea Itumalo. Silasila foi lo tatou Itumalo, e muliaina lava filifili nisi tofi o le Malo o Samoa, Palemia, Sui Palemia, Fofoga Fetalai ma le Sui Fofoga Fetalai, Sui o le

Kapeneta, a o le tofi e muamua filifili e le Itu Faaupufai lenei, o le Faifeau, o le Failotu, lea ua tofia i ai lo outou sui usufono. E a lea faaea? O lea foi ua faaea le Malo ua tofia au e avea ma Sui Fofoga Fetalai. Lou Itumalo e, aua e te fesiligia le faaso a le Malo. Ou te talitonu foi, e leai lava sou manao Palauli Sisifo ou te faaleoina e le faia, e fai uma lava manaoga, leaga fai mai, “A i ai lava se aiga na e le talia Oe, ia o i le Failotu, tutu i ai ou vae. O ai la se le fefe pe a tagi le leona? O ai foi se Minisita e le matau pe a tutu vae o le Failotu? E talitonu lava e fai uma lava o tatou manaoga.

Ua ou fia oo muamua atu lava i le Matagaluega o Faamasinoga ma Pulega tau Faamasinoga, aemaise ai lava le Faamasinoga o Fanua ma Suafa, ona o le manaoga tuga o lo matou Itumalo e tatau ona ou faaleo atu. Ua taatia Faiga Faavae a le Faamasinoga o Fanua ma Suafa, o Tagi ma Tetee e faasalalau i le Savali, e le fausia foi se faaiuga a se Faamasinoga i se mea fou po o se mea e le'i faasalalauina, po o se itu e le'i auai i se Faamasinoga. Sa i ai le Faamasinoga a lenei itu o Palauli, ua maea le Faamasinoga ua uma foi ona lau le faaiuga, o le iuga o le Faamasinoga, o le a taatia se'i fua le fanua o le Malo.

Lau Afioga i le Fofoga Fetalai, e le'i auai se Itu a le Malo. A o lea ua ou talatala atu, o faiga faavae ia e faavae ai le faatinoina o Faamasinoga o Fanua ma Suafa. Afai na silafia e Alii o le Faamasinoga ua taunuu atu se tusi a le Malo, o le a le mea na le tolo ai? Silasila foi lau Afioga i le Fofoga Fetalai ma le Mamalu o le Palemene, e ese le taugata, aua e fai o nuu, o pasese, o le tausiga, e toe malaga foi i le aso e lau ai le iuga, ae sau le iuga, taatia se'i fua muamua le fanua o le Malo.

Na ona ou faalatalata atu i le Afioga i le Minisita ma le Matagaluega aemaise lava le Faamasinoga o Fanua ma Suafa, ona e le faigofie i nuu mataupu faapenei. O lea la ua sosoo atu ai ona e i ai le sootaga o le mataupu lenei ma Faalapotopotoga o Eleele o Samoa. E pei lava ona ou talatalanoa atu, o se mataupu e tuga i lou Itumalo. O le 1891 e oo i le 1894 lea sa fai ai le Komisi Suesue i fanua o le Atunuu ua ave e le Malo. O le luga a le Komisi Suesue, toe faafoi uma lava fanua o nuu na ave e le Malo, se'i vagana ai fanua ua faamaonia na faafesui ai o loia po o ni tau. A la lea e i ai le fanua lea e 500 ma ona tupu eka i Lata? O le faamaoniga o lea tulaga, ua uma ona fua le fanua, o la foi e i ai pine o lona tuaoi. A o le 11,000 eka lea e finau ai, e leai ni pine, e le'i fuaina. O le faafanua lea e tau mai i le taimi lenei, o le faafanua na fua mai luga i le vanimonimo ae le o se satélite, o se vaalele, ae leai ni pine o le fanua lea.

Ou te tatalo atu ma le agaga faaaloalo, ou te tatalo atu foi ma le agaga mauualalo, lau Afioga i le Minisita o Eleele o Samoa po o lau Afioga i le Palemia, e le'i lava i ai le 500 ma ona tupu eka lea e ave e le Malo, ae faamatuu mai le 11,000 ma ona tupu eka lea pe sili atu, e tusa i ai lenei Itumalo?

O le Minisita mo Galuega, Felauaiga ma Atinae Eeseese, ou te faafetai atu e avea ai au ma sui o lo matou Itumalo. O lea ua uma ona vali ta le auala i Foailuga, faafetai tele lava, faafetai mo lea galuega. Ou te faafetai atu foi ua uma ona fuaina survey le auala galue o Satuiatua, faapea Foailalo ma le aualatele o Siutu. O lea ua i ou aao lau talosaga ma le auala lea i Siutu, ona o le auala lea e le o se auala galue o le aualatele, ona ua see le maota o le Faafeagaiga EFKS i uta, e le gata i le pefu, e omoomo toe vaiti. Ae ou te tatalo atu ma lou agaga faaaloalo, sei e silasila i lea itu. O auala galue foi, o lo o i ai le fua faatapulaa e 2,000 mita pe 2 kilomita. Ou te talitonu e uma le 2 kilomita e le'i taitai ona oo i le mea o lo o i ai faatoaga a le tele o afioaga o lou Itumalo, ae ou te talitonu o talosaga na e ono fai mulimuli, ae faafetai ua i ai se vaega ua faatino i lenei Itumalo.

Lau Afioga i le Minisita e tauala atu i le Fofoga Fetalai, ia ou te fia talanoa lava i laisene o pasi ia e o o le vaa. Ou te manatu foi e lagolagoina sau faamatalaga e sui usufono mai Savaii po o Salafai. O le tele o taimi e taunuu mai ai le vaa, e le taitai ona lava pasi e felauai ai le mamalu feoai i le vaa. O le pasese o le vaa e ono oo i le 700, faamau ane i lau peni le Aso Gafua o le Eseta, lua pasi ae sili i le 700 le pasese. O le isi vaiaso i le Aso Lua o le isi vaiaso na ou sau ai e lua pasi, e sili i le 600 le pasese. Faafetai i se tasi o ave pasi na i ai lona finagalo na te faaogaina pasi o fale pasi e latalata ane, na avatu ai pasi e ono i le Aso Gafua lea o le Eseta na feaveai ai le Atunuu. E oo foi i le Aso Sa lea na tea nei i le malaga mulimuli o le vaa o le 2:00 mai Savaii, e sili i le 500 ma ona tupu le pasese, ae na o le fa pasi. Ou te talitonu lava o laisene ou te talosagaina mo le auaunaga lautele i le Atunuu.

O tagata o lo matou Itumalo ia e malaga mai Savaii, e leai lava se isi e sau ma se tupe tele e faamoemoe e pasese mai ai i se taxi mai Mulifanua i Apia nei. E tatalo atu i lau Afioga i le Minisita, sei silasila ane i lea tulaga. E tatalo atu foi, sei silasila ane ia i ai se pasi o le vaa moe mai Salafai i le vaa o le 4:00, aua o le mea mautinoa e leai se pasi, a faapefea le Atunuu o lo o femalagaai mai Salafai ae na o le \$3.00 o lo o totoe mai

le taga e pasese ai i le pasi ae leai se pasi. E faapea uma lava le auaunaga o lo o fai i le Malae Vaalele i le pasi o lo o faatalia pasese mai fafo, pe tasi lava le tagata e malaga mai fafo e alu i se faletalimalo e alu lava le pasi leaga o le auaunaga ua uma ona tuu aloaia atu i ai le laisene. Faamolemole lau Afioga i le Minisita e tau ala atu i le Fofoga Fetalai, sei silasila ane i lea tulaga leaga tatou te au i le tau ola au i le fagota. A silasila i le faafitauli o lo o tupu i luga o vaa pe a latalata mai le vaa i Mulifanua, ua le ofi ala e omai ai tagata i lalo aisea? E leaga o lo o finau mai ai poo ai e maua lona avanoa i luga o pasi ma o le mafuaaga lea ua ou tatalo atu ai.

O le Pulega o le Suavai, faafetai tele i lau Afioga i le Minisita faapea le Ofisa Sili o le Pulega ma le Matagaluega e tau ala atu i le Fofoga Fetalai, ua maea ona faafouina ma faaatoatoa le vai o lou nuu o Taga, Ua i ai tane ma o se suavaii aupito sili ona lelei ae i ai lava nai faafitauli laiti ona e le o alu lelei le suavai i lalo o le nuu tele, ae tatalo atu ina ia toe silasila ane i ai.

O le vai o Salailua o loo i lalo o le vaega o vai tumaoti, ao lea vaega o se tasi o le Malo, o lona uiga o loo i lalo lava o le Malo, faafetai mo lea vaega. Ua maea ona foi mai le Inisinia Peretania ua uma ona fai le suesuega muamua, o le vaiaso na tea nei na taunuu atu ai le Inisinia mai Niu Sila ona sa fia o le Inisinia i uta i le mea e tau o Papafu faapea o lo o maua mai le Satelite e lua ni vai tafe tetele o loo taotoo ai i gauta o lo matou nuu, ae paga lea e le o mafai ona oo i ai le inisinia ona o le mamao tele, e le o se nofoaga latalata mai.

O le suavai o Gagaemalae ua silafia e lau Afioga e pei lava o le suavai o loo maua i isi aiga ma isi nuu o lo matou faaitu o Salega, e ese le mai o le vai atonu o le tasi lea mafuaaga e faaleaga gofie ai meafaigaluega a le falemai ona o le mai o le vai. O lo o ou mautinoa e i ai vaipuna i gatai o Satuiatua ma gatai o le vaega sa i ai le falemai tuai i Foalalo poo Foaluga. A faapea o i ai nei vai atonu o i ai ni metotia faaonaponei e mafai ai ona pau atu lea vai pe a pe le tai i ni tane e fai i luga. A faaoga ni pamu e alu i le la e le alu ai le eletise. Ua na o se tuu alalo atu i lau Afioga e ala atu i le Fofoga Fetalai, silasila ane i ai.

O le Faalapotopotoga o le Malosiaga Faa-Eletise...

O le tasi leni itu e ese le pologa ai o Savaii, ua faamalositia le cash power ae tasi lava le nofoaga e faatau ai ua na o Salelologa. A faapea e te sau e faatau lau cash power i Salelologa, e \$5 e te sau ai mai Pauali Sisifo toe \$5 le alu atu ae na o le \$5 lau cash power. Ua taugata atu lou pasese i lau cash power. O lea ua i ai pepa valuvalu e sao lelei ae ese le taugata ma faigata lona faatinoina. A maua le \$20 e faatau ai lau pepa valuvalu ae leai sau telefoni pe leai foi sau credit e le mafai ona fai. Ou te tatalo atu i lau Afioga i le Minisita pe leai lava se isi auala faigofie e mafai ona fai ai. E tele le poto faaonapo nei e mafai ona fai ai, a silasila foi i pepa valuvalu o telefoni, na ona valuvalu lava o le pepa ma tuu i totonu ona uma lea ma ola le moli ae tasi lava le nofoaga e faatau ai ae taugata atu lou pasese i lo le cash power lea e te sau e faatau.

Ona ua utiuti lou taimi lau Afioga i le Minisita mo Leoleo, Falepuipui ma Tinei Mu e ala atu i lau Afioga i le Fofoga Fetalai, faafetai o lau pule lea ona o lea o le a toe foi atu lava le Pou a Leoleo i Salailua i le nofoaga sa i ai le pou a Leoleo, faafetai tele lava i lau faaaloalo. E leaga o le pou lea sa i Salailua o le pou lava lea na i ai i le amataga ae faafetai ua e tali mai i lau talosaga e toe faafoi atu le Pou a Salailua ma faatumau ai pea i totonu o Palauli Sisifo. E tatalo atu lau Afioga ona o lea ua i ai le finagalo o le Malo ina ia faasafua atu i nuu i tua le auaunaga lautele e pei o le auaunaga mo faalavelave e tutupu faafuasei. E lelei lava le i ai faatasi i le nofoaga e tasi ao ia nofoaga a le Malo.

Lau Afioga i le Minisita mo Punaoa Faalenatura ma Siosiomaga ma le Matagaluega, o lena ua e silafia lau talosaga ua i ou aao. O le taligalu o Siutu e oo i Satuiatua aua o leni taligalu e le o se talosaga fou. Na faaleoina leni talosaga i le taligalu i le 1985 i le taimi ao nofoia e le Susuga Mulipola Fiatau le Nofoa o leni Itumalo, ai ona o le vai taitai sa tele ai feeseeseaiga o le Malo ua galo ai. O lea la ua toe faamanatu atu ma ua i ai foi asiasiga, ou te talitonu a le vave faia i ai se gaoioiga e uma atu le lima tausaga ua tafea uma le pito i tai o le auala aua e le toe i ai se mea e faia i le siitia o le tau.

Sa ou talanoa faatasi i Aoaoga ma le Soifua Maloloina aua talu mai lava ona ou iloa Fono ma le Tala o Tupe, o le faamuamua lava o Aoga ma le Soifua Maloloina. E leai lava se naunauga i isi Matagaluega ae ave lava le faamuamua i Tupe mo le Soifua Maloloina ma Aoaoga. E leai se tala tele e toe fai atu i le auaunaga faa-Soifua Maloloina leaga e le talafeagai ia te au ona ua ua ou iloa e le o fou le pule o le auaunaga o le Soifua Maloloina, se i mataitu poo le a foi se tulai mai o lea tamalii o le Atunuu.

O aoaoga o le faafitauli lava lea o le le lava o faiaoga, na le lava mai lava i le 30 tausaga talu ai e oo mai nei lava e le o lava faiaoga. Faafetai ua ou vaai i le Lipoti a le Komiti o lo o i ai le talosaga ina ia toe iloilo le totogi o faiaoga. E le o se mea faigofie, ae na fesili mai tagata ia te au. “Ao le a le mea na e alu ese ai oe ma le faiaoga?”

E tasi lava lau tali, e le lava lou totogi, o le mea lena na ala ai ona ou alu ese. Ae fai mai, “ae faapefea le mea lea o lou fiafia ua lelei au pasi ma au vasega ma isi mea e iloa ai oe, ua ou fai atu, o mea na e fai i fafo. Aua o faiaoga i fafo e leai ni a latou peleti, e leai ni o latou oti, e leai ni o latou faaulufalega ma le tele ma anoanoai o mea e fai. O Samoa e maua loa lava lou tusipasi faiaoga, o oe la o le faletupe o le aiga, na ona ou faapena atu.

O le Tulafono Tau Faaofi o le Faatatauina o Tupe Faaopopo (Nu. 2) 2010/2011 ma le Tulafono Tau Faaofi o le Faatatauina o Tupe 2011/2012 o le a faaiu atu ai lau tautalaga, faafetai i le Tala o le Tupe. E tele manao e foliga mai ua tele le fia tagata ae ua tuai mai mea a papalagi. Ona pau lava lau tilotilo i le Tulafono Tau Faaofi o le Faatatauina o Tupe 2011/2012 o lauga e fai mai e fiafia i le Tulafono Tau Faaofi ona ua faaitiitia aitalafu. A faaitiitia aitalafu ao le a le mea o le a faatino ai galuega? O lou lava manatu ia matua nono mai tupe, a faapea e le mananao ai isi Itumalo ae nono mai tupe e fai ai galuega a lou Itumalo. Silasila foi, o Amerika, Niu Sila, Ausetalia e oo i Iapani o le matua tele o aitalafu. Ia nono mai tupe meamanu o maua le avanoa i pasene pau aua o tupe e maua i le taimi e tasi, fai mai le tamaloa miliona o Niu Sila o Bob Jones a le loan le tagata e le milionea. O lana lena filosofia.

O le a seu i fanua le Sa o Palauli Sisifo o lea ua faalava le Amoa i lou fofoga lau Afioga i le Fofoga Fetalai, e le toe tele foi se faamatalaga. A i ai se lafoga a Palauli Sisifo ua le tau tamalii i le Palemene nei ma le faafofoga a Samoa, lafo i nuu le aina.

Lou Itumalo, tapuai maia sei ou taumafai poo le a se ai o le Itumalo e maua i le sui usufono ua outou tusi aao i ai. O le Isaraelu moni lava, a galo a oe ia te Au ia pipii lava lou laulaufaiva. Le paia o Aiga Salevalasi, le Maopu ma lau Tautalaga Faiumu ma le paia o Salemuliaga. Le paia o Aiga ma Sa Muliaga o ouluga o Matua o Ulugatagata, le paia o le Nofa a Tapaau ma le Ituaiga o Gagaemalae, o paia na o le Itumalo. O tupu na o le itu, o tootoo na o Vailoa. O le paia o saoa tausi ma faletua ma augafaapae, o le paia i le malosi o lo tatou Itumalo, tuu mai lou faatuatuga, ou te talitonu lava e le o i ai se atoatoa i le auuuna ae faamoemoe i le Agaga o le Alii e fesoasoani mai.

Ia manuia le tapuaiga a Lana Afioga Mamalu O Le Ao o le Malo ma le Sui o le Fono a Sui Tofia. Ia manuia le tapuaiga a le aoa o Samoa mai ona ao seia oo i ona iu. Ia manuia le tapuaiga a Ekalesia Kerisiano a Samoa o loo faanonomanu aua se manuia o Samoa e ala i le Palemene.

Le Atua o manuia, tatala maia lou lagi sei liligi ifo faua au faamanuiaga i lenei Palemene aua le Afioga i le Palemia ma e Sui Palemia ma le mamalu o le Kapeneta. I lena itu o le Maota i lau Afioga i le Taitai o le Itu Agai ma le Sui Taitai ma lena Itu.

Lau Afioga i le Fofoga Fetalai ma le loaloa o le Palemene, tatou faanonomanu i le Atua.

Ia manuia foi le tapuaiga a Ofisa Sili o Pulega ao alofaiva Samoa i lana Fonotaga.

Ia manuia Samoa i lenei afiafi. Soifua.

22 IUNI 2011

Afioga Hon MANU’ALESAGALALA ENOKATI POSALA (Minisita mo Galuega, Felauaiga ma Atinae Eseese): Lau Afioga i le Fofoga Fetalai, aemaise le malualii ma le paia faaolioligata o le Maota o le Fono Faitulafono o le Malo Tutoatasi o Samoa, e manatu o le oo sa matou faamatalaga i ai e tusa ai ma tali faa-Minisita, ae ao lava ona afea tulaga e tusa ai ma le tapuaiga a le Atunuu.

E muamua ona ou taia Uto o le Tao tuugai a le Aitu o le Vavau e pei o le fetalaiga i le malae i Tumua, Maloletumau ma Utumoeaau aua o lele ua saasaa i lalau le soliga o Lafoga a’o le vai foi ua sua taulu sua taili o lo o ua fetalai le Tupua nai Fiti, ae nofoia le Tiaseu o Alii nai le Puava ona faapea lea, a ua liligo le Fogatia ma ua pau foi le Tuavao, a’o le fetalaiga i le Tautai a le Tuimanua, ua sa le Sami aua ua leleva foi le Aupeau. Ua faaneene la lo’u Sa aua ua fati laolao foi le Ao ma le Pua o le Tufaoga i le Tuavao, aua ua manu mai vao le tamaloa Safotulafai, o le Tufuga Maolo mai Vao, le Tufuga Pule, le Tufuga Asaasa, le Tufuga Toatamai, Tufuga Alofa.

A ua gafoa le Ata, ua totego foi Malama e pei o le fetalaiga ia Paiatea ma Paialala. Ua tuanai Lupe o pupula, ae ua uma foi ona faailo lupe o maunu, tainane lupe o atoa ma lupe o fanolua, ae ao lava ina ou saua le Va e pei o le Faiva i Malae, le Taaloga o le Aigofie, o le uluai Taea o le tama o Leatiogie.

E pei lava o le faamanu o le Tuasivi, e pei o le Fetalaiga i le Taitafola ma le Alofisa o le Tuimanua, “Aloalo o le La, sau ia ina alu, alu ia Po ma Ao, fai i ai e tatala ia lo la Sa, ae to mai le Togi sa, o le Uti o Sasaa, ona avane lea o le Pa e te tiu ai, o le pa e tau..... muamua e mataga, e foliga mai o le au o mala, ave laia o le pa lena. A o ai na manatu o le a fotuai mai le Alii o le Taea, ae.... ai o le aiga Sa Saumani. Ua maleifua mai ai le Tamaitai sa moe i le Ilititai, ma ua tatou feiloai ai. O le Pa o ‘Aloalo o le La, o le Au o Mala, Au o Mala, Au o Manu. Ou te faatalofa atu ai i lau Afioga i le Fofoga Fetalai, aemaise le paia maualuga i le afio o lau Afioga i le Palemia o le Taitai o le Faigamalo, lau Afioga i le Sui Palemia, Afioga i Minisita o le Kapeneta, le Afioga i le Taitai o le Itu Agai, aemaise o sui usufono mamalu o le Palemene o Samoa. O Lupe na fa’ia mai le Fuifui aua upufai o Malo.

Ae le mafai ona faagaloina ai le Tapuaiga a Lana Afioga Mamalu O Le Ao o le Malo, le Afioga i le Tui Atua Tupua Tamasese Efi ma lau Masiofo, Sui o le Fono a Sui Tofia lau Afioga i le Tama Aiga, Tuimalealiifano Vaaletoa Sualauvi II ma lau Masiofo, aemaise foi le Afioga i le Faamasino Sili ma le Faamasinoga, o le atoaga lea o le Tafatolu aua lau Faigamalo Samoa, aemaise ai le faafogafoga tapuai mai o Feoi o le Talalelei, lau Afioga i le Taitafono o le Ekalesia Kerisiano Soofaatasi, lau Susuga le Toeaina Oka Fauolo ma lou Faletua, aemaise o Taitai o Ekalesia e fia i Samoa nei, aemaise o le Auaigaluega filifilia aua le tauasaina o le Ipuvai o le Ola. A ua to i le To ae lili’o tino i Pisaga, leaga e faigata o Samoa e Ao Mamala i le faasouga o Ao ma le Atufolasa. Afifio le paia i Aiga o Tupu, Aiga o Nofo ma Aiga o Papa, Aiga na Tafai, Tui Aana. Tui Atua, Gatoloaitale Tamasoalii. Tama ma o latou Aiga, Aiga ma a latou Tama, a o le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le tapuaiga a Tutuila ma lana Faigamalo, afio lau Afioga i le Kovana Sili, afio le Afioga i le Kovana Lutena, Afioga i le Peresetene ma le Fofoga Fetalai ma le mamalu o Maota e lua. Ae a le paia ia Sua ma le Vaifanua, Fofu ma Aitulagi, Saole ma Faleagafulu, le Laau na Amotasi, Faatuiolemotu, Auvaa o Tootoo, aemaise le Tama a le Manuatele.

O ou Paia na, o Sa na, lele ua tau i le Falelima o Tumua ma le Faleono o Pule, ae a le Usoga Matua, Laloifi ma le Falesau, Gagaelemoe ma Utumoeaau, Fatulegae ma Maloletumau, ae a Malaetele ma le Malae o le Vavau, Faleu na tau Aitu, Faleu na tau Tagata. O ou paia sausaugata na.

O ou Seetaga malu ma ou Falematu, e afua mai Galu na siisii i le Atugaluga o le Tui Manua, seia paia le Galu na pisi i Siupapa e tulata i Falemoa na tauilo ai manu o Malo. Tulou, tulou, tulouna lava.

Ae e le mafai ona faagaloina le tapuaiga a lou Itumalo. Ou te manatu, o le a ou le taea pe auauina faai’a a Tama valevale Paia, Sa ma Faigata, e afua mai i Latatuli seia paia Niualama, Siulepa ma ona tua, Togamau ma ona tua. O le paia i le Falefa o le Ulugatagifa, le Afifio o le Aiga Sa Tunumafono ma lana Faasuga, afifio Tapaau na tausi e le Alataua, alaalatai Taulauniu ma Aitu Tagata, le Nofo a Tula ia Safata ma upu ia te Oe le Alataua. Mapu ane ia i Niafane ae laafo le Taula i Malolo aua o lele ua tatou mumusa i le Taea o ua ula, e le faagaloina Afia i si ona Vao, aua ua goto lo’u Vaa, ona o la outou faaeaea ma la outou faaloalo ua inu malie ai le Falesefulu ma le Faleselau ma ua tofua malemo ai Tagaloa Aopo. O ai na manatu o le a outou sii lou Vaa ma tuu i le Maupuepue? Ao ai foi le tagata ua outou manatu ane ai? Ona ou faapea lea, o lau faaloalo ua tōtō tetele, o le a ou le seia i lou Taliga ne’i lelea i le matagi, pe pale i lo’u ulu nei mamulu, o le a le uuina foi i lou lima nei satia e se tasi ao le a elei i le va o lou fatu ma lou mama e manatua ai pea.

Faafetai i o ma aiga, faafetai i lo outou lagolago mai. Ao ai foi na manatu o le a afea lo tatou Itumalo i tofiga a le Kapeneta i lenei Paeaiga? O le Atua o e Pule aoao, e pule i mea uma, e ona tofiga, e avea ai lou nei tagata faatauvaa e fai ma mea faigaluega. Tapuai maia, o le a se taumafaiga, e faalagolago lava i le Atua o Ia e i ai manuia aua lo tatou valaauina.

Ae avea ia lenei itula e avatu ai le faamalo i le Afioga i le Taitai o le Itu Agai ua mafai ona papale mai aemaise ai o nisi o sui tauva sa matou tauva mai, tatou galulue faatasi. O lea foi e matau atu ua asoa foi ma tele Paeaiga o tulai mai lau Afioga i le Taitai o le Itu Agai, o taua e nofo lelei ai ma filemu lo ta Itumalo. Tatou saili aua upufai o le Malo mo le manuia o le Atunuu.

O le a agai loa sa matou faamatalaga e tusa ai ma talosaga sa tuuina mai. Ou te manatu e le mafai ona lelei le faasoa pe a ou tali atu i lenei taimi, a ua folasia o outou finagalo, ma ua mautinoa o auala, suavai, eletise

o le ivitu lea aua le atinae ae ma galuega i totonu o le Atunuu. Afai ou te tali atu o ai le talosaga o le a faatino ao ai le talosaga o le a taatia mo le isi taimi, atonu e le atoatoa ao le faiga amiotonu o lea ua mautu mai. Ona tuuina atu lea i le Matagaluega, o lo o i ai talosaga ua maea faatoai mai o tapenaga nei e mafai ona sailiili ma mafai ai ona fua le faagasologa o galuega ma atinae o lo o moomia e le Atunuu.

O le a ou amata atu i auala galue. O le tele o talosaga mo auala galue o lo o faamauina uma e le Matagaluega ma faasolo atu ai galuega e fua i seleni ua faamatuina mai mo lea tausaga ma lea tausaga. O le tele o nei talosaga ua leva ona faaoo mai ma o lo o faasolosolo atu lava i ai galuega.

O nisi o nei talosaga sa tuuina mai i le Malo i le fa i le lima tausaga ua tuanai ae ona o le utiuti o le seleni na le mafai ona oo i ai le faaso. O le tulaga foi lea na mafua ona oo i ai le fuafuaga ina faagata i le 2,000 mita poo le 2kilomita le umi o se auala galue e fai muamua, ina ia mafai ona faaso atu le seleni ua atofaina i le tausaga mo ni afioaga se tele e amata ai o latou auala galue. Ona faamuamua atu lea o le 2,000mita poo le 2kilomita ona toe sosoo atu ai lea i le isi taimi o i luma pe a manaomia. Ona o le taugata o nei galuega e talosagaina ai foi afioaga ina ia tatou galulue faatasi mo le faaleleia ma le vaia lelei o nei auala galue pe a maea ona fausia e le Malo. E i ai nisi o afioaga ua faamoemoe mai i le Malo e o atu e faamama autafa ala tafatafa o auala galue, ua ola mai lava le vao i totonu ma ua puni alavai ona o le ola o le vao ae leai lava se taumafai ina ia fai se galuega lelei ina ia umi ma lelei ai auala taugata na faia e le Malo. O lea e talosagaina ai sui usufono o Itumalo ina ia silasila ane ma faamanatu atu i le pulega a alii ma faipule o afioaga taitasi i le tausaga o nei auala galue mo le umi ona lelei.

Mo lo outou silafia ua na o auala tetele o lo o i ai konekarate mo le faaleleia o nei auala ao auala galue e fesoasoani atu ai le Malo mo le fausiaina ma valita ao le matafaioi a le afioaga o le vaia lelei ina ia faatumauiina ai pea le lelei.

E i ai se sui usufono mamalu sa taua le manaomia ua na o ni masini ao loo tele le maa ma le palapala i lo latou afioaga mo le faia o auala. Ou te faaailoa atu o palapala ma maa e fia faaaogaina mo o tatou auala e manaomia le siakiina ma ia maua lelei le tele atoa ma le malosi. O le faatino foi o auala e manaomia ai maa vili aua o le vaega lea e siaki e le pulega ina ia mautinoa ua maua le malosi atoa ona faatoa amata ai lea o galuega. O le tulaga lea e aofia ai maa ma palapala atoa ai ma masini i le faataufoina o galuega. O le talosaga a le Matagaluega aemaise o le Malo ina ia tatou galulue faatasi vaeatu le faafogafoga mai o alii ma faipule ma alaafaga ua uma ona faatino auala, o lo tatou sao lea o le taumafai ina ia faamama tafatafa o auala galue ina ia umi ma faatumauiina pea lona lelei mo le faaaogaina e nuu taitasi. O le tasi foi lea vaega e ala ai ona poloka nisi o alavai i nisi o auala ona ua ola ai le vao i totonu ma ua tafe mai ai le vai ma faaleagaina ai auala, ao le galuega e fau tele ma tatou galulue faatasi e mafai ai ona fesoasoani i le utiuti o le faaso o loo taumafai ai le Malo.

O taligalu, e muamua ona faailoa atu ma le faaaloalo o taligalu uma lava e puipuia ai ala tetele o le Malo, o le matafaioi lena a le Pulega o Felauaiga i le Laueleele. O lo o i ai taligalu o lo o puipuia mai ai meatotino ma fale, aemaise o matafaga o mea na o lo o tapena i ai ma le Matagaluega o Punaoa Faalenatura ma Siosiomaga ina ia mafai ona maua se tonu autu mo lea famoemoe ao loo faaauuina pea polokalame mo taligalu o lo o puipuia mai ai auala tetele a le Malo.

O auala laupapa, o lo o i ai nei i le fuafuaga alualu mamao a le Malo mo le faia o auala laupapa maualuluga e suia ai auala simā o lo o totoe i totonu o le Atunuu, e pei o auala simā i Letui, Sapapalii, Lano faapea Maliolio i Savaii faatasi ai ma auala simā i Upolu e aofia ai Lalomanu, Saleapaga, Lepa, Lotofaga, Alafua ma Lotopa, faatasi ai ma le auala laupapa i Vaimoso-uta, ou te iloa ma maitauina tafega ua mavae atu sa ave i ai le faamuamua mo nei auala laupapa ina ia mafai ona tuu ititia le tafe solo o le suavai.

O le tulaga o laisene o pasi. Sa saunoa ai se tasi o sui usufono mamalu i se laisene o le pasi mo le vaa mulimuli mai Savaii, o pasi o le vaa e umia saoloto, e avatu e le Malo le laisene e galue ai ae pule lava le pasi ma le taxi i le taimi e galue ai. O le a silasila nei le Malo mo le toe suia o nei laisene ina ia mautinoa nisi o auauna ua tuuina atu ai lenei laisene i le manaomia ai mo le vaa mulimuli mai Savaii. Faafetai mo le mataupu e pei ona laga ae talitonu o se mataupu e taua tele ma o le a i ai le fuafuaga e vaai ai i le uafu ma mafai ai ona faasoaso ai nei pasi, ina ia mafai ona fesoatai ma le uafu i Salelologa e iloa ai le aofai o nisi o lo o malaga mai e fetuunai ai le aofai o ni pasi e talia lenei faigamalaga. O lo o ua tilotilo i ai le Faalapotopotoga ina ia mafai ona sologa lelei le femalagaai o le tatou motu i Salafai.

O le tulaga i le Malae Vaalele, sa aumai ai le finagalo o le sui usufono mo Aana Alofi Nu. 3, ina ia i ai se sui o le afioga i totonu o le Komiti Faatino ma Faalapotopotoga Tumaoti a le Malo. O lea vaega ou te iloa ua i ai faiga faavae o talosaga i sui uma o le Atunuu e fia auai i lea Komiti e faatino ai le filifilia o sui auai. Ua i ai le fuafuaga e pei ona faataatia mo ē e mananao i nei Komiti ma ua mafai ona ave tusi talosaga ma fai ai le filifiliga ina ia ausia lea vaega ma avea ai ma Komiti taitasi o Faalapotopotoga e mafai ona latou vaai i galuega ma le faatinoina e le aufaigaluega.

O le talosaga i le faamatuu atu o le faamamaina o ni teula i le Malae Vaalele e Satuimalufilufi ma Satapuala, o le taimi nei o lo o faatinoina lava lea auaunaga e le Pulega o le Malae Vaalele. O lo o i totonu o Fuafuaga Mamao poo le Master Plan a le Pulega o le Malae Vaalele le faamatuu auauai i tua o nisi o auaunaga, e pei o auaunaga o le faamamaina o le terminal, faamamaina o lotoa, ma isi poo le vaitaimi o le 2011–2015.

O le sui usufono mo Vaisigano Nu.2 o lona finagalo o le puipuiga mai faalavelave faanatura e pei o tsunami ua fautuaina ai le tuutuu i uta o le Malae Vaalele i Faleolo. Ua i ai foi fuafuaga i le Master Plan lava lea a le Pulega mo le faamoemoe i le 2010-2030, o lea ua leva ona i ai faatatiaga o ia fuafuaga mo se fetuunaiga o se Malae Vaalele.

Ona ou oo atu lea i le Faalapotopotoga o Vaa a Samoa, sa talosagaina se toe fetuunaiga o tau o loli lau oloa mo Savaii, ona ua faapea ua taugata le tau o le soifuaga i le Motu i Salafai.

O le aso 1 Tesema 2008 na amata faamamaluina ai le totogi fou o pasese o tagata ma taavale mo Savaii faapea ma isi auaunaga uma a le Faalapotopotoga o Vaa a Samoa e pei ona faamaonia e le Kapeneta. E oo mai i le taimi nei e tusa ma le lua ma le afa tausaga talu ai o lo o tumau pea ia totogi e lei i ai se suiga poo se siitaga, e ui o lo o faaauau pea ona sii le tau o le suauu faatasi ma isi tau o lo o faatino ai le galuega. O lona uiga o lo o tele le sao aemaise le fesoasoani a le Malo i le mamalu lautele o le Atunuu i le faasafuaina o lona tamaoiga. O le mau lenei a le Aufaipisinisi sa aumai muamua foi, peitai e lei mafai ona faamanuiaina ona ua maea ona fai i ai Tau Faapoloaiga o Oloa sui taitasi, ma o nei tau ua maea ona aofia ai ma le totogiina o oloa i le vaega e taunnu i ai. Mo se faataitai, o le tau o oloa mo Salafai ua maea ona aofia ai ma le totogi o le vaa. O le mea moni e ao ona faafetai le Malo ona o le taofiofi mamau o le iu maea i le matauina o tau talafeagai mo femalagaiga e pei ona tumau ai tau o lo o i ai i le taimi nei, aemaise o le faaputu o tatou tupe faasili aua le tausiga ma le vaavaaia lelei ma le saogalemu o tatou vaa.

O le tulaga i suavai ma nisi o talosaga sa tuuina aua le suavai. E pei ona matou fai atu tasi lenei o vaega e le o faigofie i le silasila a le Malo, Afioga le Palemia ma le Faigamalo aemaise foi le Pulega o lo o faatinoina le fuafuaga mo le suavai. O le mea sili ona taua o lea sa i ai nisi o saunoaga faaalua i le taumafai e faasaoina mea o loo pue ai le suavai aemaise o uluvai ma faatanoa o lo o i ai. Ua taumafai foi le Faigamalo ina ia faamalosia le Tulafono ina ia vaavaaia lelei o tulaga ina ia faaauauina pea ona maua le suavai lelei e le Atunuu. Ua matauina ua i ai nisi o faatanoa poo uluvai ua amata ona matutu ua leai se suavai o maua ai. O le agaga maualuga foi o lea e faafofoga mai Samoa le Atunuu, e tataua ona faamamafaina lea vaega ina ia malu puipua mea o lo o pueina ai le suavai ina ia mafai ai ona faaauauina pea ona maua le suavai aua le soifua taumafa o le Atunuu.

O le tulaga i le masini lea o lo o.....

Lau Afioga i le Fofoga Fetalai, ua sala foi ina le manofonofu sui usufono ona o le manaomia tele o le suavai. Le Afioga i le sui usufono mo Alataua Sisifo, o le a amata ona fai atu lau faamatalaga ae tulai mai loa. O le mea sili ma taua o lea ua manino ma malamalama le agaga o le ave o le faamuamua ia Falealupo ma Papa i Sataua e moni o la e..... ae o iina lea ua faamuamua i ai le viliga o le vai. A maea Falealupo o la e galulue nei le Pulega o le Suavai i le viliina o le vai i Neiafu o se galuega faigata tele. Ua uma le tomai, uma le malolosi o masini o lo o faaoga ae o lo o taumafai pea. Ua silia nei le lua masina o taumafai pea le vai lea. O le tulaga ua i ai ua ova le 60 mita le maualalo o le mea ua mafai ona oo i ai le eliina i lalo ae i ai le faamoemoe poo le 150 mita ona faatoa mafai lea ona maua le suavai. E le o faigofie le galuega ma ua tele foi ina faaleagaina ai le masini ae ona o le agaga lava ia maua se vai aua le nuu o Neiafu. O lo o tele le manaomia o le masini ma tama o lo o galulue ai e fia faatino le galuega i Falelauniu ma nisi o alaafaga iinei Upolu ae ave lava le faamuamua ina ia mafai ona maua le suavai mo Neiafu. Ae o le tulaga lena o lo o i ai, o lo o galulue tama ina ia mafai ona maua le suavai ae le faigofie.

O se tasi o sui usufono mo Palota Taitoatasi, Afioga Maualaivao Pat Ah Him na talosaga mai mo se suavai mo Aleisa, o lo o galulue le Pulega o le Suavai e faaleleia paipa ma faafou paipa tuai na avatu ai le suavai mai Tapatapao seia oo i Aleisa Sasae ma nuu i uta e pei o Faleasiu uta ae faatupe e le EU i le tausaga faaletupe lenei. O le tulaga lena ua i ai, o lo o taumafai le Pulega o le Suavai e faataatitia nisi paipa ina ia mafai ona fesootai mai ai Aleisa faatasi ai ma Faleasiu.

E pei ona aumai e se tasi o sui usufono mo le Aana Alofi Nu.1, Afioga Hon Leaupepe Toleafoa Apulu Faafisi, muamua o lo o i ai polokalame e vili vai i uta i Faleasiu ma Fasitoo pe afai ae manaia ae maea mai Neiafu ma tulaga o i ai. O lona uiga o lo o faagasolo i ai polokalame a le Matagaluega. Ou te talitonu o se taimi o lenei tausaga ua tataua ona faatinoina le viliina o vai ina mafai ona faasafua i nuu taitasi ma aiga.

O se tasi o sui usufono mo Falealili, Afioga Tusa Misi Tupuola, o lo o manaomia foi le suavai i le Itumalo o Falealii. Ia o a ni polokalame o le mitaina o le Itumalo, o le taimi nei o lo o faagasolo le galuega o le mitaina o paipa ae sei ola le paipa fou a le EU ona amata lea o lea galuega. Ou te talitonu foi o lo o i ai se faaletonu, e le o se faaletonu ae ua uma tapenaina se tasi o vai iina i Piu, o lo o fai lava i ai feutagaiga ina ia mafai ona tatala ma tele se vaega o le Itumalo e mafai ona feinu ma taumamafa i le vai lea i Piu pe a mafai ona faamatuu mai. E talosaga atu i le Afioga i sui usufono mai Falealili aemaise le faafofoga mai o alii ma faipule o le tatou galulue faatasi e mafai ai ona tatala mea uma o lo o pa puipui ai galuega lelei o lo o mafai ona faatino e le Malo mo le suavai.

O le sui usufono mo Faleata Sasae, o le popolega o le nofoaga o lo o faamama ai le suavai i Sogi. E mafai ona fesootai le Pulega o le Suavai i mataupu lautele mo le aumaia o le ata faataitai. O lona uiga o lo o i ai fuafuaga a le Matagaluega o lo o fai pea sailiiliga ma nisi tulaga ma faamautuina, e pei lava e fai ma siaki ma tausailiili i lea vaitaimi i lea vaitaimi. O liki o paipa e pei ona taua e 67%, o le fua lena i le tausaga ua tuana'i o lona uiga o le tausaga nei, ae o le fua foi lena e 67% e na o totonu lava o Apia. O lona uiga afai e faaopoopo i ai tua atu ma Upolu atoa, o lona uiga ua pau i lalo lea pasene. O lo o amata galuega i Alafua, Seesee ma Vaimoso uta mo le taumafai e pau mai lalo lea pasene. O galuega ia o le toe suia o paipa o lo o faaogaina atonu o le tasi lea o mafuaga ona o le tele o paipa o lo o faaogaina o paipa ua leva ona i ai. E moomia le toe faafou ma suia lea la ua galulue i ai le Pulega o le Suavai e amata ai ona faatino ina ia tuuaititia le pasene lea e liki ai le suavai.

O le sui usufono mo Gagaemauga Nu.2, e fia maua le vai i le 24 itula ona o pamu o loo faaogaina e alu i le eletise. E le mafai ona ola faasoloatoa se pamu, e tataua lava ona faamalolo i nai itula nei tei ua faaletonu pe mu foi. O lo o taumafai pea le Pulega o le Suavai e fausia tane tetele e faasoasoa i ai le suavai i nuu ma alaalafaga. E le o mafai lava.

Lau Afioga i le Fofoga Fetalai, o le tulaga lea i pamuvai e pei ona taua, e leai e taua, e taua fautuaga ua tuuina mai, aemaise o taimi e tataua ona faaola ai ma le taimi e tataua ona tape ai. Na pau lava le tulaga e i ai, e moomia foi e le pamu le malolo. O lona uiga, o mea lava o la na design faapitoa i ai afi ia, e tataua foi ona tatou mulimuli i tei foi ua tele nisi tupe e faaalu e faaleleia ai pe afai e alu faasoloatoa. Ae o mea e tataua ona fai, o le fetuunai o taimi ia ina ia mafai ona talafeagai taimi mo tatou nuu i tua ona tatala ai lea o le pamu ae i ai foi taimi e tataua ai ona faautagia le taimi e faamalolo ai pamu.

A'o a tatou pasi, e leai o fautuaga lava e taua mo le tilotilo i ai i le fetuunaiga o pasi. Aua e pei o le tulaga lea i pasi, e faigata foi i le Matagaluega ona oo le latou pulega i taimi, aua o se mea faigata ona latou mataituina pe a oo ina o pasi i tua. A'o le mea faigofie, o le fesootai lava i totonu o le va o avepasi ma le latou Association, i se faalapotopotoga foi lea o pasi ona talanoa lea i se faiga e talafeagai.

A o le uafu, ou te iloa o lea e faigofie, aua o totonu o le uafu, o la e i lalo o le SPA, e tataua foi ona faasoa e latou lea vaega ina ia mafai ona maua le avanoa, e taua le malaga mai Savaii i taimi ia, a o i ai se pasi aua e le gafatia le pasese i taxis, e taugata tele. Ae faafetai tele mo fautuaga, o le a tagai i ai le Faalapotopotoga ina ia faaleleia atili lea auaunaga.

O le sui usufono mo Gagaemauga Nu.2, o le tulaga lava lea i pamuvai. O e uma sa faaalua finagalo i pamuvai, o lona ua faamanino atu, e tataua ona fai ma faamaalili afi nei, e le gata i lea, ae fetuunai, e tataua ona adjust le taimi ina ia fuafua i le talafeagai ma le manaoga e pei ona i ai. O mea lava ia o le a mafai ona faaoo mai i le Faalapotopotoga ma fua i ai taimi e tatala ai le vai.

O se tasi o sui usufono mo Vaimauga Sisifo lea sa fautua mai e faamuta le taina o le vaomatua i uta o Malololelei. O lo o i ai le taimi e fetuunai ai le vai ona o le tetele o le mugala. O Vaimauga Sisifo o lo o

fetuunai ai le latou vai. O polokalame uma ia o loo silasila i ai le Palemia ma le Faigamalo, o vaega ia e pei o wáter catchment ia e tapue ai le tatou suavai ina ia mafai ona puipuia faaletulafono. O la e ua i ai le Tulafono, ae ia atili ma mafai ona umia e le Malo ina ia faasaoina mai ai le atiaaina ma faaititia ai le suavai e ono maua, aua ou te talitonu foi o le tasi lea o vai o lo o mafai ona maua mai ai le suavai i Fuluasou ma oo mai ai i le talafatai o le taulaga i Apia.

O le sui usufono mo Aiga i le Tai, o lo o faia suesuega a le Pulega mo le vai i le motu o Manono.

O lo o i ai le consultant lena o lo o faia le latou galuega, ou te iloa e mafai ona maua mai ai pepa mo le polokalame o lea e tau fuafua i ai, o le toe faia o paipa e alu i lalo o le sami, ma pamuvai ma tanevai ina ia mafai ona maua e le motu i Manonotai le suavai lelei.

O le Itumalo o Aleipata Itupa i Lalo, o lena o lo o lau pea le suavai i loli a le Pulega, o lo o faaaauu, a oo ina faaletonu, o loo i ai loli a le Pulega o le Suavai o loo lauina ai le suavai. E le o toe mafai ona soona faaaoga e le Pulega soo se loli, ona o le tulaga tumama o ia loli. E tele mea e tatau ona faia ona faatoa faaaoga ai lea o ia loli. O lo o i ai foi suesuega alualumamao a le Pulega i le vai o le Atu Aleipata iina i Lepa ma Saleapaga, o lo o i ai le kamupani lena a le Blue Palm, ia o matou o lo o faia le feasibility study e mafai ai ona faaaogaina le vai i uta ma nisi fuafuaga e mafai ai ona faaaogaina le suavai i lea vaega o le Atunuu.

E pei ona matou fai atu, e le toe sili se matou faamatalaga o lea ua saunoa le Palemia, o le aoatetele foi lea o le faamoemoe. A o la e faafofoga mai o outou Itumalo, o lea ua outou fai poupou foi ma laga talosaga mo le manuia o Itumalo. E pei lava ona matou fai atu, e le atoa se faasoa talafeagai ma amiotonu i le taimi lenei ou te tali atu ai, ae o faiga faavae ia o le toe saili e le Matagaluega ma Faalapotopotoga o Talosaga o i ai mo le faasologa o i ai polokalame nei. Ae pei e sili atu le taua, o lea ua fofoga Itumalo, ia o le oo atu lava i lou ofisa e faamanatu atu mataupu ua tuuina mai. A o le agaga maualuga o le Afioga i le Palemia ma le Faigamalo, o le suavai, ia tatou maua le suavai lelei. E pei lava o le Itumalo o le Afioga i le Palemia la e sili ona pagatia, a leai le loli vai e le maua se suavai. Ia pei o le tulaga lena o lo o i ai, e le o faapito manu ia tasi, a o le agaga ia maua uma e le Atunuu le suavai e talafeagai mo le soifua.

Ia ou te iloa o le a faamuta ai foi ii ma se faamatalaga a le Minisita. O le fuafuaga lava o loo i ai.....

Lau Afioga i le Fofoga Fetalai, o tulaga ia pei ona matou fai atu, ia e le toe foi i tua le matou faaiuga. A o le tulaga i le suavai, o la e faafofoga mai le Itumalo o Aleipata Itupa i Lalo, aemaise foi le Itumalo o Aana Alofi Nu.3, o le Itumalo o Siumu, e i ai mataupu ia sa laga mai e sui usufono mo outou Itumalo ona o le agaga e fia faaleleia le suavai. O le a le maoti atu, ae e sili galuega i lo upu. O le a le avatua sa matou tali, ae o le a auiliili uma e le Faalapotopotoga tulaga o talosaga ia ua uma ona faatoai mai i totonu o le Maota nei. Ia pei o lau tali lea i le tulaga o le suavai.

A'o le tulaga foi i le eletise lea, o le eletise lava o lo o moomia mo moli i le auala ma aiga e le o – O le agaga o loo i ai le tulimatai e le Faalapotopotoga o le Malosiaga Faaeletise, o le taumafai i le faiga e gata ai ina ia lelei reliable, ma affordable le tulaga o le eletise. O lona uiga, e le gata ina ia faaleleia, a ia gafatia e tagata uma. O le siisii pea o le tau o le suauu, o le aafiaga lena e pei ona i ai nei. A o le tulaga lea pei ona i ai lenei taumafaiga, e le o ni mea e fau i se aso se tasi, o tapenaga fuafua mamao.

Faafetai lava mo le avanoa i lau Afioga i le Fofoga Fetalai. Ae na pau lava le tulaga i le tau o le eletise, e fua lava le tau i lau faaaoga, afai lava e tele le faaaoga, e faapena foi ona siitia le tau.

Ae avea ia lenei itula e momoli atu ai le agaga faafetai ona o le avanoa, aemaise foi o matou manatu, e pei lava ona fai atu...

Lau Afioga i le Fofoga Fetalai ma le paia maualuga o le Maota Fono i lenei afiafi, ia atonu o tulaga uma ia e i ai, ia pei ua matou fai atu, ia o lea o le a mautu mai o outou finagalo i mea e tatau ona tilotilo i ai le Faalapotopotoga, e fuafua ina ia mafai ona faamalieina uma manaoga o le Atunuu.

E faamalulu atu foi afai o le a sa outou faafofogaaga le tau i so matou leo faatauvaa, e leai e talitonu lava tatou te faamoemoe i le Atua e mafai ai ona manino ma faamalamalama ma maua ai le mafanafana, aua o lea e manino ma mautinoa, o mea lava e moomia mo le manuia o le tatou Atunuu i taumafaiga uma. Mo lenei taimi, ia alofagia e le Atua ia maua pea le tomai ma le lototele i lau Afioga i le Fofoga Fetalai aua lou valaauina, ia maua foi le tofa i le Afioga i le Palemia ma le Faigamalo e mafai ai ona uli ma sao le Sa o Samoa i lenei Paeaiaga.

Ia manuia le faafogafoga mai a lo'u Itumalo aemaise o le tapuaiga a le Atunuu, ia manuia tele lenei afiafi. Faafetai.

23 IUNI 2011

Tofa Hon FAAMOETAULOA ULAITINO FAALE TUMAALII (Minisita mo Punaoa Faanatura ma le Siosiomaga): Ou te muamua ona ou tapui le tapu a Tūpō ma ou taia foi le Tafa'itoa, ou te momoli foi Laau i Foga'a ma mua mea i Matautu Sa. Ua ou manatu ai e fia fono faapipii atu le Tootoo o Gagaemauga Nu. 3 i le Viiga o le Atua na siitia e lau Afioga i le Fofoga Fetalai i lenei taeao. Faafetai i Lona alofa ma Lona agalelei aua o lea ua tafesilafai le laau a le tamaitai, ua tatou fesilafai i le soifua laulelei ma le lagi e mama, Viia la le Atua. E moni ai le upu a le Tusi; 'O Lona alofa mai ananafi ma le asō, e le liliu lea se'ia o'o i le faavavau'.

Ou te avea foi lenei avanoa taua ou te faatulou ma faatalofa atu ai i Lana Afioga Mamalu, O Le Ao o le Malo ma lau Masiofo, o le Sui o le Fono a Sui Tofia ma le Masiofo, ae le gata foi i lea o le Faamasino Sili ma le vasega o Faamasinoga. E le gata foi i lea o Feoi o le Talalelei o lo' o faafaletulua i itu e fia o Samoa aua lava se manuia o Samoa mo a taeao.

Ona ou oo mai ai lea i lo'u Itumalo. Ou te faatalofa atu i lo'u Itumalo, sau se taimi ona ou oo atu lea, a'o lenei taimi, ia tapua'i maia se'i ou liliu ane e molimoli so tatou sao aua upufai o Malo ma lona atiaaina.

I mea taitasi na laga mai e sui usufono mamalu o le Maota, muamua, o auaunaga i totonu o Matagaluega o lo o i lalo o la'u vaaiga, o le gaosiga lea o le falaoamata 'ulu. Ou te molimau atu ua maea lea tulaga i ona suesuega ma le tulaga foi i lona gaosiga, ma o lo' o i ai nei i le Fale Suesue lea tulaga ma ua sauni atu nei e faalauiloa le tulaga o lea taumafaiga. O lea la ua uma le galuega suesue faasaienitisi, o le suesue lea ma gaosia, ae ua oo atu nei i le tulaga o le liliuina o ia auaunaga i le faapisinisi, pei ona saunoa atu le Afioga i le Palemia anapo, ia o le tulaga lena ua oo i ai lea taumafaiga.

Ia lavapapale mai pea o lo o taumafai atu i le tulaga o mataupu na laga mai e sui usufono mamalu.

O le tulaga lena o le falaoamata, ma ua uma ona sauni formular e faaaogaina i lea tulaga, e le gata i le taimi o le fuata o le ulu, ae a uma foi le ulu, ona liliu loa lea i le tulaga o le manioka. O le tulaga foi la lea, o lo o galulue ai nei le afaigaluega i le tulaga o le sauniunia lelei o tau faatatau o nei oloa o lo o gaosia mai i faaeleeleaga a le Atunuu.

Ona ou oo atu ai lea i le tulaga o le gaosia o oloa mai le suauu o le avoka. E tasi lenei o suesuega o lo o ua amata nei i totonu o le Fale Suesue, ma o le suauu e maua mai i le avoka, o le suauu e sili atu lona lelei i lo le suauu popo. E le mafai, le mafai la ona faaoga se suauu taua faapenei e fai ai se biodiesel. O lo' o vaai i isi ituaiga oloa taua e ono maua mai i le suauu taua lenei ma le taugata o le avoka.

Ona ou oo mai ai lea i le tulaga o le gaosia o le biodiesel mai le suauu popo. E pei lava ona fofola atu e le Afioga i le Palemia anapo, o lena tulaga ua maea foi le suesuega a le Fale Suesue, pei lava ona maliu atu ma afio atu le mamalu o le vaega o le Komiti o Tupe ma vaavaai i ai i ia atinae ma auaunaga o lo o gaosia i totonu o le Fale Suesue – ma o lo o feoi ai foi taavale i le faaaogaina o le biodiesel lea. Ma o le tulaga moni lava, o le tulaga o lo o i ai le talitonuga o le lalolagi i le faa-Saienitisi, e toe 50 tausaga ona matutu lea o le diesel lea mai le manava o le elele, o le mea la lea, o lea ua amata foi ona o loa ia atunuu e vaavaai i punaoa uma e mafai ona gaosia mai ai le eletise ma tapenapena ai aua le lumanai pe a oo i lea tulaga. E le tatau foi la ona tatou nofonofa ai, e tatau lava ona tatou galulue ma vaavaai i punaoa uma o lo o avanoa ia i tatou, tatou te sauniuni ai mo lea vaitaimi pe afai o le a oo atu i ai, pei ona galulue ai foi nisi o Matagaluega a le Malo po o Faalapotopotoga Tumaoti a le Malo i le sauniuniga foi lea o tulaga o le eletise mai le la, ae le gata foi i lea, o le matagi faapea foi le sami, atoa foi ma le tulaga o le manava o le elele lea i le vevela lea, po o le geothermal.

Ona ou oo mai ai lea i le tulaga o auaunaga faapisinisi, ou te fiafia e tau atu, o le Fale Suesue i Nafanua, o le Fale Suesue Muamua lea i totonu o le Atunuu ua pasia atoatoa e alii Saienisi ma le Faalapotopotoga mai Niu Sila, ua avea ai nei o le International Accreditation Establishment i totonu o le Vasa Pasefika. E le gata ina i ai ia le tulaga i suesuega i le lelei atoatoa, ae le gata foi i lea o le saogalemu o oloa i feafaatauaiga ma atunuu i fafo. O lona uiga la, ia pe vaai loa i ai ia tatou paaga i atunuu i fafo o lo o tatou feafaatauai i le tulaga o lo o certify atu e le Faalapotopotoga o Suesuega Faa-Saienitisi, talia loa. Aua e i ai le talitonuga, ua lelei atoatoa ia oloa i ona tapenaga aua lona tulaga o le saogalemu o ona tagata ma le soifua lelei.

Ona ou oo mai ai lea i tulaga o puipuiga o le siosiomaga pei ona tatou vaai i ai i le tulaga o togatogo, ia o le tele lava o togatogo o lo o asiasi pea i ai le Matagaluega o Punaoa Faanatura ma le Siosiomaga. O lo o i ai lava ia faiga faavae a le Matagaluega, e o e vaavaai i ai o po'o lelei ona tausia, ae le gata foi i lea, o le tulaga lea o le togatogo i gatai mai o Faleata Sasae o lo o ua uma ona asiasia e le Matagaluega, ma o lo o toto ai foi e le Matagaluega ia le togatogo lea ina ia oo i le tulaga sa i ai, a'o le faalavelave, o tagata lava o lo o latalata mai ai i le tulaga lea, o lo'o latou taina le laau ma faaoga i fafie, sei tulou, o le faafitauli lea. E pei la ou te iloa, a galulue soosoofaatasi ma le sui usufono o le Itumalo lea ina ia i ai se va galulue faatasi, ma alii ma faipule o le Itumalo ina ia foia ai lea faafitauli, aua o lea e asiasi atu i ai ae o ese mai loa, ia amata foi ona toe o i ai e faatamaia ia tulaga. O lea la e tatalo atu ai i le Afioga i le sui usufono o le Itumalo lea, ina ia.....

Faafetai mo le folasaga malamalama a le sui usufono mo Faleata Sasae, ae tuu mai lou finagalo sei matou asiasi atu i ai poo le a le tulaga e fai i ai.

Faafetai atu i le sui usufono mo Gagaemauga Nu. 2, o lea foi tulaga o tala atu ananafi na launch ai le polokalame a matou o le Samoa Agro-Forestry Tree Farming Programme. O lo o i ai foi ma le avoka – e faasao atu o le avoka ma lona suauu e taugata, e le faaogaina i le bio-diesel ae faaoga i le faia o oloa tau taumafa o lo o fai ai suesuega a le Fale Suesue ina ia liliu le Avoka i le salad dressing, le pata po o ituaiga mea na o lo o vaai i ai leaga e taugata tele lea suauu.

Ona ou oo mai ai lea i le tulaga o le mama o le suavai mai siama o togatogo. O lea tulaga o lo o galulue faatasi ai le SROS ma le PUMA, o lo o i ai foi le mafai e le SROS e suesue ai le saogalemu o le suavai lafoai i Togatogo. O lo o lelei foi ma malupuipua i totonu o le SROS i ana galuega fai ina ia saogalemu le suavai o lo o lafoai i Togatogo ia le afaina ai se tagata.

Ona ou oo mai ai lea i le puipuiga a le Matagaluega o Punaoa Faalenatura ma Siosiomaga. O lo o i ai lo tatou naunau i le Food Security po o le lē lava o taumafa. O lo o saunoa foi nisi o sui usufono i le soona ta o le vaomatua e afaina ai le eleele o lo o tapu'e ai le suavai. O lea tulaga e pei ona ou avatu o lo o galulue ai foi le Matagaluega ona o le taumafai e faasao eleele o lo o tapue ai le suavai aua le fofoga taumafa o le Atunuu. E pei foi ona saunoa le Afioga i le Palemia i eleele ua i fafo atu o le Malo, o lo o taumafai foi le Malo ina ia toe aumai nei eleele. O lo o i ai foi i totonu o Tulafono i le Matagaluega ina ia i ai le avanoa e ave ai nei eleele, aua o lo o i ai lava Tulafono i totonu o le Natural Reserves e puipui ai mai le aveeseina atu o eleele lava na e tatau ona i lalo o le Malo.

Ona ou oo mai ai lea i le eliina o le oneone e pei ona saunoa i ai le Afioga i le Palemia. O lea tulaga o lo o fai faa-solitulafono, o le upu moni lava lea. E i ai lava faiga faavae e galulue faatasi ai le Matagaluega ma ni konekarate e manaomia lea auaunaga. O le mea lea e lapatai atu ai i konekarate o lo o faafogafoga mai e tatau lava ona uia ala o mea ma ia faafesootai mai le Matagaluega mo le tuuina atu o le pemitā mo le faatinoina o lea auaunaga.

O le aoina o le lapisi i Vaiaata, o lo o tatou i ai pea i le puipuiga o le siosiomaga, o loo i ai konekarate o lo'o faatinoina.

O lo o i ai foi Matagaluega a le Malo o lo o galulue ma vaavaai i le faamaoni o konekarate. Sa ou alu i Savaii i le vaiaso ua mavae ma ou vaai i le galuega o lo o faatino i gauta o Vaiaata, sa faaletonu le auala e o atu ai taavale ma fai ai loa le faatonuga ina ia faalelei auala. Ua feoloolo a'o lo o faaauau pea ona galulue ai ma lou uso a Minisita mo Galuega, Felauaiga ma Atinae Eeseese ina ia faaleleia atili lea tulaga aua le puipua o le siosiomaga ma faalalelei ai Samoa aua le taunuu mai ai o tagata asiasi maimoa mai fafo a'o lelei i la latou silasila.

O le polokalame i le myna bird, o lo'o maua mai faaiuga lelei lava i le Poloketi lenei ma o lo'o faaauau pea lea Poloketi aua o se tasi lenei o manu faalafua o le tatou Siosiomaga. E le gata ina faatamaia o isi manu felelei o le laufanua ao isi vaega o loo faatamaia e le manu lea. O lo o faaauau pea le Poloketi lea i totonu o le Matagaluega.

O eleele o Samoa e le mafai ona faamatuu atu aua o eleele faale-Atunuu ma o eleele uma foi a tatou. E le mafai la ona faamatuu atu eleele na o se vaega e faamalieina ai lo latou mana o faapefea fanau lalovaoa ma le agai i luma o le Atunuu. O le tali atu lena i mataupu na laga mai e sui usufono, o eleele faa-Samoa.

Ona ou oo mai ai lea i le STEC land poo eleele i Mulifanua. E tele lou fia tautala i le mataupu lenei aua ua lava foi lou iloa i au suesuega sa fai, ae faigata e noatia se leo ona o le mataupu lea o lo o taoto nei i

luma o le Faamasinoga, e le'i faia i ai se faaiuga. O lea e loma le faamasinoga i le tausaga nei ia Tesema lea ua toe tolopo i ai le mataupu lea.

Ona ou oo mai ai lea i taligalu. O lo o fai lava le faasoa a le Malo, e ui lava ina utiuti le seleni e taufaasoaso atu ona o le taumafai lava e faamalilie uma talosaga na tuuina mai. O le galuega a le Matagaluega o lo o lava e asiasi ma vaai i tulaga o laufanua poo mea foi o lo o manaomia tele ai le ave i ai o le faamuamua. Ina ia maua le saogalemu e le gata i maota, tua laoa ae faapena foi i tagata lautele. E pei la o le tulaga lena o lo o i ai taligalu ma o le faia o taligalu o lo o tauofoina. O taligalu foi ua uma ona tauofoina, ma ua latalata ona faauma ia atinae po'o ia galuega, toeitiiti lava maea. O lo o i ai le tupe i totonu o le Tala o le Tupe e faauma ai atinae o taligalu. A i ai foi ni taligalu e le o lelei ona fai e konekarate, o lo o aumai lava faitioga i totonu o le Matagaluega ona o atu lea o le Matagaluega e toe fesootai ma le konekarate, ina ia o e faalelei, e toe asiasi foi e le Matagaluega poo lelei, aua o lo o taofi pea e le Matagaluega le 10% o le value o le konekarate, seiloga ua lelei ona fai atoatoa i le maliega o le Matagaluega ona faatoa faamatuu atu loa lea o lea vaegatupe. O le taligalu o Saleaula ua uma ona fai, o le la e fai i le ituala i tai faafeagai ma le Maota o le Faafeagaiga seia oo lava i le auala laupapa. Ou te le o iloa la poo fea le taligalu lea e.....

Faafetai atu i lau Afioga i le Fofoga Fetalai.

O le mea sili o lena ua faamalieina le sui usufono i le tali atu a le Afioga i le Palemia faapea foi ma le Minisita sa i ai i lena vaitaimi.

Ona ou oo mai ai lea i lou Itumalo Faalaalafaga o Gagaemauga Nu.3. I le paia o le afio o Aiga Sa Peseta, Susu foi le Maupu, faapea le paia o le Nofo a Usoalii, Le mamalu i le Faleiva ma le Igoa o Oe le Matautu, o le Faamalumaluga o Malo. E le gata foi i lea i le paia o le Afio o Maiava, Susu foi Mataia, Alalatai Le Aitutagata faapea le lavelave ia Satoalepai.

E avea ia lenei avanoa e momoli atu ai sau faafetai i la outou faaeaea ma la outou tōpule lea ua ou sapi ai nei i le Maota Fono o Samoa. O le Malae o le faautugatagi e vevete ai upu o le Atunuu. E le gata ina avea au ma a outou sui usufono faatauva mo le lima tausaga i le lumanai ae ua tōpule foi le Afioga i le Palemia faapea foi le mamalu o le Malo i le tofi Minisita. E le mama ia te au lau faaeaea ma lou talitonuina o lou nei tagata.

Faafetai mo fesili e pei ona tuuina mai. O le a ou oo muamua atu i le energy efficiency po o energy efficiency products. O lo o i ai le Energy Komiti a le Malo o lo o Taitaifono ai le Afioga i le Minisita o Tupe, ae o lo o i ai foi ma le Afioga i le Minisita mo Galuega, Felauaiga ma Atinae Eseeese, faapea foi ma lou tagata. O le tulaga tonu lava o le Energy Efficiency Products, e i lalo o le vaega lea a le EPC, pe afai o le tulaga lena e pei ona fesili mai. O le tulaga foi lea i le consumption rate o le mea lea po o light bulbs po o a ituaiga..... taavale ma mea faapena o lo'o i ai la le polokalame o lo'o faatino e le LTA.

Ona ou oo mai ai lea i le falaoamata o le 'ulu. E pei lava ona fai atu, e moni le saunoaga e eseese ituaiga 'ulu, ae o le technology lea ua develop e le Faalapotopotoga, e fuafua lava i ituaiga ulu ina ia faaoga uma 'ulu. O le mea lea e i ai nei, o isi 'ulu e samasama lona lanu, ae mafai lava ona aveese le lanu. E faapena foi le manogi o le ulu, e malosi foi pe afai e tao se'i tulou. O itu uma ia, ua uma ona suesue e le Faalapotopotoga ma o lea la ua i ai e pei ona molimau atu i le tulaga atoatoa o le mea lea o lo'o i ai.

O le tulaga foi i le faatinoina o le supply, e pei lava ona ou fai atu, o lea o lo'o silafia uma lava e le mamalu o le Maota nei, o le tulaga o le ulu e fuata, ae o le technology lea ua fai i le taimi e leai ai se fuata, a'o tua atu, o le a la le isi source o le falaoamata lea? O lea la o le a vaai ai loa i le manioka. I lau Afioga i le sui usufono mo Faleata Sisifo, ou te iloa e sao lava le tulaga foi lele o le manioka paepae e tulituli.....e aoga foi isi manioka foi ia lanu samasama e fai ai noodles, e le'i oo atu foi i ai le tulaga o suesuega o lea e faasolo lemu atu lava e faalauiloa le gaosiga o ia oloa.

Ona ou toe oo mai ai lea i la'u folasaga i lo'u Itumalo...

Faafetai mo le fautuaga. O le tulaga lava lea ua sauni nei i ai le Malo, e faaoga ia vaegatupe i lalo o le fesuisuiga o le Tau, e maua mai ai seleni aua lava le atiaeina o le Atunuu.

Ona ou sau ai lea i le tulaga o lou Itumalo. Ou te momoli atu le faafetai, Tupu ma Ee o lou Itumalo, ae le gata foi i lea o Feoi o le Talalelei, le Afaigaluega a le Atua o lo o latou nōnō manū aua lava se manuia o le Itumalo, malo le fai tatalo. Ou te faafetai atu foi i lou talitonuina o lou tagata ma lau faaeaea ia te au i lea tulaga i le Faiga Palota ua tuanai nei...

E momoli atu le faafetai i lau Afioga i le Fofoga Fetalai, faapea foi sui usufono mamalu o le Fonotaga.

O lau fautuaga i lo tatou Itumalo, ua uma le Palota, aua le toe tepa i tua ae tatou galulue faatasi e tauave le ta avega ina ia atinae lo ta Itumalo i se mea e lelei mo le agai i luma. Ou te talitonu, o lou finagalo foi lea, ina ia ave la ta faamuamua i so ta sao i le atinaeina o le lautele o Samoa mo a taeao. E le faagaloina foi atinae o lo o i ai i totonu o lo ta Itumalo e ao ona faaleleia. Ia aumaia lau faatuatuaga, ua ou iloa uma ia tulaga o mea e ao ona faaleleia i totonu o le Itumalo, ae tapuai maia o se taimi o i luma tatou toe feiloai.

Ae o lenei itula, ona seu mai ai lea o lou vaa i fanua, ia manuteleina lau Afioga i le Fofoga Fetalai, faapea foi ia tulaga o paia ma mamalu o sui usufono uma, ia manuteleina le tapuaiga a Samoa. Soifua.

23 IUNI 2011

Afioga Hon MAGELE MAULIU (Minisita mo Aoga, Taaloga ma Aganuu): Lau Afioga i le Fofoga Fetalai, mua pea ia mea i Matautu Sa o le viiga ma le faafetai i le Atua i Lona alofa ma Lona agalelei, lea ua o gatasi le Futia ma le Umele i le finagalo o Lana Afioga Mamalu O Le Ao o le Malo, aua le tauaofiaga a le Palemene Lona XV a Samoa.

Ou te faatalofa atu i lau Afioga i le Fofoga Fetalai. Ou te faatalofa atu foi i lau Afioga i le Palemia, Sui Palemia, Kapeneta, Minisita Lagolago ma lenei Itu o le Maota.

Ou te faatalofa atu foi i le Taitai o le Itu Agai, Sui Taitai ma sui usufono mamalu uma o lenei Itu o le Maota.

Ou te faatalofa atu foi i le Afioga i le Failautusi o le Fono Aoaofaitulafono. Ou te faatalofa atu i le tapuaiga a Ofisa Sili o Pulega o Matagaluega ma Faalapotopotoga Tumaoti a le Malo o loo tatou faatasi i lenei taeao.

Lau Afioga i le Fofoga Fetalai, a malu peaua le masina ona iloa lea ua o'oo'o tūtū le tai, ae a taaalii seu le tuavao ona liligo lea o vanu ae malu mauga le fogatia ona lagona lea o le lilia o le tino aua e faigata le e'e tapuai ma le faafofogaaga a Samoa.

Ona ou faapea atu ai lea ma le faaloalo, tulouna Lana Afioga Mamalu, O Le Ao o le Malo ma lau Masiofo. Tulouna lau Afioga i le Sui o le Fono a Sui Tofia ma lau Masiofo. Tulouna le Faamasino Sili ma le vasega o Faamasinoga. Tulouna le Aufaigaluega paia a le Atua i fata faitaulaga e fia i le Atunuu, o lo'o faafale-le-malu ma faanōnō manū mo Samoa. O ou paia ma ou mamalu ua poto ai moli i futiafu e tasi i ona tulaga faalupeina aua Aiga ma Tama, Tama ma o latou Aiga, Aiga o Nofo, Aiga o Pāpā, Aiga o E'e, Aiga o Tupu, Aiga o Tafaifa, alaalatai Faleupolu o Tofiga, ae tainane le Usoga a Tumua ma Pule, Itua ma Alataua, Aiga i le Tai ma le Vaa o Fonoti. O ou paia ma ou mamalu ia Samoa faale-Atunuu, faale-Malo ma faale-Tapuaiga. O paia e afua mai i le Malae e oso a'e ai le la seia paia le pa sopoia ma le lualoto o le fāfā, tulou, tulouna lava.

Lau Afioga i le Fofoga Fetalai, ao lei oo se faamatalaga i mataupu sa laga e sui usufono, na o lou fia pai lava i lou Itumalo o Faasaleleaga Nu. 1, Salelologa, Salelavalu, Iva ma Lalomalava. Ou te faatalofa atu lou Itumalo pele i le Afio o Ti'a ma Lumanauvae, Susu Su'a ma Tinousi, Susu le Malelega a le Malietoa, Alaalatai le Falefia ma Fale Salafai, o le Lologapule faapea le Faitoaga. Susu foi Su'a ma Aiga Sa-Su'a, Afio Tusani ma le Aiga Sa-Tusanī, alaalatai Sa-Tilafaiga ma le Malae, Afifio le Aiga Salevalasi, Afio le Tootoolii, Afio le Alo o Tagaloga, Alaalatai Sasulu ma Taulauniu ma lau Fetalai Leauanae. Afio oe o le Tamaitai, Afio Usualii ma le Falefa o Atiulagi, Alaalatai le Faletolu ma Oe Safuamua. O paia le popo ia o lo ta Itumalo. Ou te avatu le faafetai tele i lou Itumalo mo lenei faatuatuaga tele ua outou aumai mo lou nei sui usufono faatauvaa. Faafetai i lau puletō, ou te lei faalataina lau tofa i ni tupe poo ni taumafa. E leai foi sau Komiti na tafaleina lau tofā ae sa tuu atu lava i lau uta, ae faamoemoe i le Atua ma Lana faasinomaga. O lea ua tali mai le Atua ma ua tautala le Faugagana ua outou tusi aao i lenei auauna faatauvaa, ou te avatu le faafetai tele lou Itumalo. Tuu maia la outou lagolago ae sei alo ane la outou auauna e tautua oe i le lima tausaga, e vaivai ae faamoemoe i le fesoasoani mai o le Atua.

O lenei avanoa ou te faafetai atu ai i lou tuafafine le Afioga Gatoloaifaana Amataga Alesana Gidlow mo le lima tausaga ua mavae. Faafetai tele mo galuega lelei mo lo tatou Itumalo, sagai mai ta galulue faatasi mo lo ta Itumalo.

I sui sa matou tauva i le Palota, faafetai le taaalo faa-tausala ma le malolo faa-tamalii, e ui i le taimi sa satia ai lo ta Sa ona o peau laga ma ni gasegase ao lea ua alofagia e le Atua ma ua tatou maua le loto faamagalo.

Fai mai le Fetalaiga a lo tatou Alii o Iesu: “Ia faafitugafulu ona e faamagalo i lou uso.” Afai o faafofoga mai lo’u uso na ma faamasino, ua ou faamagalo ia te oe e faa-faselau ivasefulu.

Lau Afioga i le Fofoga Fetalai, o le faalagiga o lou Itumalo “E mata ae vave”, e mataalia toe vave, e faalagilagi o le numera tasi ae le taulia ai le Faasaleleaga Nu. 2, 3 ma le 4.

Lau Afioga i le Fofoga Fetalai, e vave lava lau folasaga. O le tulaga i faleaoga mo le fia fausia ma le toe faafouina ma anofale o faleaoga mo le faatotogaina, le mamalu o lenei Maota ia faaauau pea polokalame a le Malo ua leva ona faataatitia mai e ala i le faafouina o faleaoga faatasi ai ma le fesoasoani mai o ana paaga mai fafo. Afai o ni faleaoga fou, e faia uma o outou faleaoga aua o lo o i ai le polokalame faataatia. Ona pau lava le tulaga ia outou tausia aiaiga o lo o faataatia e le Matagaluega o Aoga, Taaloga ma Aganuu. Afai e tuai atu, ia lava le onosai ona o lo o tau fuafua a tatou tupe, a’o le mea moni lava afai e alu atu le asiasiga a le Matagaluega ma faamaonia ua tataua ona fai lo outou faleaoga, e fai lava. O le faatotogaina o faleaoga o le matafaioi lenei a le Komiti o Aoga aua e i ai le feagaiga e saina e le Matagaluega ma le Komiti o Aoga, e tau atu ai o la outou matafaioi o kesi ma nofoa ma isi mea, peitai i le mamalu o le Maota e i ai le fesoasoani a le Matagaluega o Aoga, Taaloga ma Aganuu, e le nofoai. E mafai ona tuu atu le tauau a le Matagaluega e fesoasoani e saili mai ai ni tupe mai fafo e faatupe ai kesi ma nofoa pe afai e manaomia le fesoasoani.

O malae taaalo ma malae ua i ai ae toe fia faaleleia, o le tasi lea polokalame faaauau a le Malo o lo o faatino e le Matagaluega i lalo o taaloga, ina ia tofua aoga ma le malae. E i ai foi malae ua faatasi, faalua ma faatolu ona faaleleia e le Matagaluega ona o le naunautaga lava ina ia ola lelei alo ma fanau o le Atunuu, ia malosi le tino ma maua ni tagata taaalo mo le lumanai o Samoa.

O pasi mo aoga, o loo i ai foi le naunautaga o le Matagaluega ma le Malo i se taimi i le lumanai pe a lava a tatou tupe, e fesoasoani ai i alaafaga ma afioaga mo ni pasi i le faigata o le feoai ai o tamaiti. O loo silafia e le Matagaluega o Aoga, Taaloga ma Aganuu aua e alu a latou asiasiga i masina taitasi i le faigata o loo i ai nisi o afioaga.

O pili o Aoga. O loo i ai le polokalame faaauau a le Malo ma le Matagaluega o Aoga, Taaloga ma Aganuu ua totogi pili o Aoga Tulaga Lua. O loo i ai foi le polokalame a le Malo i sikolasipi o loo ave i Iunivesite e fesoasoani i aiga e vaivai le tamaoiga, e tele sikolasipi o loo ave i Le-Papaigalala, USP i Alafua ma le Iunivesite Faa-Fomai.

Lau Afioga i le Fofoga Fetalai, o le tologia o pili mai le Tausaga 9 i le Tausaga 13, e tuu o le a lenei mea lelei? O le tasi lea faamoemoe vaai mamao a le Malo i se taimi e lava ai a tatou tupe, ona totogi foi lea e fesoasoani i pili o le Tausaga 9 e oo i le Tausaga 13.

A oo atu i le isi lima poo le sefulu tausaga, poo le a le umi ao loo i ai lava le naunautaga o le Malo mo le fesoasoani.

O meaai a tamaiti. Ona pau lea o le vaega e tau faaletonu ai matou o le faia o lunch a tamaiti. Lau Afioga i le Fofoga Fetalai, ina nei ave, ave ao a mea a matua e fai? Ina ne’i o tatou naunau e ave ae ave ma mea tatou te aveesea ai le manuia o fanau i le faamanuia mai o le Atua e ala i matua. A e faitau i le Salamo 127 fuaiupu 3; “O fanau o le tofi mai le Atua”. Se’i fai se galuega a matua, aua o le tamaitiiti a tilotilo atu ua ala ane le tina i le taeao ma auli le ofu aoga, fai le laumoli, tago atu talatala mai le sisipeni o loo nonoa i le ie, o ai a le oso se alofa. O lenei ua outou silafia, tuu atu ia le lunch e fai e matua ao loo i ai le...

Lau Afioga i le Fofoga Fetalai, o le toaitiiti o faiaoga. O le tausaga ese lenei i le tatou Iunivesite e 700 tama ma teine o lo’o aoaoina faa-faiaoga. O lona uiga poo le isi tolu i le lima tausaga ua ausia le ratio lea o faiaoga i tamaiti aoga o loo i ai. O loo taumafai le Malo e faatosina mai ē ua iu mai i le Vasega 13 aemaise o le Tausaga Preparatory Year a le Iunivesite ina ia ofi i lea polokalame e 700 o lo’o aoaoina ai.

O le tatou Telex Centre, lau Afioga i le Fofoga Fetalai o le a tali atu i ai le Minisita mo Fesoataiga ma Faamatalaga Tekonolosi o ia tonu e i ai lea matafaioi.

O totogi o faiaoga o loo fai lava e le Malo siitaga mai lea taimi i lea taimi e faatatau i le tau o le soifuaga, e aofia ai faiaoga ma isi vaega o le public services. E fai foi o le naunau ae leai lava se isi e le naunau ina ia sili atu totogi o faiaoga ae o soo se public services lava e i ai le relativity i totogi ae leai lava se isi e le o aoga i le tautua a faiaoga. Ou te iloa foi o loo lata mai se taimi e toe iloilo ai a’o faiga faavae e iloilo faatasi ma isi tagata faigaluega a le Malo.

Lau Afioga i le Fofoga Fetalai...

Lau Afioga i le Fofoga Fetalai, o loo i ai le polokalame o loo galulue faatasi ai le Matagaluega o Aoga, Taaloga ma Aganuu ma le Matagaluega o le Soifua Maloloina i taumafa paleni, ua fai sina umi o faagasolo lea polokalame, e le gata i le aoaoina o matua ae faapea foi ona aoaoina o tamaiti aoga, o loo aoaoina foi ma i latou o loo faia faleoloa i totonu o faleaoga, ina ia taumafai e fai le meaai e gafatia e tamaiti le tau ma ia paleni lelei.

Lau Afioga i le Fofoga Fetalai o aoga nei e faaigoa o Community Learning Centres e pei o ni mataupu faa-Matata, o loo i ai foi polokalame a le Malo e faatauaina ai nei aoga ina ia toe tau lalaga mai ma faamalosia Aoga i tua i Aoga a Itumalo ina ia faapipii i ai aua galuega a le autalavou aemaise o afioaga mamao e pei o Fagaloa.

Lau Afioga i le Fofoga Fetalai, o le Compulsory Education o loo ua i ai faagasolo ae tuu mai se avanoa i le Matagaluega o Aoga, Taaloga ma Aganuu sei amata lelei ai ona faamalosia lea Tulafono fou ua amatalia. O loo galulue faatasi ai ma le Matagaluega o Leoleo, Falepuipui ma Tinei Mu ma le Matagaluega mo Tina ma Tamaitai, Atinae o Nuu ma Afioaga ma Agafesootai faapea Parent Teachers Association ma Pulenuu o nuu i tua.

O Aoga Faataitai. Lau Afioga i le Fofoga Fetalai, e leai se aia a le Matagaluega o Aoga, Taaloga ma Aganuu i Aoga Faataitai, e tuu lava i le faitalia o le nuu, afai e fia fai sana Aoga Faataitai ona fai lea ae ia faamalumu le National Council of Early Childhood Education, o iina e faamauina ai.

Lau Afioga i le Fofoga Fetalai, ou te talitonu ua maea mataupu sa laga e sui usufono o le Maota. Ia manuia tele lau Afioga i le Fofoga Fetalai faapea sui usufono uma o le Maota. Manuia Samoa ma ia Soifua.

23 IUNI 2011

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai ma le mamalu o lenei Maota, ou te talitonu ua lasi fetalai ma saunoaga aua paia, sa ma faiga o lenei Maota. E faapea foi i lo tatou Atunuu o loo faafofoga tapuai mai. O le a le alo lava i le ata o le niu pe augata foi se taofi e tautala ai i lea tulaga ona e tatau lava ona fai, ina nei faitauina se leo o le auauna e tusa ai ma lea tulaga.

Lau Afioga i le Fofoga Fetalai, o paia o lenei Maota e le o ni paia faatoa toe tau fatufatu. O paia ua lauvivili ai ē sa toai taunuu mai i totonu o le Maota ma faavaeina tulaga aloaia o loo tatou solisoli muliaao ai nei. O le Palemene ma ona paia maualuga i le Afio o Lana Afioga Mamalu O Le Ao o le Malo, lau Afioga i le Tama a Aiga. O paia tatou te taulagi pea aua e ave i ai le faamuamua ma faatili i ai lau o le fō.

Tulouna Lana Afioga Mamalu O Le Ao o le Malo, Afioga Tui Atua Tupua Tamasese Efi ma lau Masiofo. Tulouna le Sui o le Fono a Sui Tofia ma lau Masiofo.

Lau Afioga i le Fofoga Fetalai ma le mamalu o le Palemene, Afio lau Afioga i le Palemia ma lau Kapeneta, le mamalu o le Taitai o le Itu Agai ma le Sui Taitai ma lena Itu Faaupufai o loo Agaia le Malo.

Tulouna lau Afioga i le Faamasino Sili ma le Ofisa o Faamasinoga. O le tafatolu lea o lau Faigamalo, tulouna lava.

Le paia o Samoa i le faafofoga tapuai mai a Aiga o Tupu, Aiga o E'e, Aiga o Pāpā ma Aiga na Tafai, o Aiga ma o latou Tama, Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, tulou, tulou lava. O paia ua uma ona tofi e le toe toesea i se upu pe toe faamuamua i sa'u faamatalaga. Ae taoto ia a'o se taotoga a i'a sa, taoto a'o se i'a mai le moana e tumau e oo i le faavavau.

Lau Afioga i le Fofoga Fetalai, e ui lava ina momoo faalupe o le toafa naumati le taofi e fia tautala e tusa ai ma le tofia o Au i lenei Nofoa, e taliu lava ae popo'e. E see lili'a foi Ulufanuasese'e ona o le tulaga o lou tulai atu i luma o lenei Maota ao loo manino le mata o le vai ia i latou na tusi-ao ma faatietie ai lenei sui usufono i le maa salafa, le Nofoa o le Itumalo. E le galo le tapuaiga i lou Itumalo, o paia o le Aiga Sa Tuala, Aiga o Mavaega, le Taulagi, Tamaaitu ma le Maugafa, Mamalu i le Faletolu ma Fuaifale, o paia ia o Faleasiu.

A oo atu i le la itu o le Itumalo i le paia o le Aiga Sa Tuala, Leaupepe ma Aiono, Su'a ma Toleafoa ma le mamalu i le Taauaso, le Tuua ma le Falefitu aemaise o le Fetalai i le Matua o Tauau, tulou, tulouna. Ae avea ia lenei avanoa e oo atu se leo o le auauna ma momoli atu le faafetai i la outou puleto i le faaaloalo ma le amanaia o lou nei tagata faatauavaa e nofoia le Nofoa o loo tatou Itumalo e vaavaalua ma se tasi o sui usufono, Afioga Leaupepe Apulu Toleafoa Faafisi ma te tauaveina lo outou finagalo aua se sao o loo tatou

Itumalo i Faigamalo. E le galo Afia i lona vao, o lau pule ma lau faaaloalo o se tulaga maualuga e le mafai ona ausia i se tu ma se aga, ao se upu foi ma se tala, o le upu moni o le a lava se mea o le a mafai ona ma tautua ai i lo outou paia ma le mamalu, o le ave atoa i ai lo maua malosi. E le galo upu ma tala na fai ao lei oo mai i totonu o lenei Maota i lau pule ma lau faasoa mai.

O le tulaga i lo tatou mafatiaga o loo i ai, o lona ua outou faafofoga ma ua maea foi ona saunoa i ai se tasi o sui usufono o lo tatou Itumalo, Afioga Hon Leaupepe Toleafoa Apulu Faafisi ma te galulue faatasi aua se manuia o lo tatou Itumalo. O lona ua to foi le matupalapala ma ua maea ona saunoa le Minisita e fitoitonu i ai lea tulaga o le galuega.

O le tatou suavai ua folasia i le Maota, a maea Papa ma Neiafu ona sosoo loa lea ma Faleasiu. O le tulaga o le suavai i Faleasiu-uta faapea ma Lepale.

O le auala galue o Lealalii o lona e silafia. O lo oulua toalua ē o loo vaaia le Maota ma le Nofolalii faapea tulaga maualuluga o le tatou fuaiala i Lealalii, o loo silafia le faapogai ua tuai ai le faatinoga. O loo taoto atu pea sei saausi feutagaiga aua eleele o loo aafia i lea faamoemoe na ala ai ona toe toloa le faatinoina o le galuega i le auala galue. O nisi vaega o loo taoto o le a taumafai ma seu silasila, o le mea e i ai la outou tofa ma le faautautaga, o i maua o ni auauna vaivai e faatinoina lo outou finagalo i se tulaga moomia.

O le a agai tonu loa se faamatalaga ma sagai tonu lau o le fo ma agi faasulu le siu amouli aua le tali atu i nisi o vaega sa laga i lenei Matagaluega mo le Soifua Maloloina.

O le Itumalo o Falealili, Gagaemauga Nu. 2, Aana Alofi Nu. 3, Palauli Sasae, Faasaleleaga Nu. 4 ma Salega, o sui usufono nei sa talosaga mai i vaega e lua. Muamua, e fia manaomia se Fomai e nofomau i o outou falemai.

O lona lua, ia faapoopo le asiasiga a Fomai o loo taitasi i le vaiaso.

Mo lo outou silafia, o le Malo e 44 Fomai o loo tautuaina le auaunaga faa-Soifua Maloloina ma o loo faafaigaluega i lalo o le Malo. O le faasoaina o nei Fomai e 44 ae 4101 tagata e vaai e le Fomai e toatasi pea tufatufa i se tulaga faapena, o iina tou te silafia ai le utiuti o le faasoa o Fomai o loo galulue mo le faatinoina o galuega a le Matagaluega o le Soifua Maloloina i totonu o le Atunuu. O le ala lea o le faia o lea fuafuaga ma ua faaoga i ai tupu ma tamalii o le Atunuu o loo galulue faa-Fomai tumaoti ma faafaigaluega e le Matagaluega e faatino lea galuega i le asiasia o Falemai i tua e tasi i le vaiaso, o le taumafai ina ia oo pea lea auaunaga i lo outou paia ma lo outou mamalu. E i ai lava le taimi o le a silasila mamao i ai le tatou Matagaluega ina ia mafai ona faatino lea auaunaga ona o le aua lea o aute ae ua fai fuafua i le utiuti o le afaigaluega. E i ai le talitonuga ona o tulaga agai luma o faaleleia o auala faapea foi taavale o loo faaogaina e Itumalo lea ua mafua ai le fuafuaga. O lea ua uma ona pasia e le Kapeneta i le masina talu ai taavale double cab four wheel drive e 8, e tausi ai falemai i nuu tua, e tofu ai falemai e fa i Savaii faapea foi ma falemai e fa i Upolu nei. O le a outou molimauina i se taimi lata mai.

O le sui usufono mo Alataua Sisifo sa fesiligia pe moi le fuafuaga o le a sii le falemai i Sataua i Asau ona o lea sa faaupu mai ao le tala faalogo. Ao lea ua faamaonia o le tala faalogo lea mea. E leai se fuafuaga faapea a le Malo o i ai i le taimi nei. O le siitaga o le falemai lea e le faigofie ao le agaga o le Matagaluega lea e i ai, ia sii ese mai le falemai mai tai ona o le tele o le afaina o mea faigaluega a le falemai ao le tele foi o le lamatia i le louloua o le tau ma mala faanatura e pei ona i ai le tsunami. Aepeitai e le o se tulaga faigofie lea mea o le sii aua ua outou silasila i ai o loo manaia le falemai o loo i ai. Ae ua i ai pea le lagona ma le fuafuaga e le tataua ona tumau ai pea i i.

O lea ua uma ona saunoa le sui usufono mo Vaisigano Nu.2, o lea ua maua le fanua e siitia i ai aua o le agaga moni lea ou te faatauaina ai le saunoaga a le sui usufono mo Faasaleleaga Nu.2. Sa saunoa i le autu e faapea “Tatou galulue faatasi, ia lalago faatasi tatou foe” o upu ia o lea ou te quote ina atu. Ae saunoa se tasi o sui usufono mo Palota Taitoatas, Afioga Maualaivao Pat Ah Him, fai mai, “faatau le mai”. O gagana taiala ia i se manatu i lenei taeao e tusa ai ma le sagai atu i le faatinoina i le galuega a le Matagaluega o le Soifua Maloloina. O le saunoaga a le Director General poo le Taitai o le Faalapotopotoga o le Soifua Maloloina o le Lalolagi i le fonolona 64 lea sa usua i Sineva, fai mai lona faa Peretania, “remember the people, never forget the people, all of our debates and discussions have meaning only when they improve the health of the people and relieve their suffering” a ou faa Samoa ina, “manatua tagata aua lava nei galo ia te i tatou tagata, poo le a lava le matagofie o tatou manatu e faaalua ma le malie o finagalo faaalua ae afai e faaleleia ai le soifua maloloina ma tuuaititia ai mafatiaga o tagata e leai lava ma se aoga”. O le manatu

autu foi lea o loo taiala ai se lagona i lenei taeao e tali atu ai i outou popolega ma atigaluga e tusa ai ma le faatinoga o le auaunaga i outou Itumalo.

O le saunoaga a le sui usufono mo Alataua Sisifo ua leai ni panadols...

O lenei ua fesoasoani atu le Afioga i le Palemia. O le tulaga lenei lea sa faamalamalama atu ai aua o le taimi nei o falemai uma nei o loo tofua ma le fale talava'i ona o lea sa i ai i le saunoaga o lea ou te faamauiina faapea ua leai ni panadol leai ni vailaau. O le aso 14 Aperila na ou taamilo ai i Savaii i falemai uma la ma le aso 19 Aperila na ou taamilo ai Upolu i falemai uma ia. O lea ou te tautala atu ma le mautinoa e le faamaoni lea tulaga.

O vailaau lea e faapea e le maua, o vailaau e le mafai ona tuuina atu e teine foma'i seia vagana le faatagana a le foma'i. O le pili o le falemai la e i ai i le taimi nei i telefoni e matautia le maualuga. E tele le tupe alu o loo totogi e le falemai i le totogiina o telefoni ia ina ia fesootei mai ai falemai uma ia e i nuu i tua pe afai e i ai se vailaau o manaomia vave mo se mai ua tataua ona ave i ai ae le i lalo o le malosiaga o lana faatagana ona ave i ai le vailaau, ona avatu lea o le faatagana pe a uma ona faamatala mai le gasegase o mea ia o loo maua ai, ona fai lea o le diagnosis a le foma'i e aupito sili ona latalata i ai o loo talia le telefoni ma faataga ai loa teine foma'i e ave la i ai le vailaau lea ona faatoa mafai lea ona release antibiotics ma isi vailaau e le i lalo o le faatagana ona tuuina atu e le mamalu o loo tautuaina le Atunuu i tamaitai tausi soifua.

Lau Afioga i le Fofoga Fetalai ua palega auau le taliga o le sua i lau Afioga, le Afioga i le Palemia faapea foi sui mamalu o le Kapeneta. Ou te talitonu ua maua se faamalosiaga.

E momoli atu le faafetai i lau Afioga i le Fofoga Fetalai mo taliina o le fono usu a Samoa, maeu lenei vaitau i le felanulanuai o tapenaga aua tatou fonotaga.

Lau Afioga i le Fofoga Fetalai, sa ou taumafai e avatu i se tulaga lautele popolega ma mataupu n alaga e sui usufono ina ia maua ai foi se fesoasoani mo i latou e lei saunoa i le tulaga o le soifua maloloina. Peitai ua maitauina, ua avea foi lea ma tulaga ua saofaga ai ia le tutulai mai foi o nisi sui usufono e le'i saunoa i mataupu tau soifua maloloina.

Ae atonu e lelei foi lea, e pei ona saunoa le Afioga i le Palemia, o lo o i ai pea le tatou lagona e fia faalogologo mai pea ma faafofoga ia tatou Itumalo, o ta'uta'u atu suafa o sui usufono ma mataupu na latou laga. O lea la aua e le tóatele nisi na laga mataupu tau soifua maloloina, ia o le a faigofie pe a asiati atu loa i ai i mataupu taitasi, o lea na laga mai e sui usufono ma taofia ai le tutulai mai pea o nisi sui usufono mamalu e le'i saunoa i mataupu tau soifua maloloina.

Lau Afioga i le Fofoga Fetalai, o le a ou amata atu i se tasi o sui usufono mo Falealili, Afioga Tusa Misi Tupuola, na laga mataupu e tusa ma se ambulance mo le falemai i Poutasi. O le taimi nei o lo o i ai le ambulance i Lalomanu, e ui ina e le o atoatoa lelei foi ia le ambulance lea, a o lo o faaoga pea ma o le a tilotilo totoa pea i ai le Matagaluga, o Poutasi foi o lo o tau lalata mai i Apia. O lea e pei ona ou taua i le taimi ua mavae, ua uma ona approve e le Kapeneta ia taavale fou mo Poutasi e fesoasoani ma aumaia foi ma nisi gasegase mai Poutasi. A silasila lava i ai o lenei e silafia uma lava e le Atunuu tulaga o le faaogaina o le ambulance, aemaise gasegase mai tua, e seasea manaomia le service a le ambulance, e tele lava o gasegase lea e mafai ona faatino mai i isi auala. O le faamaoniga o lenei tulaga, lea e pei ona taua e le sui usufono, a leai le ambulance e aumai lava e isi taavale tua, o lea la ua i ai ma le isi taavale fou lea ua avatu e fesoasoani i ai i le falemai lea i Poutasi, a tuai atu le ambulance, faaoga mai le tatou taavale lenei e aumai ai ni gasegase e manaomia ia le aumai vave i le falemai i Apia.

O le tasi vaega na laga, o le tulai mai lea o le... sa fia mautinoa pe o le a siitia ia Poutasi pe leai.

O le taimi nei pei ona ou taua foi e tusa ai ma le tulaga lea i Sataua, ua uma ona pasia talu ona uma le Tsunami, ua uma ona pasia e le Kapeneta le siitia o Poutasi ma Fusi i se tulaga maouta mai le sami, ona talu ai le tele o le afaina lea na lamatia ai le soifua ma le saogalemu o le falemai mai le taimi o le Tsunami. Ina ua maea la le Tsunami, fai ai loa ma le faaiuga a le Kapeneta, faatasi ai ma le maliega mo le faatupeina o le siitia o falemai ia i uta.

E pei la ona ou taua muamua, e le faigofie le o atu sii le falemai, e saili muamua le tulaga o le a siitia i ai, maliega o issues tau fanua ma tulaga uma faapena e tapena muamua, ona faatoa mafai ai lea ona faatino le faamoemoe lea. I lau asiatisiga ia Aperila, o lea na feiloai ai foi ma se tasi o tamalii o lo o fesoasoani tele i le tausiga o le falemai lea i Poutasi o lea e silafia e le sui usufono, na ia taua ai o lo o i ai lona fasi eleele i uta e maouta ma le mea lea o lo o i ai nei le falemai e mafai ona siitia i ai le falemai pe a faapea e manaomia

se siitia, ma le taimi e faatino ai lea faamoemoe. Ia o upu lava ia e fai, o lena tou te silafia, o nei mea o maliega faapenei ma faatalatalanoaga, se'i vagana ua pipii i lalo o le pepa ma fai le maliega ina ia 'aua ne'i fau atu foi le falemai ae toe taofi mai foi e nisi, ia ona tulai mai foi lea o nisi tulaga. O mea la ia e lavelave e faigata ai ona faatino, a o le faamoemoe lea e i ai, e manaomia le siitia i uta o Poutasi ae le iloa le taimi e siitia ai. O lea foi ua uma ona i ai ma le faamanuiaga a le Kapeneta i lea fuafuaga, o lea e faagasolo pea tulaga e tataua ona faatino, ona faatoa taunuu ai lea o le faamoemoe lea.

O le ala foi lea e pei ona taua e le Afioga i le sui usufono, o le fale lea o lo o nonofo ai le aufaigaluega, e manaomia le faalelei, o le ala foi lea ua faatuatuai ai ona faaleleia le fale lea, ona o lea e talia tulaga ia, aua ne'i uma atu ona fai ma faalelei le fale lea e nonofo ai le aufaigaluega ae siitia ma le falemai, ia ona maumuina lea o lea vaega. A o le talosaga a le Matagaluega, o lo o i ai le fale komiti o le Itumalo o lo o lelei lea sa nonofo ai le Army i le taimi o le Tsunami, e a pe a faaoga le maota lea e see i ai le aufaigaluega e malupuipua ai pei o lea e atugalua i ai le Afioga i le sui usufono, ae o le a lafo atu le tulaga lea i le Afioga i le sui usufono, e silasila i ai aua tulaga mo lona Itumalo ma le faaogaina o le fale lea e see atu i ai le aufaigaluega e talitali ai le taimi e faatino ai le fuafuaga lea a le Malo.

O le sui usufono mo Gagaifomauga Nu. 1, na talosaga mai i se potu faaopoopo mo le latou falemai lea e i Safotu. E pei lava la ona ou taua, ua uma ona ou asiasia i le aso 4 o Aperila le falemai lea, o le falemai lea e tutusa lelei lava fausaga ma le falemai i Poutasi ma le falemai i Safotu faapea foi ma le falemai i Lalomanu, e tutusa lelei model lea e fai ai falemai ia.

O falemai ia e tailua potu e tuu ai gasegase, o le Ward e i ai ma le Multi-Purpose Ward, o lo o faaoga nei e Poutasi potu uma ia e lua, e fa le isi potu, lima moega i le isi potu ona iva ai lea o moega faatasi ma le lua o moega e faaogaina e i latou o tina maitaga e taoto ai, ona sefulutasi ai lea o potu o i totonu o le falemai e tasi. E faapena foi Lalomanu o lo o faaogaina potu e lua. O i la i Poutasi e na o le tasi le potu lea e faaoga, lea e fa moega la e i ai, ae o lo o faaavanoa pea le isi potu o lo o faaoga e teine foma'i, o le mea lea, e i lalo lava o le faasoia ia ma le fetuunaiga a le aufaigaluega o lo o galulue ai, a oo i le taimi e manaomia ai, e mafai lava ona faaoga foi ma le isi potu na e tuu ai foi ma isi mai, o lo o i ai foi ma moega ae le o faaogaina, ona o lea e lava ia le potu lea o lo o i ai nei ma'i, e fa moega la e i ai.

O le average admission i le falemai lea i Safotu, e tusa e 1.2 ia mai i le aso e tasi, o lona uiga e leai se aso e mafai ai ona tumu ai le potu lea...

Sa i ai lava le manatu ou te le tali atu i le tasi lea o sui usufono, ona na te le'i laga se mataupu i lana saunoaga i tulaga tau soifua maloloina, ae ua aoga le tulai mai, o lea ua tau mai ai, e fotu faafuata ia tina fananau o lea foi Itumalo e tai sefulu i le aso, ae omai faatasi lava.

Ia a o le...

E tele lava ni faaupuga e ave i ia ituaiga mea faapea, ae o le a omiomi lava faaniu aleale ni lagona, ona o lea e tau tuli le tatou taimi.

O le saunoaga foi a le tama matua le sui usufono mo Gagaifomauga Nu. 1, ia o le faamalamalamaga lena, afai lava ua finagalo le Itumalo ma e o lo o faigaluega ai e tuu ai masini ae taoto i fafo mai, o le latou lava lea matafaioi, ae ua uma ona tapena ia potu e tuu ai mai. Ia pei o le uiga lea o se faamatalaga o lea e avatu.

O le sui usufono mo Falelatai ma Samatau, o lea sa talosaga mo se falemai mo Falelatai. Mo le silafia e le sui usufono, o le tulaga lea i le falemai e i Falelatai, e tutusa lelei ma le tulaga o lo o i ai nei ia isi falemai ia o lo o faia i ai le fuafuaga ma ua uma ona pasia e le Kapeneta, ia se faiga ina ia laugatasia ai falemai ia i Falelatai, Lefaga, Afega, o lo o outou silasila i ai, lala o lo o tutu falemai tetele na fai e Itumalo e le o faaogaina, ma o lo o tutu ai pea aua e leai se pule i ai a le soifua maloloina, o meatotino a Itumalo, ae ua i ai le agaga o le Matagaluega i se faiga e laugatasia faatasi ai ia Itumalo nei o lo o i ai falemai ia i ni fale e le tetele tele, pe laiti tele, ae ia atoa i ai ia tulaga e fai ai le auaunaga, o lea la e i ai ma le falemai lea o Falelatai.

O lea la e faamalie atu i le sui usufono o le Itumalo o Falelatai ma Samatau, ia faamalo faafetai le tau lagalaga mai, a o le tulaga lena o lo o i ai nei i le taimi nei, ma o lo o faasolo atu i ai fuafuaga a le Matagaluega.

O le sui usufono mo Aleipata Itupa i Lalo sa ia taua.....

Lau Afioga i le Fofoga Fetalai, afai na maua mai e le sui usufono lea ia lau tala na fai atu i le amataga, o lea ua ou faasolo atu e tautau outou suafa ma outou Itumalo, o lea lava la e alu atu le faasologa e oo atu lava i le Afioga i le sui usufono i se taimi e le o toe mamao, aua o lea ua faasolo ina uma e na saunoa i lenei foi Matagaluega.

O le sui usufono mo Aleipata Itupa i Lalo sa taua ai paipa ma atigipusa ua expire. E faamalie atu i le sui usufono ua uma ona fai lau sailiga i lenei mataupu ma ua tautino mai e le aufaigaluega e leai se mea faapea o tupu i le falemai i Lalomanu. Sa ou asia foi lenei falemai i le aso 19 Aperila ma ou matauina ai le tulaga o lea falemai o loo atoatoa ma lelei vaega uma o le falemai. E le o taua mai foi poo le a le taimi na i ai lea vaega ua expire ae poo a foi na mea sa i totonu o atigipusa ae le o silafia e le aufaigaluega ma le Matagaluega, ua maea ona sailia ma e le o i ai se faamaoniga o se mea faapenei na tulai mai. O lea e faamalie atu ai i le mamalu o sui usufono e le mafai ona ou tali atu i lea vaega ona e asa le faiva ae le asa le tau sailia o lea faaaliga na aumai ao le a tilotilo pea i ai.

Faafetai i le sui usufono mamalu. Ona ou see mai ai lea ia Palauli Sasae, o le talosaga ua toe faaleo mai i se falemai ae silafia foi o Palauli, Salelologa faasolo atu i Tuasivi. O loo i ai le Fomai Tumaoti i Salelologa o loo lata ane Tuasivi, ao le lagona lava a tuu i le faasoa e aupito sili ona amiotonu, e tataua ona finagalo malilie Palauli e faaoga le falemai i Tuasivi, ao loo taulalata atu foi le Fomai tutoatasi. O le tasi lea o fomai tutoatasi o loo faaoga e le Matagaluega e asia falemai ia taitasi i le vaiaso...

O le tulaga tuai lava lea sa i ai le falemai, na ou faigaluega mai lava i lenei vaiatau o Satupaitea lava sa i ai le falemai.

O nisi fuafuaga e le i faatinoina o le a tilotilo i ai pe afai o le tonu lea e saunoa ai le Minisita o Tupe mo se falemai i Palauli poo Satupaitea.

Lau Afioga i le Fofoga Fetalai, o le sui usufono mo Faleata Sisifo sa talosaga mo se Centre i le maketi e faaoga ai le maketi ona e leai ni fua o faaeleeleaga a le Atunuu, o loo aumai i tua i Faleasiu ma Fasitoo fua o faatoaga o loo faatau i lea maketi, ae ui o lea o le a tilotilo. O lea ua tuu oe i lalo o le lisi ae taatia mai.

Faafetai i le saunoaga a le...

Lau Afioga i le Fofoga Fetalai, faafetai mo le faamanatu mai e le sui usufono. E pei ona ou tau tata lava i le moa o le ala e tusa ai ma Tulafono Tumau ma le faafoeina o le Fonotaga, e lei saunoa le sui usufono i lenei Matagaluega.

O le tasi foi vaega e faamalie atu i le saunoga a le sui usufono ona o loo taua ai se tasi o auauna o le Malo, ae i ai le faaeteetega. E pei foi ona agiga i lenei Maota ina ia aua nei aafia se tasi e le o auai i totonu o le Maota ma afaina ai lona suafa i se tulaga le faamaonia.

Ua ou faalogologo atu i le concern a le sui usufono ma o le a teu fatu i le loto ae tulimataia pea le faagasologa o a tatou galuega.

E momoli lau faafetai i le sui usufono mo Vaisigano Nu. 2, i lana saunoaga faamalosiua, o se tasi foi sa ma galulue faatasi i le Matagaluega. O le agaga e tilotilo atu lava ma fai mea faalogo i sona foi finagalo ona o le naunautaiga lava o le Matagaluega ina ia lelei ma atoatoa le auaunaga mo tagata lautele. O le tulaga i le OUM sa taua e le sui usufono, o le naunautaiga lava lenei, o le faamoemoe foi lenei o Samoa mo le lumanai i lou talitonuga. O le tulaga i lenei taimi o loo tatou talanoa i le le lava ma le utiuti o Fomai. O le Aoga Faafomai e i ai lona faailoga e amanaia ai i isi atunuu la latou auaunaga ma i latou e faauu mai i lea aoga e aloaia ai e isi atunuu. E le pei o le tele o isi Aoga Faa-Fomai e le mafai ona latou faigaluega saoloto i atunuu latou te le o faitauina i le faitauga o aoga e aloaia i totonu o auaunaga faa-Fomai. E talitonu o le lagona foi lea ma le talitonuga, o se taimi ona agai ai lea i le Iunivesite e pei ona maua o loo ua tapenapena le fausiaina o le Falemai tele i se fesoasoani mai fafo ina ia ave ai i luga lea auaunaga e fesoasoani i le aotauina o alo ma fanau o loo autovaa i le Aoga faa-Fomai.

O loo faapea foi ona laugatasia i le tofa ma le faautautaga ia outou Afioga i Taitai o le Atunuu ina ia tauave lea matafaioi ma ia avea o se puna e tulai mai ma faatuputupulaia le tautua ma le auaunaga a Fomai i totonu o le Atunuu.

Lau Afioga i le Fofoga Fetalai, o le talosaga sa tuuina mai e le Taitai o le Itu Agai, ua uma ona ou faaali atu o le Falemai i Fusi ua maea ona pasia e le Kapeneta lona siitia ma seleni e faatino ai lea fuafuaga ao loo faatali i lo outou Itumalo e soalaupule poo fea le eleele talafeagai ma lava ma ia mamao i uta ma le mea o loo i ai le falemai ina ia faatino ai lea faamoemoe. O le manatu lava ina ia tatou galulue faatasi ma ia mafai

ona fesootei mai pe a maea ona tapena lea vaega e fitoitonu i lou Itumalo, ona faatoa gaoioi atu loa lea o le Matagaluega.

Ou te faafetai foi i le laga e le Taitai o le Itu Agai ona ua saunoa faa-Taitai o le Atunuu ina ia silasila mamao i le aufaigaluega ma i latou o loo galulue ma tautua le Malo, o lea na laga ai le tulaga i totonu o le aufaigaluega. Faafetai mo le tofamamao ma le faautautaga. O loo galulue nei le Matagaluega ma silasila totoa i lea itu ua e taua ae i ai le faamoemoe o le agaga ina ia faafiafia le aufaigaluega ma faapena ona naunautai e faatino o latou tiute ma lo latou valaauina ae tatau foi ona i ai se taui lelei mo a latou galuega. Faafetai i le Taitai o le Itu Agai mo le fesoasoani mai i lea mataupu.

O le mataupu mulimuli lau Afioga i le Fofoga Fetalai, sa saunoa le Taitaifono o le Komiti o Tupe Maua ma Tupe Totogi, sa fesiligia ai le auunaga a se tasi o tamalii o le Atunuu, le Afioga Papalii Benjamin o loo galue mo tatou i Niu Sila. O loo alaala atu le sui usufono mo Vaisigano Nu. 2, o maua na asaina mai lea ogasami i taimi ua mavae, o le faigata o le taumafaiga o ma'i e ave i fafo. O le tele o feuiaga e fai atu iinei ae fua i le talia e fofai. A leai toe fai suesuega ma ia suesuega. O le taimi nei la ua faigofie, o le mai lava e faafuasei ona tulai mai ae manaomia le ave taeao poo ona tala atu e oo atu i o ua uma ona tapena uma e lea foi tamalii o le matai Samoa tulaga uma e manaomia mo le faatinoga o togatitiga i fafo.

O le tulaga la i le faafaigaluegaina, o le tulaga lena i ai, na inherit e au ina ua tulai mai ae pei ona outou silasila mai e lei atoa se ono masina o tauave le galuega. O lau matau o loo lelei ma atoatoa le faatinoga o le auunaga i le taimi nei. O le agaga moni lava a tuu i mea lelei poo isi foi alo ma fanau a le Atunuu o i fafo, e latou te gafatia lea ituaiga o galuega, e le faavavau se isi ma nei ituaiga galuega, o le Fuata lava ma lona Lou, ae fai mai foi le isi upu, "afai e le o malepe o le a le mea o le fau ai seia vagana ai ua afaina ona fai lea i ai o se fuafuaga". E faapena foi le tilotilo a le Matagaluega, o le ala foi lena ua laaloa ai le silasila ao le tulaga ou te fia tautala i ai ona o le Afioga i le Taitaifono o ia lea sa nafa ma tupe a le Atunuu.

Ou te talitonu ua tatau ona silafia ia vaega aua o soo se mea lava e agai i ai tupe a le Atunuu e oo uma lava i le Matagaluega o Tupe a le Atunuu mo lona faasoasoina ma o loo manino ma atoatoa i le latou silasila. Atonu o lea lava e silafia e le sui usufono e fesoasoani mai i se isi taimi.

Lau Afioga i le Fofoga Fetalai o le taumafaiga lena.

Faafetai i se tasi o sui usufono mo Palota Taitoatasi, Susuga Hon Papaliitele Niko Le Hang poo le Taitaifono o le Komiti o Tupe Maua ma Tupe Totogi. O lena ua taoto atu ni lagona ae talitonu o le a le gata ai iinei ia tulaga. O ai lava le Tautai matapalapala, e tatau lava ona i ai se i'a e sē i ama. Lau Afioga i le Fofoga Fetalai ma le mamalu o lenei Maota, ua maea mataupu sa laga i lenei Matagaluega ma e momoli atu atu ai le faafetai i lau Afioga i le Fofoga Fetalai mo le faafoeina o le Fonotaga. Faafetai i sui usufono i a latou mataupu na laga e fesoasoani mai ai i le faatupu manatu ma fatufatu ai le auunaga faasoifua maloloina o le Atunuu.

Ia manuia le Fono.

17 IANUARI 2012

Tofa FAGAAIVALU KENRICK SAMU (Aleipata Itupa i Luga): Faafetai atu i lau Afioga i le Fofoga Fetalai, e tusa ai foi ma le avanoa ua tuuina mai e taumafai atu ai se sao o lenei Itumalo o Aleipata Itupa i Luga e tusa ai o le Tulafono Tau Faaofi o le Faatatauina o Tupe Faaopoopo (Nu. 1) 2011/2012.

Lau Afioga i le Fofoga Fetalai, ua uma ona e tapui le tapu a Tupu ma e sausuina le niu ua uma ona e toto i le tuaoi aua lo tatou va tapuia ma le Atua. O lea foi ua e momoli lapalapa o Malo i la tatou faasagi ma le tatou faapolo i lenei taeao fou. Ia saga viia ai pea le alofa ma le agalelei o lo tatou Tapaau i le Lagi aua o lea ua ia momoli mai lo outou soifua ma lou nei ola i lenei taeao, aua o se taeao na atofa ma se taeao sa loma, ae a le Fono Usu a le Atunuu i lenei taeao, ona ou faapea lea o le a ou le toe oo i ai se leo o lenei usugafono.

Lau Afioga i le Fofoga Fetalai, o le a ou le toe faamapuea auma masani ma galu fati oo tutu o lo tatou taeao aua e ui lava ina tagutugutu le ala ma maualuluga mauga a ua iloga lava tulaga o Tama ma o latou Aiga, Aiga ma Tama. Ua iloga foi le fala see talaluma o le faleupolu tofia o Samoa. E loloto le moana a ua iloa gofie ona maa taua ma ona penina tautele.

E maualuga foi le vanimonimo a ua faigofie la outou silasila ma maimoa i fetu pupula e tapasa ai le folauga a Samoa i luga o le sami ma luga foi o le laueleele. O Samoa o le atunuu ua uma ona tofi aua e tala tau Toga

ae tali tofi Samoa. Ua uma ona tofi i le malae vavau, ua uma foi ona tofi i tulimatala ma siu o le faitotoa, o Siumoo foi ma Vaioa o Lalogafuafua ma Sepolataemo. O Samoa o le Maota ua soo lona atuao, o le sami e le soona fagotalia e se tautai aua ua taoto alao ona upu, e le o toe tapuvaeina pe toe utuvai tofo i ai se tasi i le papa le gae o tupu ma le fala le see o le faleupolu. O le ala lea o le a ou le seu ai i le tai sei faanae ao le tai o le taeao aua ua ite le matagi aua ua tu tafaitoa lagona na ufiufi a manu gase ina ua sausu fia lele le manu a Letagaloa. Aua e fai foi o le ulu o le galu ae popoe foi le taofi i siu o le galu na see lilia ai le tama o Saveasiuleo. Ae o le a ou pii paia faalupetu i mulifale le uagalu leliaga ma le siaga aua o lea ua tuta le Sa o le Aiga Sa Tunumafono e pei o le Fetalaiga ia Salemuliaga.

Lau Afioga i le Fofoga Fetalaiga ou te muai faatulou i le paia o lenei Maota i Tiafau i le Malae o le Faautugatagi a le Atunuu. Afio lau Afioga i le Palemia o loo e tu i matagi olo aua aso lelei ma aso louloua o le Sa folau o Samoa aua sona manuia a taeao. Afio lau Afioga i le Sui Palemia ae tainane Minisita uma o le Kapeneta, ou te faatulou atu foi i lau Afioga i le Fofoga Fetalaiga aua o oe e te faatonu folauina le Maota o Samoa. Afio lau Afioga i le Sui Fofoga Fetalaiga, ou te faatulou atu foi i le paia o lea itu o le Maota i le Afio o lau Afioga i le Taitai o le Itu Agai aemaise o le Sui Taitai ma sui usufono mamalu uma o le Fono usu a le atunuu i lenei taeao fou. Ou te faatulou atu foi i tupu ma ee ma tamalii o le Atunuu, Ofisa Sili o Pulega ma Faalapotopotoga Tumaoti a le Atunuu aua e le faagaloina lo outou sao taua ae a le tamaoaiga faasoa o le Atunuu.

Ou te faatulou atu foi i le faafofoga tapuai mai a Lana Afioga Mamalu O Le Ao o le Malo, Afio lau Afioga i le Sui o le Fono a Sui Tofia, lau Afioga i le Faamasino Sili ae tainane Alii ma Tamaitai o le Faamasinoga. O le paia lava lea aua Tama ma Aiga, Aiga ma a latou Tama, le Usoga a Tumua ma Pule, Ituaa ma Alataua, Aiga i le Tai ma le Vaa o Fonoti.

O le a le mafai foi ona vaea le fala ooto, ou te faatulou atu ai i le faafofoga tapuai mai a Tutuila ma Manua, o paia lava ia aua Sua ma le Vaifanua, Fofu ma Itulagi, Saole ma Saleaamua ma le Launiunasaalua, Tootoo o le Faleula ma upu ia te oe le Manuatele. E avea foi lenei avanoa ou te faatulou atu ai i Taitai uma o Ekalesia taitasi i totonu o lo tatou Atunuu aemaise o faafeagaiga taulagi o loo faanono manu aua so tatou manuia mai le Atua.

Lau Afioga i le Fofoga Fetalaiga, ao lei avatua se sao o lenei Itumalo e tusa ai ma le Tulafono Tau Faaofi o le Faatatauina o Tupe Faaopoopo (Nu. 1) 2011/2012, ae avea ia lenei avanoa taua sei ou faapai atu ai i lou Itumalo o Aleipata Itupa i Luga mai Olomanu seia paia Ulutogia.

I le Susu o le Toeaina Faatonu i lau Susuga Isaia Tiatia, o paia lava lea aua le Afio o le Afioga i le Tuiatua Faanofonofu, Afifio le Falefia o Alii, Afio Amituanai o le Maopu o le Tuiaana, Susu i Laua o Suafa, Tootoo e fa o le Igoa Matua ma Upu ia te oe Saleaamua. Susu lau Susuga i le Tama Sea Rev Faletui Mulitalo, o le paia lava lea aua le afio o lau Afioga i le Sao Fetalaiga, Afifio le Falelima o alii ma le paia i Alaalamalae. E le gata i lea o le matua ia Tuiolamoso ma Salelealii. Susu lau Susuga i le Faafeagaiga Rev Mose Latu o paia lava lea aua le Susu o le Sagapolutele o le Tama o le Malo, le Matua o Falenaipupu, le Taofia a Taiiai ma le Usoalii ma le mamalu ia te oe Saoluafata, o paia nei o lou Itumalo e pele i le agaga.

Lou Itumalo e, avea ia lenei taimi e faaleo atu ai se agaga vaivai a la outou auauna faatauvaa, e momoli tele atu ai le agaga faafetai e tusa ai ma la outou puleto ma la outou faaeaea. A lele ua tu mai lagā le lagaali a Tamafaiga, ao ai lou nei tagata ua outou manatu mai ai e ala i le Palota Laitiiti sa tatou feagai ai. Sa tau ala mai i la outou filifiliga le finagalo o le Atua e fai ai au ma o tatou sui usufono i totonu o le Palemene o Samoa mo lenei lima tausaga. Lou Itumalo e, o le a ou le seiina i lou taliga pe asoa i lou ua lau faaloalo ao le a teu i lou fatu ou te manatua pea i aso uma o lou ola. E avea foi lenei taimi ou te faafetai atu ai foi i nisi o tupu ma ee sa matou taumafai mai i le Palota Laitiiti, malo le tauaalo faatausala, malo le taaalo faatamalii. Ou te talitonu o le a tuu mai la outou lagolago i lenei foi lima tausaga sei ou taumafai ai i se sao o lo tatou Itumalo aua Upufai a le Atunuu.

E faamauiina foi lau faafetai i lē sa tu mai i le foe i nisi o Paeaiga ua tuanai atu, tau ina ia alofagia e le Atua ia foai pea le malosi o le tino ae silisili le mafaufau aua foi nisi o tofiga ua tofia ai oe e le Atua e te galue ai mo lenei vaitau o le soifuaga. O lau tatalo ia tuu mai lou faatuatuaga ina ia ou galue ai mo lenei lima tausaga aua so tatou sao i Upufai o le Atunuu.

Lau Afioga i le Fofoga Fetalaiga, e avea ai foi lenei taimi ou te faafetai faapitoa atu ai i lou nuu o Lalomanu mai ona vaega faalupe e ui lava ina ua fai i lagi le tuligasia a le Aiga Sa Tagaloalagā i le tuua o le Malo e le

Tuiatua Faanofonofu i se taimi e lei mamao atu ae ou te talitonu e le o so tatou loto a ua faia lava le finagalo o le Atua, ia tatou fai tatalo i le Atua ia foai pea le loto faamafanafana i le tina ma le aiga alii aua le tuua o le Malo e le Afioga i le Tuiatua Faanofonofu, tau ina ia taulu taulu ia pau se toa ae toe tulai mai se isi toa aua le tausiga o le tatou aiga aemaise o lo tatou nuu i Lalomanu. Faafetai foi i lau komiti ma ou aiga sa lagolagoina au e ui lava ina faigata ae ou te talitonu sa outou galulue ma le faamaoni. E le o ia te au se tau ua na o le Atua pulepule tetele e faamanuia ma tauia lo outou agalelei ua mafua ai ona ou seei i le Nofoa o le tatou Itumalo.

Lau Afioga i le Fofoga Fetalai, e avea ai leni avanoa ou te faafetai faapitoa atu ai i le tatou Faiga Malo i lau Afioga i le Palemia ma le Kapeneta, e le gata i leni vaiatao nisi foi taimi ua sola, ou te talitonu e fou lou nei sui usufono i totonu o Upufai o le Atunuu, ao le lagolago a leni Itumalo i le Faigamalo ma ana polokalame faataatitia aua se manuia o Samoa, ou te talitonu e le fou, aua e le taua i le Itumalo leni upu ma tala ae taua galuega ua tino mai. Tau ia ina ia alofagia e le Atua faamanuia lau Afioga i le Palemia aemaise foi o le Kapeneta i leni lima tausaga ua tatou savalia.

Lau Afioga i le Fofoga Fetalai, e avatu se sao o leni Itumalo i le Tala Faatatau Faaopoopo o Tupe (Nu.1) 2011/2012. E momoli tele atu lau faafetai i lau Afioga i le Minisita o Tupe aemaise le Ofisa Sili o Pulega o le Matagaluega o Tupe ma le Pulega ma le Afaigaluega. Ou te talitonu o lea ua uma ona outou tapena faafafine toaga leni faamoemoe ma e le faigofie. Ua i ai foi le lagolago a leni Itumalo i le Tala Faatatau Faaopoopo o Tupe (Nu.1) 2011/2012 ua opea i le Maota nei.

Lau Afioga i le Minisita mo Tagata Tafafao Maimoa Mai poo lau Afioga i le Palemia, e pei ona ou faaalua i le taimi ua sola, e le taua i le Itumalo leni tala ae taua galuega ua tino mai. E mai le taele o le agaga e momoli atu le faafetai, faafetai mo atinae tau tagata tafafao maimoa mai. Sa matou i ai i se mala faalenatura e le o toe po malae i lo outou silafia i se tausaga e lei mamao atu. Sa i ai lava le lagona ailoga a toe faapei ona faatulaga mai, ae faafetai i le Faigamalo i le faasoa tatauina ua faapena ona toe faatulaga mai ai le atinae leni aua tasi leni atinae taua. E oo lava i le Itumalo leni ua matua faamoemoe lava tagata i le atinae o tagata tafafao maimoa mai ona o le tele o galuega e maua ai aemaise o tupe a matou mai tua e maua ai. Ua tau le o mai tagata e faigaluega i Apia e faigaluega ai ae ua saili lava galuega i le mata Aleipata i atinae tagata tafafao maimoa mai. O lea e momoli atu ai le agaga faafetai i lau Afioga i le Minisita mo Tagata Tafafao Maimoa Mai poo lau Afioga i le Palemia mo le faasoa i lena taimi ua tuanai. Pau lava lau tatalo, o a nisi meaalofoa e ono faasoa atu ai i lo matou Itumalo e ala lava i atinae tau tagata tafafao maimoa mai, aua le tuua ni mea lelei. O le tatalo lea i lau Afioga i le Minisita poo lau Afioga i le Palemia i le atinae o Tagata Tafafao Maimoa Mai.

Ona ou oo mai lea i lau Afioga i le Minisita mo Pisinisi, Alamanuia ma Leipa poo lau Afioga i le Sui Palemia. E muamua ona ou faafetaia lau Afioga e tusa ai ma le Tulafono ua mafai ai ona faaofi tatou i le WTO poo Fefaatauaiga a le Lalolagi. O le tasi leni faamoemoe aupito sili ona taua leaga o au le isi usufono sa auai atu i leni faamoemoe. E lagona lava le faageetia o le agaga ma le mafaufau i lo tatou Atunuu laititi ma le tele o atunuu o le lalolagi ua sao atu ai lo tatou Atunuu i leni faamoemoe taua. E momoli atu ai le agaga faafetai tele i lau Afioga i le Sui Palemia, e talitonu e fou lou tulai mai ae o upu lava a le tusi soo se tofi lava o tofi mai le Atua aua nei vale tuulima.

Ia matua galue aua e fou lou tulai mai ao leni ua tatou i ai i totonu o fefaatauaiga o le lalolagi. Ou te talosagaina lau Afioga i le Minisita mo Pisinisi, Alamanuia ma Leipa faapea le Ofisa Sili o Pulega sei silasila ane i aitalafu tetele ia i tua i kamupani. O lea e manino, o lea e faatau mai le oloa pe aitalafu mai ao la ua i ai le latou mark up poo le latou polofiti ae pei o le mea lea ua maitauina i le vaiatai leni, ua fai aitalafu ae ua i ai ma latou faaopoopoga i aitalafu poo interest i masina taitasi. O lea e tatalo atu ai i lau Afioga i le Minisita sei silasila ane i lea vaega pe le o aiaia i lalo o le Tulafono o Tau o Oloa.

O lona tolu, o lena ua silasila lau Afioga i le Minisita i le tulaga foi lea i Sosaiete. O le tele lava o Faalapotopotoga ua na ona o mai e lesitala Sosaiete e tauanau mai ai faamanuiaga mai fafo, e lei atoa se tausaga ae toe malepelepe. E maua loa lava sina faamanuiaga ma faamanuia ia te i latou, e toe sue atu le Sosaiete ua leai. Poo le a se silasila a lau Afioga i le Minisita i lea vaega aua tatau lava ona faamalosi ma faaoga tatau le agalelei o tatou uso mai fafo.

Lau Afioga i le Minisita mo Galuega, Felauaiga ma Atinae Eseese, e muamua ona ou faafetaia pea galuega atiane e pei ona ou fai atu i le taimi ua sola o leni Itumalo na afatia i mafatiaga o le mala faalenatura o le

galu na faaleagaina ai lo matou Itumalo. Faafetai mo auala aua o le Itumalo lenei ua amata ona agai i le maupuepue, ona ua lelei auala ia sa faatinoina ina ua maea le tsunami. Ae tatalo atu i lau Afioga i le Minisita ua fai sina faaletonu o le auala tele lea e i tai, ae tasi lenei faatosina o le atinae lea o tagata tafafao maimoa mai. O matou auala i tai o lea ua lelei ae faafetai mo taligalu. Faafetai i le Pulega ma le Pule Sili o Felauaiga i luga o le Laueleele aemaise foi o le Ofisa Sili o Pulega o le Matagaluega o Galuega aua o latou ia sa taumafai mai lenei faamoemoe. Faafetai mo taligalu ae tatalo atu sei alofagia lo matou auala ua tau le o atu ni tagata tafafao maimoa mai ona ua fai ma leaga ae a vave le alu o le taavale i tua ua fiafia foi tagata tafafao maimoa mai ae a faaletonu ua tau le o atu foi i le matou mataaga. O mataaga ia e ia matou o mataaga mua lea i totonu o Samoa o lea e alofagia ai sei tautuana o matou auala tele.

O lenei foi ua i luma o lau Afioga i le Minisita lo matou auala tele i Lalomanu. E pei ona ou fai atu o le tele lava o le matou nuu ua agai i uta ae sei alofagia sa i ai auala i tai ae ua ola ai vao sei tulou ao le tatalo pe mafai ona toe fai auala ia, aua e i ai nisi aiga ua toe fia nonofo i o latou fanua ae ua faigata ua leai ni auala. E pei lava na o i latou o i ai fanua i auala lea e i ai i le taimi lenei e pei o Saleapaga, Lepa seia oo mai Lalomanu o loo faaagaina i le auala lea i le taimi lenei. Ao lau tatalo i lau Afioga i le Minisita ma Ofisa Sili o Pulega sei silasila ane i lea tulaga.

O le Pulega o le Suavai. E faamauiina le faafetai a lenei Itumalo i le Pule Sili ma le Pulega o le Suavai. Na maitauina e le matou Itumalo ina ua uma le tsunami, o loo i ai lava le auaunaga faasafua a le Pulega o le Suavai o le lauina mai lea o le suavai.

E pei lava o le pamu vai i le taimi lenei ua faigata ona pamu ai le vai ona ua fai sina matietie ona o loo i tai le vai ao le tele o tagata ua agai i uta i le maupuepue. O lea faafetai atu ai mo le galuega lelei e oo mai lava i le taimi lenei o loo faatino lava le lauina o le suavai i loli vai. E tatalo atu foi i le Pulega o le Suavai sei silasila ane po o le a se auala e mafai ai ona foia lenei faafitauli aua e manaomia tele e atinae tau tagata tafafao maimoa mai le vai. O lea e talosaga atu ai ma le agaga faaaloalo sei alofagia lea tulaga ao le auaunaga i le taimi lenei e momoli tele atu le faafetai mai lava i le aso na tupu ai le mala faalenatura e oo mai lava i le aso o la e faaauau galuega lelei a ia foi tupu ma tamalii o le Atunuu, o le lauina o le suavai i luga i le maupuepue.

Lau Afioga i le Minisita mo Aoga, Taaloga ma Aganuu. E faamauiina foi le faafetai a lenei Itumalo e tusa ai ma pili aoga sa totogi mai e le Matagaluega o Aoga. E momoli atu le faafetai tele a lenei Itumalo ae manaia foi pe a toe faaauau i lenei tausaga. Ua aoga foi lenei faamamaavega e fesoasoani ia matou mai tua. O le tulaga tau aoga, faafetai atu i le tulaga lea ua faasafua atu ai Kolisi i tua i Itumalo taitasi e tuu ai le o mai o matou mai tua aoga iinei ma le taunuu ai i se taunuuga lelei, i le o mai o taimaiti mai tua ua fai sina televave o le olaga i le talafatai i Apia, ao fuafuaga faataatitia a le Matagaluega ma le Pulega mo le faasafua atu o Kolisi e momoli atu ai le faafetai. Pau lava o lea, talosia ia avatu lea auaunaga i tua ae ia lelei ai ma faiaoga. Ua maitauina i lou Itumalo nisi foi o asiasiga ma polokalame a le Atunuu sa agai i aoga, e tasi le faiaoga ae lua pe tolu vasega ae atonu o le a aoga lea fuafuaga a le Matagaluega o le a faapena ona faasafua atu ai ma faiaoga i nuu i tua aua o le tele lava o faiaoga ia e faiaoga i Apia o matou mai tua, ae manaia lava le saili o faiaoga a le nuu ia ma le itumalo e agai i ai latou e taumafai mai ai o matou Itumalo.

Lau Afioga i le Minisita mo Leoleo, Falepuipui ma Tinei Mu, tasi lenei Matagaluega taua. E momoli atu le faafetai tele a lenei Itumalo i lau Afioga i le Komesina o Leoleo, Pulega aemaise o le Auaunaga. O aso ia faatoa iloa lava e le tamaititi tua le leoleo pe a oo mai i Apia. Ae a nei aso? Ua faasafua le auaunaga. E momoli atu le agaga faafetai ua maitauina e lenei Itumalo o lea ua savalia le tolu tausaga ua siitia ai le auaunaga faaleoleo ona ua lelei le Pulega. Ua oo lava i nuu i tua i vaitaimi o aso fiafia, sa tataua ona outou faatasi ma o outou aiga ae ua taatia lava ona o lo outou manatu i le tautuaina o le Malo ma le saogalemu o tatou tagata. O lea e momoli atu ai le agaga faafetai i lea auaunaga. Pau o lau tatalo i lau Afioga i le Minisita ma le Komesina o Leoleo, e manaomia nisi leoleo i le pou i Lalomanu ona o loo tele lava tagata tafafao maimoa mai fafo o loo autovaa mai ae tataua lava ona i ai leoleo e tiute ai i lea aso ma lea aso. E le gata i lea o le Ofisa o Leoleo i Lalomanu, o lenei ua ou talosaga atu i lau Afioga i le Minisita sei alofagia le fale o malu o le Malo i tua. Ua fai lava sina faaletonu o le fale la e i ai i le taimi lenei ao lau tatalo alofagia le fale o malu o le Malo i Lalomanu.

E momoli atu le faafetai i nei foi tamalii o le Atunuu o loo galulue i lo matou nuu ma lea tafa o le Atunuu, ou te talitonu e le faigofie la outou galuega ae o le silasila lava ma manatu i le faatauaina o le auaunaga ma

le tautua i le Malo. E le gata i lea ao sina taavale fou, o le taavale la e i ai nei e lelei ae peitai ane e le gafatia e le taavale i tua. O le toatele o tagata o loo nonofo i uta i le maupuepue, o lea e tatalo atu ai i lau Afioga i le Minisita ma le Komesina o Leoleo i se taavale, e manaia lava le Toyota. O le taavale la e i ai nei o le taavale Saina e le malosi tele, aua le lauina mai o le aufaalogogata i Apia.

Ona ou oo mai lea i le Minisita mo le Soifua Maloloina: e momoli atu le faafetai i le auaunaga i le faasoia atu o Fomai faapitoa. O le tasi lea faafitauli sa o ou ola mai lava a'o ou laititi, faatoa maua lava le Fomai faapitoa iinei i Apia, ae faafetai i le tulaga lea o lea ua le misi lava i tua i aso uma Fomai faapitoa aua lea auaunaga mo lea foi tafa o le Atunuu. Ua le gata foi i lo matou Itumalo, a'o Falealili ma Aleipata o lea ua agai uma mai lava i le falemai lea o matou, ae faafetai lava mo lea vaega. Pau lava o lea, e manaia pe a toe faaopopo atu nisi o le aufaigaluega, ae e le gata i lea o sa matou taavale lelei. O le la e faaoga le taavale e foeuli tauagavale ma o se taavale tuai foi, a'o la'u tatalo i lau Afioga i le Minisita se'i silasila ane i le vaega lea. E le gata foi i lea, ua leai se matou taavale mo ma'i tigaina aua o le mea lea e tupu nei, e valaau mai lava tua i Apia nei ona faatoa alu atu lea o le taavale, ae lelei lava pe a i ai se matou taavale i tua i lo matou Itumalo ina ia oo ane gasegase tigaina ma auina vave mai loa i Apia mo togafitiga. E pei o nai vaega ia lau Afioga i le Minisita mo le Soifua Maloloina, ae e momoli tele atu le faafetai i lau Afioga i le Minisita.

Lau Afioga i le Minisita mo Faatoaga e momoli atu le agaga faafetai, pau o lea se'i alofagia a matou talosaga. Ua tele tagata o lo'u Itumalo e talosagaina mea ia o manu papalagi ma mamoe. O le fesili mai a i latou, po'o le a le tonu i a tatou mamoe? Na ou fai atu, se'i ou oo pea i le Minisita ma tatalo i ai. Afai ua faaetonu, e manaia le faasilasila atu e le Matagaluega e faapea se'i toetiiti ona maua atu lea o se faamatalaga sa'o leaga ua taligā nisi o le Itumalo. E le gata i lea ae faapea foi mamoe, po'o le a se tulaga o i ai lea atinae a le Atunuu?

Lau Afioga i le Minisita mo Faamasinoga ma Pulega Tau Faamasinoga: faafetai, e ui ina tatou le faatasi ma le Tamaitai Minisita, ae e momoli atu le faafetai a lenei Itumalo. Ona pau o lea e tatalo atu, po'o le a se faiga a le Matagaluega aua e tasi lenei Matagaluega ua fai sina leva o taumafai, ae atonu e aoga le tulai mai o le Minisita fou se'i taumafai ai le tulaga lea i faamasinoga, aemaise lava le vaega lea i mataupu ua toetiiti faasefulu ona tolo. Pe e leai se faiga faavae a le Matagaluega e faapea a faatolu loa lava ona tolo, ua tatau loa ona aua le toe toloa ae faaauau le faamasinoga? O le mea lea e tupu ua faasefulu ona omai nai aiga mai fafo, ae tolo, tolo.

Po'o le a se silasila i ai a le Matagaluega i lea vaega aua ua leva ona tatau ona i ai se fuafuaga aua e le gata i lea a'o le tulaga foi i Apili?

E i ai le taimi na ou vaai na tumutumu ai Mulinuu, ae lagona lava le faanoanoa ona o Apili ua savalia i le sefulu tausaga e le'i tagofia. Ae a pe a lima loa lava loa lena ae ua tatau ona iloilo Apili, ae a sefulu loa ua pei ua fai sina umi tele. Po'o le a se faiga i ai a le Minisita ma le Matagaluega i lea faiga ina ia faaleleia le auaunaga i nei vaega?

Ona ou oo mai lea i le Minisita mo Punaoa Faalenatura ma le Siosiomaga: e ui lava ina tatou le faatasi ma le Afioga i le Minisita, ae e momoli atu le agaga faafetai o lenei usugafono aua ua matauina le tele o fanua o le Malo la e nofo lisi ai le tele o tagata, a'o le tulaga foi e sili ona faanoanoa ai ona o le tele o tupe a lo tatou Malo lea e le o maua mai, ae ua vaai lava ma le agaga fiafia ma le agaga faafetai i le Minisita ma le Pulega le lelei o le aoina mai o lisi ia po'o fanua ia o le Malo, aua o lea e i lalo o le vaaiga a le Minisita mo Punaoa Faalenatura ma le Siosiomaga.

O le isi vaega taua lava o le Faalapotopotoga lea o le STEC: e momoli atu le agaga faafetai i le Afioga i le Ofisa Sili o Pulega ma le Matagaluega i le lelei o le tulaga ua i ai faatoaga a le Esetete Tausi i le taimi lenei. Atonu o le tasi lea Faalapotopotoga a le Malo sa i ai i se tulaga faaetonu, a'o le taimi lenei ua matua lelei faatoaga a le matou Esetete Tausi. A i ai nisi o le Palemene e fia asia, e mafai ona o atu e asiasi i ai ma outou talitonu ai i le tulaga ua i ai le talo, o le fa'i aemaise foi o le popo. O lea lava ua sologa lelei le tulaga o i ai le faatoaga a le matou Esetete Tausi.

Lau Afioga i le Fofoga Fetalai, o saafiafiga ia o le agaga, o le a foi Sinalefutu, a'o upu lava a lenei usugafono ia faamanuia le Atua i lau Afioga i le Palemia, le Sui Palemia ma Minisita uma o le Kapeneta. Ia maua la outou tofa faatamalii, ae ia silisili le Atua ma Lona finagalo i le taitaiga o le Sa o Samoa mo a taeao. Ia faamanuia i lau Afioga i le Taitai o le Itu Agai ma lea foi Itu o le Malu, atonu o la outou taulogologo

e pei lava o upu a le Atunuu, e logo lava le tuli o le tātā, e tupu foi le faamoemoe o le taugologolo. O outou faiva alofilima e faapena ona ulimasao ai le folauga a Samoa mo lenei foi lima tausaga.

Ia faamanuia i lau Afioga i le Fofoga Fetalai aua o oe o lo’o faatonu folauina le Maota lenei, ia maua pea lou lavapapale ma le onosai aua faafitauli o lenei Maota. Ia maua foi se manatu o lenei Itumalo aemaise foi o lo’u nei tagata faatauvaa ou te tautua ai ma aumai se sao o lenei Itumalo aua upufai o le Atunuu.

O se tala lea ma le faaaloalo tele. Ia manuia lenei aso i feau o totoe, soifua ma ia manuia.

17 IANUARI 2012

Tofa LAUTAFI FIO SELAFI PURCELL (Satupaitea): Faafetai lava i lau Afioga i le Fofoga Fetalai mo le avanoa.

Ua maea ona e faamua mea i Matautu-Sa, ua ave foi Laau i Fogaa ma le Viiga i le Atua i Lona alofa ua toe taitaiina mai ai i le soifua laulelei sui usufono uma o le Maota nei. Faafetai mo le avanoa ua tuuina mai i le sui usufono mo Satupaitea e fai atu ai se lauga muamua i totonu o le Maota lenei i lenei Paeiga.

E’ e ia i Tialogo ma faasausau i paepae o Folasa paia o le taeao, ua taoto foi faai’a o tai loloto mamalu o le asō, o paia lava ma mamalu e ao lava i le Atua. Tulouna Lana Afioga Mamalu O Le Ao o le Malo ma lau Masiifo, lau Afioga i le Sui o le Fono a Sui Tofia ma le Masiifo. Tulouna foi Tiafau nei o le malae o Malo, o le malae o faalelegafulu, o le malae foi o le faautugatagi a Samoa, ae faatili lava le laumea i le Maota nei i le afio o lau Afioga i le Palemia ma lau Kapeneta, afio lau Afioga i le Sui Palemia, lau Afioga i le Fofoga Fetalai faapea foi lau Afioga i le Taitai o le Itu Agai ma lena Itu o le Maota nei. O lo’o afifio foi sui o Atunuu mai fafo o lo’o faipaaga pea ma Samoa, o Ulu o Matagaluega ma Faalapotopotoga a le Malo, o Ulu o pisinisi ma Faalapotopotoga Tumaoti o lo’o galulue faatasi aua se manuia o Samoa.

O lo’o pofala foi le tapuaiga i le paia o le Tala Lelei i Fata Faitaulaga e fia i totonu o Samoa o lo’o nōnōmanū faafale lē malu aua se manuia o Samoa ma ona tagata.

E le faagaloina foi le tapuaiga mai maota ma laoa a le paia i Aiga o Tupu, Aiga o Nofo, Aiga o Pāpā, o Aiga sa tufaletia ma tufaletoa, a’o lo’o siva taufao foi i le Usoga mamalu a Tumua ma Pule, Ituaa ma Alataua, Aiga i le Tai ma le Vaa o Fonoti.

Ou te le faasopolima foi i le tapuaiga mamalu a le Fale Tutuila ma le Fale Tuimanua i le afio o le Afioga i le Kovana Sili ma lana Masiifo, le Fofoga Fetalai ma Maota e lua. O le paia lava lea aua Sua ma le Vaifanua, Fofu ma Aitulagi, Saole ma le mamalu i le Launiu na Saelua ae faapea foi lau Afioga i le Laau na Amotasi, Faatui, Auvaa o Tootoo ma upu i le Manuatele.

O paia lava ia Samoa a tafa a’e le malama i Saua ona malamagia lea o Analega o le maota o le tamaitai o le Alataua, o ia sa valoia manū o Samoa. See ia laia i ou Tia maualuluga ma a’e i ou Papa le gae’e ma nuunuu atu faatini o tausala paia ia ma opoopo tutū i Tiafau nei, ae se’i ou liliu ane i lo’u Itumalo faasui usufono o Satupaitea aua le Susu o Aiga Samoeleoi, o le Aiga na mua i malae o Aiga uma o Samoa, Susu Asiata na Falefa i ai Tumua, na ono i ai Pule, Susu Alo o Lilomaiava aua Tuimaseve ma Faanana, Afifio Tapaufanua aua Savalomua ma le Fauatea. Afio le Tapaau Fanua o le Tonumaiepa o le Ao o Salafai, o la e talie le vaega la aua o la e iloa e sa’o a’u.

Alaalata’i le Alataua, Tapaau le Fano, Nofo a Pule ma le Matuafia, ae tainane foi le tapuaiga mamalu a faletua ma tausi, saoa ma tamaitai ma le malosi o le nuu, aemaise foi o le tapuaiga i feoi o le Talalelei i auauna a le Atua o loo i totonu o lou Itumalo. O paia ia o Satupaitea e amata mai i Malae Aoga seia paia Falepau. Satupaitea sao falalelei i la outou faaaloalo, faafetai i la outou faatupu, faafetai i la outou faatamalii. O lea ua ou titi, o lea ua ou ula, o lea ua ou pale i lau faaaloalo, o lo’u talitonuga o lau tatalo le uma ma lau lagolago faifaipea o le a maua ai se manatu o le auauna aua le fili mafuaina o le tofa i Tiafau nei. Po fala laia lau tapuaiga lou Itumalo ae sei ou alo e fai le faiva o le tautua mo le Itumalo, e tautua ai mo le Atunuu aemaise o le galuega a le Atua. O lau tatalo ia faatasi le Atua i lau tapuaiga. O upu lava e masani ai Samoa e le sili le tai i lo le tapuai, a alu foi se faiva ae tapuaia e ae lava ma le manumalo. Tapuai maia Satupaitea sei taumafai sa tatou upu aua le tauaofia o le Fono Aoao Faitulafono a Samoa i lenei taeao.

Lau Afioga i le Fofoga Fetalai ma le mamalu o le Maota, e le o toe po se lilo ua levaleva aso o lea ua faatoa toe lagona se leo o Satupaitea i totonu o lenei Maota talu mai tuumalo o le Afioga i le Vaaimalae ia Asiata Saleimoa sa fai ma sui usufono o lenei Itumalo, o lea faatoa toe tautala Satupaitea i totonu o lenei Maota. O lona uiga o lau faamatalaga, a umi le lauga a Satupaitea, sala i le umi ioe, e pei lava o le maea ai

o le Faiga Palota ma saunoa foi i Lauga Faataupou sui usufono mamalu ma lafo atu i Minisita mea o loo mananao e faaleleia. Ua amata galuega a Afioga i Minisita ao loo nofonofa lava Satupaitea ao lea faatoa maua le avanoa ma o le a faamuamua atu lava ni mea o loo manaomia mo lenei taimi.

E umi le tatou Paeaiga ma tele foi nisi mea e toe taumafai atu ai lou nei sui usufono ao le a muamua atu lea vaega. E pei lava o isi Itumalo uma o le matafaioi lava a le sui usufono e sau e aumai ni mea e fia faaleleia. E pei foi o le lauga a lou uso na faatoa maea atu nei e faapena foi Satupaitea ma o nai mea nei ua talosagaina mai e lou Itumalo ina ia faaoo atu i Afioga i Minisita o loo fitoitonu i ai nei mataupu.

Lau Afioga i le Minisita mo le Soifua Maloloina, Afioga i le Minisita mo Punaoa Faalenatura ma Siosiomaga, ou te vaai atu e le o auai mai le Afioga ae atonu o loo faafofoga mai le Ofisa Sili o Pulega. Lau Afioga i le Minisita mo Galuega, Felauaiga ma Atiina Eseeese ma le Minisita mo Aoga, Taaloga ma Aganuu.

Lau Afioga i le Minisita mo le Soifua Maloloina, o lena ua tuuina atu le talosaga a lo matou Itumalo e pei ona talanoaina ma lau Afioga le toe fia fausia o le falemai faa-Itumalo o Satupaitea. E pei ona silafia o lenei lava Itumalo sa tu ai le falemai ae tei ua alu alu lea auunaga ua le toe faaauuina ona o tulaga le malofia. E le gata e le mafai ona faaauu le vaia o le fale poo le maintenance ona ua fai lava sina malosi o le pisi sami sei tulou. O le talosaga a lenei Itumalo lau Afioga ina ia sii atu le falemai i uta i le auala faalava ma ua uma ona faatuina ni fanua maoti ma ua taatitia aua lea faamoemoe e pei ona maua i lau saunoaga o le faafitauli lava lea o loo tulai mai e o atu e fau le falemai ae leai se fanua ona o loo faalavelave aiga ma i latou e ona nei fanua. I lou Itumalo e tolu lelei lava fanua ua uma ona faataatia e fai ai lau filifiliga ma le mamalu o la outou Matagaluega, a faataunuu loa le faamoemoe ua uma ona i ai le fanua e fausia ai.

Lau Afioga i le Minisita mo Punaoa Faalenatura ma Siosiomaga, e talosagaina le toe faaleleia ma toe faaauu le fausia o taligalu i lou pitonuu i le amata mai i Pitonuū, sa i ai taligalu tuai a ua faaleagaina ona ua leva ma ua goto uma le maa i le oneone ma ua sau lava le sami ma ua oo i totonu o umukuka o aiga sei tulou. E faapena le taligalu sa fai i le 2009 e le Afioga i le Minisita sa i ai i lena vaitau, ona alu alu lea ua le toe faaauuina e oo mai i lenei taimi o loo gata i le ogatotonu o le pitonuu o Vaega. E talosagaina ai lau Afioga ina ia toe faaauuina lenei taligalu ma ia oo atu i le pitonuu o Satufia. E mo le silafia o le gataifale o lo matou nuu e siisii lava i luga le sami ae sa le masani ai atonu o le tau o le kelope poo le global warning i lenei vaitaimi ma ua lamatia ai lava i latou o loo nonofo latalata i le sami, ae a faaauu lenei taligalu o le a tele lava se fesoasoani i le soifua o lou nuu o loo nonofo i luga o le sami.

Lau Afioga i le Minisita mo Galuega, Felauaiga ma Atiina Eseeese, o lena ua tuuina atu le tusi talosaga a lenei Itumalo e talosagaina ai le faaleleia o auala galue aemaise lava le auala galue i Pitonuu ua toetoe a le sao ai se taavale, a siliga ma le palau poo le 4uili ua le uia e tagata a latou faatoaga.

E talosagaina ai lau Afioga ona ua fai sina leva e le o toe i ai se gaoioiga i auala galue o lou pitonuu, e le gata i lea o auala galue i pitonuu e lua o Satufia ma Vaega, poo tau ane ai fuafuaga o galuega a le Malo ae tautuana ma lau Afioga o lena ua auilili atu faafitauli o loo tulai mai i nei auala galue, atoa ai ma le tosoina o ni moli i le auala galue i Pitonuu ma le faia o ni street lights i le auala i Satufia. O le toatele o lou Itumalo ua sosola i uta ma nonofo ai i autafa o auala galue, e le gata ina latalata ai i faatoaga aemaise o le matau lava i mala faalenatura, o le a faataatia atu le talosaga a lenei Itumalo i ou tafatafa a oo i ai fuafuaga ona manatua lea o le talosaga a Satupaitea. O nei lava fuafuaga uma aua le galueaiina o le vao e pei ua toe faafouina le malosi ma le tomai o tagata i lenei vaitaimi i le toe gagau o le vao. E le gata i fuafuaga a le Matagaluega o Faatoaga ma le Afioga i le Minisita i mea ia o le stimulus package a ua maua foi le avanoa e toe galueaiina ai le talo fou lea ua maua i lenei vaitau. E faapena foi ma le faamanuiaga ua maua mai nei i le Nonu e pei ua toe faafouina le malosi ona pau lava le faaletonu o loo i ai o le faigata ona uia auala ona ua faaleagaina tele. O le talosaga lea ma le faaaloalo tele.

Lau Afioga i le Minisita mo Aoga, Taaloga ma Aganuu sa faatalosagaina lau Afioga i se avanoa e maua ai se malae taalo mo lou pitonuu o Pitonuu, o lenei pitonuu e leai lava se aoga ma ni malae o i ai. Ou te alofa tele i le autalavou poo le youth ona ua tele le taimi o latou lima a ua leiloa poo le a le mea a fai ai. Ua tatou silafia foi a bored loa le tamaitiiti poo le autalavou ona o loa lea fai mea valea, o le mea lea ua tulai ai le faasala soo e le nuu, ua fiu foi i latou i le o i faatoaga ma o ane i tai a ua tatau lava ona i ai se isi activity e tua i ai lo latou malosi. O loo ua amata foi ona sailiili se fanua e fai ai se malae taalo aua leiloa poo isi nei tagata o le Manu Samoa o loo i ai i Satupaitea ae ona o le leai se malae taalo e mafua ai ona leai

se tagata Satupaitea i totonu o le Manu Samoa. A fai loa le malae taalo ona seia loa lea o le Ipu a le Lalolagi i le Manu Samoa aua o le a i ai tama mai Satupaitea.

O le avanoa lea ua tuuina mai e fai atu ai se tala i le Tulafono Tau Faaofi o le Faatatauina o Tupe Faaopoopo (Nu. 1) 2011/2012 lea o le a ou oo atu i ai. E lagolagoina lava e lou sui usufono le Tulafono Tau Faaofi, e leai lava se mea o ou tilotilo atu ai e ono fai ai se fesili a lou nei sui usufono. Ona pau lava o lea e faafetai atu i lau Afioga i le Minisita o Tupe ma le Matagaluega mo le Tulafono Tau Faaofi ma mea uma lava aua le agai i luma o fuafuaga a le tatou Malo. Ou te lagolagoina le Tulafono Tau Faaofi o le Faatatauina o Tupe Faaopoopo (Nu. 1) 2011/2012 e pei ona faataatia i luma o lenei Maota, ae pei ona ou fai atu ona pau ia o mea i lenei taimi ae alofa atu ua vela foi le fala.

Ae tau ina ia alofa le Atua i lau Afioga i le Palemia ma le mamalu o le Kapeneta ma foai la outou tofamamao ma le utaga loloto aua le taitaiina o le Malo. Ia utupupuina pea e le Atua la outou tofa.

A talii ane i lea Itu o le Maota i le Afio o lau Afioga i le Taitai o le Itu Agai ma le latou Vaega Faaupufai ia faapena, ia alofagia e le Atua ma foai le tofa loloto, foai le onosai e le faigofie foi la outou galuega. O au le isi tagata e talitonu tele i le faaupuga lea “Good Opposition makes for a Good Government”. A lelei le Itu Agai e lelei foi le Malo. Ia manuia o outou faiva i lenei Paeaiga.

Lau Afioga i le Fofoga Fetalai, ia maua pea le tofamamao aua le faafoeina o galuega i totonu o lenei Maota, e le faigofie foi lau matafaioi. O le tele foi o taimi e eseese ai o tatou manatu ao loo e faafoe lava i le ava fatafata ma le faatamalii lo tatou Maota.

E avea foi lenei taimi ou te faafetai atu ai i nai ou aiga, aemaise lou tina ia Anasoa ma lou tina ia Foti na autovaa mai lava i atunuu mamao ona o le fia auai i le aso, faafetai i la outou tatalo, faafetai mo la outou faatuatuaina o se alo moni o Satupaitea e tauaveina le tofi lenei. Ia manuia le alofaiva o le tatou Palemene i lenei lima tausaga, tatou oo atu i le faailogaina o le 50 tausaga o le tatou Malo, faamalo i le Malo i galuega uma ua fai e oo mai i le taimi nei, o atinae lava ia o Samoa o lea ua tatou oo mai i le 50 tausaga o lo o saogalemu lava le alu o lo tatou vaa.

Ia faamanuia le Atua i le tapuaiga a Samoa atoa, tatou maua se manuia i lenei tausaga, ia amata i manu faaii foi i manu. Lou Itumalo o Satupaitea, faafetai i la outou tapuaiga, o le a ou taumafai i le mea e gata ai lou mafai aua se sao o Satupaitea i tonu o upufai a le Malo o Samoa.

Faafetai manuia lo tatou aso.

17 IANUARI 2012

Tofa ALO FULIFULI TAVEUVEU (Anoamaa Sasae): Faafetai atu i lau Afioga i le Fofoga Fetalai, ae ou te tulai atu i le ava ma le faaaloalo sei taumafai atu sou sao aua le faafofoga mai a le tatou nuu aemaise lou Itumalo o Anoamaa Sasae.

O lea ua faaifo i atimalae le lupe na lagatila aua le Atua ma Lana pule faasoa i le Maota o Upufai o Samoa. E to la i lagi le tatou faapolo e ala i le tau’i mamalu o le tatou vatapuia ma lo tatou Tapaau pei ona momoli e lau Afioga i le Fofoga Fetalai i lenei taeao. Ae ua ou faatauaina lenei avanoa sei momoli atu ai sou sao o lou nei sui usufono e tusa ai ma aga masani a lenei Palemene.

O le a ou le toe alotuina la i le taeao, ina ne’i pisia lo tatou sa i iu galu, ae o le a ou alo nonofo ae pei o le faiva o Samoa o le matamatanonofo, ae sei ou vaisausauina le paia o le tatou Atunuu o Samoa. To maia le mamalu faale-Malo, afio Lana Afioga Mamalu O Le Ao o le Malo ma lana Masiofo, Afio le Afioga i le Sui Ao, Afio lau Afioga i le Palemia ma lau Kapeneta, Afio le Faamasino Sili ma le Ofisa o Faamasinoga, afio lau Afioga i le Fofoga Fetalai aemaise o alii ma tamaitai o le Palemene o Samoa i lenei taeao.

Ae le vaea le falaooto i le tapuaiga a lo tatou Atunuu mamalu, le afio o Aiga ma Tama, o Tama ma Aiga, Aiga i le Tai ma le Vaa o Fonoti, Ituau ma Alataua ma le mamalu ia te oe Tumua ma Pule. Le paia i Taitai o Ekalesia i totonu o le Atunuu o lo o latou nonomanu aua se manuia o Samoa mo a taeao, tulou, tulou lava.

Ae le faagaloina le tapuaiga i lo tatou tuaoi i le Motu i Sasae, le Afio o le Kovana Sili le Sui Kovana o Amerika Samoa, afio le Peresetene le Fofoga Fetalai Afioga i alii faipule o Maota e lua, afio le Afioga i le Faamasino Sili ma le vaega o Faamasino, o le paia lava lea ia Sua ma Vaifanua, Fofu ma Aitulagi, Ituau ma Alataua, Saole ma le Launiu na Saelua ma le afifio o le Maopu. Le afio o Faatui ma Tootoo ma oe le Manuatele, o paia na i le tapuaiga a Tutuila ma Manua. Tulou, tulou lava.

Ae le faagaloina lou Itumalo pele o Anoamaa Sasae, afio le Tuiatua afio Seutatia e te alaala i le maota o tupu, susu ai le Toaono ma le Saofaiga o paia na ia te oe Tumua Lufilufi. Afio oe le Tapaau, afio le Fuaifale o Salevalasi, susu le Matua ma oe Lufilufi, o paia na o le alaalfaga i Manunu. Afio Afoa ma le Matua o Lefaoseu, susu Ti ma tagata ma oe Lufilufi, o paia na o le afioaga i Lalomauga. Afio Aiga ma Faataulemaga, afio Usoalii ma Tama o le Paepae, na manuo i le putuputu o tagata o le Tuiatua, o paia na o le afioaga i Saletele. Afio Aloalii ma Aiga, alaalfaga i Limutau o le Tua o le Faleono ma oe le Faletolu ma le putuputu o tagata o le Tuiatua, o paia na o le alaalfaga i Sauano. Afio Gagaeolo ma le suafa Naioti, afio Ae o le alo o Malietoa, alaalfaga i Falelima o le Siitagafita ma le putuputu o tagata o le Tuiatua, o paia na o le alaalfaga i Falevao.

Afio aiga Sa Fenunuivao ma le latou Tama, afio aiga o Sa Alaiasa, afio Aloalii, alaalfaga i laua Matua Iuli ma Moeonoono ma le mamalu o le tofi faasolo o le aai o le tupu, o paia na o lou nuu o Falefa. Tulou, tulouna lava. Ia avea ia lenei avanoa ou te faapea atu ai le tatou Itumalo o Anoamaa Sasae, faafetai, faafetai tele, ona o la outou filifiliga lenei ua avea ai lou tagata e auauna i lo tatou Itumalo e ala i le Palemene o Samoa. Ae ou te fia faafetai atu foi i le tapuaiga i le susuga i le Toeaina ia Mauala ma le Faletua, aemaise le nofo i Faafegaiga i Ekalesia e fia i lo tatou Itumalo i Anoamaa Sasae. Malo, malo le tuu atu i le Atua o lo outou faamoemoe aua le alofaiva o le Itumalo i lana Faiga Palota Laitiiti ua mavae atu nei. Ua tatou oo ai i se Faiga Palota filemu i lenei tausaga e pei ona alo i ai le Itumalo o Anoamaa.

Ou te fia faafetai atu foi i nai ou aiga, uo ma e masani, e le gata i Samoa nei a o atunuu mamao i a outou faamanuiaga na aumai i nusipepa ma telefoni, aemaise o tama ma tina na malaga atu i lo tatou aiga i Falefa e molimoli atu la outou faamanuiaga, aemaise le tapuaiga a o alofaiva le Itumalo o Anoamaa i lana Faiga Palota Laitiiti. Faafetai tele i lo outou faitama o lea ua iu manuia ai le faamoemoe o le Itumalo.

Ou te fia faafetai atu foi i lau Komiti na lagolagoina le faiga finagalo o lo matou nuu, ua filifilia ai au e fai ma sui tauva o le Itumalo i le Faiga Palota Laitiiti na mavae atu nei, faafetai atu i lau afioga i le Taitaifono ma le Failautusi, aemaise sui usufono mamalu o Itumalo i nuu taitasi o Anoamaa Sasae, aemaise lava lau faafetai faapitoa i lo matou nuu o Falefa, Aiga ma Aloalii ia laua Matua na tofi faasolo le aai o Fonoti, malo fai o le faiva, ua faafetai i lo outou faamoemoe lea ua tino mai ua tatou taunuu i lenei vaiata o le tausaga fou, ae ua avea lou tagata e fai ma sui ma auauna o le tatou Itumalo i lenei tausaga fou ma lenei Paeaiaga. Ia faamoemoe i le Atua, a maua se avanoa ia te au e le gata o se manatu i luma o lenei Palemene, ae ia aoga lou tagata e tautua ai le Itumalo ma le Atunuu.

Ou te faafetai atu i le Afioga ia Alaiasa Schwarts ona o ia sa i ai le tofi lenei – ma e talitonu le taofi sa e le alo lava i le ata i le niu a o tatou alofaiva i le Faiga Palota Laitiiti, sa e lagolagoina lou nei tagata i lenei tulaga, faafetai, ia faamanuia i lau galuega o lo o feagai ai. Ona o au e le o se taupou ao le faaigoa o lenei lauga “Lauga Faataupou”. O le igoa ipu a le tamaloa Atua “Lalago faatasi Malo e sue i le Filemu”. O lea ua atagia i le aso ina ua tuu faatasi nei alofi e lua ona ou faapea lea, “Lalago faatasi le Malo na sue i le Filemu”. O lenei ua atoa tupe o taulafoga, ua atoa le auvaa o le Sa o Samoa aua Upufai o lana Palemene.

Ua le o se lauga la ua afe tualaina ao le manatu ia toe faamanatu atu o lea ua i Sa le Tulafono Tau Faaofi o le Faatatauina o Tupe Faaopoopo (Nu. 1) 2011/2012, o le Tala o Tupe faasoasoa a le tatou Malo O lea lava o loo faamaumauina lona faaaogaina ma e foliga mai o loo misi ai lou Itumalo o Anoamaa Sasae, ona ua leai sou leo e faaalua ona ua tautuaupega lou taunuu mai i le Maota o Samoa.

Lau Afioga i le Palemene, Afioga i Minisita, ou te tautala atu ma le faaaloalo e ala i lau Afioga i le Fofoga Fetala ma le mamalu o le Palemene, o manaoga nei o lou Itumalo o le a ou taumafai e laulau atu, aua o le upu moni a faafofoga mai lava afioaga o lou Itumalo o le fiafiaga foi lea o lou sui usufono sei tautuana manaoga o lou Itumalo. O Manunu, o le faafitauli o loo feagai ma lenei alaalfaga o le vaiata o loo tafe tulata i le aai ae le gata i lea o loo lalata i le faleaoga tulagalua o lenei nuu. A oo ina malosi le tafe ua leai se tamaitiiti e toe sao i le aoga ma leai foi se tasi o le nuu e toe mafai ona femalagaai mai i Apia nei. O le molimau a alii ma faipule o le nuu ua tele soifua ua maumau ai i le tafe o lenei vai.

Faafetai mo le avanoa i lau Afioga i le Fofoga Fetala, ua ou toe tulai atu ai e faamaea le lauga a lenei Itumalo. Ona pau lava le faanoanoaga e i ai lava le manatu o le Itumalo a Lauga loa le Anoamaa e sa ona tapunia e se isi le Lauga a le Anoamaa, ae ui o lea e leai. Faafetai mo lenei avanoa ua toe taliu mai le paia o lau Afioga ma le mamalu o lenei Palemene, ao le faaauuina o le taumafai atu ua maea ona folasia le manaoga o le nuu lenei o Manunu, e talosaga atu ai ma le faaaloalo i lau Afioga i le Minisita o Punaoa

Faalenatura ma Siosiomaga e ui lava ina e le o paau mai ao lena e afio mai le Afioga i le Palemia ma le Sui Palemia o lo matou Itumalo foi lea, e tatalo atu ina ia taumafai se auala mo lenei alaafaga.

E pei lava ona talanoa atu ae tele lava o faafitauli o le vaiatae ae sopoia e nai tamaiti aoga ao le faleaoga e tulata i lea vaiatae, e tatalo atu ai ma le faaaloalo i se auala laupapa o lenei alaafaga. Ua faaletonu foi le tulaga o le auala ma e tatalo atu ai i lau Afioga i le Minisita o Galuega, Felauaiga ma Atiina Eeseese, sei tagai ane e amata atu lava i luga o Saoluafata e oo atu i le aai ua matua faaleagaina le auala ae lelei pea toe teuteu pea tusa ai ma lou finagalo.

Ona oo mai ai lea i Sauano ma Saletete, o nai nuu laiti nei o le Itumalo e manatu e toatele nisi o lenei Palemene ua silasila i pagatia o loo feagai ma nei alaafaga o le Itumalo e lumafale i le moana ae tuafale i papatu e leai se alofaga pea oo mai mala faalenatura. E tatalo atu i lau Afioga i le Minisita o Punaoa Faalenatura ma Siosiomaga sei alofa ifo ma toe faalelei le taligalu o loo i ai. Ua faaleagaina le tele o vaega o le ala tele ua tau le mafai e taavale ona feoi ona ua tele ina tafia e le malosi o le galu o le gataifale.

O Lalomauga, ua leva foi ona pagatia lenei nuu i le vaiatae tele o loo tafe i le ogatotonu o le aai poo lenei alaafaga. Ua aafia tua maota ma laoa ona o le tele ina tafia le eleele, e tatalo atu ai i lua Afioga i le Minisia o Punaoa Faalenatura ma Siosiomaga ina ia tagai ane i se talivai e taofiofi ai le eleele ua lalata ona maea le nuu ona tafia ona o le malosi o lenei vaiatae. O loo i ai foi le auala e sopoia ai lenei vaiatae na faia e le Navy a Niu Sila, ua tausaga ma ua le toe lava le malosi o lenei auala, ona pau lea o le auala e sopoia ai lea vaiatae i totonu o le aai o le nuu, ae talosaga atu ai i lau Afioga i le Minisita mo Galuega, Felauaiga ma Atiina Eeseese i se auala e sopoia ai e le gata o tagata aemaise o taavale afi e femalagaai i lenei alaafaga o le Itumalo. E faapena foi ona talosagaina se talivai mo le nuu lenei o Falevao, ona o le tulaga lava lea o le vaiatae leni e tasi o loo tafe mai i Lalomauga e malosi tele masalo ua silasila i ai le paia o lenei Palemene. E tatalo atu ai i lau Afioga i le Minisita ina ia tagai ane i se talivai o lenei alaafaga, afai e le mafai i leni tausaga ae talitonu e fa tausaga o loo totoe o le tatou Paeaiga ina ia silasila ane ai i lau faasoa ina ia faataunuu ai mafatiaga o lenei alaafaga ao le alaafaga foi o le Afioga i le Palemia o le tatou Malo, ia alofagia ma sei faaleleia lea vaega.

Faafetai mo le falemai o le Itumalo o loo i Lufilufi lea na umusaina ia Aokuso i le tausaga ua mavae, o le upu moni ua tele le suiga o le tatou falemai i Motootua ona ua tele ina faagasolo falemai i Itumalo. Ona pau lava le talosaga o lenei Itumalo ina ia tagai ane i maota o alii ma tamaitai Fomai, e manatu ua le o toe mamao ni tausaga ae i ai se finagalo o lau Afioga i le Minisita ina ia 24 itula o lenei auaunaga taua mo Itumalo o le Atunuu.

Ona ou oo mai ai lea i lou nuu o Falefa e le tagi alao leni nuu ae pau lava o lea sa matua lagona lava le le fiafia o leni nuu ina ua faasilasila atu i le televise, leitio ma nusipepa i le tausaga 2010 o le a amata le taligalu o lo matou nuu.

Ua uma foi ona foafoaina leni galuega e le konekarate sa tofia e le Malo ae peitai ua i ai nisi fuafuaga a le Kapeneta i lea vaiatae. E tatalo atu ai lau Afioga i le Minisita mo Punaoa Faalenatura ma Siosiomaga ina ia e tagai ane i le taligalu o lo matou nuu poo fea ua oo i ai. Atonu foi o le a fesoasoani mai le Afioga i le Minisita o Tupe aua o ia lea sa feagai ma leni vaega i ia foi Paeaiga ua mavae. E tatalo atu ai ma le agaga faaaloalo e manaia pea amata i leni tausaga fou le talosaga mo lo matou nuu o Falefa.

Ona pau nei o manaoga mo lou Itumalo ao lena ua taoto atu ia outou Afioga i Minisita o loo nafa ma ia matata o le Malo i talosaga tusitusia a lou nei tagata, ma le faamoemoe o le a outou faautagia mai le talosaga a lou Itumalo i ona vaega uma e pei ona tolaulau atu. Ia fesoasoani atu pea le Atua i o outou faiva alofilima aua se manuia o lo tatou atunuu o Samoa.

Lau Afioga i le Fofoga Fetalai ma le mamalu o le Maota, o le a faaiifoifo i fanua le vaa o le tamaloa o le Anoamaa Sasae, ma le manatu ia “Lalago faatasi le Malo na sue i le Filemu”, o le toe malelega lea ae lei taape papa ma gasolosolo ao, “Samoa ia toa le tai ma ia fifilemu”. O le taiala e le moe ma le mavae ma e le galo foi, ao se papatu lea e mausalī ia Samoa ma ona tagata i aso uma. O leni Maota Fono o se lama mua lea ma o se faataitaiga aua le mau lea ua i luma nei o le Laulau a Fono. Ua leai se Malo o le Lalolagi ua le o aafia lo latou tamaoiga ao se mai faalauaitetele i le lalolagi atoa aemaise o le tele o faafitauli e pei ona faafofoga i ai, ao le sini ma le fofo o leni faafitauli, ia tatou tau fai galulue faatasi ma fai le tiute o le Malo, fai le tiute o tagatanuu o Samoa. O le aufaigaluega a le Malo, au faifaatoaga, aufaifaiva ma le aufaipisinisi, alii ma faipule o alaafaga, tupulaga talavou ma tama fanau a Samoa i atunuu e mamao aemise foi o le

Aufai Lotu i totonu o Ekalesia o lo tatou atunuu, ia tatou opogi ma sii faatasi la tatou avega ona manuia lea o Samoa mo le aso a taeao.

Lau Afioga i le Palemia, faafetai tulai toa i le foe o le Sa o Samoa. O se Taitai e potu ma le alofa e afua mai i galuega faatino ma le faaloto nuu, inosia pe tauemua e le faafiti lava. Afai e malosi le luitau o ni manatu o le tele foi lea o le malamalama i se mataupu. O lou tiute faasui usufono o le lagolagoina o mataupu lelei ma manuia ai le Atunuu o Samoa. O le sao foi lea o le Itumalo aua ona Upufai o le Palemene o Samoa.

Lau Afioga i le Taitai o le Itu Agai le Tautua Samoa faapea lena Itu o le Maota faamalo le onosai, malo foi le sailimalo. O le upu moni, manatua Samoa ma ona Upufai. E ao ona tatou galulue faatasi aua se manuia o Samoa mo a taeao. O se lagona lea o lou sui usufono. E fou lou leo ae le fou le Nofoa o le Itumalo. E fou se manatu, fou foi le taupou nei ae le fou tiute tauave o le Itumalo.

Ia manuia tele lau Afioga i le Fofoga Fetalai, manuia le Afioga i le Palemia, manuia sui usufono mamalu o le Palemene, manuia le tapuaiga a Samoa ae ola le auuuna a le Itumalo o Anoomaa Sasae.

Ou te faasilasila atu i lau Afioga i le Fofoga Fetalai ma le mamalu o lenei Palemene ua pau le taupou a Anoomaa Sasae. Soifua.

17 IANUARI 2012

Afioga TUFUGA GAFOALEATA FAITUA (Vaisigano Nu.1): Faafetai i lau Afioga i le Fofoga Fetalai mo le avanoa. E fia faamauiina foi lalagofaatasi e pei o le Igoa Ipu a le Tui Atua le faapolo ma le faasao e pei ona e momoli i lo tatou Atua i lenei taeao.

Ao lei pau le lauga faataupou a Vaisigano Nu.1, ou te fia tautala i le Tulafono Tau Faaofi o le Faatatauina o Tupe Faaopoopo (Nu.1) 2011/2012 e pei ona i lumamea nei o le Maota. O le Tulafono Tau Faaofi o le Faatatauina o Tupe Faaopoopo (Nu.1) 2011/2012, e matua lagolagoina e le sui usufono mo Vaisigano Nu.1 ma le faanoanoa. E ala ona faanoanoa ona o le alofa i le Afioga i le Minisita o Tupe i le utiuti o le faasoa i le lē lava o le tamaoiga o le Atunuu e faatino manaoga o Itumalo taitasi. Ae tasi lava lau fesili lea i le Tulafono Tau Faaofi o le Faatatauina o Tupe Faaopoopo (Nu.1) 2011/2012 lau Afioga i le Fofoga Fetalai, o Matagaluega lea e i ai i totonu o le Tulafono Tau Faaofi o le Faatatauina o Tupe Faaopoopo (Nu.1) 2011/2012 o loo i ai uma lava seia vagana le Matagaluega o Faamasinoga ma Pulega tau Faamasinoga. Ou te iloa poo le leai o se manaoga pe ese se mea o ave i ai le latou faamuamua? Ae na o le pau lea o se fesili i le Tulafono Tau Faaofi o le Faatatauina o Tupe Faaopoopo (Nu.1) 2011/2012.

Ae ou te lei paia le pa i Fualaga pe ou te papai foi i le loto na i le itu tolu o Sagaga o Faleono Leatigaga ma Faleata ma le Gafa, e muamua ona ou sua le tuli, e mua foi ona ou faatulou atu Samoa i ou paia e le tutu ma ou mamalu e le avea.

O paia sautuafafafa o sasa na Samoa e amata mai le malama nai Sautu ma Manua e paia le tauafiafi o le la goto nai le Alataua Sisifo i Fili ma Puletuu na tauilo ai Malo.

Ou te faatulou atu foi aua le afifio o Tama ma latou Aiga, Aiga ma latou Tama, Aiga o Tupu, Aiga o Nofo, Aiga o Papa, Aiga na Tafai, o Aiga na Tafaitia, Tafaitoto, Tafai foi i fetalai. Le mamalu i le Usoga a Tumua ma Pule, Itua ma Alataua, le Too o le fua ma le Vaa tau o Nafanua.

Aemaise foi o tatou uso i le Motu i Sasae, le Faleagafulu ma le Motu sã. Le paia o Fofoga ma Aitulagi, Itua ma Alataua, Saole ma Saleaumua ma le Launiunasaeta. Aemaise le afifio o alii o Faatui, mamalu o le Faletolu, Tootoo o le Faleula ma le Manua tele. O le afifio lava o le Kovana Sili ma le Lutena Kovana, Peresetene o le Senate, le Fofoga Fetalai o Maota e lua.

Ou te faatulou foi i le Malae i Tiafau nei, o le Malae o le Faautugatagi a Samoa o loo tau ai Tafatolu o Upufai o le Malo Tutoatasi o Samoa. Tulouna le ee tapuai, O Lana Afioga Mamalu, O le Ao o le Malo lau Afioga i le Tui Atua Tupua Tamasese Efi ma lau Masiifo faapea foi le ee tapuai o le Afioga i le Sui o le Fono a Sui Tofia le Afioga i le Afioga i le Tuiaana lau Afioga Tuimalealiifano Vaaletoa Sualauvi II ma lau Masiifo, afio lau Afioga i le Faamasino Sili lau Afioga Patu Tiavaasue Sapolu, le paia o alii ma tamaitai Faamasino ma le mamalu o le Ofisa o Faamasinoga. Afio lau Afioga i le Palemia; lau Afioga i le Maopu taulagi; lau Tofa le Punefu; lau Susuga i le Alo o le Malietoa; lau Afioga i le Suafa poo lau Afioga foi i le Tama Tauaana o le Aiga faalagilagi. Ae tainane le afio o lau Afioga i le Sui Palemia ma le mamalu o alii ma tamaitai Minisita o le Kapeneta.

Ia liua le vai o Sina i lau Afioga i le Fofoga Fetalai, afio lau Afioga i le Taitai o le Itu Agai lau Afioga Hon Palusalua Faapo II e faigata e te afio mai i le Itumalo o le Aiga Malosi ua faapena ai foi ona malolosi ai sui usufono o lona Itu o le Maota ma ua faafouina ai foi le malosi o le Afioga i le sui usufono mo Falealupo o le Sui Taitai.

Ae tainane le galulue tautua o Ofisa Sili o Pulega o Matagaluega ma Faalapotopotoga uma a le Malo o loo faavailolo le latou tapuaiga i lenei taeao. Ae tefa ia le tauala i lou finagalo faasoa lelei i lau Afioga i le Fofoga Fetalai ae sei ou tapa tuli i le tatā i le tapuaiga a lou Itumalo Faaalalafaga o Vaisigano Nu.1 aua o faiva e tapuaia o faiva manuia ia.

Le afio o lou nuu i Vaisala, le afio o Tapaau, afio le Gafa ma le Aloalii, alalatai laua Taulauniu, lau tofa Gale ma lau fetalai Tuiasau. Le Aiga Sa Maupu ma le mamalu ma le paia ia te Oe le Safune. Le afio o si ou nuu o Auala, le afio o Tapu ma le Toalima le paia ma le mamalu ia te Oe Safune. Isi ou nuu pele o Asau, e faigata Oe o le Matua o le Itumalo, mai Asau seia oo atu i Falelima poo le amata atu i Matiamatiatua, Falefaea, Faletagaloa seia oo i Siosave. Tulouna ia le afio o Aiga Tupu, Aiga o Nofo, Aiga o Papa, Aiga na Tafaifa.

E faatulou foi i le afio o le Aiga Sa Lilomaiava, faigata o Oe o le Aiga na toala faautama e i ai le Tui Atua ma le Tui Aana. Tulou le afio o le Aiga o Mavaega o le Aiga na mavaeaiga le Tupu. Tulou le afio o le Aiga Sa Moeleoi o le Aiga na au lana inailau. O le Susuga lava lea o Tufuga ma le Aiga Sa Tufugā, tulou ou tootoo o le aava e faigata leaga o lau Susuga te faalele ma e tatalaina avei. Afio mai lau Afioga Masoe o le uso tuofe ma lo outou Aiga Sa Masoē. Tulou lau Afioga i le Matua e faigata o lau Afioga e te faafulu, e te faalanuma'aveave ma e auli mea lelei. Afio le falefa o lo outou Usoalii o alo o Tupu, le afio o Seiuli ma le Leilua, afio Maiavapalaoa ma le mamalu tele. Afio mai lo outou Maopu, lau Afioga Tupua Tamasese Taisi, le aumaga ma le Aiga Sa Tane-a-vae, mamalu mai Oe Salafai na Faiga, Oe Leituala-nalua, le Falefia o le Atiatipa o Salafai ma Siu-a-fanua ma ou fale e sefulu ma le lua, tulou le Fofoga o Fao, o le Tula o le Aiga Sa Tufugā, tulou foi le fofoga o le Mu'a o le Tula o le Aiga Masoē, o alo o Tupu a ua faafaleupolu talu le puipuga o Aiga ia. Tulouna ia Oe le Pule, o paia na ma mamalu o le Itumalo Faaalalafaga o Vaisigano Nu.1.

Ou te faafetai i la outou lagolago mai le auauna faatauvaa ma le le taualoa. O lenei ua ou nofoia le Nofoa o le Itumalo i le Maota, i le Maota i Tiafau nei ae ou tepa i le Maota o matagofie. Ou te napenape foi i pitopito ae ou vaai i Siufagā e pei o le vaaloa o Nafanua. Afai e taaseu tupu o le Atunuu ma maua lupe o le fuifui ona faailo lea o le soāseu ae tãpã tuvaga aliiseu i Tiasā aua o faiva e tapuaia. O le mavaega foi nai le Mulivai a Tofaeono ma Leasapai na faapea ifo ai Tofaeono, 'sau ia ina e alu, a lukaluka le matagi ona sala lea o le la-fala, ae tiu i le la-afa, ae a fisaga le matagi, ona sala lea o le la-afa ae tiu i le la-fala. Ua faapena sou lagona lou Itumalo e, faafetai mo lo outou faatuatuaia o au e ave le tofa ma le uta, e avea ai le auauna faatauvaa e fai ma outou sui e tatalaina avei o manaoga o le Itumalo, o faafitauli ma manaoga e fia faamalieina mo le soifua lelei o o tatou tagata. Faafetai i lo outou faaeaea, ou te talitonu sa tatou au ma le Atua i faiga filifiliga i le faiga palota ua tuanai atu. Faafetai foi i le afioga i le Aloalii i tausaga e tele sa ia tauaveina ai le tofi o le Itumalo i manatu ma galuega lelei sa faia mo le tatou Itumalo, ae tainane o le Atunuu.

Faafetai i le afioga ia Lealiifano ma le tofa ia Malolo Tui i lo oulua taaalo faatausala, faafetai i le malolo faatamalii ma le uta faafaleupolu. Faafetai le faaloalo ma le amanaiaina o faiga filifiliga a le tatou Itumalo.

Ou te fia faafetai foi i sui vaai o le Atua i totonu o le tatou Itumalo, i le ee tapuai o le aufaigaluega i fatafaitaulaga e fia i totonu o le Itumalo, e amata mai i le Susuga i le Alii Sea, o faafeagaiga taulagi o afioaga taitasi, malo le tatalo, faafetai le tapuai.

Lau Afioga i le Fofoga Fetalai, e fia avea foi lenei avanoa, tau lava ina ou sau i le va, e momoli atu ai le faafetai i le tapuaiga a si ou tina, ma le isi ou nuu ma le Itumalo i Upolu nei.

Lau Afioga i le Alaalatama lau Afioga Fuamatu, malo le onosai, malo le talimau, faafetai le anofale, faafetai foi le lima foai i lau afioga ma ou alo. Ia si ou nuu i le afio o Alaalatama ia Tuisugaletaua ma Luamanuvae, Pulemagafa o le Faiga le sa faialaga i le Tuamasaga, o i laua na talia le tanoa ma le nofo a ituaiga i le faleupolu. Malo faafetai le tapuai. I si ou nuu i Vailele e faigata ou te matai ai, ia, le Falefia o Alii le Gataiala, o laua Nofoa ma le nofo a ituaiga i le faleupolu, faafetai le tapuai.

Lou nuu foi i Laulii i le afio o le Sa'o Faapito ma ou Alo, le Matua ma le Aiga Paia ia Salevalasi, i ituala tau tupu e fia ma oe Tuisamau. Malo le tapuai.

E le faagaloina foi le tapuaiga a Vaimauga Sisifo i Aiga e lua ma le nofo a Too, aua e faigata le faaeaea i se tasi o le Afioga i le sui usufono ia Lefau, a o le Tootooau o Matiamatitaituau.

Ia lou Itumalo e Vaisigano Nu.1, ou te le folafola atu ni mea e fai mo le tatou Itumalo, nei ou le mafaia ni folafolaga ona avea lea ma lape o lo outou faatuatuaaina o le auauna, ae o le a ou finau malosi aua se manuia o le tatou Itumalo, ae manaomia la outou tatalo ma le tapuai faa-tama toeaina e pei ona faia e Feepeo a o alo le atalii o Leatiogie i ana faagatama. E faapena se lagona, e tapuai ma faamoemoe i le Atua ae sei finau le auauna e saili se ai mo le tatou Itumalo ma le tapuaiga mamalu. Ia tapuai maia ma le manuia.

Lau Afioga i le Fofoga Fetalai, ae ou te le i nofo i lalo, e fia faaaoga foi lenei avanoa e faaoo atu ai nisi o manaoga o le Itumalo. O le Itumalo lenei, o loo momoe ai ni aseta lelei lava a le Malo. E i ai le manatu a fafagu nei aseta, e ala mai ai se manuia o le Itumalo lenei ae tainane le Atunuu. O loo momoe ai le uafu faava o Malo ma le malae vaalele mo le feoai o tagata ma le felauaiga o uta. E mafai foi ona faaaoga mo le felauaiga o motu o le Pasefika nei i se taimi e mafai ai ona faatele ona faaaoga lea mo atunuu i fafo atu o le Pasefika. Sa matou faalogo ma tatalo, ai o le a maua ni galuega pe a oo ona faatu le fale ia sa fuafua atu, ae peitai, ua le taulau o le faamoemoe. O ni atinae faapena o loo manaomia e maua ai ni galuega a fanau lalovaoa o le Itumalo.

O lea ua i ai le tatou Matagaluega o le SROS, e mafai ona suesue poo a ni laau Samoa e mafai ai ona gaosia le pepa i totonu o si o tatou Atunuu, ae pe lava foi na laau e faaauau ai lena atinae, a leai, ou te tatalo atu e fai loa e le Malo se tatou lava fale ia ma le pepelo soo o tatou e nei tagata taufaavalea e omai soo mai fafo. Afai o lena, o loo tetele fanua o le Itumalo e mafai ai ona osi feagaiga e fai ai ni faletalimalo e faaaoga i ai nei aseta o loo momoe.

Lau Afioga, o nei aseta, ou te tauina o ni sleeping giants. A lelei ona fafagu, e mafai ona feala mai ai manuia sa lilo. Lau Afioga i le Fofoga Fetalai, ua faaoo atu foi se talosaga i le Afioga i le Tamaitai Tausala Minisita o Faamasinoga, e ui ina ua tatou le faatasi ai i lenei taeao, faamolemole, silasila ane pe le ua alagataua ona fai ni fale faamasino mo le Itu Asau.

E le toe tau faamatalaina atu le faigata o femalagaiga i le malaga mai Tuasivi ma Apia nei. E le gata i le Faamasinoga o Fanua ma Suafa, a o Faamasinoga Mauualalo Faaitumalo poo District Courts. O lenei Itumalo, a sauni i se faamasinoga, e maea loa talisuga o le afiafi, tapenapena loa le omai i Tuasivi poo Apia nei. A o le tele o nei faamasinoga, e tele ina tolopo, ae ua le taulia ai le alu o le taimi ma le tupe, o pasese ma tapuaiga. O nisi taimi, e afaina atu ai ma le Matagaluega i le tologiina o pasese o molimau e omai mai le mea mamao. Ae afai e fai se fale faamasino, e o atu lava alii ma tamaitai faamasino, e le toe tolopoina aua e fia faasaoina lo latou taimi ma tupe a le Matagaluega.

Lau Afioga i le Fofoga Fetalai, e faapena foi le talosaga ua tuuina atu i le Minisita o Aoga, Taaloga ma Aganuu, i le Kolisi o le Itu Asau, ua toatele tamaiti aoga a ua le lava potu aoga, faatasi ai ma le lē lava o faiaoga. O lena ua leva ona talosaga atu i lau Afioga i le Minisita o Aoga, faamolemole lau Afioga sei tagai ane i ai, ma le agaga faaaloalo, i ni potu aoga, o se malae taalo ia lava ma se fale e nonofo ai nai faiaoga mai Apia nei. E fai lava sina utiuti o faiaoga i Savaii, ae afai e fai ni fale e nonofo ai ni faiaoga, ia, e autovaa atu ai ni faiaoga i Upolu nei ma nisi faiaoga mai Savaii e fesoasoani i le Kolisi o le Itu Asau. E le na ma le laina, o le tasi lenei Itumalo na toatele sui i le au a le Atunuu pei ona i ai le taaloga o le lakapi i le Ipu o le Lalolagi na tuanai atu nei, ana i ai se malae ua atili foi ona toatele ni tagata, ni alo ma fanau a lenei itumalo e tautuaina le Atunuu i lea tulaga.

O le talosaga i lau Afioga i le Fofoga Fetalai e fia tuuina atu i le Minisita mo le Soifua Maloloina. Ou te le mailoa pe ua taunuu pe leai. Afai ua i ai se finagalo ma se manatu o le Malo e siitia le falemai lea i Sataua, e manaia le avatu e tuu faatasi uma fale o le Malo i le mea o i ai le falemeli, le Ofisa o Leoleo, Ofisa o le Tinei Mu, Ofisa o le Faatoaga o i ai nei. Ae a tefa le tauala ma fai se fale faamasino, ona avea uma ai lea, centralize uma ai fale o le Malo i le nofoaga e tasi, e tinei ai le feoai solo o le Itumalo, ae faapea foi Itumalo o lalata ane.

E i ai foi le talosaga ua avatu i le Afioga i le Minisita o Galuega, Felauaiga ma Atiina Ae Eseeese, e faapea foi le Minisita o Punaoa Faalenatura ma le Siosiomaga i le fia faaleleia o auala o loo faaaogaina i le taimi nei, o taligalu ma auala galue. O taligalu lau Afioga mo le Itumalo, ua matua manaomia vave mo le taimi nei. A silasila lau Afioga i le mea lea e i ai le uafu i Asau i le pito i tai, ua aia, ua matua aia lava. O auala tanu na fai e nai aiga i tai, ua leai se auala a ua liu matafaga. A faapea e tuu ai faapea, e iu ina afaina ai ma

le uafu, e le gata i le pito i tai, ae faasolo mai i le agai atu i le afioaga o Auala. I le faasolo atu i le vaitaele agai atu i luma o le Maota o le Sea seia oo atu i le Falemeli faasolo atu i Auala, a sua le tai, ua toetiiti lava tutusa le auala ma le sami, tulou, a o le pito i tai ua tele ina aia, ua leai se mea e savavali ai tagata. Faamolemole lau Afioga i le Minisita, sei tagai ane i se auala e faavave ai le foia o lea tulaga.

O auala galue lau Afioga e faapena, e manaomia vave le faaleleia i se taimi vave. O auala galue o le afioaga o Auala ua matua faaletonu lava, faamolemole, a fai le auala galue o Auala, e tatalo atu ia fai faatasi ai ma moli. O auala galue ia o Auala, masalo na amata loa le polokalame o auala galue i tausaga ua alu fai loa. I le taimi lenei, ua matua malepe lava. Faamolemole lau Afioga i le Minisita o Galuega, Felauaiga ma Atinae Eeseese, se i e tagai ane i ai.

Faafetai mo auala galue o le afioaga o Vaisala, ao le faalavelave e lei oo tele atu i nai aiga e nonofo i uta atu, faamolemole sei tagai ane i ai ma fai i ai se galuega lelei.

Faafetai mo auala galue i Asau, toe tasi lava le auala galue o loo totoe i Matia e lei faia lava i ai se galuega talu mai le vavau. O lenei taimi ua agai i uta le nuu ona o le fefefe i faalavelave faalenatura. O Matia e maualuga atu nai lo o auala galue i Ogaala ma Tuaimanu, e lelei lava le sau o le Tsunami a ua i ai fale i mea maualuluga e malu ai le nuu.

Lau Afioga i le Fofoga Fetalai, o lenei Itumalo o le matua fia matamata televise lava o nai tagata, ao le faalavelave o loo faaletonu pou o loo faga atu ai le televise ma ata i le itu Asau atoa. Ia manatua foi o le Anavatau, o mea e lelei i Apia nei e lelei foi i tua ma Savaii, ao le mea o loo i ai e lelei i tua ma Savaii ae oti le itu Asau, se faamolemole le Minisita mo Fesootaiga ma Faamatalaga Tekonolosi sei e tagai ane i ai i lea tulaga ina ia foia.

Ona oo mai ai lea i le Faalapotopotoga o le Malosi Faaletise. O lenei Itumalo e matua oa i le umi ona la, a ae se tofa ma se manatu e faaaoga e le Malo le la e faagaioi ai le eletise o le Itumalo lava lenei e matua agavaa ma alaga tataua ona faatu ai le atiina ae. A faapea foi e manatu le Malo e faaaoga le savili e gaosi ai le eletise e aoga foi le savili ma laueleele o le Itu Asau mo ia atiina ae. O le Vaisigano Nu. 1 ua mautinoa e oa i le tele ona laina, ae a finagalo le Malo e faaaoga le Solar mo lea gaosiga o le eletise ia o le Itumalo lenei e tataua ona faatu ai lenei atiina ae. E leai se faaleagaina o le siosiomaga pe a faaaoga foi nei mea faalenatura e gaosi ai le eletise i Samoa.

Ona faamuli lea ma le ai le tatalo a lenei Itumalo, o lenei tatalo ua leva ona tuuina mai ao nofoia le Nofoa o lenei Itumalo e le Afioga i le Aloalii, o ni tofi se lua. Ou te iloa ua manatu tele le Afioga i le Aloalii i le Matua o le Itumalo i le faatasina soo i nei mea o Faiga Palota, ou te iloa o le manatu foi lea o le Itumalo. Ou te iloa o le manatu foi lea o le Itumalo ina ia ese se Matua o le Itumalo, ese le tofi o le nuu o le Itumalo O le saunoaga foi a le Afioga i le Aloalii ina ua malolo i le Faamasinoga, na afio atu ma saunoa ai ou te faaauauina mai lenei talosaga i le Maota. Ou te manatu uatatau foi aua a fua i le lola palota a Asau e sili atu nai lo le lola palota a nisi Itumalo o loo i ai. O Asau e lua nuu o loo i ai ae fa pitonuu.

Ona faatai lea ma so matou leo i lau Afioga i le Fofoga Fetalai, ia faamanuia le Atua i lou tulai mai i le tofi o le Fofoga Fetalai, ia tumu lau utu ma foai e le Atua ni manatu, ia faaosofia moegaluga i le tofa ma le uta, ia fesoasoani le agaga o le Atua ina ia faatoafilemuina le Maota Fono o Samoa. Ia amata i le Atua ma faaiuina i le Atua, ia faamanuia e le Atua lau Afioga faapea le mamalu o le Ofisa o le Fono Aoao o le Malo Tutoatasi o Samoa.

Ia manuia le tapuaiga a lou Itumalo e le gata i le Itu Asau ao Vaisigano Nu.1. Ia manuia le tapuaiga paia a Samoa ma ia manuia le Palemene.

Soifua.

23 IUNI 2015

Susuga SEIULI UELIGITONE SEIULI (Sagaga le Usoga): Faafetai i lau Afioga i le Fofoga Fetalai. Masalo o lea sa nofonono lava lenei sui usufono fou i totonu o lenei Palemene ma mafaufau foi po o le a se taimi e oo mai ai foi i lou nei tagata se taimi e avatu ai sau lauga, ae faafetai mo le avanoa taua. Ou te mulimulitai lava i le upu foi lea a toeaia, “E fesili mulimai ia muamai. Faafetai o lea ua uma ona saunoa le tootoo na mavae atu nei, faatoa ono masina talu ona tulai mai, ia o le a sosoo ia ma au aua o lea toe ono masina ona uma foi lea o au.

lautinalaulelei, le Ala o Leului ma Salapo, ua faamalo le lagolago, faafetai le saili malo. Ia aua lava ne i ia i tatou le viiga, ae ia tuuina atu i le Alii le Atua, e ona Lona viiga. Ua malie pule i maga, ua malie le ua na to i le va, ua malie Sugalesele o lau pule lea ua tototetele, ua ou sapaia faatua eleele. O lau faaaloalo lea, ua ou tiu ai nei ma ou sapi ai i upufai o le Malo, se a ea le tagata faatauvaa ua e manatu ane ai?

Ou te fia faaogaina foi lenei avanoa taua e momoli atu ai le faafetai tele i sui tauva sa tausinio mo le tofi o le nofoa o le Palemene, lau tofa Logo Fetaomi, lau susuga Vaotuuu ma lau fetalai Fata Tulasunui Talalelei, faafetai i le Atua ua tau muliai galu tau galu fefatai, o lea ua lautasi le matagi ma lafo le malu, faafetai le tauva faatamalii ma le tausino faafaleupolu, ua se ata lautogi na laga tila, ae faapulou le tualima, ua faamalo le fai o le faiva, e iloa le tia e malie, e na ona fifimalie. Tatou faagalo fatia ua sola, tuli i luma so tatou ai, e le uma le fai aso o le Alii. E taaalo lava tama a o le uso, o Sagaga le Usoga e tasi, o outou o le uso ia te au, aua e sili le alofa o Keriso nai lo Lona ola.

Lau Afioga i le Fofoga Fetalai, e avea foi lenei avanoa taua ou te momoli atu ai le faafetai tele i le sui usufono o lenei itumalo sa tulai mai i lenei tofi mo tausaga e tele, le Afioga Muagututagata Peter Ah Him. E momoli lau faafetai tele i le Afioga sa tulai mai i le foe mo galuega uma na ia faia mo lenei itumalo, faafetai mo mea uma, afai foi o i ai ni galuega sa e talosagaina ai le Malo, ia aumaia lou faatuatuga i lou nei tagata o le a ou taumafai i ai.

Ia lou itumalo e, tapuai maia, e le faatoina faiva aua e talitonu le taofi, o le sui usufono aupito lea ona saasaa i le taimi e galue ai i lenei Paeaiga a le Palemene. O a ni toe o Sagone, ae o a foi ni galuega o fia faaleleia mo le manuia lautele o lo tatou itumalo, o le a ou taumafai i le mea e gata mai ai le mafai. Ae afai foi o le a le mafai ona faataunuuna ona o le puupuu o le taimi, aua ne i popona le toa i aai o finagalo, e aumai lava e le Atua le tamai mamoe e osi ai le taulaga.

Lou itumalo e, ou te le tatatuli pe ou te fafagu i lau pele, se i vagana ua ala lava ia, ua na o se tagi a le pumate i lou agaga loto mauualalo, lou itumalo e o Sagaga le Usoga, o fea o i ai le tofa ma le faataga, ua ta maooluma, ua see lou vaa, o mata o masiasi e tatalo atu ai nei ma valuvalusia aa o le fau, pe tefa le tauala i sou finagalo faatamalii, ae to mai lau pule e faaauau ai lota taimi i le Palemene i le Palota Tele, e le i iloa sota lelei i le fanae o le tai papau, aua ua api le uli, se i vagana le fanae a le tai galu, faatoa iloa lea o se galuega e mafai.

E ui i lea, e le fai loto le nuu o manu, e logo foemuli i le nofoa, aua ne i faia sou loto, ae o lou finagalo. Ia manuia lou alo atu i le faiga filifiliga o le Faiga Palota Tele o lo o fou mai.

Lau Afioga i le Fofoga Fetalai, lau Afioga i le Palemia ma le mamalu o le Palemene, faafetai i lau tapuaiga a o alofaiva lenei itumalo i le Faiga Palota Laitiiti, ou te tatalo ina ia faaauau ona outou toe tatalo mo au i le Palota Tele.

Lau Afioga i le Fofoga Fetalai, e le faaitiitia le agaga fia faafetai i le Afioga i le Palemia ma le Kapeneta mamalu, i lou valaauina e tautua le atunuu i le Minisita Lagolago o le Matagaluega o Fesootaiga ma Faamatalaga Tekonolosi Faaneionapo, aemaise foi o le tofiga e sui usufono o le Komiti mo le Ofisa o le Palemene, ma le Komiti o Faifoega tau Pulega a le Malo. E le i manatu lava Asomua o le a sii lona fale i luga o le mauga, ae faafetai alofa, e leai se manatu o le a maua lenei faaeaea ona ua toe 6 masina ona faamuta lea o lenei Paeaiga, ae faafetai tele i lau Afioga i le Palemia i le manatu mai i le paupau o lou titi, a o lea ua oo i Lepea. Faafetai i le amanaia, ua mata e fia vaai le vaa o Inu, faamalo le faaeaea mo si ou itumalo, o lau pule lea.

Lau Afioga i le Fofoga Fetalai, avea lenei avanoa i lau lauga mua, e fia faaleo atu ai nisi o galuega atinae o lo o fia faaleleia i totonu o lou itumalo. Lau Afioga i le Palemia ma le mamalu o le Kapeneta, e le seluselu atu, ina ne i o tatou fao le viiga o le Atua, a o lo outou paia, o le faamatua o le magalafu, o afi tutu e atiafi i ai sui usufono o le Maota i mataupu ua mafatia ai o latou itumalo, e ui ina moe i le ala le aumoega nai le Alataua ma ua foliga ua tautuapega le ulufale mai i le Maota, faapei o le taliu mai o Apaula ua liu mauga Vaea, ae e le mate le faamoemoe i le moe ai o Vaatausili i le Ana, atonu e moe, moe, moe, ala mai ua atoa lona tino e faataunuu ai nai moomooga faivavale ua tagisa atu ai le itumalo o Sagaga le Usoga.

Lau Afioga i le Fofoga Fetalai, e talosagaina le mamalu o le Malo i le auala lea o si ou nuu i Tuanai, o le auala lea o le auala ua uma ona fausia, o le auala lea mo le silafia e le mamalu o lenei Palemene, o le auala lea e alu i le malae vaalele ona alu atu lea tau atu i le auala o le alaafaga lea o Leauvaa, ia ona faaauau ai lea seia taunuu atu i le auala lea faalava i Aleisa, o le auala lea e le gata i le faaogaina e lou nuu o Tuanai,

a o lo o faaogaina foi e le mamalu o le atunuu e femalagaai mai Aleisa i le auala lea agai atu i le malae vaalele, o le auala ua uma ona fai, masalo ona ua faaleagaina foi e tafega, ia na o se toe faata lava, masalo pe na o se \$150 e alu ai. E faapea foi le auala lea i Afega, o le auala lea e tutusa lava ma le auala lea i Tuanai, o le auala lea e alu atu i le malae vaalele ia alu atu ona tau atu lea i le auala faalava lea i Aleisa, e le gata foi isi ou nuu i Afega, ia a o lo o femalagaai ai foi le mamalu ma le paia o le atunuu, o e o lo o fia malaga mai i Aleisa i le auala lea e alu i le malae vaalele, e faapena foi ia nisi o le mamalu o le atunuu o lo o fia malaga atu i le auala lea i uta foi. Ua leaga foi nisi mea o le auala lenei ona ua faaleagaina foi i tafega, ia ae toe lava ina faata le auala lenei, aemaise le faafofogaaga a lenei Palemene, o le auala lea o lo o i ai o lo o fausia ai le faleaoga fou lea o lou itumalo le kolisi le auala lea o lea o lo o fausia nei le faleaoga fou lea, ia o le auala foi lea e alu atu ona tau ai lea i le faleaoga lea o lou itumalo.

Pe o le a se finagalo o le Afioga i le Palemia ma le mamalu o le Kapeneta mo le faaleleiga o lea auala, aemaise foi o le auala lea i lou nuu o Afega le auala lea e taamilo atu i le pito i tai, le auala lea e taamilo atu i le isi itu i le mea lea i le auala laupapa lea i Afega toe alu ifo tau i tafatafa o le maketi, ua faaleagaina foi lenei auala ona o nisi o tafega ma timuga, pe mafai lava ona toe silasila i ai ma toe fia faata lenei auala, ailoga lava e tele se tupe pe na o se \$150,000 e toe faata ai faamolemole.

E faapea foi i le auala o si ou nuu i Malie, le auala lea o Vailoa ma Vaifoa, e le mamao tele lava auala ia e lua e mafai ona o atu ona fesootai lea o auala ia, e le iloa pe na o se tai kilomita ma le afa o auala nei, e moomia lava le toe faaleleia aua nisi o nuu foi o lo o nonofo ai foi ma aumau ai i auala ia i Malie.

Lau Afioga i le Fofoga Fetalai, o se ai ma se oso lelei lea o lenei sui usufono fou pe a talia le manaoga o Sagaga le Usoga. Ma e le taumateina faameataitai i le ato le faapea mai o le itumalo, "Seiuli, faafetai mo tatou auala, o ou mama na ae le palotaina le tatou tofi i le 2016."

Lau Afioga i le Fofoga Fetalai ma le mamalu o le Palemene, ua lava lea lauga, ae atonu e toe maua nisi manatu i se taimi o i luma. A o se manatu i le Tala Faatatau o le Tupe ua i luma o le Laulau a Fono, e avatu le faafetai i lau Afioga i le Minisita o Tupe po o le Afioga i le Palemia, faafetai mo le galuega fita e le faigofie, aua e fai foi o le silasila i le lauamanu, ae ao foi ona mataitu le faamuli o atu. E tautalaaso le sao tamaitai o le Vaaimalae, tau ma lau Afioga i le tau faasoasoina o le tamaoiga o le atunuu. Aua ne i faoa i le ta lou finagalo i se talosaga soonafai a ia taofi i iumaea. Faamalo i le Ofisa Sili o Pulega ma le Matagaluega o Tupe, malo le galulue, ma e matua lagolagoina e lenei itumalo le Tala Faatatau o Tupe ua soalaupule nei i luma o le Maota.

Lau Afioga i le Fofoga Fetalai, o le a seu i fanua le sa o lenei itumalo, e ui ina naunau i le avanoa faaauro ua tuuina mai mo lenei sui usufono, ae manao i le ufi ae fefe i le papa, o si ota lima foi e toe paia ai si ota mata. Ia lagi e mama ma ia faafualoa e le Atua le soifua o Lana Afioga Mamalu, O Le Ao o le Malo ma lana Masiofo, ni ao gasolosolo aua le tapuaiga i le Sui o le Fono a Sui Tofia ma le Masiofo, lagimama lau Afioga i le Fofoga Fetalai i le Maota. Ia faamanuia le Palemia ma le Sui Palemia ma le aiga Kapeneta, ae faapea foi le Taitai ma le Sui Taitai o Itu Agai ma sui usufono uma lava o le Palemene.

Ia manuia le tapuaiga a si ou itumalo o Sagaga le Usoga aemaise o lau faafofoga Samoa, ae ou ola i le alofa ma le agalelei o le Atua. Faafetai.